

10264

1, 1/2

2007

2025
1(3)
2-20
u

100
107-85

1655-44

Վ Ա Ր Ք

ՆԱԽՆԻՒՄԱՏԱՄԻՐԱՅ Հ Ա Մ Ա Ռ Օ Տ Ե Ա Լ

Ի հ. ՅԱԿՈՒՐՍԻ ՎԱՐԴԱՊԵՏԻ
ՃԻԼԱԼԵԱՆ

Ի ՄԻՒԹԱՐԵԱՆ ՄԻԱԲԱՆԻՑ

Արդեամբք և ծախիւք
Պարոն Աղեքսանդրի Ռաֆայելի
Հարամեան

1004
1887



Ի ՎԵՆԵՏԻԿ

Ի ՏՊԱՐԱՆԻ ՍՐԲՈՅՆ ՂԱԶԱՐՈՒ
1826. Ի 1 ԱՊՐԻԼԻ

1φ

100-501
100

2632
1001



2632
1001


ԱՌ ԸՆԹԵՐՅՈՂՍ

Վատութիւն կենաց և վարուց ահա, նաւոր արանց յիրաւի ամենեցուն ցանկալի վասն չքնաղ գեղոյ հանճարոյն որ 'ի նոսա երևեալ յիւրաքանչիւր կարգի: Եւ վասն զի ըստ ամբառնալ 'ի ըզգալեաց և յիմանալիսն հպել առաւել է ազնուականութիւն հանճարոյ, ապա ազնուագոյն ևս յիմաստասէրսն է հանճար. և վարուց նոցա և ուսմանցն տեղեկութիւն յաւէտ ևս զուարճալի և շահաւէտ մտաց: Նմին իրի զվեհան յիմաստասիրաց խորհեցաք 'ի տեսիլ ածեւ 'ի գիրս յայս 'ի զբօսանս ուսումնասէր մերոյին համբակաց, առաջնորդ կալեալ զմեծին Ֆենեւոնի գաղղիացւոյ զհամառօտութիւն վարուց իմաստասիրաց:

Այլ փափաքեմք զի զուարճաբար և յուղղութիւն կենաց խրախուսեսցէ սա զընթերցողսն՝ արտաքնոցն զգաստութեամբ: Զի յորժամ զայնպիսի ուղղագործութիւնսն նոցա տեսանի-

ցեն, զոր հասարակաց և եթ մտօք ուղ-
 ղեցին, առ որ և 'ի ճահ իցէ արդեօք
 զԱռաքելոյն առնուլ, թէ որ զօրէնսն
 ոչ ունէին հեթանոսք՝ բնութեամբ զօ-
 րինացն գործեցին, ամաչեսցեն թերև
 ոչք յետ շնորհացն 'ի նոցա առաքինու-
 թենէն յետնեալ գտանիցին: Իսկ զան-
 ուզալսն նոցա գործս ընդ ուղիղսն
 պատմագրել, այն վասն ամբողջու-
 թեան նկարագրին է. ուշիմ ընթերցո-
 ղին թողեալ մեղուաբար 'ի գիրսս մատ-
 չել, որք ոչ յանուշից միայն 'ի ծաղ-
 կանց, այլ և 'ի դառինց զքաղցրութիւն
 ծծեն զմեղու. սապէս և նորա շահ ան-
 ձին առեալ 'ի սխտանեացն, և 'ի թիւ-
 րոցն իրատ զգուշութեան, ընդ նմին
 և զՔսի շնորհացն զօրութիւն ծանիցէ,
 որ միայն կատարէ իմաստունս և առա-
 քինիս, և առանց այնորիկ հարկ էր այ-
 լոցն թերի լինել:

Արդ եթէ ինչ 'ի նկատելոց աստի օ-
 գուտ գործեսցի, և մեք չհամարիցիմք
 սնավաստակ եղեալ:





*Is f. ung. hugglin
spunfuelety quiple. r.*

Հ Ա Մ Ա Ռ Օ Տ

Վ Ա Ր Ք

Ի Մ Ա Ս Տ Ա Մ Ի Ր Ա Յ

Թ Ա Ղ Է Ս

Ճնաւ յառաջնում ամի երեսներորդ
հինգերորդ ողիմպիադին. մեռաւ 'ի յի,
սուեն և ութ ողիմպիադին՝ 'ի հասակի
իննսուեն և երկուց ամաց :

Թ Ա Ղ Է Ս միլէտացի կամ միլէսա-
ցի հայրենեօք 'ի Փիւնիկեայ, սերեալ 'ի
Կադմոսէ յորդւոյն Ադենորայ: Չայ-
բացումն ծնողաց նորա ընդդէմ բըռ-
նաւորացն՝ որք հարստահարէին զարս-
բարեկիրս, բռնադատեաց զնոսա լքա-
նել զհայրենիս իւրեանց : Գնացեալ
բնակեցին 'ի Միլէտոն քաղաք Յոնիայ-
ուր ծնաւ Թաղէս յառաջնում ամի
երեսներորդ հինգերորդ ողիմպիադին .
այն է՝ իբր 640 ամօք նախ քան զՔս :
Սոյն սա եղև առաջին 'ի ստանալ ըզ-

պանծալի անունն իմաստնոյ . և եղև հեղինակ փիլիսոփայութեանն, որ ընկալաւ զյորջորջումն յոնիական՝ յանուանէ հայրենեաց իւրոց :

Պարապեցաւ զժամանակ ինչ յատենական գործառնութիւնս . և յետքաջանունն ՚ի գլուխ հանելոյ զերևելի երևելի աւագութիւնս, ցանկացեալ խելամտել գաղտնեաց բնութեան, եթող զկնճիւն գործոց հասարակաց : Գնաց Նգիպտոս՝ ուր յայնմ ժամանակի ծաղկէին գիտութիւնք . անդ ընդ ամս բազումս եկաց ընդ քուրմս՝ որք էին վարդապետք աշխարհին . մարզեցաւ ՚ի գաղտնիս դենի նոցա, և յաւետ իմն փութով հետամուտ եղև երկրաչափութեան և աստղաբաշխութեան : Ոչ եկաց երբէք առ ոտս վարժապետի ուրուք, և բաց ՚ի կենցաղակցութենէն ընդ քրմաց Նգիպտոսի ՚ի ճանապարհորդութեան անդ, ստացաւ և փորձով և խորին զննութեամբ օգտակար ծանօթութիւնս՝ որովք ճշխացոյց զփիլիսոփայութիւնն : Ա իճակեալ էր թաղէս վսեմական հոգւոյ . սակաւս խօսէր, և բազումս խորհրդածէր . առ ոչինչ համարէր զանձին օգուտ, և նախանձախնդիր էր հասարակապետութեան :

Յորենաղ ՚ի խօսելն յաղաղս այնո

ցիկ՝ որք համարէին թէ վրէժխնդրու-
 թիւնն իցէ բարի ինչ առաւել ցան-
 կալի քան զկեանս զլխովին . այդ խոր-
 հուրդք, ասէ, հեռի է յոյժ ՚ի խորհր-
 դոց անտի Խրիստիպպոսի և ՚ի քաղց-
 րութենէն թաղեսի .

Թէ քէն վրիժուն իցէ բարի՝ և քան
 ըզկեանս քաղցրատենչիկ,

Ոչ Խրիստիպպոս ըզդոյն ասաց, ոչ
 թաղեսի ոգին հեզիկ :

Իբրև դարձաւ թաղէս ՚ի Միլետոն,
 եկաց յառանձնութեան, պարապեալ
 ՚ի զննութիւն ընթացից երկնից : Առ-
 սէր իմաստութեան ընտրեաց զհան-
 դարտութիւն անամուսին կենաց՝ քան
 զհոգս որք կցորդ են ամուսնութեան :
 Եւ մինչ էր ՚ի հասակի քսան և երից
 ամաց, մայր նորա Աղէօբօլինա՝ յոր-
 դորեաց զնա ընտրել զչահաւէտ իմն վի-
 ճակ ամուսնութեան, որ առ ձեռն կայր
 նմա : Ասէ թաղէս, մինչդեռ մանուկ
 է որ, չե է նմա ժամ ամուսնանալոյ .
 մինչ ծեր է, անադան է ժամանակն .
 և մարդ հասակաչափ՝ չունի ժամանակ
 բաւական ՚ի խորհիլ զընտրութենէ
 հարսին : Ասեն ոմանք թէ մօտ ՚ի կա-
 տարած կենաց իւրոց առ ՚ի կնութիւն
 զեզիպտուհի ոմն, որ յօրինեաց զբա-
 ղում գրաւոր գործս ընտրականս :

Յաւուր միում յանցանել ոմանց

օտարականաց միլետացւոց ընդ Կոթ
 կղզի, սակ արկին ընդ ձկնորսաց գնել
 'ի նոցանէ զոր ինչ և որսացեն յառա
 ջին ուռկանի անդ : Եւ ահա ձգեցին
 եռոտանի մի ձոյլ ոսկի. զոր՝ որպէս
 աւանդի՝ ընկէց 'ի տեղի անդր Հեղինէ՝
 մինչ դարձ առնէր 'ի Տրոյիոյ, բառ
 խրատու ուրումն պատգամախօսի : Ծա
 գեաց զառաջինն անդ տարաձայնու
 թիւն մեծ 'ի մէջ ձկնորսացն և օտա
 րականաց յաղազս այսր եռոտանույ .
 մինչև 'ի վէճ գրգռեցան և քաղաքք, և
 իւրաքանչիւր թեկն ածէին իւրեան
 ցայոցն : Եւ մինչ մերձ էր գրգռել պա
 տերազմ, միաբանեցան յերկուց կող
 մանց՝ մնալ վճռոյ պատգամախօսին :
 Առաքեցաւ որ 'ի Դեղփոս հարցանել
 ցՊիւթիա. որում ետ պատասխանի,
 զայս ոսկեղէն եռոտանի արժանէ է շը
 նորհել առն իմաստնագունի : Վասն
 որոյ առաքեցաւ նախ առ Թաղէս, որ
 յղեաց զայն առ Բիաս : Սա առ չա
 փաւորութեանն յղեաց վերստին առ
 այլ ոմն, և նա առ այլ միւս, որ և նա
 առաքեաց առ Սողոն : Ասէ Սողոն,
 չեք որ ճշմարիտ իմաստուն, բայց միայն
 Աժ. և վասն այսորիկ ետտանել զեռ
 ոտանին 'ի Դեղփոս, և նուիրեաց
 Ապողոնի :

Յաւուր միում ոմանք յերիտասար

դասց Միլենտոնի յերեսս իօկ նախարտէինն զԹաղէս, թէ դիտուածիւն քո յոյժ անարգասաւոր է, վասն զի ՚ի կարօտութեան մնացեալ ես: Ամեցաւ Թաղէս յայտ առնել նոցա, զի թէ իմաստունք ոչ հաւաքեն բազում ինչս, այն է լոկ սակս արհամարհելոյ նոցա զհարստութիւնս. և թէ դիւրին է նոցա շահել՝ զորս յօչինչ համարին:

Անուխ զդացեալ որպէս ասի, աստղաբաշխական դիտողութեամբք զարգասաւորութիւն տարւոյն, փութացաւ զնեաց յառաջ քան զկուծս՝ զամենայն ձիթապտուղս ձիթաստանեաց որք էին շուրջ զՄիլենտոնիւ. և եղեն կուծքն ամենառատ: Ամբարեաց անտի Թաղէս արդիւնս յօլով. այլ զի չէր շահախնդիր, ժողովեաց զամենայն ըզ վաճառականս Միլենտոնի, և յիւրոց շահուց բաշխեաց նոցա:

Սովորութիւն էր Թաղեսի շնորհս մատուցանել աստուածոց, նախ՝ զի ծնաւ բանական և ոչ անբան. երկրորդ՝ այր և ոչ կին. երրորդ՝ Յոյն և ոչ Բարբարոս:

Սոյն սա համարէր զաշխարհիս յօրինուած զոր տեսանեմք՝ յանսկիզբն և յանվախճան իմն հանճարոյկազմեալ այսպէս:

Սա եղև առաջին 'ի Յոյնս , որ ուսոյց զանմահութիւնն հոգւոյ :

Յաւուր միում այր ոմն եհարց , թէ կարօղ եմք ծածկել զգործս մեր յաստուածոց : Ետ պատասխանի . նաև ներքին խորհուրդք մեր յայտնի են նոցա :

Ասէր հինաւուրց է անձ , վասն զի է անսկիզբն . և թէ յիրս աշխարհի առաւել մեծագոյնն է տեղին , վասն զի բովանդակէ զամենայն էակս : Գեղեցիկ է աշխարհս յոյժ , զի անգործած է : Հզօրագոյն է հարկն , զի նա յաջողէ հնարս յամենայնի : Շարժնագոյն է հոգին , որ 'ի վայրկեան պահու յածի ընդ ամենայն տիեզերս : Իմաստուն քան զամենայն է ժամանակն , զի յայտնէ զմիտին իրս . իսկ քաղցր քան զամենայն և յոյժ հաճոյական է՝ կատարել զյօժարութիւնն կամացն :

Յաճախակի ասէր . խօսելն բազումս՝ չէ նշան հանճարոյ : Օրէն է հաւատալ բարեկամաց և յանհաւատալիսն իսկ . այլ թշնամեաց՝ թէպէտ և զհաւատալիսն պատմեցեն , չէ պարտ հաւատս ընծայել : Չբարեկամ՝ եթէ մերձակայ և եթէ բացակայ , միօրինակ յիշեցես : Մի ելցէ ինչ բան 'ի բերանոյդ , որ զքեզ կասկածելի արացէ յաչս մտերիմ սիրելւոյդ : Յորժամ իրաւամբք յանդիմանես՝ օգտակար թըշ-

նամի լինիս. բայց թէ ստուծեամբ դու
 վես, յայնժամ բարեկամ վնասակար
 գտանիս: Առ քոյինսդ լեր բարեհամ
 բոյր: Եթէ իշխան ես, անձամբ զանձն
 քո ուղղեա՛: Խօսելի են հաւանա
 կանքն, այլ լռելի անհաւատալիքն:
 Ձոր հանդերձեալ ես առնել, զգոյշ
 լեր ասել: Դժուարին է՝ այլ բարի
 ճանաչել զանձն. զի այս է ըստ բնու
 թեան օրինի քաղաքավարիլ: Առ ծնողս
 լեր ողոք և ամոք բարուք: Որպէս վա
 ըիս դու առ ծնողսդ, զգոյն ամենայնիւ
 ակնկալ ջիր ընդունել յորդուոց քոց՝
 յորժամ ծերացիս: Յամենայնի վնա
 սակար է անբարեխառնութիւնն. պա
 հեա՛ զեղանակ: Մի լինիր դատարկ
 անձն, թէ և լի իցես մեծութեամբ:
 Պարտ է դարման տանել ծնողացն,
 առ ՚ի լինել արժանի դարման գտանել
 լոյ յորդուոցն: Չիք ինչ անհաճոյ քան
 տեսանել զբռնաւոր ծերացեալ: Որ
 միսիթարէ զմեզ ՚ի վիշտս մեր՝ այն է,
 տեսանել զտանջողս մեր թշուառա
 ցեալս իբրև զմեզ: Չէ պարտ գործել
 զայն, զորս յայլս պախարակեմք: Ճշ
 մարիտ երջանկութիւնն սահմանի ՚ի
 վայելս կատարեալ առողջութեան.
 ունել զչափաւոր նպաստս, և ոչ ան
 ցուցանել զաւուրս իւր ՚ի մեղկու
 թեան և ՚ի տղիտութեան:

Հարցին ցնա, զինչ է՝ որ առաւել
քաղցր է՝ ՚ի ստանալ. ասէ, այն է՝ ու
րում՝ ցանկայ մարդ: Հարցին ևս.
զիարդ կարէ մարդ արդարապէս կեալ.
ասէ՝ թէ առնէ զայն, զոր հրամայէ
այլոց: Նա է երջանիկ յայսմ աշխարհ
հի, որ առողջ է մարմնով և լի հոգւով,
և ՚ի բնէ յաջողակ ՚ի վերանորոգել:
Մի դիմօք, այլ մտօք ջանա լինել մա-
քուր և գեղեցիկ: Ծածկեա՛ զառտնին
չարիս: Մի ամենայնի հաւատար: ՚ի
կամիլդ գործել զչար, յանձնէ երկիր ա-
ռանց վկայի: Մի լինիր հարուստ տար-
օրինակ՝ ՚ի հարստացուցանել զորդիս:

Թուէր Թաղեսի՝ թէ չիք ինչ այն-
պէս դժուարին, որպէս ճանաչել զանձն
իւր: Եւ վասն այսորիկ հանձարեաց
զայն գեղեցիկ առած, որ յետոյ փո-
րագրեցաւ ՚ի վերայ ոսկեղէն տախտա-
կի, և ընծայեցաւ ՚ի տաճարին Ապո-
ղոնի. Ծանի՛ր զսէպ:

Ոչինչ խտիր զնէր ընդ կեանս և ընդ
մահ. և յասել ոմանց ցնա, թէ ըն-
դէր ոչ սպանանեսս զքեզ. ետ պատաս-
խանի, վասն զի կեանք և մահ համա-
հանդէտ գոլով, ոչ մի ինչ ստիպէ զիս
ընտրել զմին քան զմիւսն:

Չբօսանէր երբեմն երբեմն յօրինել
զոտանաւորս: Սմա ընծայեն զգիւտ
վեցոտնեան ոտանաւորաց:

Այր ոմն ամբաստանեալ իրաւամբք
 յաղագս շնութեան, եկն յաւուր մի-
 ում հարցանել նմա, եթէ օրէնս իցէ
 արդարացուցանել զանձն երդմամբ :
 Պատասխանի ետ թաղէս այպն առ-
 նելով զնովաւ. միթէ ստերդմնութիւնն
 իցէ յանցումն թեթեազոյն՝ քան ըզ-
 շնութիւն :

Մանտրեթէս պրիենեցի՝ որ էր ա-
 շակերտ իւր, եկն 'ի Միլետոն յայց
 նմա. և ասէ ցթաղէս, զինչ տրիտուր
 կառիս՝ զի տաց քեզ ո՛վ թաղէս, 'ի ցու-
 ցանել քեզ զիմ երախտապարտու-
 թիւն յաղագս ամենայն պիտանի օւս-
 մանց առանդելոց 'ի քէն առ իս : Ասէ
 թաղէս. եթէ դիպեցի քեզ մարդել
 զայլս, տո՛ւր իմանալ նոցա թէ ես եմ
 վարժապետ այդր վարդապետութեան :
 Այս լիցի քեզ չափաւորութիւն գովե-
 լի, և ինձ տրիտուր մեծագին :

Թաղէս եղև առաջին 'ի Յոյնս՝ որ
 պարապեցաւ 'ի բնախօսութիւն և
 յաստղաբաշխութիւն : Համարէր թէ
 ջուրն է առաջին սկիզբն ամենայն ի-
 րաց. թէ ոչ այլ ինչ է հող, այլ ջուր
 խտացեալ. օրէն՝ ջուր անօսրացեալ. թէ
 ամենայն իրք անդուլ փոփոխին 'ի մի
 մեանս, բայց 'ի վերջին վերլուծու-
 թեանն ամենայն ինչ 'ի ջուր լուծա-
 նի. և թէ տիեզերս է հոգևորեալ և

լցեալ աներևոյթ էակօք, որք յար ՚ի
 շարժման են: Երկիրս է ՚ի միջոց տիե-
 ղերաց, և շարժի շուրջ զԵրով կենդրո-
 նաւ. զորև ասէր լինել կենդրոն տիե-
 ղերաց: Դնէր՝ թէ ջուրք ծովուն յորոց
 վերայ հաստատեալ է երկիր, դրդուե-
 ցուցանեն զնա, և այն է պատճառ
 շարժման իւրոյ:

Չարմանալի գործք մազնիտի և սա-
 թի, և համակրութիւնն ՚ի նոյնաբուն
 իրս, կարծիս ընդ միտ արկին նորա՝
 թէ ամենայն ինչ հողևորեալ է:

Համարէր՝ թէ պատճառ յորդու-
 թեան զետոյն Նեղոսի են կանոնաւո-
 րեալ հողմք, որք ՚ի շնչելն ՚ի հիւսիսոյ
 ՚ի հարաւ յամեցուցանեն զջուրս զե-
 տոյն, որ հոսէ ՚ի հարաւոյ դէպ ՚ի հիւ-
 սիս. և բուռն առնեն զեղուլ յանդաս-
 տանս:

Սոյն սա եղև առաջին՝ նախագտող
 խաւարման արեգական և լուսնի.
 և զննեաց զբաղմօրինակ շարժմունս
 երկուց լուսաւորացս: Համարէր թէ
 արեգակն է մարմին ինքնալոյս, որոյ
 մեծութիւնն իցէ հարիւր և քսանիցս
 աւելի քան զլուսնոյ: Եւ թէ լուսինն
 է մարմին անթափանց՝ որ ցոլացուցա-
 նէ զլոյս արեգական, միայն կիսով մա-
 սամբ մակերևութի իւրոյ. և ըստ այսմ
 կարծեաց մեկնէր զգանազան կերպա-

րանսն , ընդ որովք լուսինն երևի մեզ :

Սա հետադուրեաց նախ՝ զսկզբունս հողմոց , զնիւթս կայծականց , զպատճառ փայլատակմանց և որոտմանց :

Ոչ ոք յառաջ քան զսա գիտաց զերանակ չափելոյ զբարձրութիւն աշտարակաց և բրդանց միջօրեայ ստուերաւ իւրեանց , մինչ արեգակն իցէ ՚ի զուգօրութեան :

Հաստատեաց զտարին յաւուրս երեքհարիւր վաթսուն և հինգ : Սահմանեաց զկարգ եղանակաց տարւոյ . և բաշխեաց զիւրաքանչիւր ամիս յերեսուն օր . յետ երկուտասան ամսոց՝ յաւելոյր և զհինգ աւուրս ՚ի ընուլ զընթացս տարւոյն : Չայս կարգ էառ յեղիպտացւոց :

Սա ետ ճանաչել զԱրջն փոքր , որով փիւնիկեցիք վարէին յիւրեանց նաւազնացութեանն :

Յաւուր միում ելեալ սորա ՚ի բնակութենէ իւրմէ ՚ի զննել զաստեղս , անկաւ յանզգոյշս ՚ի խորխորատ մի : Աին մի պառաւ աղախին տան իւրոյ՝ առժամայն ընթացաւ առ նա , և հանեալ զնա անտի , ասէ ընդ կատակս . զիարդ , ո՛վ թաղէս՝ կամիս դիտել զայն որ ՚ի բարձունս է . և ո՛չ տեսանես և զորս առ ոտս կան :

Յամենայնի մեծարդի համարեալ էր
 Թաղէս, և խորհուրդ հարցանէին նմա
 'ի ծանր ծանր գործառնութիւնս :
 Արեսոս ձեռնարկեալ 'ի պատերազմ
 ընդդէմ Պարսից, յառաջ խաղայր
 հօր բանակաւ մինչև յեղը Ալիս գե-
 տոյ . բայց դժուարին եղև նմա անցա-
 նել ընդ այն : Ոչ կային նմա ոչ կա-
 մուրջք, և ոչ նաւակք . և գետն խկ
 շէր ծանծաղ : Թաղէս 'ի նմին ժամու-
 ընդառաջ դիպաւ նմա յարտորէս իւր,
 վստահացոյց զնա գտանել հնարս ան-
 ցուցանելոյ զգօրս նորա ընդ այն գետ
 առանց կամրջի և նաւակի : Անդէն
 վաղվաղակի ետ հատանել խրամ խոր
 'ի ձև կիսալուսնոյ, որ սկսանէր 'ի միոյ
 ծայրէ անդաստանին և յանկէր 'ի
 միւսն : Սովին հնարիւք գետն բաժա-
 նեցաւ յերկուս առաջս, երկաքանչիւրն
 ծանծաղ . և ամենայն բանակն էանց
 առանց ինչ դժուարութեան : Ոչ թո-
 դացոյց Թաղէս թէ յայամ 'ի սոյն
 ձեռնարկ միլետացիք դաշնաւորեսցին
 ընդ Արեսոսի, որում նա 'ի խնդիր էր
 ժտելով : Այս հանձարեղ խորհուրդ
 նորա եղև պատճառ պահպանութեան
 հայրենեաց իւրոց . վասն զի Աիւրոս՝
 յաղթականն լիւղացւոց, յաւարի
 էառ զամենայն քաղաքս՝ օրք մտեալ
 էին 'ի դաշնաւորութիւն ընդ լիւղա-

ցիս, և խնայեաց 'ի միլետացիս, որք
ոչ զինեցան ընդդէմ նմա :

Մինչդեռ 'ի յետին ծերութիւնն հա-
սեալ էր Թաղէս, յաւուր միում տա-
րան զնա 'ի հովանոց մի՝ կալ անդ 'ի
զնին արդնրնկէց խաղուց 'ի Թէատրո-
նի : Սաստիկ ջերմութիւնն ներգոր-
ծեաց 'ի նմա բռնն այլայլութիւն,
մինչև մեռաւ յանկարծակի 'ի տեղւոջ
անդ՝ ուստի հայէր 'ի մրցմունսն : Այս
եղև 'ի 58 ողիմպիադի, և 'ի 92 ամի
կենաց իւրոց : Մեծաշուք կատարեցին
միլետիացիք զհանդէս յուղարկաւո-
րութեան նորա :

21881
1881



Ս Ո Ղ Ո Ն

Ճնաւ յերրորդ ամի երեսներորդ հինգերորդ ողիմպիադին . կարգեցաւ իշխան յԱթէնս յերրորդ ամի քառասներորդ հինգերորդ ողիմպիադին . մեռաւ 'ի սկզբան յիսներորդ հինգերորդ ողիմպիադին , 'ի հասակի 78 ամաց :

ՍՈՂՈՆ հայրենեօք աթենացի , ծնաւ 'ի Սաղամինա 'ի 35 ողիմպիադին : Հայր նորա Էքսեկեստիդէս էր 'ի զարմէ Կողրոսի արքայի , և մայր նորա յազգականութենէ տանն Պիսիստրատեայ : Չամս բազումս յերիտասարդութեան իւրում պանդխտեցաւ յԵգիպտոս , որ զայնու ժամանակաւ ժողովարան էր համօրէն իմաստասիրաց : Արթեալ նորա անդ 'ի հրահանգս կարգաց պետութեան , և 'ի զննութիւն օրինաց և սովորութեանց աշխարհին , դարձ արար յԱթէնս , յորում բազմարդիւն վաստակ նորա և ազնուականութիւն ամբարձին զնա 'ի մեծապատիւ բարձ աւագութեան :

Այր զգօն էր Սողոն , քաջասիրտ ,

անյողղողղ և աննենգ : Պերճախօս ա-
տենաբան էր, բանաստեղծ, օրէնսգէտ
և հմուտ 'ի գործ պատերազմի : Յամե-
նայնի նախանձախնդիր եղև աղատու-
թեան հայրենեացն, ոխերիմ թշնամի
բռնաւորաց, և ոչինչ ջանացեալ 'ի մե-
ծութիւն ազգատոհմի իւրոյ : Ոչ ու-
մեք երբէք եկաց յաշակերտութեան՝
ըստ օրինակի թաղեսի : Չանց արար
զհետազօտութեամբ պատճառաց բը-
նութեան, առ 'ի տալ զանձն բովան-
դակ 'ի բարոյական և 'ի քաղաքակա-
նութիւն : Նորա համարի հռչակա-
ւոր այն առած . Պարտ է յաճնայնի զլա՛ճ
ուհէլ :

Մինչդեռ էր զժամանակ ինչ 'ի Մի-
լետոն՝ ուր ձգեալ էր զնա համբաւ
Թաղեսի, յետ ընդ աւուրս ինչ կենցա-
ղակից լինելոյ ընդ այնմ իմաստասիրի,
ասէ ցնա . սքանչանամ, ո՛վ Թաղէս՝ զի
բնաւ չէ՛ յօժարեալ քո յամուսնու-
թիւն . քանզի լինէին քեզ որդիք, զորս
ախորժ հաճութեամբ դաստիարա-
կէիր : Ոչինչ պատասխանի ետ նմա
Թաղէս առժամն : Յետ քանի ինչ ա-
ւուրց՝ երևեցոյց զայր ոմն իբրու տար-
աշխարհիկ ոք այր՝ եկեալ առ նոսա
յայցելութիւն . որ և ասաց թէ այն
ինչ հասանէ յԱթենայ : Քա՛ջ է, ա-
սաց Սողոն . և զլի՛նչ անտի արժանի

լսելոյ : Ոչինչ գիտեմ՝ ասէ այրն օտա-
 րական . բայց միայն յուղարկաւորէին
 ՚ի թաղումն պատանի զոմն աթենացի,
 զորոյ զհետ զնայր ամենայն քաղաքն
 ՚ի յուղարկաւորութիւն, վասն ազ-
 նուականութեանն և մեծապատիւ շը-
 քոյ հօր նորա՝ զոր ունէր ՚ի ժողովրդե-
 նէն . և այդ այր, յաւել ասել օտարա-
 կանն, ՚ի ժամանակաց հետէ ՚ի բա-
 ցեայ կայ յԱթենայ . բարեկամք նորա
 խորհուրդ ՚ի մէջ առին զգուշութեամբ
 վարիլ ՚ի զգացուցանել նմա զիրան, զի
 մի մորմոք սրտին մահու զրաւեսցէ զնա :
 Աւաղ հօրն տարաբազդի՝ գոչեաց Սո-
 ղոն . և զինչ անուն է նորա : Լուայ ես
 զանուն առնն՝ պատասխանի ետ այրն .
 այլ այժմ ոչ ևս յիշեմ զնա . զայս զիւ-
 տեմ զի ասէին ամենեքեան թէ այր ի-
 մաստուն էր : Սողոն որ ժամ ՚ի ժամէ
 յուղեալ տատանէր ՚ի խորհուրդս,
 խռովեցաւ, և ոչ ևս ժուժեալ եհարց,
 մի արդեօք Սողոն իցէ : Ասէ այրն շու-
 թափելով . այո՛ նա ինքն է : Դղրդե-
 ցաւ Սողոն ՚ի բուռն և ՚ի հրատապ
 շարժութենէ անտի, մինչ զպատմու-
 ճանն պատառել, զվարսան փետել, և
 ծեծել զգլուխն . և ոչինչ եթող յայնմ
 ամենայնէ զոր սովոր են առնել ընկ-
 ճեալքն ՚ի ցաւոց : Ասէ ցնա թա-
 ղէս . զո՞ կոծես, և այդչափ տաղնա-

պեալ ես վասն մահու մանկանդ, որ
 բում չկարեն դարման տանել համօ,
 բէն արտասուք աշխարհի: Ա՛հ. այդ
 իսկ է՛ ասէ Սողոն, որ ինձ կոծել տայ.
 կոծեմ զաղէտսն անդարմանելի: Յե-
 տոյ ուրեմն ծիծաղեցաւ թաղէս ՚ի վե-
 բայ այլ ընդ այլոյ արարիցն Սողոնի, և
 ասէ ցնա. ո՛վ Սողոն, բարեկամ իմ,
 ահա այդ է՛ որ խիթալի արար ինձ զա-
 մուսնութիւն. երկիւղ ունէր զիս ՚ի
 լծոյ նորա. և խելամուտ եմ ՚ի ցաւոց
 խմատնագոռնին ՚ի մարդկանէ՛ թէ
 սիրտ անդրդուելի չկարէ ժոյժ ունել
 դառնութեանն որ ՚ի հոգոց և ՚ի խնա-
 մոց զաւակաց: Մի՛ ևս վշտագներ
 զանձնքո, զի որ ինչ ասացաւ աստէն՝
 հաճոյական իմն հնարագիտութիւն է:

Ընդ ժամանակս բազումս մղէր
 մարտ անագորուն ընդ մէջ աթենա-
 ցւոց և մեդարացւոց ՚ի սակս Սաղամի-
 նայ կղզւոյն: Յեա բազում կոտորա-
 ծոց յերկոցունց կողմանց, աթենա-
 ցիք որոց առաւելագոյն էր զեան, և
 պարտասեալք էին ՚ի բազում կոտո-
 բածոյ, մահու պատուհաս սահմանե-
 ցին ընդդէմ առն՝ որ իշխեսցէ յիշա-
 տակ առնել նորոյ պատերազմի ՚ի վե-
 բայ Սաղամինայ, զոր յայնժամ ու-
 նէին մեդարացիք: Երկեաւ Սողոն թէ
 մի գուցէ այդ զԵոյց ՚ի վատութիւն

Իւր կրթեսցի, կամ թէ 'ի լուսնն իւրում՝ զեան բերցէ հայրենեաց լուսթիւնն իւր, խորհեցաւ նա՝ խելացնոր երևեցուցանել զանձն, զի ընդ սովին պատրուակաւ՝ շնորհեսցի նմա առնել անպատուհաս՝ զոր ինչ կարևոր դատեսցէ։ Ասան որոյ ետ զհամբաւի հարկանել 'ի քաղաքին թէ թափեալ է 'ի մտաց։ Յօրինեալ նորա եղերերգութիւնս իմն, և զայն 'ի բերան առեալ, ել 'ի դուրս 'ի տանէ իւրմէ, հանդերձ պատառատունն արկեալ զիւրե, տոռն 'ի պարանոցի, և խոյր 'ի գլուխ հին և աղտեղի. և համօրէն ժողովուրդն կուտեցան 'ի վերայ նորա։ Ելեալ Սողոմն 'ի վերայ վիսին բարձու, որ էր բեմ հրապարակախօսութեան, արտասանեաց զոտանաւորսն նուագելով ասէ. իցէ՛ թէ հաճեսցին զիք՝ զի մի ևս ինձ հայրենիք գրեսցի Աթէնք. երանի՛ թէ ծնեալ էր իմ 'ի Փոլեզանդա կամ 'ի Միկինա, կամ յայլում դժնդակագոյն և 'ի խուժագուժ վայրի, զի գէթ ոչ ևս մորմոքէի՝ տեսեալ զի մատամբ ցուցանեն զիս և ասեն, ահա՛ այր աթենացի ամօթապարտութեամբ փախուցեալ 'ի Սաղամինայ։ Արէ՛ժ խնդրեսցուք անյապաղ զնախատանացն զոր 'ի մեզն ընկալաք, և գրաւեսցուք դարձեալ զզուարձութեան կայանսն, զոր

յանհրաւի կորզեցին 'ի մէնջ [Թշնամիք:
 Այս բանք այնպէս իմն ազդողագոյն
 գտան 'ի սիրտս աթենացւոց, զի անդէն
 վաղվաղակի զառաջին պատուէրսն ա,
 պախտ արարեալ, վառեցան զինու, և
 'ի մարտ պատրաստեցան ընդդէմ մե,
 գարացւոց: Սողոն՝ առաջնորդ կար,
 գեցաւ զօրուն. եմոյժ զզօրս իւր 'ի
 յուրվ նաւակս ձկնորսաց: Չհետ գայր
 զնորա, ցռկանաւ երեսուն և վեց [Թիա,
 կօք. այսպէս գնացեալ խարիսխ արկ
 առ Սաղամինաւ: Մեգարացիք որք 'ի
 քաղաքին էին, զգաստ եղեալ իրացն,
 տագնապաւ 'ի զէնս ընթացան: Չա,
 տուցին զմի նաւուց իւրեանց՝ և յղե,
 ցին իմանալ զոր ինչ էրն: Այն նաւ
 քանդի կարի իմն մերձեցաւ, անկաւ
 'ի ձեռս Սողոնի, որ անդէն վաղվաղա,
 կի 'ի կալանս արկեալ զամենայն մե,
 գարացիս որ 'ի նմին էին, եմոյժ 'ի
 նաւ նոցա զընտիր ընտիրս յաթենա,
 ցւոց, և հրամայեաց նոցա՝ դէպ ու,
 ղիղ գնալ 'ի Սաղամինա՝ կալով 'ի [Թա,
 գըստի՝ որչափ մարթ իցէ: Առ Սողոն
 ընդ իւր զմնացօրդս զօրուն, և ել 'ի
 ցամաք ընդ այլ կողմն. գնաց ընդա,
 ուաջ մեգարացւոց ուր բանակեալ էին.
 և մինչդեռ 'ի կռուի էին, նորա՝ զօրս
 յառաջն յղեալ էր նաւու, հասին և
 կալան գրաղաքն: Յետ վատթարելոյ

Սողոմոնի զմեղարացիս, եթող յաղա-
 տութիւնն առանց փրկանաց զգերիսն
 զլուբունեալս՝ ի պահու մարտին. և կանգ-
 նեաց մեհեանն ի պաշտօնն դիցն Արե-
 սի ի տեղւոջն յորում ի գլուխ տա-
 րաւ զյաղթութիւնն: Չկնի ժամա-
 նակաց ինչ ի զուր ջանահնար եղեն
 մեղարացիք՝ դարձեալ ընդ ձեռամբ
 գրաւել զՍաղամինս, մինչև հուսկ ու-
 բեմն միաբանեցին կողմանքն երկօքին՝
 իրաւարարս կարգել դատին զլակեդե-
 մոնացիս: Յայտ յանդիման կացոյց Սո-
 ղոնն առաջի հրեշտակացն Սպարտիոյ՝
 թէ Փիլէոս և Եւրիտիակէս որդիք
 Այաքսայ արքայի Սաղամինայ եկեալ
 բնակեցին յԱթէնս, և թէ նոքա ետուն
 աթենացւոց զայդ կղզի՝ պայմանաւ
 գրելոյ ընդ քաղաքակիցս աթենացւոց:
 Ետ բանալ զբողոսմ շիրիմն, և եցոյց
 թէ սաղամինացիք դարձուցանէին զե-
 րեսս մեռելոց իւրեանց ընդ այն կողմն՝
 յոր և աթենացիք. իսկ մեղարացիք
 դարձուցանէին ընդ հակառակն կոյս.
 և ևս՝ զի գրոշմէին ի դադաղսն զանուն
 ազգատոհմի մեռելոյն. որ սեփական
 էր աթենացւոց և եթ: Սակայն մեղա-
 րացիք ոչ յետ բազում ժամանակաց
 խնդրեցին զվրէժն. քանզի տարածայ-
 նութիւնք որ ի վաղուց բռնացեալ զօ-
 րացեալ էին՝ ընդ մէջ տանն Ալիոնի և

Մեզակլեայ՝ ամենցին յոյժ յոյժ, մինչև
 կորուսանել և զքաղաքն ողջոյն : Անն
 խաւ այս խորհուրդք էին Ախլոնի՝ տի-
 րել Աթենայ. յայտնեցաւ դաւն. սպա-
 նաւ հանդերձ գործակցօք իւրովք . և
 որք միանգամ ապրեցանն՝ ապաստան
 եղեն ՚ի մեհեանն Աթենասայ : Մե-
 զակլ՝ որ էր ՚ի ժամուն իշխան , համո-
 ղեաց զնոսա բանիւք իւրովք՝ գալ յան-
 դիման լինել ՚ի դատաստանի, ունելով
 թել ՚ի ձեռին՝ պնդեալ զծայրէն յար-
 ձան շաստուածուհւոյն, զի մի ՚ի դերև
 լիցի յոյս ազատութեան իւրեանց :
 Իբրև իջանէին նորա ՚ի մեհենէն, խղե-
 ցաւ լարն . ասէ Մեզակլ, դոյն այդ
 յայտնի նշանակ է մերժելոյ զձեզ
 աստուածուհւոյն ՚ի հովանաւորու-
 թենէ իւրմէ . և կալաւ զյողունս ՚ի
 նոցանէ , որք անդէն առ նմին քար-
 կոծմամբ սպանան ՚ի ժողովրդենէն .
 իսկ որք անկան ՚ի սեղանս դից՝ ամե-
 նեքին գողցես կոտորեցան , առանց
 ինչ ՚ի տեղւոյն ակնածելոյ . բաց յո-
 մանց սակաւուց վասն որոց միջնորդ
 դտան կանայք իշխանացն , և թողին
 յազատութեան :

Այդ խժդժական գործ ատելի երե-
 ւեցոյց զաւագանին և զորդիս նոցա ,
 որք յետ աղետիցդ գարչեցեալ էին ՚ի
 ժողովրդենէն : Յետ ամաց բաղմաց սե-

բունդք Աիլոնի զօրացան յոյժ յոյժ,
 և ատելութիւնն տարրացեալ ընդ մէջ
 կողմանցն երկոցուն՝ աւուրց յաւուրս
 վառեալ բորբոքէր: Սողոն՝ որ իշխան
 էր նոցա, խիթացեալ թէ մի արդեօք
 երկփեղկել նոցա՝ աւերածս ածցէ քա-
 ղաքին համօրէն, հաւանեցոյց երկա-
 քանչիւր կողմանց անսալ խորհրդոց
 դատարարի՝ զի յանկ ելցէ տարաձայ-
 նութիւն նոցա. դատարարքն վճռե-
 ցին ՚ի նպաստ Աիլոնեանց: Տարագրե-
 ցան ամենայն սերունդք Մեկադլեայ,
 և ոսկերք մեռելոց նոցա հանան ՚ի գե-
 րեզմանացն, և ընկեցան արտաքոյ սահ-
 մանացն Աթենայ: Մեզարացիք դէպ
 ժամանակ յաջողութեան գտեալ
 զայդ, մինչդեռ նոքա զաղմկաւ էին,
 զինու վառեալ տիրեցին Սաղամինայ:

Այն ինչ լուեալ էր խռովութիւնն՝
 միւս այլ խուժեաց ՚ի վերայ, որոյ չա-
 բիք ոչ ինչ նուազ էին քան զառաջ-
 նոյն: Ընդ ծանր պարտեօք հեծէին աղ-
 քատք, զորս պարտատեարք նոցա ա-
 ւուր աւուր ՚ի դատ վարեալ իբրև ըզ-
 գերիս՝ աշխատել տային նոցա, կամ
 վաճառէին զնոսա ըստ հաճոյից իւ-
 րեանց: Աուտեցան բազումք յամբո-
 խէն՝ եղեալք ՚ի մտի ընտրել զոք գլուխ,
 որ խափան արկցէ՝ զի մի ոք յայնմ հե-
 տէ ՚ի ստրկութիւն դրաւեսցի վասն ոչ

Հատուցանելոյ զպարտսն 'ի ժամանա-
 կեալ աւուրն . ևս և բռնադատել զա-
 ւագանին բաշխել յամենեսին հաւա-
 սարութեամբ զամենայն ստացուածս ,
 զորօրինակ արարեալ էր Աիկուրդոսի
 'ի Սպարտա : Ամբոխն և խռովութիւն
 զայրացեալ էր յոյժ , մինչև անհնար
 լինել՝ գտանել ելի աղագս 'ի խաղա-
 զել զնոսա : Երկուստեք հաւանու-
 թեամբ ընտրեցաւ Սողոն՝ օրինօք սիրոյ
 'ի գլուխ հանել զայն . հրաժարեաց
 զառաջինն 'ի խիստ գործոյ անտի .
 միայն իղձ սպաս հարկանելոյ հայրե-
 նեացն յօժարեցոյց զնա . ամենեցուն
 լուեալ էր յառաջագոյն 'ի նմանէ՝ ա-
 սել թէ հաւասարութիւն տարադիր
 առնէ զամենայն հակառակութիւնս .
 և ամենայն մարդ յանձն իւր հանէր
 զթարգմանութիւն բանիդ . կարծէին
 աղքատք թէ կամք իցեն նմա հաւասա-
 րել զամենայն մարդիկ . և ճոխք ընդ-
 հակառակն՝ համարէին թէ բաշխել
 կամիցի ըստ իւրաքանչիւր ազնուակա-
 նութեան և պատուոյ : Այս զնա սի-
 րելի կացոյց երկաքանչիւր կողման ,
 որք և յօժարեցուցանէին զնա ընդու-
 նել զաւագութեան զբարձն : Իսկ որք
 անմասն էին 'ի հերձեաց աստի՝ ոչինչ
 այլ լաւագոյն դարման գտանելով
 յանդորրութիւն իրացն , մտադիւր սի-

բով յանձին կալան ընդունել իբրև
 Տէր զայրն՝ որ համարեալն էր իմաս-
 տուն քան զամենայն մարդիկ : Բացէ
 'ի բաց հրաժարեաց Սողոն, վկայու-
 թիւն եղեալ՝ բնաւ ոչ անսալ այնմ .
 մինչև սոգտանել զնա և մտերիմ՝ բա-
 րեկամաց նորա : Այր պարզամիտ ես
 ասէին ցնա, որ պատճառանօք անուան
 բռնաւորի՝ խորշիս 'ի միահեծան տէ-
 րութենէ, որ յապագայ ժամանակս
 յիրաւունս համարեցցի քեզ . ոչ ապա-
 քէն և Տիմոնդաս անուանեցաւ եր-
 բեմն թագաւոր Եւբէայ : Ոչ և այժ-
 մու թագաւորէ Պիտտակոս 'ի Մի-
 տիլինէ : Ոչ խոնարհեցաւ Սողոն առ
 այս ամենայն բանս : Յիրաւի, ասէ,
 օրինաւոր իշխանութիւն և բռնաւո-
 րութիւն՝ աւադութիւնք են վերամ-
 բարձք, սակայն և շուրջ պատեալ են
 'ի վախից, և չէ ուստեք ճանապարհ
 անտի 'ի դուրս ելանել՝ յետ միանդամ
 անդր մտանելոյ : Անհարին եղև հա-
 ճեցուցանել զնա՝ յանձն առնուլ զօգ-
 տակար զայն ընտրութիւն . վասն որոյ
 և բարեկամք նորա իբրև մոլեալ հա-
 մարէին զնա : Չեռն էարկ Սողոն կամա-
 կար մտօք խաղաղել զխռովութիւնսն
 զյարուցեալս Աթէնս . հրաման ետ
 խափանել զամենայն ղհին պարտիս,
 և զի մի ումեք իրաւունք ինչ իցեն 'ի

վերայ պարտապանաց իւրոց . և վասն
տալոյ օրինակ հասարակաց՝ հրաժա-
րեաց յեօթն տաղանդաց որք նմա անկ
էին իբրև ժառանգութիւն հայրենի :
Նոյնպէս և ապախտ արար զամենայն
զպարտս որ լինիցին յետ այնորիկ՝ ՚ի
վնաս իւրաքանչիւր պարտատեառն առ
՚ի խափանել յապագայս զճախողակի
պատճառս այս ամենայն տարաձայ-
նութեանց : Չառաջինն անդ երկոքին
կողմանքն զչարեցան ընդ այս դատաս-
տան . ցասնուին մեծատունք ընդ կո-
րուստ ստացուածոց իւրեանց . ոչ
նուազ քան զնոսա սրտմտէին և աղ-
քատք ընդ այն՝ զի ոչ հաւասար բաշ-
խեցան ինչք . սակայն և երկոցուն
հասու գտեալ օգտի սահմանադրու-
թեանցն Սողոնի, դարձեալ կրկին ան
գամ ընտրեցին զնա ՚ի խաղաղել զաղ-
մուկն որ յերիս պատառէր զԱթէնս .
և իշխանութիւն ՚ի ձեռս ետուն նմա
օրէնս հաստատել որպէս ինչ հաճոյ
թուիցի նմա , և զտարազ պետու-
թեանն օրինադրել ըստ հաճոյից իւ-
րոց :

Բնակիչքն լերանց կամէին՝ զի ժողո-
վուրդն ինքնին տնօրէն լիցի ամենայն
իրաց . իսկ բնակիչք դաշտավայրաց
պնդէին ՚ի բանս իւրեանց՝ իշխան կար-
գել ընտրանաւ զոմանս յաւադաց . և

Ծովերէրեայք կամէին կառուցանել զնախարարակոյտ ատեանն յերկոցունց միանգամայն : 'Ի բաց մերժեաց Սողոն, որ կարգեալն էր գերագոյն հրամանատար, զամենայն օրէնս Դրակոնի զնախորդին իւրոյ . քանզի տարապայման էր խստութիւնն նոցին : Ամենայն դոյզն յանցանք մահու նշաւակ էին իբրև զեղեռն չարիս, և վտանգ էր միօրինակ՝ կալ դատարկ, դողանալ միրգս կամ բանջարս, և սեղանակապուտ լինել, կամ մարդասպան, և որինչ այլ ևս դժնդակակագոյն : Եւ վասն այնորիկ սովորութիւնն էր ասել՝ թէ արիւնագիր դրոշմեալ են այն օրէնք : Յաւուր միում հարցաւ Դրակոն՝ թէ ընդէր անխտիր պատուհաս մահու սահմանեաց վասն ամենայն յանցուածոց. ետ պատասխանի . Քանզի թեթև յանցանք՝ մահու պարտական են . իսկ վասն ծանրագունիցն՝ չգտանեմ այլ պատուհաս խստագոյն :

Բաշխեաց Սողոն զքաղաքացիս յերիս դասս՝ ըստ չափու ճոխութեանն՝ զոր ունէին այր իւրաքանչիւր : Համարձակեաց ամենայն ժողովրդեան՝ մխիլ 'ի դործակալութիւնն ատենական. բաց յարուեստաւորաց ոմանց, որք կէին վաստակօք ձեռաց իւրեանց : Մերժեալ էին սոքա յաւագութեանց և

չէին կցորդք 'ի շնորհս այլոց: Օրէնս
 կարգեաց ընտրել ղբարձերէցս յաւա-
 դանւոյն յառաջին դասէ քաղաքա-
 ցեաց: Չի թէ որ յաղմկայոյղ տարա-
 ձայնութեան՝ ոչ յարեսցի 'ի մին 'ի կող-
 մանցն՝ վատանուն երևեսցի: Չի թէ
 որ ամուսնացեալ ընդ դստեր մեծա-
 տան, անկարող դտանիցի, իշխան է
 կինն լինել ընդ միոյ 'ի մերձաւոր ազ-
 դականաց առն իւրոյ: Չի մի օժիտ մե-
 ծածախ տարցեն կանայք առ արս իւ-
 բեանց, բայց միայն երիս հանդերձս, և
 քանի մի կարասի թեթեազին: Չի օ-
 բէն իցէ անպատիժ սպանանել զչնա-
 ցողն՝ ըմբռնեալ 'ի գործն անդ անար-
 ժանութեան:

Սահման եղ ծախուց տիկնայց. և
 խափան արկ բաղում տարադէպ սո-
 վորութեանց նոցա: Արդել ղբամբա-
 սանս մեռելոց: Թողացուցանէր որոց
 ոչ ունէին որդիս՝ ըստ կամի կարգել
 զայլ որ 'ի ժառանգ, միայն թէ ոչ ի-
 ցեն ցնորեալ մտօք 'ի պահու կտակա-
 դրութեանն: Չի վատանուն լիցի որ
 վատնիցէ զինչս իւր, և մերժեսցի յա-
 մենայն պատուոյ. նոյնպէս և որ ոչն
 դարմանէ զհայր իւր և զմայր 'ի ծե-
 րութեան նոցա: Արդիք չէին պարտա-
 պան խնամ ունել հարց իւրեանց՝ թէ
 նոցա չէր հոգ տարեալ վարժել զնո-

սա 'ի մանկութեանն յարուեստս ինչ :
 Չի ոչ որ այր օտարական գրեսցի քա-
 ղաքացի Աթենայ, մինչև իցէ անդարձ
 տարագրեալ 'ի հայրենի երկրէ իւրմէ .
 և մինչև իցէ հաստատեալ բնակու-
 թեամբ յաթէնս համօրէն տամբ իւ-
 րով վաստակել յարարս ինչ : Նուա-
 զեցոյց յոյժ զյաճախակի սովորեալ
 մրցանակս ըմբշամարտկաց : Սահման
 եդ հասարակաց ծախիւք սնուցանել
 զմանկունս անկելոց 'ի պատերազմի
 վասն հայրենեաց : Չի այր որ խնամա-
 կալ մանկան կրտսերոյ՝ մի բնակեացէ
 ընդ մօր որբոցն այնոցիկ . և զի՛ մի ըն-
 տրեսցի 'ի խնամակալութիւն որ մեր-
 ձաւորն է 'ի կարգի ժառանգութեան :
 Չի ամենայն զողութիւն՝ մահու
 պատժեսցի . և որ կուրացոյց զոր ըստ
 միոյ ականն, պատժեսցի կուրութեամբ
 երկուց աչացն :

Ամենայն օրէնք Սողոնի փորագրե-
 ցան 'ի տախտակս : Ծերակոյտն միա-
 համուռ երդումն երդուաւ պահել ըզ-
 նոսին, և հսկել յանվրէպ կատարումն
 նոցին : Եւ նորին իսկ որոց յանձն էր
 խնամք իրացդ՝ երդուան 'ի հանդիսի,
 զի թէ որ 'ի նոցանէ ապախտ արասցէ
 զիւիք յօրինաց անտի, պարտապան լի-
 ցի նուիրել 'ի տաճարն Ապողոնի ար-
 ձան ոսկի ըստ կշռոյ մարմնոյ իւրոյ :

Էին անդէն և դատաւորք մեկնիչք օրինացն՝ ի ծագել ինչ խնդրոյ ՚ի վերայ նոցին ՚ի մէջ ժողովրդեան :

Յաւուր միում մինչդեռ գրէր Սողոն զօրէնան, ծաղրեաց զնովաւ Անաքարսիս, և ասէ . Ձինչ, համարիս դու յանձին քում՝ գրուածեամբ իւիք սանձել զպատամբութիւն կրից մարդկան : Այդոքիկ պատուիրանք նման են անշուշտ ոստայնից սարդի, որք միայն զձանձս գիտեն պարանել : Պատասխանի ետ Սողոն . անշարժութեամբ ունին մարդիկ զայն ինչ՝ յոր միանգամ ձայնակից և հաւան գտցին . այնպէս կարդեցից ես զօրէնս իմ՝ զի խելամոտեցին ամենայն քաղաքացիք՝ թէ շահ է նոցա հնազանդիլ օրինացս, քան անցանել զտքօք :

Հարցաւ թէ զի ոչ օրինադրեաց ինչ վասն հայրասպանաց : Ոչ կարծէի, ասէ, թէ գուցեն մարդիկ չարախտավատք՝ որք իշխեսցեն սպանանել զհայր կամ զմայր իւրեանց :

Սովորութիւն էր նորա ասել առ բարեկամսն՝ թէ այր անցեալ զեօթանասնամենիւք՝ չպարտի երկնչիլ ՚ի մահուանէ, և ոչ բողոք ունել զաղետից մահուն : Թէ պալատականք թագաւորաց՝ նման են համարածիւ խերևէշից, և է զի շատ՝ և է զի նուազ ունին

զօրութիւնս ըստ կամս թագաւորաց :
 Թէ որք բարձակցին թագաւորաց՝ մի
 տացեն նոցա խորհուրդ զհաճոյն , այլ
 զոր շահաւորն իցէ : Թէ հաւատարիմ
 առաջնորդ մեր միայն բանն է . և թէ՛
 չէ՛ արժանն ասել ինչ կամ առնել՝ մինչ
 չև խորհուրդ հարցեալ առ 'ի նմանէ :
 Թէ օրէն է յաւէտ հաւատալ երկիւ
 ղածութեան մարդոյ , քան երդմանն նո
 բա : Թէ չէ՛ 'ի դէպ անխտիր յաճախել
 բարեկամս . և վտանգ մեծ է քակել
 զհիմնացեալ բարեկամութիւնս : Թէ
 հնարագիտութիւնս ճահաւոր առ 'ի
 բաց մերժել զանիրաւութիւնս՝ է մո
 ռանալ զայն : Թէ չէ՛ օգուտ միջամուխ
 լինել 'ի հրամանատարութիւնս , մինչ
 չև ուսեալ հնազանդիլ : Թէ խարէու
 թիւնս խորշելի լիցի առ ամենայն մարդ
 կան : 'ի դուխ ամենայնի՝ պարտ է
 պաշտել զաստուածս , մեծարել զճնօղս ,
 և մի կցորդել ընդ ամբարիշտս :

Ասէր ևս . Չանյայտս գուշակեա՛ 'ի
 ծանօթ եղելոց : Մի նստցիս դատա
 ւոր . ապա թէ ոչ թշնամի լիցիս դա
 տելուոյն : Յորժամ ուսցիս կառավա
 րիլ , դիտասցես կառավարել : Փախիր
 'ի ցանկութենէ , զի ծնանի զտրտմու
 թիւնս : Յղփութիւնս 'ի մեծութենէ
 ծնանի , և 'ի յղփութենէ խօթամտու
 թիւնս : Անքեա՛ զբանս քո լռութեամբ .

իսկ զլուծութիւն ժամանակաւ : Չոր
միանգամ տեսցես, մի ասասցես. 'ի գիւ
տել անդ լուեսջիր : Ընդ ուստերս և
ընդ դստերս քո մի ծիծաղեսցիս, զի մի
յետոյ լայցես զնոսա : Լաւ է 'ի ծա
ծուկ յանդիմանել զմերձաւորն . քան
յայտնի գովել : Քաղաքացւոց մի զհա
ճոյականս, այլ զվայելչականս դիցես
առաջի 'ի խորհրդեան : Սմա ընծայեն
օմանք զայս բան անձաբանական . 'ի
վախճանի տէրն զգայթակղութիւն
մարդկան զգենու և ընդ աղօտ երևի
յերկրի . և 'ի սահմանս անմեղադրելի
անձութեանն, զապականութիւն չար
չարանաց խափանէ . և աստ ժողովեալ
հաւատացեալ . կախեալ կամաւ զթա
բար, զամենեսեան առ ինքն ժողովէ
զօրութեամբ :

Ծանեալ Սողոն թէ Պիսիատրատոս
հաւաքէ իւր բազում թեակիցս յԱ
թէնս, ջան 'ի վերայ եղեալ տիրել
բռնանալ 'ի վերայ ամենեցուն . գուն
գործեաց ամենայն հնարիւք զգէմ ու
նել խորհրդոց նորա : Խմբեաց զժողո
վուրդն 'ի հրապարակ անդր . ուր եկն
և ինքն վառեալ զինու զարդու, և 'ի
վեր եհան զգաւանս Պիսիատրատեայ .
ձայն եբարձ առ նոսա . Նախահայեաց
եմ ես օվ Աթենացիք քան զանդէտս
ամբարշտութեան խորհրդոց Պիսիա

տրատեայ, և հղօրագոյն քան զորս զի տենն, և զանդիտեն 'ի դիմի հարկանիլ նմա՝ առ երկիւղի, կամ առ տկարութեան: Աւասիկ ես ինքնին հասեալ կամ առաջնորդել ձեզ՝ 'ի մարտնչել քաջութեամբ վասն ազատութեան: Ժողովուրդն որ զկողմն ունէր զՊիսիստրատեայ, իբր ընդ այր ցնորեալ վարեցան ընդ Սողոն: Յետ աւուրց ինչ անցանելոյ՝ անձամբ զանձն խոցոտեալ Պիսիստրատոսի՝ ետ տանել զինքն կառօք՝ բովանդակ արիւնաշաղախ 'ի հրապարակն. ասաց՝ թէ թշնամիք իւր դաւաճանեցին ինքեան, և յայդ աղէտս հասուցին: Անդէն վաղվադակի վառեցաւ ռամիկն 'ի զայրոյթ, և ընթացան 'ի զէնս՝ պաշտպան կալ Պիսիստրատոսի: Այլ Սողոնի յառաջ մատուցեալ ասէ ցնա. Ո՛վ որդի Հիպոկրատեայ՝ ոչ ևս նմանիս դու հոմերականն Ողիսեայ. զի դու գործես զայդ 'ի պատրել զբաղաբացիս քո. իսկ նա խոցոտեալ զանձն՝ պատրեաց այնու զթշնամիս իւր: 'Ի խմբել ժողովրդեանն ինդրեաց Պիսիստրատոս վասն իւր յիսուն թիկնապահս: Ընդդէմ եկաց նմա Սողոն արիագոյնս՝ յայտ յանդիման կացուցեալ զբազմավտանդ հետեանց այնր նորահնար գործոյն. սակայն ոչինչ ազդել մարթացաւ 'ի

ուամիկն զայրացեալ. զի շնորհեաց Պի-
 սիստրատեայ՝ ունել զիւրև թիկնա-
 պահս չորեքհարիւր, և զօրաժողով լի-
 նել՝ առ ՚ի տիրել ամրոցին: Չարհու-
 րեալ յիրացն աւաղանի քաղաքին՝ ՚ի
 բաց խուսէին անտի: Ո՛չինչ սրտաբեկ
 եղև Սողոն. և կշտամբեալ զժողո-
 վուրդն վասն հեղգութեան և վատու-
 թեան նոցա, ասէ ցնոսա. Յառաջն
 դիւրագոյն էր ձեզ խափանել զբռնա-
 կալութիւնդ. այլ զի այժմ սերտա-
 գոյնս ամրացաւ, ՚ի շքեղ փառս յան-
 կեսցի ձեզ աղարտել զայն, և քանցել
 արմատաքի: Սակայն տեսեալ զի այս
 ամենայն բանք ազդեն ինչ ո՛չ զգաս-
 տացուցանել զժողովուրդն յապշու-
 թենէ իւրեանց, ՚ի բաց մեկնեցաւ. և
 տարեալ զզէնս իւր եղ առաջի դրան
 ծերակուտին, աղաղակելով. Ո՛վ հայ-
 րենիք իմ սիրելի՛ ես օգնեցի քեզ որ-
 չափ ինչ ձեռնհաս դտայ բանիւք և
 արդեամբք. վկայ են ինձ դիք՝ զի բնաւ
 ո՛չ դանդաղեցի պատսպար լինել օրի-
 նաց և ազատութեան հայրենեաց իմոց:
 Ո՛վ հայրենիք անուշակ. ահա գնամ
 ես աստի, և յաւիտեան թողում ըզ-
 քեզ, զի ես միայն մնացեալ եմ թշնա-
 մի բռնակալին, և այլք ամենեքին յօ-
 ժարամիտ են ընդունել զնա ՚ի գլուխ
 իւրեանց:

Բացէ՛ի բաց հրաժարեաց Սողոն ընդ
 իշխանութեամբ կալ Պիսիսորատեայ .
 և զի խիթայր թէ մի գուցէ աթենա-
 ցիք բուռն առնիցեն նմա՝ փոփոխել
 զօրէնսն՝ յորոյ երդուեալ էին՝ ի պահ
 պանութիւն , լաւագոյն վարկաւ՝ կա-
 մովին յանձն առնուլ զտարագրու-
 թիւն , և տարադէմ գնալ ճանապար-
 հորդել՝ և ճանաչել զաշխարհ , քան
 կեալ տհաճութեամբ յԱթէնս : Անց
 յԵգիպտոս , ուր եկաց ժամանակ ինչ
 յարքունիս Ամասիս արքայի : Իսկ Պի-
 սիսորատոս որ մեծապատիւ մեծարէր
 զՍողոն , կարի իմն խռովեալ յօգի իւր
 ընդ մեկնել նորա , գրեաց նմա թուղթ
 թախանձանաց , անդրէն յետո դար-
 ձուցանել զնա : « Ոչ ես միայն ՚ի յու-
 նաց՝ տիրեցի արքայութեամբ հայրե-
 նեաց իմոց , ոչինչ գործեմ ես հակա-
 ռակ օրինաց կամ դից , քանզի արիւն
 եմ Վոտրոսի՝ որում երդուան աթե-
 նացիք՝ յաւերժ պահել զթագաւորու-
 թիւն սերնդոց նորա : Զան ՚ի մտի
 եղեալ է իմ՝ պատկառ կալ պահպա-
 նութեան առ ՚ի քէն օրինացդ՝ առա-
 ւել զգուշութեամբ , քան զոր ՚ի տի-
 բել աամկաց համախումբ : Շատ հա-
 մարիմ ինձ զհարկսն զորս յառաջնմէ
 հաստատեալ գտի . և բաց ՚ի շքոյ մե-
 ծարանաց աւագութեանս ոչ այլ իւրիք

զանազանիմ ՚ի սոսկական մարդկանէ :
 Ոչինչ դժկամակ եմ ընդ քեզ, վասն
 հրատարակելոյ քո զխորհուրդ իմ. հա-
 ւանեալ եմ ՚ի խորհուրդս իմ՝ թէ
 այդ յաւէտ առ սէր հայրենեաց էր,
 քան առ ատել զիս. քանզի դու ոչ
 զիտէիր զնպատակ խորհրդոց իմոց. զոր
 թէ կանուխ զգացեալ էր քո, թերևս
 ոչ առ ոտն կոխէիր զհնարս իմ : Արդ
 ծանիր աներկիւղ, և հաւատա՛ բանից.
 զի ոչ բնաւ երկիցէ Սողոն ՚ի Պիսիատ
 բատեայ. քանզի և ոչինչ զչարեցայ առ
 որս յառաջն եղեն իմ թշնամիք : Աա-
 լայց զքեզ մտերիմ բարեկամ, և դու
 կացցես առ իս յանխռով անդորրու-
 թեան, քանզի զիտեմ զքեզ թէ չես
 այր դաւաճանող : Թէ կան քեզ վիաստք
 իրաւացիք խափանարարք դարձի քո
 յաթէնս՝ շնորհեալ քեզ կալ ուր և
 կամիցիս. և ինձ շատ լիցի զիտել քեզ՝
 թէ ոչ յինէն է վտարանդութիւն քո : » :

Արար նմա Սողոն պատասխանի այ-
 սու օրինակաւ. « Հաւաստեալ եմ
 ճշմարտիւ զի ոչինչ արասցես ինձ չար.
 քանզի մինչև բռնակալեալ քո՛ ես քեզ
 բարեկամ էի. այլ արդ ատելի եմ
 քեզ քան զամենայն ատեցողս բռնա-
 կալութեան : Թող այր իւրաքանչիւր
 զյանկաւորն ընտրեալ կալցի, որ օգուտ
 է աթենացոց, կառաւարիլ ՚ի միոյ

յինքնիշխան տեառնէ, թէ 'ի համա-
 խումբ ատենակալաց: Անշուշտ եմ 'ի
 խորհուրդս իմ՝ զի դու լաւագոյն ես
 'ի բռնակալս, այլ տարագէպ համա-
 ըիմ զդառնալն իմ՝ յԱթէնս. քանզի
 յետ միանգամ հիմնելոյ իմ անդէն
 զազատ պետութիւնս, և հրաժարելոյ
 յիշխանութենէն մատուցելոյ ինձ, ա-
 մենայն մարդոյ իրաւունք են դարովել
 զիս, և կարծել՝ հաւանել ինձ ընդ քո
 բռնակալութիւնդ, եթէ դարձայց
 այդրէն:

Գրեաց Սողոն և այլ թուղթ առ
 Եպիմենիդէս ըստ այսմ օրինակի:

«Քանզի օրէնք իմ ոչ մարթացան
 շնորհել օգուտ բազում, նոյնպէս և 'ի
 դերեանալն ոչ եղիտ քաղաքն յուր
 շահ: Ոչ աստուածք, և ոչ օրէնագիրք
 բաւական ինչ են օգտակար լինել քա-
 ղաքին, այլ որոց վարեն զժողովուրդն
 ըստ կամս իւրեանց՝ յորժամ բարւոյն
 ակն եղեալ իցեն: Օրէնք առ յինէն
 թահմանեալ՝ չեղեն օգտաբեր, սակայն
 յրք լուծին զայնս, առ հասարակ խան-
 դարեցին զհասարակապետութիւնս,
 յոչն խափանել նոցա զբռնակալու-
 թիւնս Պիսիստրատեայ: Կանուխ դու-
 շակեցի ես զոր ինչ լինելոցն էր. այլ
 ոչ հաւատացին ինձ: Պիսիստրատոս
 որ շնթէր ատենացւոց՝ հաւատարմա-

գոյն երևեցաւ քան զիս՝ որ զճշմարիտն
 ազդէի նոցա : Նախագրաւ եղէ՝ կալ
 'ի զլուս քաղաքացւոց առ 'ի զառաջ
 ունել զարկածիցն որ արդիւնացան .
 իբրև ընդ անմտի նայեցան յիս , և
 շնորհեցան Պիսիստրատոսի թիկնա-
 պահք՝ որովք վարեցաւ նա՝ 'ի գերու-
 թիւն գրաւել զքաղաքն ողջոյն . վասն
 որոյ և ես լաւ համարեցայ մեկնիլ ան-
 տի » :

Չայնու ժամանակաւ Արեսոս ար-
 քայ լիւղացւոց կացոյց 'ի հարկի ծա-
 ռայութեան իւրոյ զամենայն զյոյնս
 բնակեալս յԱսիա . և բազում արք
 նշանաւորք յայնմ դարու լքեալ զԵւ-
 լադա 'ի սակս այլ և այլ պատճառաց ,
 փոխեցան 'ի Սարդիա մայրաքաղաք
 թաղաւորութե Արեսոսի . որ մեծա-
 պէս բարգաւաճ էր յայնժամ մեծու-
 թեամբ և ճոխութեամբ . և զի յամե-
 նայն մարդոյ լսելի լինէր գովութեամբ
 անուն Սողոնի , կամակար յօժարե-
 ցաւ Արեսոս տեսանել զնա : Յընաց
 աղաչեաց զնա՝ գալ և բնակել առ
 իւր : Սողոն ետ նմա պատասխանի այս-
 պէս .

» Մեծ է ինձ բարեկամութիւնդ
 առ իս . վկայ են աստուածք՝ զի թէ
 չէր իմ վաղուրեմն եղեալ 'ի մտի բնա-
 կել յազատ քաղաքի , նախապատիւ

ընտրէի բնակել 'ի թագաւորութեանդ
քում, քան եթէ յԱթէնս, ցորչափ
բռնացեալ տիրէ անդէն Պիսիսորա-
տոս: Այլ ես յանդորրու կամ աս-
տէն՝ 'ի քաղաքի յորում թագաւորէ
հաւասարութիւն. սակայն և այնպէս
եկից առ քեզ՝ ախորժ կամօք բնակել
զժամանակ ինչ ընդ քեզ և:

Գնաց Սողոն՝ 'ի Սարդիա՝ հարկեալ
'ի ժտելոյ Արեսոսի, որ եռանդեամբ
բորբոքեալ էր տեսանել զնա: Յանցա-
նելն ընդ Լիւդիա՝ դիպաւ նախարա-
րակոյտ բազմութեան. և ընդ նոսա
ծառայք և սպասահարկութիւն սաս-
տիկ, որ կարծէր թէ թագաւորն ինքն
անդր իցէ: Իսկ իբրև լինէր նմա յան-
դիման լինել Արեսոսի՝ որ մնայր նմա
բազմեալ յարքունի դահուն, պեր-
ճացեալ չքեղ փառօք ամենայն զար-
դուն իւրով, ոչինչ զարմանս երևեցոյց
Սողոն ընդ այն տեսիլ մեծաշուք: Ատէ-
ցնա Արեսոս. Հիւր իմ, գիտեմ զիմաս-
տութիւն քո՝ 'ի համբաւոյ քումմէ,
գիտեմ զի երկայն ուղի հատեալ ըն-
թացար ընդ աշխարհս յոլովս, ասա-
ցիս. տեսեր ուրեք զայր ոք չքեղապանձ
զգեցեալ քան զիս: Այո՛, ասաց Սո-
ղոն. փասեանք, աքաղաղք և սիրա-
մարդք պարծ շրջին քան զքեզ. քանզի
որ ինչ նոցա պերճութիւն է՝ 'ի բնու-

Թենէ է. զի ոչ խնամ կալան նոքա
զարդարել զինքեանս :

Այս անակնկալ պատասխանի ապ-
շեցոյց զԱրեսոս. հրաման ետ իւրոցն՝
բանալ զամենայն զգանձս իւր, և ցու-
ցանել Սողոնի զգանկալի ցանկալի
սպասս ապարանից իւրոց : Առջեաց
զնա երկրորդ անգամ առաջի իւր, և
ասէ ցնա . Տեսեր բնաւ այր երջանիկ
քան զիս : Այո, կրկնեաց Սողոն,
զՏելլոս աթենացի, որ եկեաց իբրև
այր առաքինի ՚ի բարեկարգ հասարա-
կապետութեան. եթող երկու որդիս
առաքինիս, և ստացուած չափաւոր՝
բաւական ՚ի պէտս նոցա, և երջան-
կացաւ՝ մեռանելով զէն ՚ի ձեռին,
յաղթութիւն տարեալ ՚ի գլուխ ՚ի
փառս հայրենեաց. որում և շիրիմ՝
կանգնեցին նմա աթենացիք՝ ՚ի տեղ-
ւոջն ուր անկաւ, և մեծաշուք պա-
տուեցին զյիշատակ նորա :

Առաւել ևս զարմացեալ Արեսոսի՝
ապուշ զոմն համարեցաւ զՍողոն : Իսկ
արդ՝ ասէ, ո՞վ իցէ երջանիկ ՚ի մարդ-
կանէ յետ Տելլոսի : Ետ պատասխա-
նի. Իին երբեմն երկու եղբարք. միոյն
անուն Ալէոբիս, և երկրորդին Բիտոն,
արք. քաջալանջք, որ յաղթական երևե-
ցան յամենայն մրցմունս, և սիրէին
զմիմեանս սերտ սիրով : Ի տօնս ուրեք՝

մայր նոցա քրմուհի դիցն շերայ՝ զոր սիրէին խանդակաթ սիրով, հարկաւորեալ էր գնալ մատուցանել պատարագ ՚ի մեհեանն. և զի յապաղեաց ՚ի վարել զեղինսն, Ալէոբիա և Բիտոն կառամուտք եղեն՝ և ածին գնա ՚ի դէմ եղեալ տեղին: Համօրէն ժողովուրդն լիաբերան ներբողէր զնոսա. և մայր նոցա յափշտակեալ ՚ի խնդութենէն, աղերս արկ շերայի՝ զփոխարէնն առատաձեռնել որդւոցն. և ապա յետ նուիրացն և ընթրեաց, մտեալ նոցա ՚ի մահիճս, ոչ ևս առաւօտեցին. զի դտան մեռեալ. արժանի եղեալ կատարիլ ՚ի մեծ փառսն՝ անվիշտ և անցաւ: Յայնժամ ցասուցեալ Արեսոսի՝ իսկ դու ոչ դասես ասէ՝ զիս ՚ի համար հասելոցն յերջանկութիւն: Ետ պատասխաի Սողոն. Արքայդ լիւղացւոց, կան քո ճոխութիւնք բազում, տէր ես բազում ժողովրդոց. սակայն կեանք մարդկան յեղափոխ են. վասն որոյ անհնար է հաւաստի սահմանել զբարեբաստութիւն մարդոյ յառաջ քան զկատարած կենացն: Աւուր աւուր ծնանի ժամանակն անակնկալ պատահարս՝ զոր ոչ ոք կարծէր երբէք. չէ ումք հաւաստի լինել ընդ յաղթութիւն՝ մինչև ՚ի դուրխ հասեալ պատերազմին: Գժ դմնեցաւ ընդ

այն Արեսոս . և ոչ ևս յօժարեաց տեսանել զնա :

Եսովլոս որ ընդ ժամանակս ընդ այնոսիկ 'ի Սարգի էր՝ եկեալ անդր հրամանաւ Արեսոսի 'ի զուարճացուցանել զնա , ոչ հաճեցաւ ընդ դործս արքայի 'ի մերժելն զայնպիսի այր զգօն . և ասէ ցնա . Ո՛վ Սողոն . կամ չէ՛ արժան խօսել ընդ թագաւորս , կամ միայն զհաճոյականսն ասել նոցա : Կա՛ մանաւանդ , ասէ Սողոն , կամ չխօսել բնաւ ընդ նոսա , կամ ըստ պատեհ ժամուն զբարիոքն խորհուրդ տալ , և միշտ զճշմարիտն ասել ցնոսա :

Աիւրոս պարսից արքայ բանտարդել պահէր զԱստիագէս զհաւ իւր մայրենի , կապտեալ զնա 'ի թագաւորութենէն . սրտմտեալ ընդ այն Արեսոսի , կուսակից եղև Աստիագէսի , և դիմեաց հասանել մարտիւ պատերազմի 'ի վերայ պարսից : Եւ քանզի էին նորա բազմութիւն գանձուց . և 'ի դուռն կայր ազգի՝ քաջամարտիկ հանդիսացելոց ընդ համօրէն աշխարհ , դիւրաւ առ ձեռն պատրաստ կարծէր զամենայն ինչ : Այլ ձախողակ բազդիւ խորտակեցան զօրք նորա , և ինքն փախուցեալ անկաւ 'ի Սարգիա , յորում պաշարեցաւ և ձերբակալ եղև՝ յետ չորեքուսանօրեայ մաքառման :

Իբրև յանդիման եղև Աիւրոսի՝ հրա-
 մայեաց ՚ի շղթայս պնդել զնա, և
 հանել ՚ի փայտակոյտ բարձր, և անդ
 կապեալ զնա ընդ շորեքտասան ման-
 կունս լիւդացիս, զի այրեսցին առաջի
 Աիւրոսի, և ամենայն պարսից: Իբրև
 հուր հոտոտէր ՚ի փայտակոյտն՝ յայնմ՝
 աւաղելի պահուն յիշեաց Արեսոս ըզ-
 բանան Սողոնի. յոգւոց եհան. Ո՛վ
 Սողոն. Սողոն Սողոն: Հիացաւ ընդ
 այն Աիւրոս. եհարց՝ ո՞ր աստուած է
 առ որ կարդայ յարկածս իւր: Ո՛չ
 ետ պատասխանի Արեսոս. իսկ իբրև
 բռնադատեցաւ ՚ի խօսել, ճնշեալ ՚ի
 դառնութենէ սրտին՝ ասէ. Եղունկ
 զիս. յիշեցի ես զայրն՝ զոր պարտ էր
 թագաւորաց ցանգ առ իւրեանս պա-
 հել, և յարգել զխորհուրդս նորա՝ ա-
 ռաւել քան զգանձս և զմեծութիւնս
 իւրեանց: Ժտեցաւ ասել՝ ո՞վ այն իցէ.
 յաւել նա ՚ի բանս իւր. Այր ոք ի-
 մաստուն յԵլլադայ, զոր ես փափա-
 քանօք յղեալ կոչեցի երբեմն՝ սքանչա-
 ցուցանել զնա ընդ յաջողուածս իմ.
 նորա բնաւ ոչ զարմացեալ ՚ի տեսիլ
 անբաւ ճոխութեանց իմոց, ետ ինձ
 պատասխանի անխառով իբրու խելա-
 մտել զիս կամեցեալ, թէ այդ ամե-
 նայն անմիտ ընդունայնութիւն է.
 այլ օրէն է մնալ կատարածի կենաց,

և մի յանձնաստատան լինել ընդ յա-
 ջողուածս՝ որ ռանակոխ է յողունց
 թշուառութեանց : Արդ հասու լի-
 նիմ ճշմարտութեանն առ ՚ի նմանէ
 ասացելոց : Մինչդեռ զայսոսիկ խօսէր
 Արեսոս, ծաւալէր ճարակէր բոց հրոյն
 զստորոտս փայտակուտին, և ցոլանայր
 ՚ի վեր : Խանդաղատեցաւ Աիւրոս ընդ
 բանս Արեսոսի : Աղիողորմ վիճակ առն
 թագաւորի որ երբեմն հզօրացեալ՝ սը-
 րագոյնս թափանցանց եղև ընդ սիրտ
 նորա . խիթացաւ՝ մի դուցէ յապա-
 գայն և ինքն նմին վիճակի հանդիպեա-
 ցի . անդէն վաղվաղակի հրաման ետ
 շիջուցանել զհօւրն, արձակեաց վնա
 ՚ի ծանրակիր կապանաց շղթայիցն .
 ամբարձ յաւագութիւն, և խորհր-
 դովք նորա վարեցաւ յիրս ծանունս :

Իսկ Սողոն իբրև մեկնեցաւ ՚ի Արե-
 սոսէ՝ գնաց բնակել ՚ի Աիլիկիա . ուր
 կանգնեաց քաղաք՝ յիւր անունն ա-
 նուանեալ Սողոս . և անդ լուաւ թէ
 տակաւին բռնակալէ Պիսիատրատոս,
 և ստրջացեալ են աթենացիք զի ոչ խա-
 փան արկին ձեռնարկութեան նորա :
 Գրեաց նոցա Սողոն թուղթ օրինակ
 զայս . « Անիրաւէք դուք թէ բողոք
 ունիք ընդդէմ աստուածոց վասն տա-
 րաբաղդիկ վիճակիդ ձերոյ . և այժմ
 զի վիշտ նեղութեանց հասեալ կալեալ

է զձեզ՝ մեղադիր լերուք յողորմողութեան և անմտութեան ձերոյ՝ որ ոչ անսացէք արանց հայրենասիրաց . և զի կապեցայք ՚ի խոստմունս և ՚ի հնարագիտութիւնս առն նենգաւորի : Դուք ինքնին շնորհեցէք նմա թիկնապահս առնել զիւրե , որք օժանդակեսցեն նմա պնդել զձեզ ՚ի գերութեանդ զամենայն աւուրս կենաց ձերոց » :

Պերիանդր բռնաւոր կորնթացւոց լիագոյնս ծանուցեալ Սողոնի զվիճակ թագաւորութեան իւրոյ , աղաչեաց զնա լինել ինքեան խորհրդակից բարեաց : Գրեաց նմա Սողոն զբանս զայսօտսիկ : « Գրես դու ինձ թէ բազումք են դարանակալք կենաց քոց : Թէպէտև ազատեսցիս դու ՚ի թշնամեաց քոց՝ սպանանելով զնոսա , ոչ ՚ի լաւագոյն ինչ յանկեսցի վիճակ քո : Յորս յուսացեալ ես , նոքին իսկ դաւաճանեսցեն զքեզ . և թերևս այր այնպիսի՝ որ խիթայցէ վասն անձին իւրոյ , կամ որ անգոհ իցէ ընդ կեղակարծ արարս քո , և կամ որ համարիցի պաշտօն հարկանել հայրենեաց : Լաւագոյնն յոր քեզ հնար իցէ ձեռն արկանել տեղի տուր իսպառ ՚ի բռնաւորութենէդ : Իսկ թէ ոչ այդպէս՝ կալքեզ սպայակոյտ զօրս՝ որք սանձահա-

րել կարասցեն զերկիրդ, զի ոչ ևս տե-
ղի երկիւղի մնասցէ քեզ, և ոչ զոք տա-
րագրեսցես յօտարութիւն:

Անց Սողոն 'ի Աիպրոս՝ ուր կապե-
ցաւ բարեկամութեամբ ընդ Փիլոկի-
պրոսի թագաւորի Եպիսայի. և զի յան-
արգասաւոր տեղւոջ շինեալ էր այդ
քաղաք, խորհուրդ ետ նմա Սողոն յար-
գաւանդ երկիր փոխել զքաղաքն. ըն-
տրեաց դաշտավայր գեղեցիկ և բերրի,
և ինքնին ձեռնարկեալ 'ի նոյն, ժա-
մանեաց յամբոկ գործոյն: Եւ 'ի յի-
շատակ երախտեաց նորա, կոչեաց Փի-
լոկիպրոս զքաղաքն Սողէս:

Սողոնի բնաւորութիւն 'ի կեանս
իւրում չէր ինչ թշնամի ամոքարար
զուարճութեանց: Սիրէր զերախանս
կոչնոց, և զերաժշտութիւն, և որ ինչ
սատար էր հեշտութեան կենաց: Իսկ
անհաշտական ատելութիւն ունէր
ընդ տեսարանս յորս լինէին մտացածին
բանք ինքնաստեղծք ըստ հաճոյս. վասն
զի զայն ամենայն պատճառ մնասուց
դնէր հասարակաց, և զի բազմադիմի
խռովութիւնք ծնանին անտի: Մինչ
դեռ յաթէնս էր 'ի մեծաշուք փառս,
երևեցաւ Թեսպիս՝ ողբերգել զողբեր-
դութիւնան զորս յօրինեալ էր: Եւ
քանզի արդիւնք էին նորօրինակ հնա-
րագիտութեան, կարի իմն սփոփանս

էին ժողովրդեան իրքն այն : Եւ զի յօժարամիտ էր Սողոնն ՚ի զուարճութիւնս, յաւուր միում գտաւ անդէն. և ՚ի կատարել խաղուցն՝ կոչեաց առ ինքն զԹեսալիս, և ասէ ցնա, շամաչնս դու ստախոսել առաջի ժողովրդեան : Այդ չէ ինչ՝ ասէ Թեսալիս, զի ընդ խաղս է : Ցասուցեալ Սողոնի՝ յաւել ՚ի վերայ, քաջ է. այլ եթէ ՚ի ծիծաղել նոցա հաճոյական դատիցեն ըզստութիւնդ, ոչ յետ բազում ժամանակաց տպաւորեալ գոցուք զայդ յարարս մեր և ՚ի գործս կարևորս : Եւ յաղագս այսորիկ յորժամ Պիսիստրա տոս երևեցաւ ՚ի հասարակաց հրապարակի՝ համակ յարեան թաթաւեալ, յիշատակեալ Սողոնի զթատերական տեսարանս՝ յոգւոց եհան. Ահաւասիկ աղբերակն դառնութեան՝ յորմէ հոսեն այս ամենայն խաբէութիւնք :

Են որք Սողոնի համարին զհաստատութիւն Արիսպագին. որ էր կառուցեալ ՚ի մեծամեծ աւագորերոյ, որոց ՚ի դուռն տարեալ էր զամենայն գործակալութիւնս յԱթէնս : Հարցաւ Սողոն յաւուր միում. ո՞ր է պետութիւն քաջ բարեկարգեալ : Ետ պատասխանի. այն է, յորում նորին իսկ որք ոչն արհամարհեցան՝ ջանան եռանդեամբ դարման տանել փնասուն եղև.

լոյ այլում, որպէս թէ անձանց իւրեանց էր տոյժն :

Մօտ 'ի կատարած կենաց իւրոց ձեռն արկեալ էր նորա 'ի քերթուածս յաղագս որոց լուեալ էր յԵգիպտոս 'ի վերայ Ատլանտեան կղզւոյ որ անդր քան զժանուցեալ ովկիանոսն : Մեռաւ 'ի Աիպրոս՝ մինչև աւարտեալ քերթողութեանն 'ի ծէ ողիմպիադին, իբրև զութանամենիւք : Պատուիրեաց տանել զմարմին իւր 'ի Սաղամինա . և անդ կիղեալ 'ի հուր սփռել զաճիւնն ընդ անդաստանս : Յետ մահու նորա կանգնեցին նմա աթենացիք արձան պղնձի, ունելով 'ի ձեռին զմատեան օրինացն իւրոց, 'ի հանդերձս իշխանի ժողովրդեան : Նոյնպէս կանգնեցին և բնակիչք Սաղամինայ՝ 'ի տարազ ատենաբանի հրապարակախօսելոյ առ ժողովուրդն, ծածկեալ ունելով զձեռսն ընդ զգեստովն :

Պ Ի Տ Տ Ա Կ Ո Ս

Ճաղկեալ 'ի քառասներորդ երկրորդ
 ողիմպիադին . մեռաւ յերրորդ ամի յիս .
 ներորդ երկրորդ ողիմպիադին . 'ի հա-
 սակի եօթանասուուն ամաց :

ՊԻՏՏԱԿՈՍ որդի Իրրադիոսի ,
 ազգաւ թրակացի . ծնաւ 'ի Միտիլի-
 նէ 'ի փոքրիկ քաղաքի Լեսբոս կղզւոյ
 դքսաներորդ իններորդ ողիմպիադաւ :
 Յերիտասարդութեան անդ իւրում
 արիասիրտ գտաւ , քաջ զօրական , և
 յօրավար մեծանուն , և յամենայնի այր
 բարի : Այս բան էր հանապազ 'ի բե-
 բան նորա . պարտ է յարմարել զանձն
 ըստ ժամանակին , և յամենայնէ կթել
 շահ :

Առաջին գործ մեծահանդէս արու-
 թեան նորա՝ եղև դաշնաւորել ընդ
 եղբօրն Ալկէոսի ընդդէմ բոնակալին
 Մելանկրեայ , որոյ բռնացեալ տի-
 բեալ էր Լեսբոս կղզւոյ , և խորտա-
 կեաց զնա : Այսու ձեռնարկութեամբ
 դհամբաւի հարաւ քաջութիւն նորա :
 'ի բազում ժամանակաց հետէ անհաշ-
 տական պատերազմաւ զայրացեալ էին

ընդ միմեանս միտիլենացիք և աթե-
 նացիք՝ վասն տէրութեան կալուածոց
 իրիք՝ անուանելոյ Աբիլլիտիդէս . յո-
 բում առաջնորդէր զօրուն միտիլե-
 նացւոց՝ Պիտտակոս . իբրև հանդիպե-
 ցան միմեանց ճակատքն երկոքին , և
 մերձ էին բախիլ ընդ միմեանս , խոր-
 հուրդ կալաւ Պիտտակոս մենամար-
 տութեամբ վճարել զիրան . վասն որոյ
 ձայնեաց առ Փրինոն զօրավար աթե-
 նացւոց , որ յաղթական դտեալ էր յա-
 մենայն պատերազմունս , և բազում
 անդամ պսակեալ յողիմպիական մրը-
 ցանսն , գալ ելանել ՚ի ճակատ : Յան-
 ձին կալաւ Փրինոն զկռիւն . և սահման
 եղաւ զի որ յաղթիցէ անխափան տէր
 լիցի գեանոյն՝ վասն որոյ կռիւն է : Յա-
 ռաջ խաղացին զօրապետքն երկոքին
 ընդ մէջ երկուց ճակատուց . և քանզի
 թագուցեալ էր Պիտտակոս ընդ վահա-
 նովն ցանց իմն , և ՚ի յաջող պահուն
 յեղակարծում թակարդապատեաց
 նովին զՓրինոն , որում ոչ ակն ունէր
 նա . և ձայն բարձեալ աղաղակեաց ,
 ոչ մարդ որսացայ , այլ ձուկն . սպան
 զնա Պիտտակոս առաջի զօրացն երկո-
 ցուն , և տիրեաց վիճակին : Աստի
 սկիզբն կալաւ ցանցս երևեցուցանել
 ՚ի տեսարանի ՚ի զուարճութիւն ժո-
 ղովրդեան :

Ընդ անցանել աւուրց երիտասարդութեան Պիտտակոսի՝ զիջաւ և եռանդն արեան նորա, և զՏեո եղև առ սակաւ սակաւ ճաշակել զբաղցրութիւն իմաստասիրութեան: Միտիլենացիք քանզի մեծապէս պատուէին զնա, ետուն նմա զառաջնորդութիւն քաղաքի իւրեանց: Երկարաձիգ և բազմաշխատ փորձ իրաց քաղաքակա նութեան՝ ուսոյց նմա անխռով հաստատութեամբ ակնարկել ընդ այլ և այլ պատահարս բաղդին: Սահմանեալ անդէն զհանդամանս հասարակապետութեանն արդար օրինօք՝ հրաժարեաց յիշխանութենէն զոր կալաւ ընդ ամս երկոտասան. և ամենևին թութափեաց յանձնէ զվիշտ զբաղանաց:

Արհամարհեաց Պիտտակոս զբարիս բաղդի՝ յետ ընդերկար փափաքելոյ նոցուն. իսկ միտիլենացիք՝ ՚ի շնորհս մեծամեծ վաստակոց նորա զոր վաստակեալ էր յօգուտ նոցա, մատուցին նմա կալուած գետնոյ՝ ՚ի վայրս ուրեք զուարճութեան, ոռոգեալ ՚ի վտակաց, շրջափակեալ անտառօք և այգեօք, թո՛ղ և զանդաստանս, յորոց ՚ի մտիցն դիրին էր նմա վարել կեանս մեծապատրաստ հանդերձանօք յառանձնութեան անդ իւրում: Այլ Պիտտակոսի նետընկէց եղեալ ամենայն զօրութեամբ

իւրով, շատ համարեցաւ անձին զքա-
ռակուսի չափ նետաձգութեանն :
Աքանչացեալ աւազանւոյն ընդ սակա-
ւապիտութիւնն նորա՝ թախանձանօք
հարցին ցնա զպատճառն : Պիտտակոս
համառօտիւ ետ պատասխանի. մասնն
օգտակար է քան զբոլորն :

Գրեաց առ նա Արեսոս արքայ լիւ-
դացւոց՝ դալ առ ինքն, և տեսանել
զճոխութիւնս իւր. պատասխանի ա-
բար նմա Պիտտակոս ըստ այսմ օրի-
նակի. Առջես զիս դալ այդր ՚ի լիւ-
դիա ՚ի զնին պերճութեան քո. ոչինչ
երկմտեմ ես՝ թէ որդին Ալիատեայ
չիցէ հզօրագոյնն ՚ի մէջ թագաւորաց.
սակայն ես թէ և ունիցիմ զամենայն
զոր դուդ ունիս, ոչ արդեօք մեծատուն
լինէի : Ինչք չեն ինձ պիտոյ. շատ հա-
մարիմ ես զսակաւն որ կարեւորն է ՚ի
պէտս իմ, և ոմանց բարեկամաց իմոց :
Սակայն և ՚ի վերայ այսր ամենայնի՝
ժամ գտից հաճել վկամս քո :

Իբրև ընդ իւրով իշխանութեամբ
նուաճեաց Արեսոս զոր յԱսիա զՅոյնս,
եդ ՚ի մտի նաւահանդէս կազմել՝ և
ձգել զձեռն իշխանութեան իւրոյ ՚ի
վերայ կղզեաց, յայնժամ գնաց Պիտ-
տակոս ՚ի Սարդիա. եհարց ցնա Արե-
սոս. զինչ զրոյցք իցեն յԵլլադայ. ա-
սէ ցնա Պիտտակոս, գնոյ առ ին բնա-

կից կղզեաց տապն հազար երիվարս,
 և կամակար պնդեալ են վառել ընդ
 դէմ քո, և հասանել հարկանել զՍար
 դիա: Ճմարտութեամբ կալեալ զայս
 Արեսոս, ասէ. Իցէ՞ թէ շարժեսցեն դիք
 զբնակիչս կղզեաց՝ գալ այրուծիով
 հարկանել զլիւդացիս: Պատասխանի
 ետ Պիտտակոս, ապա ուրեմն փափա-
 քես դու տեսանել ձիաւորեալս զբնա-
 կիչս կղզեաց և հասեալս այսր՝ ի ցա-
 մաք: Կարի յիրաւունս. բայց գիտիցեն
 արդեօք զի ծաղրեն նոքա զքե՛ ի լսել
 անդ՝ թէ դու նաւամարտիկ պատե-
 րազմաւ յարձակիս ՚ի վերայ նոցա.
 հապշտապ ՚ի ծով ընթանան նոքա՝ ՚ի
 դիմի հարկանիլ քեզ և լիւդացւոց,
 վրէժ լուծանել զաղետից Յունաց զորս
 ՚ի գերութիւն վարեցեր: Հաւատաց
 Արեսոս հաստատութեամբ թէ հա-
 սու է Պիտտակոս խորհրդոց իւրոց.
 վասն որոյ զանց արար զպատրաստու-
 թեամբ նաւուց. և դաշնաւորեցաւ
 բարեկամութեամբ ընդ Յոյնս բնա-
 կիչս կղզեաց:

Անդեղեայ էր Պիտտակոս պատկե-
 րաւ. աչքն ցաւազին. յոյր էր և դան
 դաղ. և ընթացքն խեղաթիւր՝ վասն
 ցաւոց ոտիցն: Առեալ էր նորա կին
 զդուստր Դրակոնի օրէնսդրի. այլ
 կինն ըստ բուսոյ բարուց դուռզ էր և

ամբարտաւան . արհամարհութեամբ
 դնայր ընդ այր իւր 'ի սակս տղեղու-
 թեան նորա , և զի համարէր զանձն
 յականաւոր ազգատոհմէ : Յաւուր
 միում մինչդեռ ընթրիս տայր Պիտտա-
 կոս բազմաց 'ի բարեկամաց իւրոց ի-
 մաստասիրաց , և ամենայն ինչ կազմ-
 էր . կինն նորա որ անդուլ դժպէին էր ,
 դնացեալ թաւաղլոր կործանեաց զսե-
 ղանն և զոր 'ի վերայ նորա կերակուրս :
 Ոչինչ զչարեցաւ ընդ այն Պիտտակոս ,
 միայն ասաց առ կոչնականսն . ցնո-
 րեալ է 'ի մտաց , և արժանի է կարեկ-
 ցութեան : Այս անանդորր երկպա-
 ոակութիւն ընդ նա և ընդ կինն նորա՝
 մեծապէս խորշելի եցոյց նմա զտարա-
 բազդիկ ամուսնութիւն : Եհարց ցնա
 երբեմն այր ոմն , թէ զոր առնուցու 'ի
 կնութիւն յերկուց՝ որոց միոյն վիճակ
 համահանդէտ իցէ իւրումն , և երկրոր-
 դին՝ ազնուական հարստութեամբ և
 սերնդեամբ : 'Ի վեր ամբարձ զգաւա-
 ղանն յոր յեցեալն էր , և ասէ ցնա . դնա՛
 ընդ կողմն ընդ այն , ուր խաղան ման-
 կունք , և արա՛ զոր նոքա տան քեզ
 խորհուրդ վասն այդր : 'Ի դնալ անդր
 առնն՝ տեսանէ զմանկունսն զուար-
 թամիտ բերկրեալ 'ի խաղս , և ասէին
 ցմիմեանս . ընտրեա՛ զհաւասար քո :
 Այս բան տպաւորեաց 'ի սիրտ նորա՝

ոչ ևս ակն դնել 'ի կին որ ազնուա-
կան էր քան զնա, այլ ունել զհաւա-
սարն իւր :

Ժուժկալ էր Պիտտակոս 'ի գինւոյ,
և ըմպէր միայն ջուր աղբերահոս. թէ-
պէտ անոյշ գինեօք գինեւէտ է Միտի-
լինէ : Գաղտ խորհուրդ ետ Պերիան-
դրի՝ հրաժեշտ տալ 'ի գինւոյ՝ թէ կա-
միցի տէր լինել Աորնթոսի՝ զոր 'ի մտի
երկնէր, և թէ կամիցի հաստատուն
կալ 'ի բռնաւորութեանն : Պատուէր
եղ՝ զի որ միանգամ յանցանիցէ յար-
բեցութեան՝ կրկին պատժեսցի : Սո-
վորութիւն էր նորա՝ ասել թէ այն-
պէս իմն հզօրագոյն է հարկն, զի և դիք
անգամ պարտապան են հնազանդել
օրինաց նորա : 'Ի հասարակաց պե-
տութեան այր իւրաքանչիւր 'ի հան-
դէս հանէ զբաջութիւն մտաց իւրոց :
Պարտ է իմաստնոց նախատես լինել
արկածից՝ որոց հնար իցէ հանդիպել,
առ 'ի բաց մերժել զնոսին : Եւ վեհանձն
մարդկան է անդրդուութեամբ տանել
չարեաց 'ի հանդիպելն : Դժուարին է լի-
նել այր գովելի : Չիք ինչ լաւագոյն՝ քան
ջանալ բարիօք առնել զոր 'ի ձեռին կայ :
Առ 'ի բարւոք 'ի դուրս հանել զգործն՝
պարտ է բովանդակութեամբ խելա-
մտել ընդ այն. և վաղընդիոյթ կա-
տարել զխորհեցեալն : Մեծապանծ

յաղթութիւն՝ այն է՝ որ լինիցի առանց արեան ճապաղեաց. զի առ ՚ի քաջ ղեկավարութիւն պետութեան՝ հարկ է զի թագաւորն և ամենայն աւագանին՝ իբրև դշտին սոսկականն հնազանդ լիցին օրինաց :

Ասէր նա ցաշակերտս իւր. կեցջիք յիշատակաւ մահու, զի յիշեսջիք և զկեանս : Երբ կամիցիք առնել ինչ, մի երբէք պանծասջիք ընդ այն. զի թէ ըստ ձախողակ իմն արկածից ոչ մարթասջիք ՚ի գլուխ հանել, յայնժամ լինիք յամօթ նախատանաց : Մի այսպն առնէք զոք վասն հիգութեան իւրոյ, զի մի և դուք երբեմն նոյնպէս նկուն լինիջիք : Մի չարախօս լինիցիք զումեքէ, և ոչ զթշնամեաց ձերոց : Պահեցէք զբարեկամս ձեր, և կեցջիք ընդ նոսա աշալուրջ զգուշութեամբ, որպէս թէ եկեսցէ օր՝ յորում ոխերիմ թըշնամի լինիցին ձեզ : Սիրեցէք զողջախոհութիւն, զժուժկալութիւն, և զճմարտութիւն : Երկերուք յաստուածոց : Դարձուցէք հաւատարմութեամբ զաւանդն որ հաւատացաւ ձեզ, և մի յայտնէք զթագուն խորհուրդս :

Յօրինեալ էր նորա ոտանաւորս ինչ՝ յորս ասէր թէ հարկ է նմա առնուլ զաղեղն իւր և զնետս, և զհետ պնդել

ի սպանութիւն առնն չարի, ուր և զի պեսցի նմա . քանզի սիրտ նորա երկխօս է, նոյնպէս և բանք բերանոյ նորա կեղակարծ :

Յղեաց առ նա Արեսոս ՚ի դարձի իւրում արծաթ բաղում ՚ի պարզե : Ոչ յօժարեաց Պիտտակոս ընդունել զայն, և պատասխանի ետ անվրդով հաստատութեամբ. ճոխացեալ եմ կիսով չափ աւելի քան զոր կամէի . վասն զի եղբայր իմ մեռաւ անորդի, և ինձ հասանէ ժառանգել զնա : Առ ձեռն պատրաստ էին Պիտտակոսի պատասխանիք . և ոչ ուրեք խռովեցաւ նա ընդ անակընկալ խնդիր հարցեալ առ նա : Հարցաւ յաւուր միում. զինչ յաւէտ նշաւակ է յեղափոխութեան. ետ պատասխանի. ընթացք ջուրց, և կանացի բնութիւն : Որ այն է՝ զոր առնել չէ արժան, բայց թէ անազան ուրեմն . Իրամ փոխ առնուլ ՚ի բարեկամէն : Որ է զոր միշտ պարտ է առնել . Շահ կլթել ՚ի բարւոյն և ՚ի չարէն որ ընդ առաջ ելանիցէ : Չինչ առաւել հաճոյական է . Ժամանակն : Չինչ թագուն . Ապագայն : Չինչ հաւատարիմ . Երկիր : Չինչ հաւատադրութ . Ծով : Յասել ցնա Փոկայիկոսի, կամիմ խընդրել զայր առաքինի վասն իրաց ինչ զոր ՚ի մտի ունիմ . պատասխանի ետ

Պիտտակոս, բազումն խնդրեսցես, և ոչ զոք դացես :

Տիրրէոն որդի Պիտտակոսի մինչդեռ յաւուր միում 'ի Աումէս քաղաքի կայր 'ի կրպակ վարսավիրայի՝ ուր խմբէին երիտասարդք զբանիւք դեղերել անդէն, ոմն 'ի դործավարաց յանզգաստութենէ ընկէց 'ի ձեռանէն զտապարն, որ անկաւ 'ի վերայ գլխոյն Տիրրէոնի, և յերկուս ձեղքեաց : Քննեալ Պիտտակոսի խնամով զամենայն զղիարդն դործոյն՝ հասու եղև անմեղութեան առնն, և արձակեաց զնա : Քանզի, ասէ, յանցումն յոչ կամաց դործեցեալ՝ արժանի է թողութեան. և որ 'ի նմանէ վրէժ լուծանէ՝ մեղապարտ է վասն յանիրաւի պատուհասելոյ զայր անպարտ :

Զուարճութիւն էր Պիտտակոսի 'ի քերթուածս պարապել. քանզի օրէնք նորա, և այլ ևս գրաւոր վաստակք՝ տաղաչափեալ են : Հանապազօրդեան աշխատութիւն էր նորա աղալ ալիւր յերկանս : Դա ինքն եղև վարժապետ Փերեկիդիայ՝ զոր համարեցան բազումք 'ի կարգ իմաստնոցն Ալլադայ. և մահ նորա նորօրինակ իմն դիպաւ : Քանզի օրպէս պատմենն՝ մինչդեռ պատերազմաւ վառեալ էին ընդդէմ միմեանց եփեսացիք և մահնեսա-

ցիք, Փերեկիդէս որ հարեալ էր յոյժ
 յեփեսացիս, յաւուր միում դիպաւ
 առն միում զճանապարհայն, և եհարց
 ցնա զքաղաք հայրենեացն. և իմացեալ
 թէ եփեսացի է, կալ զիս, ասէ, զոտից
 իմոց, և ձգեալ տարցես մինչև յեր-
 կիրն մազնեսացւոց. և ընթացեալ
 պատմեա՛ յԵփեսոս՝ զոր ինչ քեզ պա-
 տուիրեաց առնել Փերեկիդէս. յիշե-
 ցո՛ նոցա՛ թէ մի զանց արասցեն թա-
 ղել զիս՝ յորժամ ՚ի գլուխ հանցեն
 զյաղթութիւնն: Ընդ քարշ տարաւ
 այրն զՓերեկիդէս. և անտի ընթա-
 ցեալ յԵփեսոս՝ պատմեաց զոր ինչ դի-
 պաւ նմա: Յաւուրն երկրորդի խմբե-
 ցան ՚ի պատերազմ, և քաջայաղթ ՚ի
 գլուխ հանին զմարտն. և ճեպով յար-
 ձակեալ մինչ ՚ի տեղին ուր անկեալն
 էր Փերեկիդէս, գտին զնա տապաստ
 անկեալ ՚ի հրապարակին. ամիոփե-
 ցին զգիական նորա մեծաշուք յուղար-
 կաւորութեամբ:

Մեռաւ Պիտտակոս ՚ի Լեսբոս
 կղզւոջ, ՚ի հասակի եօթանասուն ա-
 մաց, ՚ի ծբ՝ ողիմպիադին:

Բ Ի Ա Ս

Ժամանակակից Պիտտակոսի, նշանաւոր
երևեալ յաւուրս յորս թագաւորէին
Ալիատէս և Կրեսոս :

Բ Ի Ա Ս 'ի Պրիենէ փոքր քաղաքէ
Կարիոյ՝ քաջանուն դտաւ 'ի Յոյնս
առ թագաւորութեամբ Ալիատեայ և
Կրեսոսի թագաւորաց Լիւդիոյ, 'ի
քառասներորդ ողիմպիադէն՝ մինչև 'ի
մահ իւր: Այր առաքինաջան էր՝ ոչինչ
խնդրելով զանձինն, խորազնին 'ի քա-
ղաքավարութեան, և համեստ: Ան-
պաճոյճ էին կեանք նորա թէպէտ և
ազնուական էր ծննդեամբ, սփռէր
զստացուածս իւր 'ի պէտս կարօտելոց,
հոչակեալ էր անուն նորա քան զա-
մենայն պերճախօսաց այնր ժամանա-
կին. ջանալով 'ի ձեռնտուութիւն ազ-
քատաց, և ամենեցուն որոց 'ի վիշտս
էին. ոչ մի ինչ օգուտ խնդրելով 'ի նո-
սին, բայց պաշտօն հարկանել հայրե-
նեաց իւրոց: Ոչ ձեռնարկէր 'ի դատ՝
զոր ոչ արդարացի վարկանէր. յա-
ռակս համարեալ էր այս ընդ ամենայն
երկիրն ընդ այն. և յորժամ յայտ

առնել կամէր որ թէ անստղիւտ է
դատն, ասէր. ստանձնէ զայդ Բիաս :
Իսկ 'ի ներբողելն զատենախօս որ մե-
ծաւ գովութեամբ, ասէր. քաջ է քան
դ Բիաս :

Հէնք ոմանք ծովամարտիկք յարձա-
կեալ երբեմն մօտ 'ի Մեսենէ քաղաք
Պեղոպոնետոսի, յափշտակեցին անտի
բազում աղջկունս, զորս տարեալ վա-
ճառեցին 'ի Պրիենէ : Գնեաց Բիաս
զնոսա, կալաւ առ իւր, և սնոյց իբրև
զդատերս իւր. յետ այնորիկ տուեալ
նոցա պարգևս՝ դարձոյց անդրէն առ
Ծնողս իւրեանց. այս առաքինի գործ
նորա նիւթեաց նմա մեծարանս բա-
զում. քանզի և բազումք ոչ այլ ինչ
անուռ կարգային նմա, բայց իշխան
խմաստնոց : Յետ ժամանակաց ինչ 'ի
վերայ անցանելոյ ձկնորսք ոմանք մե-
սենացիք որսացեալ ձուկն վիթխարի՝
գտին յորովայն նորա անօթ ոսկեղէն,
յորում դրոշմեալ էր այսպէս. Իմաստ-
նագոհն : 'ի խորհուրդ ժողովեցաւ
ծերակոյտն Մեսենեայ՝ թէ ում ար-
դեօք հանցեն զայն 'ի պարգև : Օրիորդ-
քն առ որս մարդասիրեալ էր Բիաս՝
յանդիման եղեն ժողովոյն հանդերձ
հարբք իւրեանց, և ձայն բարձեալ ա-
ղաղակէին՝ թէ չէ որ խմաստուն քան
դ Բիաս : Ծերակոյտն Մեսենեայ յղեաց

նմա զայն անօթ 'ի պարզե . 'ի ձեռն
առեալ զայն Բիասայ, և ընթերցեալ
զոր շուրջ զնովաւ զգրութիւնն, ոչ
յանձին կալաւ ընդունել զայն . ա-
սաց, այդ պատիւ Ապողոնի է :

Կարծեն ոմանք թէ այդ անօթ նոյն
է ընդ եռոտանւոյն, զոր պատմեցաք
'ի վարս Թաղեսի . և թէ այսր պատ-
մութեան հիմն է առաքումն եռոտան-
ւոյն առ Բիաս : Են և որք ասեն թէ
այս զառաջինն առ նա յղեցաւ :

Ալիատէս արքայ Լիւդացոց յա-
ղարտ վարեալ զբազում քաղաքս յու-
նաց ասիացոց, հասեալ պատնէշ պա-
շարման արկանէր զՊրիենէ քաղա-
քաւ . յայնժամ Բիաս որ իշխան էր
քաղաքին, ընդ ժամանակս ձիգս զդէմ
կալաւ նմա բուռն զօրութեամբ : Այլ
զի թուէր իմն թէ յամառեալ պնդեալ
իցէ Ալիատէս մինչ 'ի վախճան յեր-
կարել զպաշարումնն, և այն զի քա-
ղաքն տառապէր 'ի սաստիկ կարօ-
տութենէ՝ առ պարենիցն նուազե-
լոյ, դիրացոյց Բիաս երկուս զեղեցիկ
ջորիս, զորս վարեաց դէպ 'ի բանակ
թշնամեաց, որպէս այն թէ ինքնին
փախիցեն : Աքանչացաւ Ալիատէս տե-
սեալ զանասունսն պարարտացեալս,
խիթացաւ թէ ոչ արդեօք ձեռնհաս
գտանի սովու նուաձել զքաղաքն,

պատճառանօք առաքեաց զայր ոմն ՚ի քաղաք անդր, պատուիրեալ գաղտ՝ զննել զվիճակ քաղաքացւոց: Իսկ Բիասայ զգացեալ զնննդութիւն Ալիատեայ՝ ետ դիզել շեղջս շեղջս աւազոյ՝ վերարկեալ զնոսին սակաւ ցորենով, զորս տեսեալ հրեշտակին Ալիատեայ, ոչինչ երկմտեաց ընդ լիութիւն պարենիցն: Պատրեցաւ Ալիատէս ՚ի հնարից աստի, անդէն վաղվաղակի եթող զպաշարումն քաղաքին. և դաշնադիր եղև ընդ Պրիենեցիս: Յանկացեալ նորա տեսանել զԲիաս՝ յղեաց առ նա դալ յանդիման լինել ինքեան ՚ի բանակին: Պատասխանի ետ Բիաս պատգամսւորաց նորա. Ասացէք ցթաղաւորն ձեր՝ թէ ես աստ բնակեմ, և հրամայեմ նմա սոխ ուտել, և արտասուս քամել զամենայն աւուրս իւր:

Հաճոյական էր Բիասայ բանաստեղծութիւն. յօրինեաց երկու հազար տողս ոտանաւորաց, յորս կանոնս աւանդէր՝ ուսուցանել ամենեցուն զհնարս երջանկութեան կենաց, և զառաջնորդութեան հասարակապետութեան՝ ՚ի ժամանակի խաղաղութեան և պատերազմի:

Սովորութիւն էր նորա. ասել ջանացարուք հաճոյ լինել ամենեցուն. զոր թէ առնիցէք՝ յաջողեսցէ ձեզ յա-

մենայն 'ի կեանս ձեր . պերճութիւն ,
 և արհամարհութիւն զայլովք՝ ոչինչ
 առատացոյց 'ի բարեաց : Սիրեցէք ըզ-
 բարեկամս ձեր խորհրդով . յուչ ա-
 ծեալ՝ թէ երբեմն թշնամեան ընդ
 ձեզ : Ատեցէք զթշնամիս ձեր չափով ,
 քանզի հնար է հաշտել նոցա ընդ ձեզ :
 Զգուշութեամբ ընտրեցէք ձեզ բարե-
 կամս . հաւասար սիրեցէք զնոսա , այլ
 միտ դիք յիւրաքանչիւր 'ի վաստակս
 նոցա : Նմանեցարձեք նոցա՝ որոց ըն-
 տրութիւնն ձեզ 'ի պատիւ համարի .
 և զայս քաջ հաստատեցէք 'ի խոր-
 հուրդս ձեր . թէ առաքինութիւն բա-
 րեկամաց ձերոց բազմօք գիտէ սատար
 լինել 'ի պարծանս ձեր : Մի ճեպիք 'ի
 խօսս ձեր , զի մի զանմտութեան տայ-
 ցէք նշանակս : Զանացարձեք ստանալ
 իմաստութիւն 'ի մանկութեան ձե-
 րում՝ որ մխիթարեսցէ 'ի ծերու-
 թեանդ . այդ իսկ է ճոխութիւն մե-
 ծապանծ . և որ զայդ ստանայ՝ ոչ ոք 'ի
 նմանէ կորզել կարիցէ : Սրտմտու-
 թիւն և գահավէժ խորհուրդ , երկուք
 այսոքիկ հակառակ են խոհմութեան :
 Մարդ զգօն ուր ուրեմն է տեսանել .
 իսկ չարք և անմիտք յորդեալ են յա-
 ճախութեամբ : Գուն գործեալ կատա-
 րել զոր ինչ խոստացարդ : Բանք քո
 վասն աստուածոց համապատշաճ լի

ցին ընդ մեծութեան նոցա . և դոհացիր զնոցանէ յամենայն բարի գործս զոր առնիցես : Մի անխորհուրդ ձեռն մխեր յամենայն , բայց յորժամ եղեր 'ի մտի գործել ինչ , մտադիւր ջանիւք 'ի գլուխ հանցես զայն : Չգոյշ լեր դովել զմարդ վասն ճոխութեանց նորա՝ թէ նա չիցէ արժանի : Աեաց հանապաղ այնպէս՝ որպէս թէ հասեալ իցես 'ի յետին օր կենաց քոց , և իբր թէ ընդ երկայն ժամանակ կեցցես 'ի կեանս : Այելք առողջութեան՝ բնութեան պարգև է . իսկ ճոխութիւնք՝ բազում այն է զի բազդին արդիւնք են . միայն իմաստութիւն է որ օգտակար հայրենեացն առնէ զմարդ : Դիւրին է փառաբել անհնարին իրաց :

Հարցաւ՝ թէ զինչ է որ առաւել քան զամենայն ինչ յորդորամիտ առնէ զմարդ . ասէ , Յոյսն : Իսկ զինչ յաւէտ հաճոյական . ասէ , Շահն : Չինչ դառն 'ի հանդուրժել . Հովովել բազդին : Թշուառական համարէր զմարդ՝ որ չգիտիցէ տանել արկածիցն հանդիպելոց : Տեսեալ սուսեր ընկեցեալ յերկիր , ասէ՝ ո՞ կորոյս զքեզ , կամ դու զո՞ :

'Ի նաւել նորա երբեմն ընդ արանց ամբարշտաց , յարեաւ 'ի ծովուն մրրիկ մեծ և ամեհի , մինչև 'ի վտանգի լինել

Նաւուէն ընկղմելոյ : Ահաբեկեալ ամբարշտացն յերկիւղէ մահուան՝ ձայն բարձեալ աղաղակէին առ դիս : Սաստեաց նոցա Բիաս . լուեցէք , ասէ , մի իմասցին զիք թէ դուք աստ էք , դուցէ ամենեքին միանգամայն կորնչիցիմք : Յայլում նուագի այր ոմն ամբարիշտ եհարց ցնա , որ պաշտօն հաճոյ է աստուածոց . ոչինչ ետ պատասխանի Բիաս : Ի ժտել առնն զպատճառ լուծեանն . քանզի , ասէ Բիաս , հարցանես զոր քեզ չէ անկ :

Ասէր՝ ընտրեմ յաւէտ դատ առնել ընդ երկուս թշնամիս իմ՝ քան ընդ բարեկամս . քանզի ՚ի հարկէ դերեանայ բարեկամութիւն նորա զոր պարտաւորեմ . իսկ ՚ի դատաստանի թշնամեաց՝ հաշտիմ ընդ միում ՚ի նոցանէ , որում իրաւունս արարից : Հարկ եղև երբեմն Բիասայ դատաստան առնել ՚ի վերայ միոյ ՚ի բարեկամաց իւրոց՝ որ մահու պարտաւոր էր : Մինչև կարդացեալ նորա զգատակնիքն՝ լուծաւ ՚ի դառն արտասուս յատենի անդ . և ՚ի հարցանել ուրուք թէ զի՞ լաս , զի ՚ի քեզ միայն կախեալ կայ դատել կամ արձակել զմեղապարտն : Լամ , ասէ Բիաս , զի բնութիւնս բռնատղատէ զիս վշտակից լինել տառապելոց , և օրէնք հրամայեն մի ակնարկել ՚ի դու՞ թ բը-

նութեան Ոչ դասէր ընդ հաւաստի
բարիս զոր միանգամ ընդ բաղդիւ են
անկեալ . համարէր զճոխութիւնս իբ-
րև աւելորդս ինչ , զորովք հնար է զանց
առնել դիւրաւ . որ և բազում այն
է՝ զի մոլորեցուցանեն զմարդիկ ՚ի ճա-
նապարհէ առաքինութեան :

Գտաւ նա ՚ի Պրիենէ ՚ի քաղաք
Ծննդեան իւրոյ՝ երբ առաւ և յաւարի
յափշտակեցաւ ՚ի թշնամեաց քաղաքն .
քաղաքացիքն ամենայն՝ բարձեալ զոր
ինչ տանելն կարէին՝ փախստեայ ան-
կանէին տազնապաւ՝ ամրացուցանել
զայնս յանքոյթ վայրս : Բիաս միայն
կայր անվրդով յաղմկայոյզ խռովու-
թեան անդ , իբրև անզգայեալ ընդ ա-
ղէտս հայրենի քաղաքին իւրոյ : Հար-
ցին ցնա ոմանք , զի և դու ոչ ձեռն
արկանես թափել զոր ունիսդ , որպէս
այլքն : Ասէ Բիաս . զգոյն և ես ինքն
առնեմ , քանզի զամենայն զգոյս իմ
ընդ իս տանիմ :

Դատաստանն որ ՚ի վախճան հա-
սոյց զկեանս Բիասայ , ոչինչ նուազ է
փառօք քան այլ գործս նորա : Գնա-
ցեալ նորա յատեան ծերակուտին՝ ըզ-
կողմն ունէր ատենախօսելով նախան-
ձայոյզ եռանդեամբ՝ զմիոյ ՚ի բարե-
կամաց իւրոց . պարտասեցաւ առ
ծանրացեալ ծերութեանն , և խոնար-

հեցոյց զգլուխն ընդ լանջս որդւոյ
դատերն իւրոյ՝ որ անդ ընդ նմա էր :
Իսկ իբրև ատենախօսեաց և փաստա-
բան դատախազին , վճռեցին դատա-
ւորք ըստ բանից Բիասայ՝ որ անդէն
առ նմին փչեաց զոգին ՚ի զիրկս Թո-
սին իւրոյ :

Խմբեցաւ ողջոյն քաղաքն ՚ի յու-
ղարկաւորել զնա , և զերեսս ամենե-
ցուն Թանճրամած տխրուԹիւնս պա-
տէր ընդ մահ նորա . կանգնեցին յա-
նուն նորա շիրիմ մեծակառոյց , դրոշ-
մեալ ՚ի նմա զայս բան . « Պրիենէ-
հայրենի քաղաք է Բիասայ սքանչել-
ւոյն՝ ընդ համօրէն Յոնիա , որոյ խոր-
հուրդք գեր ՚ի վերոյ էին քան զամե-
նայն իմաստասիրաց « : Յիշատակ նո-
րա մեծապատիւ պաշտեցաւ՝ մինչև
կանգնել տաճար ՚ի փառս նորա , յո-
րում աստուածակերպ մեծարէին զնա
Պրիենեցիք :

Պ Ե Ր Ի Ա Ն Դ Ր

Բռնաւոր կորնթացւոց, ժամանակա-
կից նախակարգեալ իմաստասիրաց: Ան-
ծանօթ ամ ծննդեան նորա և մահուն:

() ՏԱՐԱՅՈՒՑԻՉ իմն է՝ իմաս-
տուն անուն կարգալ յունաց Պե-
րիանդրի առն յիմարի: Հրաշացան նո-
քա ընդ սքանչելի բանս իմաստիցն, ոչ
ինչ միտ եղեալ տարօրէն ընթացից կե-
նացն: Բանք նորա յամենայնի՝ իմաստ-
նոյ էին, և օրինակ կենացն՝ առն յու-
սահատի. անպատկառ և անամօթ ոչ
երկեաւ առ ոտն կոխել զբնութիւնն,
խղեալ զանլոյծ կապանս անկղիտա-
նալով ընդ մօրն իւրում Արատէի:

Ուխտեաց յաւուր միում՝ զի թէ
յաղթական ելցէ յողիմպիական խա-
ղուց, կանգնեացէ Արամազդայ ան-
դրի ոսկի. յաղթեաց ՚ի բաղմաթողով
խաղարկութեանն որ լինէին. այլ զի
չունէր ինչս ՚ի կատարումն ուխտին,
ետ կողոպտել զգարդս ամենայն տիկ-
նանց՝ որոց շքեղ զարդու զարդարեալ
կախն ՚ի տօնի ուրեք և սովին օրինա-
կաւ կատարեաց զուխտն:

Պերխանդր որդի էր Ախպսելիայ՝ ՚ի
 Հերակղեանց ազգատոհմէ, և բռնա-
 ցեալ կալաւ զԱորնթոս քաղաք ծնրն-
 դեան իւրոյ, առ ժամանակօք Ալիա-
 տեայ թագաւորի լիւղացւոց. առ ՚ի
 կնութիւն զԼիսիս դուստր թագաւո-
 րին Եպիդաւրոսի. յամենայնի խնա-
 մոտ երևեցաւ ՚ի սէր նորա, և զանունն
 Լիսիս փոխեալ՝ անուանեաց Մելիս-
 սա : Երկու որդիք եղեն նորա յայնմ
 կնոջէ. անդրանիկն Ախպսելէս յամր
 էր մտօք, և իբրու ապուշ ոմն. իսկ
 կրտսերն Լիկոսիրոն քաջուշիմ էր, և
 ՚ի գործ առաջնորդութեան պատկա-
 նաւոր : Իբրև յղի էր Մելիսսա, կա-
 նայք ոմանք փասքուսք ջան ՚ի վերայ
 եղին տխեղծ առնել զանունն նորա առ
 Պերխանդրի. և այնչափ ինչ հեղին ՚ի
 լսելիս նորա՝ մինչև վառեցին զնա զայ-
 րացեալ նախանձու. յաղազս որոյ իբ-
 րև հանդիպեցաւ կնոջն յելանել նո-
 րա ընդ սանդուխս ուրեք ՚ի վեր, աքա-
 ցի եհար ընդ որովայն նորա, և սպան
 զմայրն հանգերձ որդւոյն յղացելով :
 Ստրջացաւ փութանակի ընդ գործն,
 և առ յուսահատութեանն՝ տեղի
 տուեալ ցնորից անսանձ կրից, մոռա-
 ցաւ զպարտուպատշաճ պատիւ բնու-
 թե՛ դիակնացեալ մարմնոյն, և ծանր
 նախատանօք թշնամանեաց զկինն՝ որ

ոչ ևս էր ընդ կենդանիս : Ապա թափեաց զբարկութիւն իւր 'ի վերայ կանանցն որք արկին զնա յայն կասկածանս. ետ ունել զնոսա, և հրամայեաց այրել կենդանւոյն :

Յորժամ լուաւ Պրոկղէոս արքայ Եպիդաւրոսի զաղէտս մահու դատեր իւրոյ սիրելւոյ, յղեաց և ետ բերել առ ինքն զերկոսին թոռունս իւր զորս սիրէր գգուանօք : Ալաւ զնոսա առ իւր ընդ ժամանակս ինչ 'ի միսթար դառնացելոյ սրտին. և իբրև անդրէն արձակէր զնոսա, գիրկս արկեալ զնօքօք ասաց ցնոսա. որդեակք իմ գիտէք դուք զսպանող մօրդ ձերոյ : Երէցն ոչ 'ի միտ առ զբանսն. իսկ կրտսերն քաջ խելամուտ լեալ ասացելոցն՝ 'ի դառնալն 'ի Աորնթոս՝ այնուհետև ոչ ևս յօժարեաց խօսել ընդ հօր իւրում, և ոչ տալ պատասխանի հարցուածոց նորա : Բազում ինչ հարցանէր թագաւորն ընդ Աիպսելէս՝ գիտել զոր ինչ ասաց ցնոսա Պրոկղէոս. այլ սորա զի զբովանդակն մոռացեալ էր՝ պատմէր նմա զմարդասէր հիւրընկալութիւնն որով ժողովեաց զնոսա հաւ իւրեանց. ոչ հանգեաւ Պերիանդր ընդ բանսն, զի հանապաղ խիթայր ընդ Պրոկղէոս. յաւել ևս հետազօտել 'ի մանկանէն. մինչև ուր ուրեմն 'ի միտս եկեալ Աիպ-

սելեայ, յիշատակեաց զյետին բանսն
Պրովզէոսի, և կարգաւորաբար պատ-
մեաց զայն հօր իւրում: Յայնժամ 'ի
միտ առ Պերիանդր զազդեցեալն 'ի
նմանէ առ որդիս իւր, հոգ յանձին
կալաւ 'ի նեղ արկանել զորդի իւր
զկրտսեր՝ ապաստանել առ ինքն, ար-
գել առ որս օթեանեալ էր նորա՝ ու-
նել զնա առ ինքեան:

Ապատասպար մնացեալ Լիկոփրոնի
'ի տարագրութեան իւրում, տատա-
նէր տուն 'ի տանէ, այլ յամենեցունց
'ի բաց վտարէր առ երկիւղի սպառնա-
լեաց հօր նորա. հուսկ ուրեմն ոմանք
'ի բարեկամաց նորա կարեկից լեալ
ընդ դեգերանս նորա՝ ընկալան զնա 'ի
տուն իւրեանց, 'ի վտանգ եղեալ զան-
ձինս՝ հետտութեամբ արքունի հրամա-
նաց: Հրաման արար Պերիանդր՝ զի
որ միանգամ ընկալցի կամ խօսեսցի
ընդ Լիկոփրոնի՝ մահու դատեսցի: Եր-
կիւղ սպառնալեաց պատուհասին ա-
հաբեկ արար զամենեսեան, զի և ոչ
ոք համարձակէր ակնարկել ընդ նա:
Չզիշերսն 'ի գլուխ հանէր Լիկոփրոն
'ի գաւիթս տանց. ամենեքին խորշէին
'ի նմանէ իբրև յերեսաց դազանի: Իբ-
րև անցին աւուրք չորք տեսանէր զնա
Պերիանդր յողիս ապաստան յերեսաց
սուղյ և նեղութեան, խանդաղատեալ՝

մերձեցաւ առ նա և ասէ . Ո՛վ Լիկոփրոն՝ ո՞ր լաւ է, վայրենի կեանսս վարել՝ որպէս դուդ առնես, թէ հրամանատար լինել իշխանութեանս իմոյ, և տէր ամենայն դանձուց իմոց . դու իմ որդի ես, և իշխեցող բարդաւաճ քաղաքիս Աորնթոսի : Թէ արկածք ինչ պատահեցին՝ ես ինքնին առաւել ստորջնացեալ եմ ընդ այն, գիտելով թէ ես էի պատճառ իրացն : Իսկ աղետից քոց դու ինքն եղեր պատճառ, զի զայրացութեամբ գնացեր ընդ իս՝ զոր մեծարել արդեօք քեզ օրէնք էին . այլ այժմ զի հասու եղեր հայրատեցութեան չարեաց, աւաղիկ շնորհեմ քեզ դալ մտանել ՚ի տուն իմ : Սալացեալ անչարժութեամբ մնաց Լիկոփրոն առ բանս Պերիանդրի . պատասխանի ետ նմա տմարդութեամբ . Դու քեզէն պարտաւոր ես պատուհասին զոր այլոց սպառնացար, զի խօսեցար ընդ իս : Իբրև ետես Պերիանդր զանդրդուելի կամակորութիւն որդւոյ իւրոյ, խորհուրդ կալաւ տարագրել զնա յերեսաց իւրոց . վասն այնր աքսորեաց զնա ՚ի Աորկիւրա կղզի, որ ընդ իշխանութեամբ իւրով էր :

Յետ այնորիկ ՚ի սրտմտութիւն վառեալ Պերիանդրի ընդդէմ Արոկղէոսի՝ զոր համարէր պատճառ խռովու-

Թեան իւրոյ և որդւոյն, զօրաժողով եղև. և ինքն ՚ի զլուս կացեալ բանակին՝ յարձակեցաւ ՚ի վերայ նորա մարտիւ պատերազմի: Յաջողեաց նմա յամենայնի. տիրեաց քաղաքին Եպիդաւրոսի. կալաւ զՊրոկղէոս, և պահեաց զնա առ իւր կենդանի:

Իբրև ժամանակք ՚ի վերայ անցանէին, և ՚ի տկարութիւն ծերութեան խոնարհէր Պերիանդր, յընաց ՚ի Աորկիւրա կոչել զ Լիկոփրոն, զինմա տացէ զտէրութիւն իշխանութեան իւրոյ, զանց արարեալ զանդրանկաւն, որ անբաւական էր ՚ի դործ առաջնորդութեան: Բնաւ ինչ շատ Լիկոփրոն պատասխանի հրաւիրակին Պերիանդրի. ոչ ցասեաւ ընդ այն Պերիանդր՝ զի սիրէր զորդին իւր. պատուիրեաց դատեր իւրում գնալ ՚ի Աորկիւրա, կարծեալ թէ բանք նորա ազդեսցեն ինչ ՚ի սիրտ եղբօրն՝ քան զհնարագիտութիւն իւր որովք վարեցաւ ցայն ժամ: Իբրև եհաս անդր օրիորդն իշխանազուն՝ երգմնեցուցանէր զեղբայր իւր որովք ինչ ՚ի դէպ վարկանէր քաղցրացուցանել զնա, և յաղթել կամակորութեան մտաց նորա: Իսկ արդ յօժարիցես՝ ասէ, անցանել դահու թաղաւորութեան առ այր ոք օտարական, և ոչ ՚ի քեզ. իշխանութիւն՝

տարփածու է յեղամիտ, և բազում են ցանկացողք նորա. հայր մեր ծանրացեալ է կարեօք ծերութեան, և առափամբք գերեզմանին տատանի. թէ դու ոչ դարձցիս՝ անշուշտ սպառեսցի ազգատոհմ մեր. արդ քաջ խորհեաց մի թողուր օտարաց զմեծութիւնն որ հանդերձեալ պահի քեզ օրինօք: Պընդեաց նմա Լիկոփրոն՝ թէ ցորչափ կենդանի է հայր իւր՝ ոչ դարձցի ՚ի Կորն, թոս: Իբրև դարձաւ օրիորդն՝ և պատմեաց հօրն զմիտս հաստատութեան Լիկոփրոնի, երրորդ անգամ յղեաց Պերիանդր ՚ի Կորկիւրա՝ ծանուցանել որդւոյն՝ գալ տիրել Կորնթոսի՝ երբ և կամիցի, և զի փոխարէն՝ ինքն Պերիանդր յանձին կալեալ է պանդրխտել ՚ի Կորկիւրա, և անդ անցուցանել զաւուրս իւր: Յանձն առ Լիկոփրոն զպայմանն. հանդերձեցան կազմեցան երկաքանչիւրքն փոխել զտեղի բնակութեան իւրեանց: Իբրև զգաստեղեն իրացն կորկիւրացիք՝ ամենեքին ահաբեկ պակուցեալք՝ խողխողեցին զԼիկոփրոն, զի մի Պերիանդր եկեալ բնակեսցէ ՚ի մէջ նոցա: Յուսահատ սրտմտեալ Պերիանդրի ընդ սպանութիւն որդւոյ իւրոյ՝ անդէն վաղվաղակի ետ ունել երեք հարիւր մանկունս յազնուականաց կորկիւրացւոց՝ և յը

ղեաց առ Ալիատէս՝ խղել զնոսա՝ ի
 ներքինիս : Հարկ եղև նաւուն յորում
 նոքայն էին՝ ի գնալն ելանել ի Սա-
 մոս կղզի . և իբրև իմացան մարդիկ
 երկրին զպատճառ վարելոց մանկանցն
 անմեղաց ի Սարգիա, կարեկից եղեն
 ընդ վիշտս նոցա . և ծածուկ խորհուրդ
 ետուն՝ ապաստան լինել ի տաճար Ա-
 նահտայ . իբրև անկան նոքա անդր՝
 ոչ ևս թողին կորնթացւոց կորզել ըզ-
 նոսա անտի, պատճառելով թէ ընդ
 խնամովք կան աստուածուհոյն, և
 ապա հնարս ճարտարամտեցին ապրե-
 ցուցանելոյ զնոսա, առանց ինչ թշնա-
 մութիւն յայտնելոյ ընդ Պերիանդր .
 զոր ամենայն ընդ երեկս՝ յղէին զուս-
 տերս և զգստերս սամոսացւոց՝ կա-
 քաւս կաքաւել շուրջ զտաճարաւն,
 և տային նոցա կտապս իմն կազմեալս
 մեղու՝ զոր ի կաքաւելն արկանէին ի
 ներքս ի մեհեանն . մանկունքն կոր-
 կիւրացիք ժողովէին զայնս, և նովին
 կերակրէին : Եւ զի այս պարանցիկք
 հանապազորդէին, տաղտկացեալ ընդ
 այն կորնթացւոց՝ դարձան յետս :

Յոգի խոցեցաւ Պերիանդր՝ զի ոչ
 գտաւ ձեռնհաս լուծանել զվրէժ մա-
 հու որդւոյն իւրոյ զոր փափաքէր .
 վասն որոյ եղ ի մտի այնուհետև զրաւ
 առնել կենաց իւրոց . այլ զի ոչ կա-

մէր թէ գտցէ որ զգի իւր՝ խորհեցաւ
այսու օրինակաւ թագուն պահել
զիրան . կոչեաց առ ինքն երիտասարդս
երկուս , որոց եցոյց ճանապարհ հե-
ռաւոր . և պատուիրեաց զգնալ ընդ
այն ՚ի հետևեալ գիշերին , և սպանեալ
որում նախ զառաջինն հանդիպեսցին ,
նոյն հետայն թաղեսցեն զմարմինն նո-
րա : ՚ի բաց արձակեալ զնոսա՝ կոչեաց
այլ չորս երիտասարդս , հրամայեաց և
նոցա շրջել գիշերայն զայնու ճանա-
պարհաւ , և ՚ի մահ հարկանել զերի-
տասարդս երկուս որ ընդ առաջ լինի-
ցին ՚ի միասին . և Փութանակի ամփո-
փել ընդ հողով : Յետ արձակելոյ և
զնոսա՝ կոչեաց ապա խումբ մի բազ-
մութեան մարդկան . և նոցա զնոյն
պատուէր եղ ՚ի վերայ՝ սպանանել զչո-
րեսին , և թաղել զնոսա առ տեղեաւն :
Յետ զամենայնն տնօրինելոյ ըստ կա-
մաց սրտի իւրոյ , անվրէպ ըստ ժամա-
նակեալ պահուն գտաւ ՚ի սահմա-
նեալ անդուջն՝ և սպանաւ յառաջնոց
երկուցն որոց դիպաւ : Դամբարան
կանգնեցին կորնթացիք ՚ի յիշատակ
նորա հանդերձ ներբողական արձա-
նագրով :

Առաջին եղև Պերխանդր՝ որ թիկ-
նապահս կալաւ զիւրև , և փոխեաց
զիշխանի անունն ՚ի բռնաւոր . ոչ թոյլ

առնէր ամենեցուն անխտիր բնակել
 'ի քաղաքին : Թրասիբուզոս՝ զորոյ ըզ
 խորհրդոյն զհետ գնայր հաւատարմու
 թեամբ՝ գրէր առ նա թուղթ օրինակ
 զայս . « Ո՛չինչ թագուցի ես յառնէն
 զոր առ իս յղեցեր . հանի գնա յան
 դաստան ցորենոյ , հարի առաջի նորա
 զամենայն զհասկս վերամբարձս քան
 զայլս : Կա՛լ զօրինակն զոր քեզ ետու՝
 թէ մնալ խնդրես յիշխանութեան
 քում , նուա՛ղ արա զաւագորեար քա
 ղաքիդ՝ զբարեկամ , կամ զթշնամիս .
 քանզի առն բռնակալի ցանգ պարտ է
 խիթալ . նա՛ և ընդ նոսա որք միամիտ
 կարծեսցին 'ի բարեկամութեան » :

Ասէր Պերիանդր թէ ամենայն ինչ
 յանկ ելանէ խորհելով և դործելով ,
 որովհետև գտեալ էր և հնարք՝ հատա
 նելոյ զկիրճս ծովուց : Չէ՛ արժան ցան
 կալ ընչից՝ 'ի հատուցումն դործոց բա
 րեաց : Մեծամեծք չունին այլ աներ
 կեան ամբութիւն քան զսէր իշխեցելոց
 իւրեանց : Չիք ինչ պատուական քան
 զհանդարտութիւն : Հարկ է պատու
 հասել ո՛չ միայն զչարագործս , այլ և
 զորս առ 'ի չարիս յօժարեսցին : Բեր
 կրութիւնք՝ վաղանցուկ են , փառքն
 մշտնջենաւոր է : Արժան է չափաւոր
 լինել 'ի յաջողուածս , և 'ի ձախողակս
 զգօն : Մի՛ հաներ 'ի վեր զթագուն

խորհուրդ որ քեզն հաւատացաւ : Մի
խտրեր զյաջողութիւն և զաղէտս բա-
րեկամաց , այլ յոր և վիճակ իցեն ,
դու միօրինակ հայեաց ընդ նոսա :

Իմաստնոց ընկերութիւն ցանկալի
էր Պերիանդրի . նամականի առնէր
առ այլ իմաստասէրս Ելլադայ՝ հրաւի-
րել զնոսա՝ի Կորնթոս՝ զոր օրինակ կո-
չեցեալ լինէին ՚ի Սարգիա : Քանզի
յորժամ հանդիպէին անզր՝ ժողովէր
զնոսա մարդասիրութեամբ , և ջան ՚ի
վերայ դնէր խնդամիտ ունել զնոսա :
Թագաւորեաց ամն քառասուն . և մե-
ռաւ ՚ի խբ՝ ողիմպիադին :

Համարին ոմանք թէ երկուք իցեն
իմաստասէրք Պերիանդր անուամբ . և
թէ միոյն ևեթ ընծայեն զբանս և ըզ-
գործս երկոցուն :

Ք Ի Ղ Ո Ն

Ծերացեալ էր 'ի յիսներորդ երկրորդ
ողիմպիադին, յորմէ մարթիմք ժամա-
նակակից համարել զնա ընդ Պիտտա-
կոսի :

(ՍԱՂԿԻՐ ՔԻՂՈՆ 'Ի ԼԱԿԵՂԵ
մոնացւոց քաղաքին իբրև 'ի ծք ողիմ-
պիադին : Այր անյողդողդ էր և հաս-
տատուն 'ի խորհուրդս, յամենայնի
միօրինակ, և անդորր 'ի վիշտս և 'ի
յաջողուածս : Մենակեաց էր և ան-
պաճոյճ. զայս խորհէր՝ թէ ժամանակ
անօգուտ վատնեալ՝ այն է որ յերկարա-
տև ճանապարհորդութեան անցանէ :
Կեանք նորա գաղափար էր կատա-
րեալ առաքինութեան. պարզմտու-
թեամբ գործէր զայն ամենայն՝ զոր
այլոց ուսուցանէր. սքանչելի էր ամե-
նեցուն լուծիւն նորա և ժուժկա-
լուծիւն : Կանոն կենաց նորա էր ա-
ռած նորա, այն թէ՛ Պարտ է յամե-
նայնի հանդարտ ընթանալ :

Չյիսներորդ հինգերորդ ողիմպիա-
դաւ կարգեցաւ Պարետ, կամ Պիտտա-
պետ, որ էր աւագութիւն գերաստի-

Ճան 'ի Լակեդեմոն՝ հանգիտակշիւ
 թագաւորականին, որ զարբունի իշխա-
 նութիւնն 'ի շափուն պահէր : Եղբայր
 նորա որ ակն ունէր այնմ՝ աւագու-
 թեան՝ զբարեցաւ ընդ այն, և սկսաւ
 ոգորել ընդ նմա : Պատասխանի ետ
 նմա Քիղոն անխռով բանիւք. ընտրե-
 ցայ ասէ, զի քան զքեզ պատկանաւոր
 կարծեցայ՝ հանգուրժել նախատա-
 նացն եղելոց առ իս վասն կորզելոյ զիս
 'ի հանգստենէս, հոգալոյ զբազմացն,
 և 'ի գերութիւն գրաւելոյ :

Համարէր նա թէ չէ արժան զանց
 առնել իսպառ զհմայութեան արուես-
 տիւ. և թէ մարդ զօրութեամբ ոգւոյ
 իւրոյ ձեռնհաս է գիտել բազում ինչ
 ապագայ :

Յաւուր միում մինչդեռ զոհ մա-
 տուցանէր Իպպոկրատէս ոմն 'ի ժա-
 մանակի ողիմպիական խաղուց, այն
 ինչ դնէր զմիս նուիրացն 'ի սանս
 լցեալս ցուրտ ջրով, յեղակարծում
 ջեռաւ ջուրն, և սկսաւ յեռանդն հար-
 կանել. մինչև շուրջ զեղոյր թաթա-
 դէր, առանց հուր մատուցանելոյ 'ի
 սանսն : Քիղոն որ անդէն մօտ կայր՝
 ուշի ուշով միտ եղ նորահրաշ իրացն, և
 խորհուրդ 'ի միտս արկ Իպպոկրատեայ՝
 չամուսնանալ երբէք. և թէ առ ձա-
 խողակ բաղդին ամուսնացեալ իցէ՝

անդէն անյապաղ արձակեցէ զկինն ,
 և զառ ՚ի նմանէ որդիան զամենեսեան
 սպանցէ : Ծիծաղեցաւ Իպպոկրատէս
 ընդ խորհուրդ նորա , առ կին , և ծնաւ
 ՚ի նմանէ զՊիսիատրատոս՝ որ բռնաւ
 կալեաց յԱթէնս ՚ի հայրենի քաղաք
 իւր :

Դարձեալ յայլում նուազի ճշգրտ-
 տագոյնս քննեալ Քիզոնի զհանգա-
 մանս գետնոյ և զդիրս Ալիթերա (չէ-
 րիկօ) կղզւոյ , գոչեաց առաջի բազմու-
 թեան մարդկան . Երանի՛ թէ չէր եր-
 բէք եղեալ այս կղզի , և իցէ՞ թէ ըն-
 կլուզանէր ՚ի ծով անդէն ընդ երևելն .
 քանզի նշմարեմ ես թէ դա լինիցի
 պատճառ աւերածոյ լակեղեմնաց-
 ւոց : Ոչ վրիպեցին բանք նորա . քանզի
 յետ ժամանակաց առին աթենացիք
 զայն կղզի , և այնու զօրացան յաղարա
 վարել զԱպարտա :

Երեք են՝ ասէր , իրք դժուարինք . պա-
 հել զժածուկս , հանդուրժել զըկա-
 նաց , և բարեօք անցուցանել զժամա-
 նակն : Համառօտ և հակիրճ էին զրոյցք
 Քիզոնի , մինչև յառակս լինել օձոյ
 խօսից նորա : Ասէր՝ Աճ խոնարհեցու-
 ցանէ զբարձրամիտս և բարձրացու-
 ցանէ զնուաստոս : Չէ արժան սպառ-
 նալ ումեք , քանզի տկարութիւն կա-
 նացի է : Մեծ իմաստութիւն է սանձ

դնել լեզուի, մանաւանդ 'ի կոչունս :
 Դժպատեհ է չարախօս լինել զմարդոյ,
 զի անդադար լինին թշնամութիւնք,
 և անցք անարժան 'ի լսել : Պարտ է
 յայց ելանել առ բարեկամս՝ յաւէտ
 յորժամ 'ի վիշտս իցեն, քան յորժամ
 'ի յաջողուածս : Բազդն է տղէտ
 բժիշկ, որում զհետ են բազումք : Չէ
 օրէն սնոտի յուսով պատրել զորս
 յանձկութեան իցեն : Առն քաջասրտի
 պարտ է յամենայնի քաղցր լինել, և
 պատկառելի երևեցուցանել զանձն,
 քան ահաւոր : Խոհական քաղաքակա-
 նութիւն 'ի պետութեան է ուսուցա-
 նել քաղաքացւոց զզգօն առաջնորդու-
 թիւն իւրաքանչիւր տան իւրոյ : Այն-
 լուչ է կին ածել՝ անպաճոյճ օրինա-
 կաւ, և մի անձամբ զանձն կործանել
 մեծածախ հանդերձանօք հարսանեաց :
 Փորձաբար փորձէ զոսկի և զարծաթ .
 սակայն ոսկւով և արծաթով փորձի
 սիրտ մարդոյ : Յամենայնի ընտրելի է
 չափաւորութիւն, զի մի որ անտի պա-
 կասութիւն վշտացուցէ զքեզ : Սէր
 և ատելութիւն ոչ ձգին ընդ երկար .
 սիրեա՛ որպէս թէ հասանէ քեզ ատել
 զնա . և ատեա՛ այնպէս, որպէս թէ
 վիճակեսցի քեզ երբեմն սիրել զնա :
 Մի ընտանեանար ընդ մեծամեծս : Մի
 ասեր չար ինչ զմեռելոց : Մի ծաղրեր

զաղբատս : Լեր դիմակալ բարկու-
 թեան : Հնազանդ լեր օրինաց . Սիրեա՛
 զխաղաղարարն . Չամենայն մարդ
 պարտ է սիրել , և ատել : Չէ՛ պարտ
 տատանել զձեռս 'ի խօսիլն , զի ան-
 մտութիւն է : Պարտ է անձամբ յանձ-
 նէ զգուշանալ : Այն մանկութիւն է
 ծանր , որ նման է ծերութեան . և
 այն ծերութիւն է հաճելի , որ նման է
 մանկութեան : Եթէ՛ զօրաւոր իցես՝
 հեղ լեր , զի այլք յաւէտ պատկառես-
 ցին 'ի քէն՝ քան երկիցեն : Ո՛չ կա-
 միմ՝ թէ կրտսերքն երկիցեն յինէն , և
 ոչ զի երիցագոյնքն զիս անգոսնեսցեն :
 Յաղթող լիցիս ամենայն տրտմու-
 թեան՝ կամ ոգւով արութեան , կամ
 բարեկամաւ : Ընտրելի է վնասն ընչից
 քան զչարաչար շահ . զի այն միանգամ
 ևեթ ցուեցուցանէ , իսկ սա միշտ :
 Մի տար լեղուիդ յառաջել քան ըղ-
 միտսդ : Պատուեա՛ զերիցագոյնս հա-
 սակաւ : Մի լիցիս չարախօս ընդդէմ
 մերձաւորաց . ապա թէ ոչ՝ և դու
 լուիցես , զոր քեզ ծանունք իցեն : Եթէ՛
 բարի ինչ գործեսցես , չէ՛ արժան յի-
 շատակել . իսկ եթէ՛ բարի ընկալցիս , յի-
 շեա՛ հանապազ : Ատեսցես զընդվայրա-
 քնինն , որ խուղարկու է իրաց՝ որք ոչ
 պատշաճին նմա : Բարեմասն է հասա-
 րակապետութիւն , յորում առաւել

օրէնքն , քան փաստաբանք լինին լսելի : Մի ծաղր արասցես զիշտացեալսն . մի ցանկասցիս անհնարաւորաց :

Հրաւիրեալ Քիզոնի 'ի կոչունս 'ի Պերիանդրէ իմաստնոյ՝ ընդ այլ իմաստասէրս , ոչ ետ զհաւանութիւն , մինչև տեղեկացաւ մի առ մի յանուանէ , եթէ ո՞յք իցեն հրաւիրեալք 'ի կոչունս . զի ասէր՝ թէ որոց միանգամ հարկի որք լինել ուղեկից 'ի նաւու , կամ զինուորակից՝ պէտք են նմա և նոցին ծանրութեան յուղեկցութեան և յերախանս լինել կցորդ . իսկ անխտիր միտել զանձն յորպիսի և է կոչունս , ոչ է գործ առնող ջամտի :

Ետ դրոշմել ոսկեգիր 'ի տաճարին Ապողոնի 'ի Բեղփոն՝ թէ չէ պարտ խմիք փափաքել որ վերագոյն իցէ քան զքեզ , և թէ որ երաշխաւոր լինի վասն օտարի՝ միշտ 'ի տոյժս լիցի :

Ճանահնար եղև Պերիանդր կորըն . թացի որչափ ինչ հնար էր՝ հրաւիրել զՔիզոն 'ի Կորնթոս , զի սատար գտցէ 'ի խորհրդոց նորա 'ի բռնակալութեան իւրում : Պատասխանի արար նմա Քիզոն այսպէս . Կամք են քո մղել զիս 'ի յուզմունս մարտի , և տարագրել յերկրէ իմմէ , որպէս թէ դովին հաստատուն մնասցես . զայս զիտեա՛ զի չիք ինչ աներկեան 'ի մեծու-

Թեան թագաւորաց . և բարեբաղդն
 'ի բռնաւորաց այն է՝ որում յաջո-
 ղեաց մեռանել 'ի մահիձս իւր :

Ճանուցեալ Քիղոնի զմերձենալ մա-
 հու իւրոյ , և ակնարկեալ ընդ բարե-
 կամս իւր՝ որ շուրջ կային զնովաւ , ասէ
 ցնոսա . Բարեկամք՝ դիտէք դուք զի բա-
 դում ինչ ասացի ես և արարի 'ի բաղ-
 մամեայ կեանս իմ . խոհական կշռուլ
 քննեցի զամենայն զգործս իմ , և ոչինչ
 գտի ընդ որ ստրջացայց երբէք , բայց
 թերևս այս միայն՝ զոր մատուցանեմ
 առաջի ձեր 'ի քննութիւն՝ զի դիտա-
 ցից՝ բարի՛ արդեօք թէ չար գործեալ
 է իմ : Դէպ եղև ինձ երբեմն ընդ այ-
 լոց երկուց դատաւորաց դատաստան
 առնել 'ի վերայ միոյ 'ի մտերիմ բարե-
 կամաց իմոց , զոր հարկ էր մահու
 պարտաւորել ըստ օրինաց , տաղնապ
 էր ինձ անդէն յամենայն կողմանց .
 պարտ էր ինձ կամ անցանել ըստ օ-
 րէնս , կամ մահու դատել զբարեկամս
 իմ : Յետ քաջ խորհելոյ զիրան՝ զայս
 գտի հնարս . յառաջ մատուցի ճար-
 տարութեամբ զամենայն բռնաւոր
 փաստս ամբաստանելոյն , որով ոչինչ
 յերկուացան պաշտօնակիցքն իմ ար-
 ձակել զնա . ես մահու դատեալ էի
 զնա՝ առանց ինչ ասելոյ ցնոսա : Սո-
 վին կատարեցի զպարտս դատաւորի և

զբարեկամի. սակայն տակաւին խիղճ
մտաց իմոց հարկանէ զիս, թէ մի ար-
դեօք ընդ ստգտանօք էր զոր գործեցի:

Ճանրացեալ Քիղոնի 'ի ծերու-
թենէն՝ մեռաւ 'ի Պիսա՝ 'ի լիապա-
տար խնդութենէն, գիրկս արկեալ
զորդւովն՝ որ այն ինչ պսակեալ էր յո-
ղիմպիական մրցանսն: Անդրի կանգ-
նեցին նմա լակեղեմոնացիք յետ մա-
հու նորա:

Կ Ղ Է Ո Բ Ո Ի Լ Ո Ս

Ճամանակակից Սողոնի, իբրև զի ա-
 ւուրբ նորա համարին ընդ մէջ երեսնե-
 րորդ հինգերորդ, և յիսներորդ հինգե-
 րորդ ողիմպիադից :

ԼՆՈՒՆ ԿՂԷՐՔՈՒԼՈՍԻ չէր քաջա-
 հռչակ իբրև զայլոց ոմանց իմաստա-
 սիրաց, սակայն ընդ երջանիկ համա-
 րեալն դասակարգեալ է: Որդի էր
 Եւագորայ 'ի Հերակլեան զարմէ, և
 ծնաւ 'ի Լինդոս ծովահայեաց քա-
 ղաքի հռոդացւոց, յորում ծանուցաւ
 անուն նորա յաւուրս թագաւորու-
 թեան Արեսոսի արքայի Լիւդիայ: Գե-
 ղեցիկ էր երեսօք և վայելչակերպ :
 Յերիտասարդութեան իւրում շրջե-
 ցաւ ընդ Եդիպտոս ուսանել անդ ի-
 մաստասիրութիւն՝ ըստ սովորութեան
 այնց ժամանակաց: 'ի դառնալն իւ-
 րում անտի՝ ամուսնացաւ ընդ առա-
 քինի օրիորդի ումեք, և եկեաց կեանս
 հանդարտութեան 'ի մէջ ընտանեաց
 իւրոց: Ծնաւ զԱղոբուլինա՝ որ քա-
 ջանուն գտաւ 'ի մէջ իմաստուն կա-
 նանց ուսումնասիրութեամբ իւրով,

և խոհական հրահանգութեամբ հօր
իւրոյ, մինչև տազնապել զամենայն
զծանուցեալ խմաստասէրս ժամանա-
կին իւրոյ, մանաւանդ ՚ի խնդիրս այ-
լաբանականս : Թող զառաքինութիւն
նորա և զբարերարութիւն, մինչև ինք-
նին լուանալ զոտս բարեկամաց իւրոց
և հիւրոց հրաւիրելոց ՚ի խրախուէս ՚ի
տուն հօր իւրոյ :

Կարգեցաւ Կղէորուլոս յառաջնոր-
դութիւն իշխանութեան փոքու պե-
տութեան Աինդացւոց, և ՚ի գլուխ
տարաւ զգործն անաշխատ, որպէս
այն թէ միոյ և եթ գերդաստանի ա-
ռաջնորդէր : Անյիշատակ արար զամե-
նայն պատճառ զրդութեան պատե-
րազմի, և յաւէրժ խաղաղութիւն կա-
լաւ ընդ քաղաքացիս և ընդ օտարս :
Ճարտարմտութիւն նորա ՚ի դրաւո-
րականս էր լուծանել և առաջարկել
ազգի ազգի խնդիրս այլաբանականս .
նա ինքն հռչակաւոր կացոյց առ յոյնս
զյաճախելն յառեղծուածս՝ զորս ու-
սեալ էր յԵգիպտոս : Նորա է և յե-
տագայդ. Հայր ոմն է երկոտասան որդ-
ւոց, յորոց իւրաքանչիւրն ունի երե-
սուն դստերս զանազանեալս դեղեց-
կութեամբ. կէսք սպիտակադէմք են,
և կէսք սևադէմք : Ամահք են ամե-
նեքին, և զօրհանապաղ մեռանին :

Այս առեղծուած զտարին խորհրդա-
բանէ : Նա ինքն յօրինեաց զտապա-
նագիր գերեզմանին Միդասայ՝ յու-
րում տարապայման ներբողէ զայն
թագաւոր : Ոմանք թիւր կարծեօք Հո-
մերոսի համարեցան զնոյն, որ բազում
ժամանակօք յառաջ է քան զՄիդաս :

Սահմանէր Աղէոբուլոս զառաքի-
նութիւնն՝ ՚ի խուսել յանիրաւու-
թենէ և յայլոց ախտից : Ըստ այսմ է
և զոր ասէ Ուլրատիոս .

Ըսկիզբն իմաստից է չլինել անմիտ,
Առաքինութի՛ յախտից գոլ վըճիտ :

Սովորութիւն էր նորա ասել թէ
պարտ է յամենայնի հպատակել կար-
գի, ժամանակի և չափու : Առ ՚ի մեր-
ժել զանմտութիւն ընդհանուր բռ-
նացեալ յամենայն վիճակի մարդկան,
հարկ է բռնադատել զամենայն քա-
ղաքացի՝ յիւրում պայմանին վայելուչ
կալ : Չէ՛ ինչ յաճախեալ յաշխարհի
քան զտղիտութիւն և զչաղփաղփանս :
Խնամ՝ կալ վերամբարձ ունել զսիրտ
քո . մի ապերախտ, և մի դժբող : Բա-
րերարեա՛ առ բարեկամս քո և թշնա-
միս . սովին զմին պահեսցես, և թերեօ
յաղթեսցես երկրորդին : Մինչև ե-
լեալ ՚ի տանէ քումմէ՛ խորհեաց զոր
առնելոց ես . և ՚ի դառնալդ ան-

դրէն՝ զմտաւ ած, և քննեալ զոր ինչ
 գործեցեր: Սակաւ խօսեալ, և լուր
 բազում: Մի շարախօս լիցիս զումեքէ:
 Ներեսջիր այլոց բազումս, այլ քեզ և
 ոչ մի: Բարերարեալ յամենայնի բա-
 րեկամին, զի առաւել բարեկամ լիցի-
 իսկ [Թշնամեոյ՝ զի բարեկամասցի. քան
 զի զգուշալի են սողտանք բարեկա-
 մաց, և խորշելի դարանք Թշնամեաց:
 Այն իշխան է երանելի, որ ոչ վստահի
 յոք՝ ի Թշնամեաց: ՉԹշնամիս հայրե-
 նեացդ՝ և քեզ համարեալ լինել այնպի-
 սի: Մի լինիր մեծատուն բարձրամիտ,
 և աղքատ վհատեալ սրտիւ: Որչափ ոք
 առաւել կարէ, այնչափ նուազ կամի-
 ցի: Ո՛չ ոք անզգամութեամբ երջան-
 կասցի ընդերկար: Ո՛չ ումեք՝ ի պար-
 ծանս են արդիւնք նախնեացն, այլ
 վատութիւն առաջնոց յոլովակի ըն-
 ծային յետնոց: Բարիոք հաստատեալ
 է տուն, յորում բազումք են որք սի-
 բենն, քան որք երկնչին՝ ի տանուտեա-
 նէն: Գուն գործեալ խորհիլ և դիտել
 ինչ մեծ և պանծալի: Որ միանգամ
 խնայէ շարաց, կորուսանել կամի ըզ-
 բարիս: Չծառայս արբեալս մի պա-
 տուհասեցես. զի մի և դու ինքն ար-
 բեալ երևեսցիս: Խորհուրդ հարցցես՝
 յոր ինչ արդարացի վարկանիցիս: Մի
 կարի անձնատուր լիցիս ՚ի հաճոյա-

կանս : Հաշտեաց ընդ Թշնամիս՝ Թէ
 ունիս . մի ինչ առնիցես բռնի : Խնամ՝
 կալ ՚ի բարիոք դաստիարակութիւն
 որդւոց քոց : Մի ծաղը առներ զհիգա-
 ցելովք : Թէ ընդ քեզ է բազդ՝ մի ամ-
 բարտաւանիր , և մի վհատիր ՚ի շրջել
 նորա զթիկունսն : Առ քեզ կին՝ որ-
 պէս ներէ վիճակ քո . զի Թէ ամուսնա-
 նաս ընդ ազնուատոհմի քան զքեզ ,
 իցեն քո այնչափ տեարք , որչափ տոհ-
 մային մերձաւորք իցեն կնոջն : Խնամ՝
 կարևոր պահանջի վասն դատերաց , մի
 ամուսնացուցանել զնոսա՝ եթէ տիօք
 մանկամարդ , այլ վարուք և զգօնու-
 թեամբ չիցեն կանայք : Չէ՛ արժան
 առն գովել զկին իւր , և ոչ նախատել
 առաջի օտարաց . վասն զի առաջինն
 տկարութիւն է , երկրորդն անմտու-
 թիւն :

Իբրև լուաւ Աղէօբուլոս՝ Թէ Սողոն
 լիք եթող զգաւառ իւր , բազումս ջա-
 նահնար եղև առ ինքն ձգել զնա :
 Գրեաց նմա օրինակ զայս . « Կան քո
 բազում բարեկամք , և ամենեցուն նո-
 ցա դրունք տանց բացեալ են առաջի
 քո . այլ ես այնպէս համարիմ՝ Թէ չիք
 քեզ ապահովագոյն տեղի բնակու-
 թեան քան զՂինդոս . սա ազատ քա-
 ղաք է ծովեզերեայ , ոչ հասցէ քեզ
 աստ երկիւղ Պիսիատրատոսի . և զիւր

է ամենայն բարեկամաց քոց աներկիւղ աստէն հանդիպել քեզ ։

Չգօնութեամբ գիտաց Վղէորուլոս վայելել յամենայն օգուտ միջական պայմանի բախտին իւրոյ՝ և անղբօս կենաց ՚ի զբաղմանց աշխարհի ։ Բարեբաղդ տանուտէր էր, հայր բարեբաղդ, և բարեբաղդ քաղաքացի. մեռաւ յեօթանասուէն ամաց հասակի, զբովանդակ կեանս իւր վայելեալ ՚ի պատուի ։ Աոժ եղին Վինդացիք ընդ մահ նորա, և կանգնեցին նմա հոյակապ դամբարան, և արձանադիր դրոշմեցին ՚ի նմա՝ առ յիշատակէ նորա ։

ԵՊԻՄԵՆԻԴԵՍ

Եկեալ յԱթէնս 'ի խէ ողիմպիագին .
կարծի ննջել նմա անընդհատ զամս յի-
սուն և եօթն յայրի ուրեք . և ապրիլ
ամս 154, կամ 157, և կամ 298:

ԵՊԻՄԵՆԻԴԵՍ զնոսացի հրո-
չակեալ էր 'ի Կրետէ կղզւոջ 'ի ժա-
մանակին յորում մեծարեալ էր Սո-
ղոն յԱթէնս . այր մենակեաց էր՝ հրա-
ժարական ունելով կեանս, որդի կար-
ծեցեալ յաւերժահարսին Բալտայ :
Համօրէն յոյնք էին 'ի միտս հաստա-
տունս թէ ներշնչեալ է նա յերկնա-
ւոր իմն հոգւոյ, և յաճախեն առ նա
տեսիլք աստուածեղէնք : Բովանդակ
պարապեալ էր 'ի քերթուածս, և յա-
մենայն որ յանկի 'ի պաշտամունս դից-
նա ինքն սկիզբն կալաւ՝ նաւակատիս
կատարել տաճարաց, սրբել պաշտա-
մամբք զանդաստանս, զքաղաքս, նա՛ և
զտունս իւրաքանչիւր : Չունէր 'ի յար-
դի զքաղաքակիցս իւր : Երանելի սուրբ
առաքեալն Պողոս յառաջ բերէ տող-
մի 'ի քերթուածոց սորա 'ի թղթին իւ-
րում առ Տիտոս, յորում բան արկ-

եալ վասն կրետացւոց՝ ասէր զնոսա
հանապաղասուտս, չարածճիս, դա-
տարկապորտս :

Եւ եղև զի հայր նորա յղեաց զնա
խնդրել դառն մի յանդի : Ի դառնալ
նորա՝ խոտորեցաւ յարահետ ճանա-
պարհէն, և եմուտ զմիջաւուրբ ՚ի քա-
րանձաւ մի՝ հանդչել սակաւ ինչ ան-
դէն, մինչև նուագեցէ տօթն հրա-
տապ. անդ նիրհեալ մնաց ամս յի-
սուն և եօթն : Իբրև զարթեալ՝ քան-
զի ոչ կարծէր այնչափ յերկարել ՚ի
հանդչելն իւրում, հայեցաւ շուրջ
զիւրև՝ խնդրել զդառնն. և շղտեալ
զնա՝ ել արտաքս, և յափշութիւն հա-
րաւ՝ տեսեալ զամենայն ինչ կերպա-
րանափոխ : Ընթացաւ զարմացմամբ
ի տուն անդր ուստի զդառնն առեալ
էր, և ահա տէր տանն փոխեալ, և ոչ
ոք իմանայր զոր ինչ սա ասէր : Չար-
հուրեալ և ահաբեկ դարձաւ ՚ի քա-
ղաքն ՚ի Գնոսսա՝ ուր ոչ զոք ճանաչէր
ի մարդկանէ. այսպէս ժամ ՚ի ժամէ
առաւելոյր հիացումն նորա : Ի մտա-
նելն ՚ի տուն հօր իւրոյ, ո՞վ ես հարցա-
նէին, և զի՞նչ խնդրես. հաղիւ ուրեմն
յետ բազումս տազնապելոյ, ծանօթս
եւ զանձնէն եղբօր իւրում կրտսերոյ՝
որ մանուկն էր ՚ի մեկնելն ՚ի տանէն,
և արդ ՚ի դառնալն իւրում տեսանէր

զնա ծերացեալ: Այս տարօրինակ պա-
տահումն զհամբաւի հարաւ 'ի գաւա-
ռին, և անդէն ամենայն մարդ համա-
րեցաւ ընդ միտս իւր զԵպիմենիդէս
խնամեալ 'ի դից: Որք անհնարին զնեն
զննջել Եպիմենիդեայ զայդ երկարա-
ձիգ ժամանակ, համարին թէ ընդ ամս
յիսուն և եօթն յանձանօթս չըջեցաւ
նա ընդ տար աշխարհս, միտ եղեալ 'ի
խելամտութիւն պարզ էակաց:

Յորժամ Մեկագլ՝ անողորմ զայ-
րացութեամբ մահու դատէր զամե-
նայն կուսակիցս Աիլոնի, մինչև յա-
րիւն ներկել և զսեղանս բազնաց, յեր-
կիւղ մեծ պակուցեալ աթենացւոց՝
որ քան զոր տազնապէին տարակու-
սեալք. թող և զտարաժամ սրածու-
թեան ախտն որ յապականութիւն
դարձուցանէր զերկիրն համօրէն, կար-
ծէին նորա թէ քաղաքն կալեալ իցէ
յողւոց չարաց: 'ի խորհուրդ ժողո-
վեալ քրմացն՝ գող հասու եղեն 'ի պա-
տարագս իւրեանց, թէ գոն 'ի նոսա
գարշութիւնք՝ որովք պղծեալ է ողջոյն
քաղաքն: Առաքեցաւ փութանակի
Նիկիաս նաւու 'ի Արետէ՝ ածել անտի
զԵպիմենիդէս, որ արդէն քաջանուն
էր ընդ համօրէն Ելլադա: Այն ինչ
յաթէնս հասանէր Եպիմենիդէս՝ ա-
ռեալ զառինս սեաւս և սպիտակս տա-

նէր յԱրէոսպագոսն . ուր արձակեաց
 զնոսա՝ զնալ յո՛ և կամիցին : Հրաման
 ետ առ նմին՝ զի զհետ պնդեալ զգա-
 ռանցն՝ զենցեն զնոսա զամենեսին՝ ՚ի
 պատիւ իւրաքանչիւր խնամակալ զից
 տեղեացն յորս գտանիցեն հանգու-
 ցեալ զմի մի գառանցն : Այսր աղա-
 դաւ մինչև յաւուրս Լաերտիոսի էր
 տեսանել շուրջանակի զԱթէնք քա-
 ղաքաւ բազում սեղանս նուիրական
 դից՝ զորոց անդիտանային զանուանս :
 Այս ամենայն զոր հրամայեացն Ե-
 պիմենիդէս՝ կատարեցաւ խնամով, և
 անդէն առ նմին տեղի ետ կոտորած
 մահուն . և ոչ ոք տազնապեցաւ այլ
 ևս յառաջօք երևութից :

Սերտ սիրով բարեկամացաւ Եպի-
 մենիդէս յԱթէնս ընդ Սողոնի . և
 բազմօք ջանահնար եղև ՚ի հաստատու-
 թիւն օրինաց նորա յայտ յանդիման
 կացոյց ամենեցուն զխժդժական կրօնս
 կանանց ՚ի յուղարկաւորութիւնս .
 մեղմացոյց առ սակաւ սակաւ զոգիս
 աթենացւոց՝ աղօթից և պատարագաց
 հպատակ լինել . և սովին դիւրընտելս
 արար զնոսա կեալ արդարութեամբ,
 և մի մաքառել ընդ աւագանին :

Յաւուր միում քաջ զննեալ զնաւա-
 հանդիստն Մունիբիա, ասաց առ որս
 մօտ կային . ՚ի խաւարի ըմբռնեալ կան

մարդիկ՝ մինչև դիտացեալ զապա-
գայս . զի թէ դիտէին աթենացիք քա-
նի աղէտից պատճառ լինիցի երկրի
նոցա այդ նաւահանդիստ, անդէն ան-
յապաղ քանդէին զայդ : Բնակեալ
Եպիմենիդեայ ժամանակս ինչ յԱ-
թէնս, զերեսս հաստատեաց զարձ առ-
նել անտի . հանդերձեցին աթենացիք
նաւ վասն նորա, և մատուցին նմա
տաղանդ մի՝ տրիտուր վաստակոց նո-
րա : Ընորհս կալաւ նոցա Եպիմենի-
դէս բազում բարեհաճոյ բանիւք, և
չէառ յանձն ընդունել ՚ի նոցանէ
զարծաթն . շատ համարեցաւ խնդրել
զբարեկամութիւն նոցա, և զհաստա-
տութիւն բարեկամութեան ընդ ա-
թենացիս, և ընդ գնոսացիս : Մինչև
մեկնեալ անտի՝ ետ կառուցանել տա-
ճար հոյակապ ՚ի պատիւ վհուկ կա-
տաղեաց դժոխոց :

Հետամուտ եղև Եպիմենիդէս տպա-
ւորել ՚ի միտս ժողովրդեան թէ ինքն
իսկ է Էակոս որդի Պրիամոսի . և զի
ցանկ յարուցեալ երևի ՚ի մեռելոց :
Ոչ որ երբէք ետես զկերակրել նորա .
որ պատճառս ետ ասել՝ թէ ՚ի յաւեր-
ժահարսանց սնանի . և այն ևս՝ թէ
ընդ կճղակաւ եղին միոյ պահէ նա զա-
նուշահամ կերակուրն իւր, զոր պաշ-
տենն նմա յաւերժահարսունք . և թէ

այն հրաշալին կարծեալ կերակուր՝
բովանդակ փոխարկի՝ ի սնունդ մարմ-
նոյ նորա՝ առանց ինչ յաւելուածոյ :

Նախապատմեաց սպարտացւոց ըզ-
դառն ծառայութիւնն զոր ծառայե-
լոց էին արկադացւոց : Մինչդեռ եր-
բեմն պարապեալ էր ՚ի շինուած տա-
ճարի զոր նուիրել ունէր յաւերժա-
հարսանց, լուաւ ձայն իմն յերկնից
հնչեցեալ առ նա . Եպիմենիդէս, մի
յաւերժահարսանց, այլ Դիոսի նուի-
րեալ զտաճարդ :

Ի լսել սորա զտարադէմ գնալ Սո-
ղոնի յԱթենայ, թղթեաց առ նա
քաջալերս, և հրաւիրէր դալ ՚ի Արե-
տէ, ունելով դրոյն օրինակ զայս .
,, Բարեկամ մտերիմ, արիացիր յան-
ձին քում. եթէ Պիսիստրատոս ընդ
բռամբ նուաճեալ էր զաղգ վարժեալ
՚ի ստրկութիւն, կամ զորս չիցեն բնաւ
կեցեալ ընդ խոհական օրինօք, թերևս
իշխանութիւն նորա ձգէր ընդ եր-
կար, սակայն գործ է նորա ընդ ա-
րանց ազատաց՝ որոց ոչ պակասէ ե-
ռանդն արիութեան : Յետ ոչ բազում
ժամանակաց յուշ լիցին նոցա պա-
տուէրք Սողոնի . ամաչեսցեն ընդ շրջ-
թայս կապանաց իւրեանց, և ոչ ևս
ժուժեսցեն թէ այր բռնաւոր կալցէ
ղնոսա ՚ի գերութեան ընդ երկար : Նա՛

ապաքէն թէպէտ և ընդ բովանդակ
կեանս իւր կացցէ Պիսիստրատոս յիշ-
խանութեանն, թագաւորութիւնն նո-
րա ոչ անցանէ յորդիս նորա. քանզի
և անհնար իսկ է, թէ մարդիկ վար-
ժեալք ՚ի կեանս ազատութեան ընդ
բարեկարգ օրինօք՝ յանձին կալցեն յա-
ւերժ մնալ ՚ի դերութեան: Այլ ես
ազաչեմ դքեզ, մի տատանեալ աստան-
դական շրջիր, փութա՛ եկ առ մեզ ՚ի
Արեւո՛՛ս՝ ուր չիք որ բռնակալ խռովա-
րար. քանզի և խիթամ մեծապէս, թէ
՚ի հանդիպել քեզ բարեկամաց Պի-
սիստրատոսի, որում հնար է լինել,
տաղնապ վշտաց հասուսցեն քեզ”:

Անցոյց Եպիմենիդէս զբովանդակ
կեանս իւր ՚ի հրահանգս բարեպաշ-
տութեան. և զի սիրելի էր նմա բա-
նաստեղծութիւն՝ բազում ինչ գրեաց
տաղաչափութեամբ. յորս նշանաւոր
է ծննդաբանութիւն Աուրետեանց և
Լօրիբանտեայց հին ժողովրդոց Արե-
տայ: Յօրինեաց և ճառ արձակ շա-
րադրածով յազազս պատարագաց և
հասարակաց իշխանութեան Արե-
տեայ. թող և զայլն ՚ի վերայ Մինոսի
և Հռադամանտեայ:

Մեռաւ ՚ի հասակի հարիւր յիսուն
և եօթն ամաց, ըստ այլոց՝ երկերիւր
իննսուն և ութ: Եւ քանզի բովան-

դակ կեանք նորա հրաշապատում են ,
 ըստ նմին աւանդեն ոմանք թէ յայն-
 չափ աւուրս ծանրացաւ ծերութեամբ՝
 որչափ ամս 'ի քուն հանգուցեալն էր :
 Նուէրս պատարագաց մատուցին նմա
 կրետացիք իբրև աստուծոց , և ըստ
 սովորականին՝ կուրետոս անուն կար-
 դացին նմա , որ թարգմանի կրետացի :
 սպարտացիք փութաջան խնամով պա-
 հեցին զնա առ իւրեանս , 'ի յիշատակ
 հնապատում պատգամի՝ որ զայն պա-
 տուիրէր նոցա :

ԱՆ ԱՔ ԱՐՍԻՍ

Գնաց յաթէնս 'ի քառասներորդ եօթ,
ներորդ ողբմախադին, և սպանաւ յեա
դառնալոյն 'ի հայրենիս իւր . յորմէ
մարթ է իմաստասիրել թէ ժամանա-
կակից էր բաղմաց 'ի նախակարգե-
լոցն :

ԱՆ ԱՔ ԱՐՍԻՍ սկիւթացի յազ-
դէ՝ դասեալ 'ի կարգս իմաստնոց՝ էր
եղբայր Կադուխիասայ թագաւորին
Սկիւթիոյ, և որդի Գնուրոսի, և մօր
յունի . որոյ վասն հեշտին եղև ուսա-
նել և զկրկին լեզունն : Քաջուշեղ էր
և պերճախօս . արի և անդրդուելի յորս
միանդամ ձեռն արկանէր : Ընդ ամե-
նայն եղանակս տարւոյն միօրինակ
ձորձք էին նորա խոշոր և կրկնակ, և
կերակրէր կաթամբ և պանրով : Ա-
տենախօսութիւնք նորա 'ի համառօտ
բանս բովանդակէին . և զի ոչ ուրեք
երբէք վհատութիւն յանձին բերէր,
յաջողէր նմա ամենայն յոր ինչ ձեռ-
նամուխ լինէր : Համարձակ և պերճ
ոճ բանից նորա յառակս համարեալ
էր . զի թէ ոք յայդմ նմանէր նմա, ա-
սէին թէ Սկիւթապէս խօսի :

Եթող Անաքարսիս զՍկիւթիա՝ զի
 դնացեալ բնակեսցէ յԱթէնս . և ՚ի
 հասանելն անդր՝ խնդրեալ բաղխեաց
 զդուրսն Սողոնի, և ասաց ցայրն որ
 եբաց նմա, ազդ առնել Սողոնի՝ թէ
 եկեալ է յայցելութիւն նորա, և ըղ-
 ժամանակս ինչ բնակել առ նմա: Պա-
 տասխանի արար նմա Սողոն այսպէս.
 Հիւրընկալել պարտի իւրաքանչիւր ՚ի
 դաւառի իւրում, կամ ՚ի տեղիս որ
 նմին անկ են: Առ այս բան ՚ի ներքս
 եմուտ Անաքարսիս, ասելով առ Սո-
 ղոն. Քաջ է. զի ՚ի դաւառիդ քում
 կաս, և ՚ի տան քում, պարտ է քեզ
 հիւրընկալ լինել. և յայսմ հետէ
 կալ ընդ իս բարեկամութիւն: Սքան-
 չացեալ Սողոնի ընդ եռանդուն պա-
 տասխանի նորա, սրտի մտօք յանձին
 կալաւ հիւրընկալել զԱնաքարսիս, և
 սերտ բարեկամութեամբ միացաւ ընդ
 նմա, որ ձգեցաւ ընդ ամենայն աւուրս
 կենաց նոցա:

Մեծապէս հաճոյական էր Անա-
 քարսեայ բանաստեղծութիւն. գրեաց
 տաղաչափութեամբ զօրէնս սկիւթաց-
 ւոց, և ճառ յաղագս պատերազմի:
 Սովորութիւն էր ասել նորա, որթ
 եռատեսակ խաղող պտղաբերէ. զուար-
 ճութիւն, արբեցութիւն, և ապա-
 շաւ: Զարմացեալ էր ՚ի տեսանելն՝ զի

յամենայն քաղաքախումբ երաստոս որ
 լինէին յԱթէնս՝ շատ համարէին ի-
 մաստունք ՚ի մէջ մատուցանել զգլուխ
 բանիցն . զոր յետոյ պատուիրանաւ
 սահմանէր ռամիկն, սակայն ոչ բաւէր
 ՚ի միտ առնուլ թէ զի պատուհասին
 թշնամանողքն բանիւք . և ընդհակա-
 ռակն վարձատրին ըմբիշք և նահա-
 տակք որք սաստիկ ուժով հարկանեն
 զիրեարս : Ըստ նմին օրինակի զար-
 մանս յանձին բերէր՝ տեսեալ թէ
 յոյնք ՚ի սկզբան կերակրոյ առնուին
 բաժակ չափաւոր մեծութեամբ . իսկ
 մեծամեծս ՚ի կատարածի յորժամ
 ջեռնուն գինւով : Ոչ հանդուրժէր
 տարապայման ազատութեանն՝ որով
 լրբէր ամենայն մարդ . ՚ի պահու կոչ-
 նոցն : Հարցաւ յաւուր միում՝ զինչ
 արժան է գործել, առ ՚ի կարձել զոք
 յարբեցութենէ գինւոյ : Ոչինչ այլ,
 ասէ, բայց մատուցանել առաջինորս
 այր մի արբեալ, զոր մանր ընդ քննու-
 թեամբ արկցէ : Հարցեալ յոմանց .
 իցեն ՚ի Սկիւթիա նուաղք երաժշտու-
 թեան . ետ պատասխանի . չկան և ոչ
 այգիք : Զիւղն որով օժանէին ըմբիշք
 մինչչև բախեալք ընդ միմեանս՝ կոչէր,
 հանդերձանս զայրացեալ մոլեգնու-
 թեան :

Նայեցեալ երբեմն ուշի ուշով ընդ

ստուարութիւն տախտակաց նաւու միոյ, ո՛հ, եղիւկ, ասէ. որք ճանապարհ հատանեն ընդ ծով՝ չորեքմատնեան և եթ տարակայութեամբ հեռի կան ՚ի մահուանէ: Հարցին ցնա. ո՞ր նաւ ապահովագոյն է. ասէ, հասեալն ՚ի նաւահանգիստ: Ասէր ստէպ՝ թէ հարկ է ամենայն մարդոյ բուռն առնել իշխել լեզուի իւրոյ և որովայնին: ՚ի ննջելն զձեռն իւր զաջոյ ունէր միշտ ՚ի վերայ բերանոյն, ուսուցանել կամեցեալ թէ չիք քան զլեզու՝ զգուշութեան կարօտ:

Այր ոմն աթենացի մինչ նախատէր զնա զի սկիւթացի էր յազգէ. ետ պատասխանի. Հայրենիք իմ անարգանք են ինձ. այլ դու՝ հայրենեաց քոց: Հարցաւ երբեմն. զինչ լաւագոյն, և զինչ յոռեգոյն ՚ի մարդիկ. ասէ. լեզուն է: Ասէր. լաւագոյն է ունել մի և եթ բարեկամ, միայն թէ անկեղծ իցէ. քան բազումս ունել՝ յօժարամտեալս զհետ ընթանալ զբաղդին: ՚ի հարցանել ցնա ոմանց, կենդանիք բազում իցեն, թէ մեռեալք, ասէր. զորս ճանապարհորդեն ՚ի ծովու՝ յորո՞ց դասէք ՚ի համարի: Աւճառափողոցք ասէր՝ տեղիք են սահմանեալք ՚ի մարդկանէ՝ ՚ի պատրել զմիմեանս: Յանցանել նորա երբեմն ընդ ճանապարհ ու

րեք՝ նախատեաց զնա տմարդութեամբ
 ոմն երիտասարդ . հայեցեալ ընդ նա
 Անաքարսեայ, ասէ ցնա անխռով, թէ
 դու չհանդուրժես գինւոյ՝ ՚ի մանկու
 թեան քում, ՚ի ծերութեան քում
 միշտ ջուր արբցես : Համեմատ դնէր
 զօրէնս ոստայնից սարդի, և ծիծաղէր
 ընդ Սողոն՝ որ յուսայր գրովք իւրովք
 սանձահարել զկիրս մարդկան : Սա
 ինքն եգիտ հնարս գործել անօթս կա
 ւակերտս ՚ի վերայ դրգան :

Գնացեալ նորա երբեմն պատգամ
 հարցանել ընդ քրմուհին Ապողոնի,
 գիտել թէ իցէ՞ որ քան զինքն իմաս
 տուն . հարցուկն եցոյց նմա զՄիսոն
 զոմն Քենացի . սքանչացաւ Անաքար
 սիս ընդ այն՝ զի չև էր լուեալ զանուն
 նորա : Եւ ՚ի խնդրել զնա ՚ի գիւղն
 յորում բնակէր . և եգիտ զնա զի յար
 դարէր զմաճ իւր . կարդաց առ նա և
 ասէ . Ո՛վ Միսոն՝ չէ ժամս հերկելոյ
 զերկիր : Նա՛ մանաւանդ՝ ասէ Միսոն,
 ժամ իսկ է կազմելոյ զմաճն թէ խոր
 տակեալ ինչ իցէ : Չայս Միսոն դա
 սակարդէ Պղատոն ՚ի համար իմաստ
 նոց . մենակեաց կեայր նա յառանձ
 նութեան իւրում, յորում անցուցա
 նէր զաւուրս կենաց իւրոց, չունելով
 բան ընդ ումք . քանզի մարդաստեաց էր
 ըստ բուսոյ բարուցն : Տեսաւ նա եր

բեմն թաղուցեալ յանկեան ուրեք՝ զի
 ծիծաղէր յամենայն զօրութենէ: Մա-
 տուցեալ առ նա ոմն՝ հարցանէր թէ
 զի այդչափ ծիծաղիս, զի չիք ոք ընդ
 քեզ. Ա՛յդ իսկ է ասէ, որ տայ ինձ
 ծիծաղել:

Լուեալ Արեսոսի զհռչակ համբա-
 ւոյն Անաքարսեայ՝ յղեաց նմա ար-
 ծաթ ՚ի պարգև, և աղաչեաց՝ գալ
 առ ինքն ՚ի Սարդի. ետ նմա Անաքար-
 սիս պատասխանի այսպէս. «Արքայդ
 լիւղացւոց՝ եկի ես յԵՂադա՝ ուսա-
 նել աստէն զլեզուս, զսովորութիւնս
 և զօրէնս երկրիս: Ծոխութեանց չեմ
 կարօտեալ, և շատ գրեցից անձին
 իմում, թէ դարձայց ՚ի Սկիւթիա ժը-
 րագոյն քան զոր յառաջն էի: Մա-
 կայն եկից և յայցելութիւն քո, զի
 փափաքեմ լինել ՚ի համարի բարեկա-
 մաց քոց »:

Յետ կալոյ նորա ժամանակս բա-
 զումս յԵՂադա, կազմեցաւ զնալ ան-
 տի: Յանցանելն ընդ Աիւլիկոն՝ գտա-
 նէ զԲնակիչս այնր քաղաքի՝ զի մեծա-
 ժողով տօն կատարէին դիցամօրն:
 Ուխտեաց Անաքարսիս աստուածու-
 հւոյն՝ մատուցանել նմա զնոյն պա-
 տարագս, և նոյնօրինակ տօն սահմա-
 նել յանուն նորա յերկրի իւրում, թէ
 անվտանգ հասցէ անդր: Իբրև եհաս

'ի Սկիւթիա՝ ձեռն արկ փոխել զօրէնս երկրին, և զյունացն հաստատել ընդ այնր: Խոթողեցան ընդ այս սկիւթացիք:

Եւ եղև յաւուր միում՝ զի եմուտ Անաքարսիս ծածկաբար յանտառ մի թաւուտ 'ի գաւառին Իւլէայ, կատարել անդ անտես 'ի մարդկանէ զուխտն իւր զոր արարեալ էր Աիւբէլէայ դիցամօրն. 'ի գլուխ հան անդ զպաշտամունսն զամենայն՝ ունելով 'ի ձեռին զթմբուկն՝ առաջի պատկերի հելլէն դիցն: Ետես զնա սկիւթացի ոմն, և զգացոյց թագաւորին: Յարուցեալ նորա՝ եհաս փութանակի յանտառ անդր, և եզիտ զեղբայր իւր զԱնաքարսիս զգործով երկրպագութեան պատաղեալ, և անդէն նետընկէց եհար զնա: Փչեաց զոգին Անաքարսիս, աղաղակեալ այսպէս. Խաղաղութեամբ կեցի յԵլլադա՝ ուր զնացեալ էի 'ի հրահանգել 'ի բարբառ և 'ի կրօնս հայրենի գաւառին իմոյ: Յետ մահու նորա կանգնեցան նմա արձանք բազումք:

ՊԻԻԹԱԳՈՐԱՅ

Ճաղկեալ զվաթաներորդ ողիմպիադաւ,
եկն յիտալիա 'ի վաթաներորդի երկրոր-
դի. մեռաւ 'ի չորրորդ ամի եօթանաս,
ներորդի 'ի հասակի ութսուն ամաց,
կամ ըստ այլոց՝ իննսուն:

ՊԻՉԱԿԵԱԼ է ընդ հանուրս
բաժանումն իմաստասիրութեան 'ի
յոնիական և յիտալական: Թաղէս
միլեսացի կամ միլետացի առաջնորդ
դաւալ յոնիականին, և Պիլթագորաս
իտալականին: Պատմէ Արիստիպպոս
կիւրենացի թէ այս իմաստասէր Պիլ-
թագորաս կոչեցաւ, իբրու զի ճշմա-
րիտ էին պատգամք նորա. իբրև
զպիլթեանն Ապողոնի. քանզի Պիլ-
թագորաս 'ի յոյնն լի՛ իբրև զՊիլ-
թիա խօսող: Սա ինքն զառաջինն շա-
փաւորութեամբ իմն հրաժեշտ եկաց
յիմաստուն անուանէ, զիմաստասէրն
կոչիլ շատ համարեալ: Հասարակաց
կարծիք են՝ սամեացի լինել Պիլթա-
գորայ, որդի Մնեսարքոսի անդրիա-
գործի. թէպէտ և հաւաստեն այլք թէ
թուսկիացի իցէ, ծնեալ 'ի միում

կղզեաց առ ափամբք տիւրենեան ծո-
վուն, որոց տիրեցին աթենացիք :

Գիտէր Պիւթագորաս զարուեստ
հօր իւրոյ . և շինեալ իսկ էր ինքնին
երիս բաժակս արծաթիս, զորս ետ 'ի
պարգև երից քրմաց եգիպտացւոց :
Չառաջինն աշակերտեցաւ զգօն առն
Փերեկիդեայ, և սիրով յարեցաւ 'ի
նա . սիրէր զնա մեծապէս և Փերեկի-
դէս : Եղև երբեմն՝ զի մինչև 'ի մօտա-
լուտ վտանգ մահու անկեալ դնէր Փե-
րեկիդէս, կամեցաւ Պիւթագորաս
մտանել 'ի սենեակ նորա՝ առ 'ի տե-
սանել զնա . այլ Փերեկիդէս որ խի-
թայր ընդ տարափոխիկ ախտակրու-
թիւն իւր՝ փութապէս փակեաց նմա
զդուրսն, և ցուցեալ նմա ընդ ճեղ-
քուած ուստեք զմատունս իւր . Տես
ասէ, և 'ի մատանց իմոց զորս տեսա-
նես վտտեալս՝ 'ի միտ առ զաղէտսն
յոր տառապիմ :

Յետ մահուն Փերեկիդեայ՝ հպատա-
կեաց ուսման Պիւթագորաս առ ժամն
'ի Սամոս առ ոտս Երմոզանտեայ .
յետ այնորիկ՝ զի վառեալ էր սիրտ
նորա 'ի տեղեկութիւնս սովորու-
թեանց օտար ազգաց՝ եթող զհայրե-
նիս իւր և զոր ինչ ունէրն՝ պատրաս-
տեալ յուղեգնացութիւն : Բնակեաց
ընդ երկար յԵգիպտոս՝ ելումուտ առ-

նել առ քուրմն, և ՚ի խորս մտանել
 թագնութեան կրօնից նոցա : Գրեաց
 վասն նորա թուղթ ընծայութեան
 Պողիկրատէս առ Ամասիս արքայ եւ
 զիպտացւոց՝ խնամ ունել նմա : Գնաց
 անտի Պիւթագորաս յաշխարհն քաղ-
 զէացւոց՝ ուսանել զարուեստ մո-
 գուցն : Յետ ամենայնի ճանապարհ
 արարեալ քննողական խուղարկու-
 թեամբ ընդ բազում տեղիս արևելից,
 եկն եհաս ՚ի Արետէ, ուր մտերմացաւ
 բարեկամութեամբ ընդ Եպիմենի,
 դեայ իմաստնոյ, անտի դարձ արար ՚ի
 Սամոս : Անդանօր ՚ի խոր խոցեալ՝ զի
 տեսանէր զհայրենիս իւր նուաճեալ
 ընդ բռնակալութեամբ Պողիկրա-
 տեայ, եղ ՚ի մտի՝ ինքնակամ գնալ
 տարազիր : Անց յԻտալիա և բնակե-
 ցաւ ՚ի Արոտոնա ՚ի տան Միլոնի,
 և անդ ուսուցանէր զիմաստասիրու-
 թիւն : Յազադս այսորիկ Իտալական
 անուանի առ ՚ի նմանէ սկզբնաւորեալ
 իմաստասիրութիւնն :

՚ի սուղ ժամանակի սիռեցաւ հրո-
 չակ անուան նորա ընդ համօրէն Իտա-
 լիա, և վաղվաղակի զհետ գնացին զնո-
 րա աշակերտք առաւել քան զերեքհա-
 ըիւր, յորոց կառուցաւ միական ըն-
 կերութիւն բարեկարգեալ : Գրեցին
 բազումք թէ մի էր ՚ի սոցանէ և Նու-

մա, և թէ՛ բնակէր 'ի Արոտոնա առ Պիւթագորասայ՝ յորժամ ընտրեցաւ թագաւոր հռովմայ. սակայն քաջքն 'ի ժամանակագիրս հաւաստեն՝ թէ այդ ամենայն անհաւաստի զրոյցք են զայն և եթ չհիմն ունելու՛ թէ կարծիք և բանք Պիւթագորայ զուգաձայն են ընդ Նումային՝ որ բազում ժամանակօք երէց էր քան զՊիւթագորաս:

Ասէր Պիւթագորաս՝ թէ ընդ մէջ բարեկամաց ամենայն ինչ հասարակաց է. և բարեկամութիւն՝ զուգահաւասարս առնէ զմարդիկ: Աշակերտք նորա ոչինչ ստանային առանձինն. 'ի միասին էր ամենայն ստացուած նոցա, և մի քսակ արծաթոյ էր ամենեցուն: Չհինգ ամսն զառաջինս աշակերտութեան իւրեանց՝ ունկն դնէին վարժապետին՝ առանց երբէք բերան բանալոյ՝ ասել բան մի: Յետ երկար և խիստ հրահանգութեանս՝ շնորհեալ էր նոցա խօսել, մատչել առ Պիւթագորաս, և կենաց կցորդ լինել ընդ նմա:

Տեսիլ կերպարանաց Պիւթագորայ քաջավայելուչ էր, աւարտահասակ, թիկնաւէտ, և դիմօք դեղեցիկ. զդէնոյր միշտ հանդերձ սպիտակ ասուէրէն. ոչ թողոյր զանձն ծառայ լինել կրից, և գործք նորա յամենայնի թա-

գուն էին : Ո՛չ որ ետես զծիծաղել
 նորա , և ո՛չ որ լուաւ զբան կատակա-
 նաց 'ի նմանէ . ո՛չ զոր պատուհասէր 'ի
 ցասման իւրում , և ո՛չ իսկ ձեռն ամ-
 քառնայր 'ի վերայ ուրուք 'ի ստրկաց :
 Աշակերտք նորա Ապողոն ոմն վարկա-
 նէին զնա . խուռնընթաց հասանէին
 յամենայն կողմանց ունկն դնել նմա ,
 և տեսանել զնա 'ի մէջ աշակերտաց
 իւրոց : Առաւել քան զվեցհարիւր այր ,
 ամաց յամս հասանէին 'ի Արտոոնա .
 և պատիւ մեծ համարեալ էր՝ թէ յա-
 ջողէր ումեք ընդ սուղ ժամս զբանիւք
 անկանել ընդ նմա :

Օրէնսդիր եղև Պիւթագորաս առ-
 բազում ժողովուրդս՝ որք թախանձա-
 նօք ժտէին 'ի նմանէ . այսպէս սքանչե-
 լի էր առ ամենեսին , զի և ոչինչ խտիր
 դնէին ընդ բանս նորա և ընդ զեղ-
 փեան պատգամս : Անհրաժեշտ արգե-
 լոյր երդնուլ , և կոչել զգիս 'ի վկայու-
 թիւն : Ասէր . պարտ է ամենեցուն
 այնպէս լինել յարդարութեան , զի
 ո՛չ ումեք հարկ լիցի հաւատարմացու-
 ցանել զբանս իւր : Ոգևոր և իմացա-
 կան համարէր զաշխարհ . և թէ հողի
 այսր մեծազանգուած գործարանի է
 Եթերն , յորմէ մասնաւորին հողիք
 իւրաքանչիւր կենդանեաց , մարդկան
 և անասնոց : Խելամտեաց ընդ անմա-

հուլիսին հողուոց, այլ կարծեալ առ նմին՝ թէ թափառին նորին ընդ օդս, և անխորաբար մտանեն ՚ի մարմին ուրոց զառաջինն հանդիպեսցին: Եւ այն ևս՝ թէ հողին ելեալ, օրինակ իմն ՚ի մարմնոյ մարդոյ, մտանէ ՚ի մարմին երիվարի, գայլոյ, իշոյ, մկան, կաքաւու, ձկան, կամ այլ կենդանւոյ, և կամ այլոյ մարդոյ՝ անխտիր: Նոյնպէս հողին անջատեալ ՚ի մարմնոյ որ զինչ և է անասնոյ՝ միօրինակ մտանէ ՚ի մարմին մարդոյ, կամ անասնոյ:

Այս աղաղաւ խստիւ հրատարեցուցանէր Պիւթագորաս ՚ի մտակեր խորտկաց: Կարծեալ այնպէս էր նորա՝ թէ ոչ դոյզն յանցանք են ՚ի ճմլել անդ զճանճ, զորդն, կամ զայլ մանրիկ միջատ, քան սպանանել զմարդ զլսովին. քանզի նոյն հողիք սփռեալ են ասէր ընդ ամենայն մարմինս: Եւ առ հաւանեցուցանել ամենայն մարդոյ զհողեփոխ վարդապետութիւն իւր՝ ասէր՝ թէ ինքն իսկ զառաջին Նտալիդէս ոմն էր, որդի կարծեցեալ Հերմեսի. որ իբրև ասէր ցորդին՝ խնդրել որ զինչ և կամիցի՝ բաց յանմահու թենէ, և այն ևս՝ թէ կատարեսցին խրնդրուածք նորա, Պիւթագորաս խրնդրեաց ՚ի նմանէ շնորհս՝ յիշատակել ՚ի կեանս իւրում, կամ ՚ի մահուն զա-

մենայն որ զինչ և լինիցի յաշխարհի .
ապա յետ այնորիկ քաջ դիտաց նա
բովանդակ զոր ինչ եղևն :

Յետ ժամանակս ինչ մնալոյ յան-
ձին Ետալիդեայ՝ եղև Եւփորբոս, որ
դտաւ ՚ի Տրոյական պաշարման, և կա-
րեվէր խոցեցաւ ՚ի Մենեղաւեայ . յետ
այնորիկ անց հոգի իւր յԵրմոտիմոս,
և զայնու ժամանակաւն առ ՚ի հաւա-
տարմացուցանել ամենեցուն զպար-
զևան ընկալեալ ՚ի Հերմեայ՝ գնաց ՚ի
գաւառն Բրանբիտեայց . եմուտ ՚ի
տաճարն Ապողոնի, և իբրև դիտակ
իրացն՝ եցոյց զասպար նորա ապակա-
նեալ, զոր Մենեղաւոս ՚ի դառնալն
իւրում ՚ի Տրոյիոյ նուիրեալ էր այնր
դից՝ ՚ի շնորհակալիս յաղթութեան
իւրոյ: Յետ Երմոտիմեայ եղև Պիւր-
բոս ձկնորս . ապա Պիւթագորաս ի-
մաստասէր . թիղ և զոր յառաջն եղև
աքաղաղ Միկիլիոսի, և սիրամարդ
անձանօթի ուրումն :

Պնդէր իբրև հաստատութեամբ՝
թէ ճանապարհորդեալ ՚ի դժոխս՝ ե-
տես անդ զհոգի քերթողին Հեսիոդո-
սի պնդեալ շղթայուք ընդ սիւնս, ուր
լկէր ջարատանջ: Իսկ զՀոմերոսին
տեսանէր կախեալ զծառոյ, և շրջա-
պատեալ յօձից՝ վասն բաղմահնար
ստութեանցն զորս յօղեալն էր առաս-

պելեօք 'ի վերայ դից : Եւ հողիք ա-
րանց ասէր՝ որոց չարեօք վարեալ էր
զկեանս ընդ կանայս իւրեանց՝ ան-
հնարին չարչարանօք տանջէին :

Պեղել ետ երբեմն Պիւթագորաս
խորխորատ մի 'ի տան իւրում. և ասեն
աղաչել նորա զմայր իւր՝ գրել հաւա-
տարմութեամբ զանցս ամենայն, ցոր-
չափ ինքն 'ի բացեայ իցէ անտի : Յետ
այնորիկ փակեաց զանձն 'ի խորափիտ
անդր ուր կացեալ ամ մի՝ ել անտի
աղտեղի, վտտեալ, և զազրտտի կերպա-
րանօք. գումարեաց զժողովուրդն՝ և
ասաց նոցա թէ 'ի դժոխոց դարձ ա-
րարեալ հասանեմ ես. և զի հաւա-
տասցեն նոքա որոց ասելոցն էր, սկսաւ
պատմել նոցա կարգաւ զամենայն
զանցս անցեալս 'ի նժդեհութեան իւ-
րում : Չահի հարաւ ժողովուրդն,
համարեցաւ թէ աստուածեղէն իմն
զօրութիւն գոյ 'ի նմա, ամենեքին առ
հասարակ արտասուագոչ աղաղակ
բառնային : Եւ արք աղերս արկեալ
մաղթէին 'ի նմանէ հրահանգել զկա-
նայս իւրեանց : Սորին աղագաւ կա-
նայք կրոտոնացիք՝ Պիւթագորեանք
անուանեցան :

'ի զնին գտաւ Պիւթագորաս յա-
ւուր միում 'ի հանդիսի խաղարկու-
թիւնս. և առաջի համօրէն ժողովր-

դեան կոչեաց առ ինքն ձայնիւք ոմամբք զարծուի մի, զոր ընդելացուցեալ էր նորա՝ առանց ուրուք գիտելոյ: Հրաշացան ընդ այս ամենեքին որք անդն կային: Սակայն առ յաւէտ ևս զարմանասքանչ գործել զիրան՝ երևեցոյց Պիւթագորաս յաչս ամենեցուն նոցա ազդր մի ոսկեղէն՝ մած ՚ի սրունս նորա:

Նուիրական պատարագք նորա էին կարկանդակք, կամ այլ ինչ ըստ նմին կարգի: Ասէր թէ խորշին աստուածք յարիւնոտ պատարագաց, և այն շարժէ զցասումն նոցա ՚ի վերայ մատուցանելեացն:

Հաւանական է իմաստասիրել՝ թէ զայսօրինակ վարդապետութեամբք կամէր Պիւթագորաս ՚ի բաց քեցել ըզմարդիկ ՚ի բազմախորտիկ խնջոյից, և մարդել զնոսա յանպաճոյճ կեանս. քանզի այդ դիւր է բնութեան, և ոգիք ազատօրէն գործեն: Եւ առ օրինակաւ ՚ի գլուխ հանել զիրան՝ ջուր և եթ ըմպէր, իսկ կերակուր նորա էր հաց, մեղր, միրգ, և ունդք բաց ՚ի բակլայէ. թէպէտ և չէ յայտ թէ կր աղադաւ հրաժարեաց նա ՚ի բերոյ այդր տնկոյ:

Ասէր Պիւթագորաս, կեանք նման են թօնավաճառ հանդիսի. զի զորօրի-

նակ փութան հասանել ոմանք 'ի տօ-
նաւաճառս՝ առ մարդելոյ յըմբշամար-
տութիւնս, ոմանք վասն շահաւաճա-
ռաց, կէսք միայն 'ի զնին տեսեանց,
նոյնպէս և 'ի կեանս ոմանք ծնանին
ստրուկք փառաց, ոմանք ամբարտա-
ւանութեան, և կէսք հետամուտ են
ճշմարտութեան և եթ :

Ո՛չ յօժարէր բնաւ խնդրել ինչ
վասն իւր. զի ամենայն մարդ, ասէ,
տգիտանայ զոր ինչ ինքեան պիտոյն
իցէ : Բաժանէր զհասակ մարդոյ 'ի
չորս մասունս հաւասարս. մանկունք
են, ասէ, մինչև 'ի քսանամեան հասակ.
երիտասարդք մինչև 'ի քառասուն.
արք մինչև 'ի վաթսուն. ծերք մինչև
յութսուն. իսկ զոր աւելի քան զայն՝
ոչ գրէր ընդ կենդանիս :

Յօժարամիտ էր յերկրաչափութիւն
և յաստեղաբաշխութիւն. նա ինքն
հաս 'ի վերայ թէ լուսաբերն նոյն ինքն
գիշերավարն է. և եցոյց թէ յամենայն
ուղիղ եռանկիւնս՝ քառակուսի հակ-
ուղղոյն հաւասար է ընդ քառակու-
սեաց այլոյ երկուց կողմանցն : Պատ-
մել պատմեն թէ այնպէս իմն խնդա-
մտեաց Պիւթագորաս 'ի հաւաստելն
զայս հռչակաւոր տեսութիւն, զի պար-
տապան համարեալ զինքն ներշնչելոյ
զայն դից յանձն իւր, երախտագէտ

մտօք զհարիւրեղեանն մատոյց պատա-
րագ: Բազում ուրեք է յակն արկա-
նել զայդ պատմութիւն, թէպէտ և
հակառակ պիւթագորեան վարդապե-
տութեան. սակայն և կարծել մարթ-
է՝ թէ այն անուանեալ եղինք յօրի-
նուածք էին մեղու և ալեր, զոր օրինակ
սովորութիւն էր առ պիւթագորեանս:
Գրեն և ոմանք թէ մեռաւ նա առ մե-
ծի խնդութեանն վասն այնր. բայց
ըստ կարգի բանից Լայերտիոսի մար-
թիմք անհիմն համարել զդոյն:

Այս խնամ մեծապէս էր Պիւթա-
գորայ՝ բարեկարգութիւն և միաբա-
նութիւն ՚ի մէջ աշակերտաց իւրոց.
և բազում այն էր զի ՚ի վարդապետու-
թեան իւրում առակախօս լինէր առ
նոսա: Օրինակ իմն, ասէր, չէ արժան
երբէք ընդոստնուլ ՚ի կշիռս: Ծանու-
ցանելով նոցա՝ չհեռանալ երբէք յար-
դարութենէ: Չէ օրէն նստել առ թո-
շակօք աւուրն: Հրահանգէր սովին թէ
չէ ՚ի դէպ անազանել զառաջիկայիւն,
այլ միտ դնել և հանդերձելումն:
Խրատէր զնոսա՝ զօր ամենայն ընդ
սուղ ինչ ժամս զանձամբ դալ, և ա-
սել ցանձն. յինչ անցուցի զօրս ցե-
րեկ. ո՞ւր կացի, զի՞ գործեցի վայելուչ,
և զի՞ տարադէպ: Պատուիրէր նոցա
ունել միշտ յանձին զարտաքին զհա-

մեստութիւնս և զճանրութիւնս՝ ոչ
բնաւ անձնատուր լինելով յազդեցու
թիւնս խնդութեան կամ ցաւոց .
գութ ունել առ ծնողս, պատիւ առ
ծերս, կալ ՚ի մարդս աշխատութեան՝
զի մի տարապայման դիրացին, և մի
՚ի ճանստպարհորդութեան վատնել
զբովանդակ ժամանակն: Ի մեծարանս
գից՝ խնամք ժրաջան, և ջանալ ՚ի
պարտուպատշաճ պաշտօն նոցա:

Քաջ շահեցաւ ՚ի խրատուց Պիւ
թագորայ՝ ստրուկ նորա Զամուքսիս
սկիւթացի. քանզի ՚ի դարձին իւրում
՚ի հայրենի երկիր իւր՝ պատարագօք
պատուեցին զնա սկիւթացիք, և ընդ
զիս համարեցան զնա:

Կարծիք էին և Պիւթագորայ թէ
առաջին սկիզբն ամենայն իրաց Միւ
թիւն է. ՚ի միութենէ անտի բաշխին
թիւք, ՚ի թուոց կէտք, ՚ի կիտից գիծք,
՚ի գծից մակերևոյթք, ՚ի մակերևու
թից հաստատունք, և ՚ի հաստատնոց
չորեքին տարերքն հուր, օդ, ջուր և
հող, որովք կառուցեալ են տիեզերք
ողջոյն. և թէ այդօրիկ տարերք ցանկ
փոփոխին ընդ իրեարս, այլ ոչ մի ինչ
վատնի ՚ի տիեզերս. և ամենայն որ ինչ
լինի՝ բովանդակ փոփոխութիւն է:
Գնտաձև ասէր զերկիրս, զետեղեալ ՚ի
միջավայրի տիեզերաց, և բնակեալ

շուրջանակի. համարէր լինել և հակա-
 տոնէից, որք գնան՝ ներհական ունե-
 լով զոտս ընդդէմ մեզ: Օդ՝ զերկրաւս
 շրջափակ՝ ծանր է, և գոգջիր անշարժ.
 և յաղազս այսր ամենայն կենդանիք
 բնակեալք յերկրի՝ մահկանացուք են,
 և ընդ մահու դրաւեալք: Ընդ հակա-
 ոական՝ նրբին են եթերք և մշտաշարժ.
 յաղազս որոյ ամենայն կենդանիք
 բնակեալք ՚ի նմա անմահք են, և աս-
 տուածեղէնք: Արև, լուսին, և այլ
 ամենայն աստեղք՝ աստուածեղէն բնու-
 թեան բաժանորդք են, զի զմիջակէտն
 ունին զնրբին եթերացն, և զազդողա-
 կան ջերմութեանն՝ որ սկիզբն է կեն-
 դանութեան:

Բազմադիմի են կարծիք յաղազս
 կատարածի կենաց այսր իմաստասիրի:
 Են որք ասեն թէ ոմանք յաշակեր-
 տացն զորս ոչ կամեցաւ ընդունել՝
 զայրացեալք ընդ արհամարհել զնոսա,
 հուր հարին զտանէն Միլոնի ուր բնա-
 կէրն Պիւթագորաս: Այլք հաստա-
 տեն թէ նոքին իսկ կրոտոնացիք մտա-
 բերեցին յայդ եղեոն, զի խիթային
 թէ մի գուցէ տիրացեալ բռնակալես-
 ցէ Պիւթագորաս գաւառի նոցա: Որ
 զիարդ և իցէ, տեսեալ Պիւթագորայ
 զտունն ողջոյն ճարակ հրդեհին, փու-
 թանակի ՚ի բաց մեկնեցաւ անտի, ու-

նելով ընդ իւր քառասուն յաշակեր-
 տացն: Աւանդեն ոմանք թէ անկաւ 'ի
 նուիրական անտառն Մուսայից 'ի
 Մետապոնտոս (յայժմուս Պաղլիլիգա-
 դա դաւառ Նէապօլսոյ) ուր ինքնա-
 կամ սովամահ կորեաւ: Այլք հաստա-
 ւեն թէ հանդիպեալ նորա յարտ մի
 բակլայի՝ ընդ որ անցանել կայր նմա,
 ոչ յօժարեաց առ այն, և ասաց. լաւ
 իցէ մեռանել աստէն, քան առաթուր
 կոխել զվիճակ հիգացելոյ տնկոյդ: Ե-
 կաց անդէն անխռով մինչև 'ի հասա-
 նել կրօտոնացւոց՝ որք սպանին զնա և
 զբազումս յաշակերտաց նորա: Դար-
 ձեալ են որք պնդեն, թէ ոչ կրօտոնա-
 ցիք սպանին զնա, այլ 'ի բորբօրել մար-
 տի պատերազմի ընդ ագրիգենտացիս
 և ընդ սիրակուսացիս, դիմեաց Պիւ-
 թագորաս տալ ձեռն օգնութեան
 ագրիգենտացւոց դաշնաւորաց իւրոց.
 Իսկ իբրև ցրուեցան նոքա, և Պիւթա-
 գորաս զգուշացեալ 'ի բաց մեկնէր,
 անդ դիպաւ անդրոյն բակլայի՝ ընդ որ
 ոչ կամեցաւ անցանել, և յանձն առ
 խողխողիլ անդէն 'ի սիրակուսացւոց:
 Ընդ նմա սպանան և բազումք յաշա-
 կերտաց նորա, յորոց սակաւք ոմանք
 ապրեցան, ընդ որս էր և Արքիտաս
 տարենտացի՝ հռչակաւորն յերկրա-
 չափս իւրում ժամանակին:

Հ Ե Ր Ա Կ Ղ Ի Տ Ո Ս

Հոչակեալ զվաթաներորդ իններորդ ու
ղիմպիադաւ ։

Ն Ե Ր Ա Կ Ղ Ի Տ Ո Ս եփեսացի՝ որդի
Բլիսոնի, քաջանուն հոչակէր յամեն
վաթաներորդ իններորդ ողիմպիադին ։
Սովորական անուն էր նորա՝ Խաւաւ
ըին իմաստասէր, քանզի յամենայնի
բանք նորա առականխօսութեամբ էին ։
Պատմէ Լայերտիոս՝ թէ այր ինքնաւ
պարծ էր, և արհամարհէր գողցես զա-
մենայն մարդիկ ։

Ասէր, զՀոմերոս և զԱրքիլոքոս
բռնցի պարտ է վանել ՚ի բաց յամե-
նայն տեղեաց ։ Ոխութեան քինու-
լցեալ էր ընդ եփեսացիս՝ այնու զի տա-
րագրեալ էր նոցա զբարեկամ իւր
զԷրմոզրոս. համարձակէր ասել յա-
տենի բաղմութեան՝ թէ մահու պար-
տապան են ամենայն մարդիկ քաղաքին
այնորիկ, և մանկունքն տարադրու-
թեան, առ ՚ի քաւել զյանցանս ամօ-
թալից արտասահմանութեան առա-
քինւոյն ՚ի քաղաքակիցս իւրեանց, և
ականաւորին ՚ի պետութեանն ողջոյն ։

Չեղենն Հերակղիտոսի վարժապետք.
այլ հանդէս արար նա քաջութեան
իւրոյ խորախորհուրդ մտածութեամբ.
անտես առնէր զամենայն դործովք
մարդկան, և ախտակցաբար տխրէր
ընդ կուրութիւնն նոցա. այս 'ի տխուր
թախժութիւնն համակեաց զնա, մինչ
զի լայր հանապազօր, Յովննալիս կամ
Յոբնաղ լատինս քերթող՝ 'ի կշիռ
արկանէ զայդ իմաստասէր ընդ Գե-
մոկրիտեայ՝ որ անդադար ծիծաղէր.
ասէ. Ան իւրաքանչիւր իշխանու-
թիւնն 'ի ձեռս է՝ դառն ծաղու կծա-
նել զախտս և զանմտութիւնս աշխար-
հի. այլ ոչ խմանամ թէ ո՞ր այն աղ-
բիւր հոսիցէ այնչափ ջուր՝ բաւական
լինել արտասուացն հոսելոց անդու-
յաչացն Հերակղիտեայ:

Ոչ միշտ զնովին խորհրդովք դեգերէր
Հերակղիտոս. յերիտասարգութեանն
ասէր թէ դիտեմ և ոչինչ. իսկ յաւա-
դոյթ հասակին մեծամտէր դիտել զա-
մենայն ինչ. և թէ չիք ինչ անձանօթ
առ 'ի նմանէ: Գժպհի էին նմա ամե-
նայն մարդիկ. խորշէր յընկերութենէ
նոցա. գնայր ընդ մանկունս մանունս
քաղաքին վէդ խաղալ, կամ այլ ինչ
խաղ անստղիւտ առ Արտեմեայ տա-
ճարաւն: Եւ 'ի հորդան տալ զնովաւ
եփեսացւոց տեսանել զնա. Արք ան-

միտք, ասէր ցնոսա Հերակղիտոս, զի պշուցեալ էք տեսեալ զիս զի խաղամ ընդ մանկունսս ընդ այսոսիկ. ոչ ապաքէն լաւագոյն է զայս առնել, քան գործակից լինել ընդ ձեզ յանկարգ խնամակալութիւն գործոց քաղաքիդ:

Ազերս արկին նմա եփեսացիք կարգել իւրեանց օրէնս, այլ ոչ առ յանձն զայն Հերակղիտոս. զի գնացք ժողովրդեանն յաւետ իմն ՚ի վատթարն կոյս զակատեալ էր, և չունէր հնարս ճարտարել ՚ի փոփոխել զտարազ կենաց նոցա: Ասէր. պարտ է ժողովրդեանն նովին եռանդեամբ մարտնչել ՚ի պահպանութիւն օրինաց, որով մարտնչին ՚ի պատասպարութիւն պարսպաց: Պարտ է յօժարագոյն լինել ՚ի հանդարտել զցասումն, քան ՚ի շիջուցանել զհրդեհ. քանզի աղէտք առաջնոյն դժնդակագոյն են քան զերկրորդին: Շիջանի հրդեհ այրեցմամբ իրաց սակաւուց. այլ ցասումն՝ բազում այն է զի դուռն բանայ չարաչար պատերազմաց, յորոց կործանումն և խապառ քակտումն ազդաց:

՚ի յուզել երբեմն ազմկի յԵփեսոս քաղաք՝ աղաչեցին ոմանք զՀերակղիտոս՝ հրապարակախօս լինել առ ժողովուրդն զոր կարևորն է՝ ՚ի լռեցուցա-

նել զաղմուկն : Ամբարձաւ 'ի բեմբ
անդր Հերակղիտոս , էառ բաժակ մի ,
և ելից 'ի նա ջուր ցուրտ , արկ 'ի նմին
և հատս վայրի ընդոց . և արբեալ զայն
խառնուրդ , 'ի բաց մեկնեցաւ անտի ,
ասելով և ոչինչ : Ասել կամէր սովին ,
թէ վասն զառաջս ունելոյ զխառովու
թեանց՝ հարկ է 'ի բաց անջատել 'ի
ժողովրդենէ զգեղխութիւն և զանձն
ղիւրութիւն , և 'ի ժուժկալութիւն
հրահանգել զբազաբացիս :

Յօրինեաց Հերակղիտոս զիրս իմն
յաղագս բնութեան՝ զոր ետ դնել 'ի
տաճարին Արտեմեայ : Աղօտագոյն
էին բանքն , զի միայն գիտնոց իցէ ըն
թեոնուլ . խիթացաւ՝ զի թէ ուամիկն
առցէ զայնր զճաշակ՝ դիւրաբար 'ի
ձեռս յաժի ամենեցուն , և արհա
մարհեալ լինի : Պատիւ դրոցս և ևս
առաւելաւ . քանզի ըստ Լուկրետիոսի՝
ոչ ոք խելամտէր այնմ : Լուեալ զիրսդ
Դարեհի արքայի Պարսից՝ գրեաց առ
Հերակղիտոս՝ զի յօժարեցուցէ զնա
դալ բնակել 'ի Պարսս , և մեկնել նմա
զգիրսն , խոստանալով նմա հատու
ցումն մեծապարգև , և բնակարան
յարբունիս իւր . այլ ոչ յանձն առ
Հերակղիտոս :

Սովորոյթ էր այսր իմաստասիրի
կալ անբարբառ . և 'ի հարցանել ու

մեր զպատճառ ըռութեանն նորա, յոչ
կամաց իմն տայր պատասխանի, Ձի
տաց խօսել քեզ: Արհամարհէր զաւ
թենացիս որք մեծապէս պատիւ դնէին
նմա. և հաճեալ էր ընդ բնակելն յԵ-
փետոս՝ ուր անդոսնեալ էր յամենե-
ցունց:

Անհնար էր նմա՝ տեսանել զորք, և
ոչ արտասուել ՚ի վերայ մարդկեղէն
տկարութեան, և վասն զայրացկոտ
բնութեանն, զի ոչ ինչ բնաւ հաճոյ
լինէր նմա: Այս անհամբոյր մարդա-
տեցութիւնն նորա բռնադատեաց զնա՝
զատուցեալ մեկին կալ. առանձնաւ
ցաւ ՚ի լերինս անմարդիս, ուր երբէք
ոչ տեսանէր զորք. անդ ՚ի հեծութեանն
մաշէր զաւուրսն, և բանջարով և ըն-
դով շատանայր:

Կարծիք էին շերակղիտոսի թէ
հուրն՝ առաջին սկիզբն է ամենայն ի-
րաց. այդ առաջին տարր, ասէ, խտա-
ցեալ յոդ փոխարկի. իսկ օդ խտա-
ցեալ ՚ի ջուր փոխի. նոյնպէս և ջուր
հող լինի. և դարձեալ նովին օրինա-
կաւ հողն անօսրեալ ՚ի ջուր դառնայ.
Ջուրն յօդ. և օդն ՚ի հուր. որ է առա-
ջին սկիզբն ամենայն իրաց:

Տիեզերս ՚ի վախճան հասեալ է. մի
միայն է աշխարհ. և այդ կազմեալ ՚ի
հրոյ, և ՚ի կատարածի հրով քակտես-

ցի: Տիեզերք բնակարան են հոգւոց և
 քաջաց: Ո՛չ նախախնամեն դիք. այլ
 որ ինչ անցք անցանեն՝ բովանդակ
 դործք են բազդի: Արևն չէ՛ ինչ մե-
 ծագոյն քան զերևեալն: Ան յօդս ուղգ
 ինչ մակուկաց ՚ի մեր կողմն գոգեաղք.
 ՚ի նոսին գումարին գոլորշիք ցնդեալք
 յերկրէ. և այն ամենայն զորս մեք աս-
 տեղս անուանեմք՝ են այգոքիկ մանր մա-
 կոյիք լցեալք գոլորշեօք վառելովք, որք
 լոյս շողացուցանեն ըստ օրինակին զոր
 մեքս տեսանեմք: Խաւարին արև և
 լուսին՝ երբ այգոքիկ մանր մակոյիք
 դարձուցեն զգոգս իւրեանց առ
 մասնն հանդիպակաց երկրի. իսկ պատ-
 ճառ այլօրինակ երևութից լուսնի՝ այն
 է՝ զի մակոյիկ նորա մեղմով կատարէ
 զդարձուածս իւր: Ասէր և յաղագս
 բնութեան հոգւոյ՝ թէ զուր ժամա-
 վաճառ լինիմք ՚ի խնդրելն հետազօտել
 զայն. զի և գտանել իսկ անհնարին է.
 այդպէս թագունն իմն է:

Խեղաթիւր ընթացք կենաց Հե-
 րակղիտոսի հասոյց նմա հիւանդու-
 թիւն չարատանջ, զի կալաւ զնա ախտ
 ջրգողութեան: Դարձաւ յԵփեսոս՝
 գտանել բժշկութիւն անձին, անկաւ
 առ բժիշկս. և օրինակօք խօսելով ընդ
 նոսա՝ ասաց նոցա այսպէս, ակնարկե-
 լով յախտակրութիւնն իւր. Վարիցէք

դուք դարձուցանել զանձրև 'ի ցամա-
քուտ և 'ի պարզ եղանակ : Եւ քանզի
ոչ իմանային բժիշկք զոր ինչ նա ասել
խնդրէր՝ գնացեալ եմուտ 'ի գոմս ե-
զանց, և թաղեաց զանձն յաղբես՝ քա-
մել նովին զլճացեալ ջուրս որ պար-
պատէին զնա . սակայն խորագոյն
խրեալ 'ի նմին՝ ոչ կարաց յառնել
անտի : Ե՛ն որք ասեն թէ շունք յօ-
շոտեցին զնա յաղբես անդ . կամ թէ՛
անդ մեռաւ չկարելով թափել զանձն :
Էր յայնժամ 'ի հասակի վաթսուն և
հինգ ամաց :

ԱՆ ԱՔՍԱԳՈՐԱՍ

Ճնեալ 'ի վաթաներորդ ողիմպիադին,
մեռեալ յութսուն և ութ. 'ի հասակի
ամաց եօթանասուն և երկուց :

ԱՆ ԱՔՍԱԳՈՐԱՍ որդի Եգիսի-
բուլոսի 'ի խորս խաղաց բնաբանու-
թեան՝ առաւել քան զայլս որք քան
զնա երիցագոյն էին ժամանակաւ : Էր
'ի Վլազովենա քաղաքէ Յոնիոյ, յազ-
նուական տոհմէ հնութեամբ և ճո-
խութեամբ. ծանուցաւ անուն նորա
առ ժամանակօք եօթանասներորդ վե-
ցերորդ ողիմպիադին : Աշակերտեցաւ
Անաքսիմենեայ՝ որ էր ուսեալ առ
ոտս Անաքսիմանդրի, և նա թաղեսի՝
զոր համարին Յոյնք՝ նախասկիզբն
դպրութեանց իւրեանց : Բերկրութիւն
էր Անաքսագորայ զիմաստասիրու-
թեամբ գալ . մինչև վասն այնր հրաժա-
րել յամենայն գործոց՝ որ հասարա-
կաց, և որ առանձնական, զի բովան-
դակ նմին պարապեսցէ : Լիք եթող
զստացուածս իւր, զի մի գուցէ հոգ
շահասիրութեան 'ի բաց տարցէ զնա

յուսուամնասիրութենէ . ակն յանդիման ցուցին նմա ծնողք նորա՝ թէ առանհոգութեանն վատնին ինչք նորա . սակայն ոչինչ ազգեցին ՚ի սիրտ նորա : Ելեալ մեկնեցաւ ՚ի հայրենի երկրէն իւրմէ , և բովանդակ հպատակեաց ՚ի հետազօտութիւն ճշմարտութեան : Ի կշտամբել զնա առն ուրուք վասն ոչ ակն ածելոյ բնաւ հայրենի քաղաքին իւրոյ , ցուցեալ նորա մատամբ զերկինս , նա մանաւանդ , ասէ , կարի իմն առաւելութեամբ ջանացեալ եմ նմին : Տեղի բնակութեան ընտրեաց զԱթէնս , ընդ իւր տարեալ անդք և զյոնիական դպրութիւն , որ ՚ի Թաղեսէ և այսր՝ յառաջնորդէ այսր ուսման՝ հիմնացեալ էր ՚ի Միլետոս : Ի քսան ամաց տիս ձեռն արկ ուսուցանել զիմաստասիրութիւն , և յերկարեաց ՚ի նմին զամս երեսուն :

Ածաւ երբեմն ՚ի տուն Պերիկղեսի խոյ մի՝ որոյ մի եղջիւր էր ՚ի ճակատուն : Լամպոն գուշակ մարդարէացաւ անդէն թէ նախապատում է այդ՝ ՚ի մի մարմին պատկանելոյ կրկին կողմանցն՝ որք յայնժամ երկիւեղկէին զԱթէնս : Սակայն Անաքսագորաս մեկնեաց զիրսն օրինակ զայս . քանզի ուղեղ կենդանւոյդ ոչ քաջ ընու զխելապատակն երկայնաձիգ , այլ ՚ի սրա-

ծայր յանգի 'ի տեղէ անդը զլիսոյն ուր
սկզբնաւորին արմատք եղջերն : 'Ի ստու-
գել զիրան , կորեաց մանր զգլուխ
խոյին առաջի ամենեցուն • յորմէ
յայտնի եղև՝ թէ զուգածայն է բա-
նիցն Անաբսագորայ : Յանկեցաւ այս
գործ 'ի փառս նորա • այլ ոչ նուազ
փառաւորեաց և զ Աամպոն հարցուկ-
քանդի յետ ժամանակաց ինչ 'ի վերայ
անցանելոյ խորտակեցաւ կողմն թու-
կիղիղեայ , և ամենայն գործակալու-
թիւնք պետութեան անցին 'ի ձեռս
Պերիկղեայ :

Առաջին համարի Անաբսագորաս 'ի
մէջ համօրէն Յունաց որ եհան 'ի լոյս
ճառ իմաստասիրական : Նախկին
սկիզբն եղ զանհունն , և զիմացութիւն
իմն տնօրէն նիւթոյ , և յորինող ամե-
նայն էակաց եղելոց 'ի տիեզերս : Առ-
բին սակս իմաստասէրք ժամանակա-
կիցք նորա՝ Ոգի անուանեցին զնա :
Ոչ հաւատաց նա թէ այդ իմացու-
թիւն յոչնչէ արար զնիւթն • այլ կար-
գաւորեաց միայն : 'Ի սկզբանէ , ասէ ,
խառնափնդոր էր ամենայնն , և մնա-
ցին այնպէս՝ մինչև իմացութիւնն բա-
ժանեալ անջրպետեաց զնոսա 'ի մի-
մեանց , և սահմանեաց 'ի կարգին յո-
րում տեսանեմք այժմ զնոսա : Գեղե-
ցիկս բացածանոյց զայս իմաստ նորա

Ովիդիոս 'ի սկզբան գրոցն այլակերպութեանց :

Ոչ այլ ինչ աստուածութիւն ընդունէր՝ բաց յիմացութենէ անտի որ արար զաշխարհս . և քաջ իսկ 'ի վերայ հասեալ էր ստութեան դից՝ երկրպագութեամբ պաշտելոց 'ի կռամոլ հնութենէ , մինչև կեղծել Լուկիանոսի՝ թէ շանթահար սատակեցաւ յԱրամազդայ , վասն արհամարհելոյն զնա , և զայլ ամենայն աստուածս :

Համարէր թէ չկայ դատարկութիւն 'ի բնութեան . լի է ամենայնն . և ամենայն մարմին թէև դուզնաբեայ՝ մինչև ցանհունս բաժանի : Չամենայն մարմին բաղադրեալ համարէր 'ի մանունց մասնկաց համասեռից . և թէ՛ օրինակ իմն՝ արիւնն կազմի 'ի մանունց մասանց արեան . ջուրն 'ի մանրամանր ջրեղէն մասանց . նոյնպէս իմա՛ և վասն այլոցն ամենայնի . զայդ նմանութիւն մասանց յոյն բառիւ կոչէր *օմեօմեօն* : Ըստ այսմ օրինակի բացատրեաց Լայերտիոս զիմաստասիրութիւն նորա : Իսկ որոց ընդդէմ բանս դնէին Անաքսագորայ , թէ հարկ է ամենայն մարմնոց բաղադրել 'ի տարասեռ մարմնոց , իբր զի աճեն մեծանան ոսկերք կենդանեաց՝ առանց ոսկր ուտելոյ նոցա . ստուարանան ջիղք նոցա , սակայն

նորա ոչ ուտեն ջիղ. յորդեալ առա-
 ւելու արիւն նոցա, թէպէտ և ոչ ա-
 րիւնածուծ լինին. պատասխանի առ-
 նէր նա այսոցիկ՝ թէ յիրաւի չիք մար-
 մին որ բովանդակ յօրինեալ իցէ ՚ի
 մասանց նմանեաց: Եւ թէ՛ օրինակ ՚ի
 մէջ առեալ բանին, ՚ի խոտն գոն և
 մարմին, և արիւն, և ոսկր, և ջիղ.
 քանզի տեսանեմք մեզէն զի նորօք սնա-
 նին կենդանիք. այլ իւրաքանչիւր մար-
 մին յարանուանի ՚ի նիւթոյն յորդե-
 լոյ յաճախութեամբ ՚ի կազմութեան
 նորա: Չորօրինակ՝ այս ինչ մարմին՝
 որպէս զի անուանեսցի փայտ կամ
 խոտ, շատ է նմա ընդունել առաւե-
 լագոյն մասնկուես փայտեղէնս կամ
 խոտեղէնս քան զայլսն ամենայն, և
 այնց մասանց փայտեղինաց կամ խո-
 տեղինաց սիւռել յորդագոյնս ընդ մա-
 կերևոյթ այնր մարմնոյ:

Ո՛չ այլ ինչ համարէր զարեգակն
 բայց երկաթ հրաշէկ, մեծ քան զհա-
 մօրէն Պեղոպոնեսոս: Ըստ նորա լու-
 սինն է մարմին անթամիանց և բնա-
 կեալ. յորում են լերինք և ձորք իբրև
 ՚ի մերում զնտի: Գիսաւորք՝ հոյլք են
 մոլորական աստեղաց՝ համահաւաքե-
 լոց ըստ դիպուածոյ, և բաժանեալ
 ցրուին ՚ի միմեանց յետ սուղ ժամա-
 նակի: Հողմ շնչէ յանօսրել զօղս ջեր-

մութեան արևու: Արոտումն՝ բախումն է ամպոց, և շանթք հատանին ՚ի շիման է նոցա: Երկրաշարժութիւնք լինին յօդոյ փակելոյ ՚ի ստորերկրեայ անձաւս: Յորդեն ջուրք Նեղոսի՝ սակս յաճախութեան ձեանց Եթովպիոյ, որոց լուծեալ ըստ սահմանափակ ժամանակին՝ յարուցանեն ուղիս ջուրց, և զեղուն զաղբերակամբք այդր գեատոյ:

Վարկաւ Անաքսագորաս զօդս պատճառ շարժութեան աստեղաց. և առ բանսն ՚ի դէմն բերեալ նմա յաղագս երթալոյ և դարձի մոլորական աստեղաց ընդ մէջ երկուց արևադարձից, պատասխանէր թէ լինի այդ ՚ի ճնշելոյ օդոյ, որ իբրու աղեղն կծկեալ մերթ մղէ, և մերթ ձգէ զաստեղս ըստ հասանելոյ նոցա ՚ի սահմանեալ տեղիսն:

Համարէր զերկիր տափարակ, և ծանրագոյն քան զամենայն տարերս, և վասն այնր զխոնարհագոյն տեղին ունի ասէր ՚ի տիեզերս: Զուրք կաթեալք ՚ի վերայ նորա՝ անօտեալ են ՚ի ջերմութենէ արևու՝ որ ՚ի շոգիս վերամբառնայ զնոսին, և ձգէ մինչև ՚ի միջնագաւառ օդոյ. ուր ՚ի ջուր լուծեալ անձրևեն ՚ի շիթս:

Չոր տեսանեմք յերկինս գիշերայն

'ի պարզի լսնադոյն իմն կամարանման,
 ծիր յարդգողի անուանեալ, զայն կար-
 ծեցին ոմանք 'ի նախնեաց թէ ճանա-
 պարհ իմն է զոր ունին աստուածքն
 փոքունք՝ առ 'ի գնալ 'ի ժողով մեծին
 Աբամազդայ : Այլ թէ տեղի է յո-
 բում հողիք զիւցազանց սլացեալ
 հանդչին 'ի լուծանել մարմնոց նոցա :
 Խաբեցաւ 'ի նմին և Անաքսագորաս
 ըստ օրինակի հին իմաստասիրաց . վար-
 կաւ զայն ցոլացումն լուսոյ արեգա-
 կան երևեալ այնու կերպարանաւ .
 քանզի, ասէր, ընդ ծիրն յարդգողի և
 ընդ երկիր չեք այլ աստղ լուսափայլ
 որ խորոց ընդ մէջ անկցի ցոլաց-
 ման լուսոյդ : Զկենդանիս առաջնա-
 ստեղծս արտադրեալս համարէր 'ի ջեր-
 մութենէ և 'ի խոնաւութենէ, որք
 յետ այնորիկ ծննդագործութեամբ
 պահեցին զազգ խրեանց :

Դէպ եղև յաւուրս նորա քարի
 միոյ անկանել յերկնէ . անդէն 'ի
 վերայ ամ Անաքսագորաս՝ թէ քարե-
 ղէն են երկինք . և հաստատուն կան
 վասն հապշտապ շրջանակելոյն . այլ
 եթէ այդ ուժգին շարժումն վայր մի
 նուազեացէ՝ համօրէն կազմած աշ-
 խարհիս 'ի քթթել ական քակտեալ
 ապականի : Կանխաւ գուշակեաց եր-
 բեմն՝ քար անկանել յարևէ . ար-

դեամբք կատարեցան բանք նորա . և քարն անկաւ մօտ յԵզոս գետ : Իմաստասիրեաց թէ որ այժմ հաստատուն երկիր է՝ յանցանել ժամանակաց ՚ի ծով փոխեսցի . և ծովն յերկիր հաստատուն : Ի հարցանել ցնա ուրումն . իցէ թէ վերացեալ ամբարձցի ծով ծածկել զերինս Լամպսակոնի . այո՛ , ասէ , միայն թէ մի պակասեսցէ ժամանակն :

Չճայրագոյն բարին հաստատէր լինել ՚ի խոկալ զգաղտնիս բնութեան . և վասն այնր երբ հարցանէին ցնա թէ զի՞ եկեալ իցէ յաշխարհ , ասէր . քննել մտօք զերկինս , զարև , զլուսին , և զայլ սքանչելիս : Եհարց ցնա ոմն . ո՞վ է յաշխարհի երջանկագոյն ՚ի մարդիկ . ետ պատասխանի . ոչ ոք յորոց կարծես . այլ ՚ի նոսա դոցես զնա՝ զորս դուն հիգացեալս համարիս : Լուանա յաւուր միում՝ զի կոծէր այր ոք վասն ՚ի տար աշխարհ մեռանելոյ . և զինչ խտիր կայցէ , ասէ ցնա Անաբաս գորաս . չիք երկիր յաշխարհի՞ ուր չիցէ ճանապարհ իջանելոյ ՚ի դժոխս : Իբրև գուժէին նմա զբօթ մահու որդւոյ իւրոյ , անխռով ընկալաւ զլուր աղետիցն . և ասէ . քաջ գիտէի՞ թէ ծնայ զմահկանացու : Յետ այնորիկ զնաց ինքնին զլխովին ՚ի թաղել զնա :

Անուն պատուոյ նորա յԱթէնս՝
 ոչ ձգեցաւ ընդ երկար: Չգեցին զնա
 աթենացիք ՚ի դատաստան և ամբաս-
 տան եղեն հրապարակաւ. գլուխք ամ-
 բաստանութեանն բազմօրինակ աւան-
 դին. հասարակաց ընկալեալ կարծիք
 են թէ վասսապարոս դտաւ ՚ի յան-
 ցանս ամբարշտութեան, իշխեալ ՚ի
 պնդել թէ արեգակն պաշտեցեալ իբ-
 րև աստուած՝ երկաթի ձոյլ է հրա-
 շելի: Այլ ասեն թէ բաց յամբարշտու-
 թենէն ամբաստանեցաւ և ՚ի յանցանս
 դաւաճանութեան: Իբրև ծանուցաւ
 նմա՝ թէ մահու դատապարտ կացու-
 զին զնա աթենացիք, ոչինչ դրդուե-
 ցաւ. կանուխ ուրեմն՝ ասէ, ինքնին
 շնութիւն վճռեաց ՚ի վերայ նոցա
 զնոյն դատակնիք: Չեն օգնութեան
 ետ նմա ժրագոյնս Պերիկղէս որ աշա-
 կերտեալն էր նմա, և նուազեաց զխրս-
 տութիւն հրամանին: Պարտաւորե-
 ցաւ ՚ի տուգանս հնգից տաղանդաց,
 և ապա ՚ի բաց աքսորեցաւ: Արու-
 թեամբ քաջութեամբ տարաւ Անաք-
 սագորաս վշտացն իւրոց: Դեղերեցաւ
 զժամանակ տարագրութեանն յԵ-
 զիպտոս և յայլ տեղիս՝ խորհուրդ
 հարցանել ընդ արս իմաստունս, և
 հասու լինել սովորութեանց օտար աղ-
 դաց: Լի և պատարուն հետադօտեալ

ղբովանդակն՝ դարձ արար ՚ի Ալաղոմե-
նա՝ տեղի ծննդեան իւրոյ . և գտեալ
զստացուածս անխնամս և լքեալս, ա-
սէ . եթէ այս ամենայն ոչ կորնչէր՝ ես
ինքնին կորնչէի :

Յաւէտ իմն փութոյ պնդութեամբ
Ջան եղեալ էր Անաքսագորայ ՚ի հրա-
հանգս Պերիկղեսի, և յօժանդակել
հասարակաց գործակալութեանց նո-
րա . սակայն ոչ զուգաչափ դտաւ և
երախտագիտութիւն Պերիկղեսի . նա՛
և սողիւտ է զնմանէ թէ ՚ի վախճանի
զանց արար զվարժապետաւն :

Տեսեալ զանձն իւր Անաքսագորաս
ծանրացեալ կարեօք ծերութեան, աղ-
քատ, և լքեալ, ամիովեցաւ յաղաբո-
ղոնն իւր, և եղ ՚ի մոտի՝ սովամահ կորն-
չել : Լուաւ զայն Պերիկղէս, ՚ի խոր
խոցեցաւ ընդ այն . ընթացաւ փու-
թանակի առ Անաքսագորաս, թա-
խանձ արկ նմա՝ հրաժեշտ տալ ՚ի
մտացն հաստատութենէ : Ողբաց զա-
ղէտս պետութեանն ընդ կորուստ այն-
քանոյ առն . յաւէտ ևս զիւրն . քան-
զի անօգնական մնայր ՚ի հաւատարիմ
խորհրդականէն : Եբաց նմա Անաք-
սագորաս զերեսս իւր որ այն ինչ զվեր-
ջին տուրևառն շնչէր . և կարգաց առ
նա . Ո՛վ Պերիկղէս որք կարօտ իցեն
լապտերի՝ իւզ արկանեն ՚ի նա :

Պատմէ Լայերտիոս, թէ Անաբաս,
 գորաս մեռաւ 'ի Լամպսակոն, և այն
 ինչ զլետինն շնչէր տուրեառ՝ զլիսա-
 ւորք քաղաքին հարցին ցնա, թէ ու-
 նիցի՞ ինչ աւանդել պատուիրանաւ .
 նա հրամայեաց նոցա՝ ամ ըստ ամէ
 յօր յիշատակի մահուան իւրոյ պա-
 րապ տալ մանկանց 'ի դպրոցաց, և
 թոյլտուութիւն 'ի խաղս պարսպելոյ :
 Չգեցաւ այդ սովորութիւն ընդ քա-
 ղում ժամանակս : Անցեալ էր Անաբ-
 սագորայ զեօթանասուն և երկու ա-
 մօք 'ի մեռանելն իւրում, եթէ ստոյգ
 է մեռանել նորա յութաներորդ ու-
 թերորդ ողիմպիադին :

ԴԵՄՈԿՐԻՏՈՍ

Ճնեալ յերրորդ ամի եօթանասներորդ
երրորդ ողիմպիադին . մեռեալ 'ի չոր-
րորդումն հարիւրորդ հինգերորդին .
կեցեալ ամս հարիւր ինն :

ԱՍԱՐԱԿԱՅ կարծիք են թէ
Դեմոկրիտոս իմաստասէր՝ արդերացի
էր . զոր այլք միլետացի ասեն լինել .
իսկ արդերացի անուանեցաւ՝ վասն
բնակելոյ նորա յԱբդերա քաղաք :
Ուսաւ զառաջին ուսմունսն 'ի մոգուց
և 'ի քաղղէից՝ զորս Քսէրքսէս արքայ
թողեալ էր առ հօր նորա , առ որում
օթեանս կալեալ էր 'ի խաղալն իւ-
րում մարտիւ 'ի վերայ Յունաց : 'Ի
քաղղէից անտի ուսաւ Դեմոկրիտոս
զգիցաբանութիւն և զաստեղագիտու-
թիւն : Յետ այնորիկ ուսաւ զբնաբա-
նութիւն ընդ ձեռամբ Լիւկիպպոսի
իմաստասիրի : Զանք նորա յուսու-
մնասիրութիւն՝ բորբոքեալ էր յոյժ
յոյժ . զի և բազում անգամ զօրն ցե-
րեկ փակեալ մնայր 'ի տաղաւարի ու-
րեք 'ի մէջ դրախտի միոյ : Աճ նմա յա-
ւուր միում հայր նորա եզն մի 'ի զե-

նուլ . և կապեաց զնա առ անկեամբ
միով 'ի տաղաւարի նորա . այլ Դե-
մոկրիտոս խորագոյնս յառեալ յըն-
թերցասիրութիւն իւր՝ ոչ լուաւ ըզ-
բանս հօրն . և ոչ իսկ իմացաւ թէ եղնն
կապեալ կայ առ անկեամբն . մինչև
յետոյ ուրեմն երկրորդ անգամ եկեալ
հօր նորա զարթոյց զնա 'ի խորազնին
ափշութենէն յորում էր , և եցոյց
մօտ կացեալ նմա զեղն զոր հարկ էր
զենուլ 'ի զոհել :

Յերկարեալ Դեմոկրիտեայ յաշա-
կերտութիւն Լեւկիպպոսի՝ զերեսս
հաստատեաց զնալ 'ի տար աշխարհ
ելումուտ առնել առ իմաստունս , և ճո-
խացուցանել զմիտս իւր ընտիր ընտիր
զիտելեօք : Բաշխեաց զժառանգութիւն
հօրն ընդ եղբարց իւրոց . և կալաւ
մասն անձինն դրամ և եթ , թէպէտ և
նուալ բաժին էր քան զայլոցն . սա-
կայն այդ հեշտին էր նմա 'ի պէտս ծա-
խուցն զոր ծախել ունէր յիմաստա-
սիրական զննութիւնս և յուղէզնա-
ցութիւնս :

Գնաց յԵգիպտոս՝ ուր ուսաւ զեր-
կրաչափութիւն . անտի փոխեցաւ յԵ-
թովպիա , 'ի Պարսս , յերկիրն քաղ-
ղէացւոց . նա՝ հետազօտութիւն նորա
վարեաց զնա մինչև 'ի հնդիկս՝ ուսա-
նել անդէն զգիտութիւն մերկիմաս-

տակաց : Սիրէր ճանաչել զգիտունս ,
 այլ ոչ յօժարէր ճանաչիլ յումեքէ :
 Ասի ևս՝ թէ զաւուրս ինչ կեցեալ նո-
 րա յԱթէնս՝ անդ ետես զՍոկրատ ,
 առանց յայտնելոյ նմա զանձն : Ախոր-
 ժական էր նմա՝ ծածկաբար կեալ .
 քանզի և երբեմն երթեալ զօղէր բնա-
 կութեամբ ՚ի ծերպս և ՚ի գերեզմանս
 զի մի ոք գիտասցէ զտեղին յորում
 էրն : Այլ ՚ի վերայ այսր ամենայնի
 յայտնեցաւ և յապարանս Գարեհի
 արքայի . և այն ինչ ՚ի տրտմութիւն
 թախծութեան պաշարեալ կայր թա-
 գաւորն ընդ մահ միոյ ՚ի կանանց իւ-
 րոց՝ զոր առաւել սիրէր քան զայլսն
 ամենայն , խոստացաւ նմա Դեմոկրի-
 տոս առ ՚ի մսիթարութիւն՝ յարու-
 ցանել զնա ՚ի մեռելութենէ՝ եթէ
 կարասցէ գտանել արքայ ՚ի թագաւո-
 րութեան իւրում արս երիս՝ որոց ոչ
 ինչ արկած իցէ հանդիպեալ . զորոց
 զանուանս զբոշմեացէ ՚ի վերայ շիրմի
 կնոջն մեռելոյ : Անհնարին եղև գտա-
 նել զոք ընդ համօրէն Ասիա՝ որպիսի
 խնդրէրն Դեմոկրիտոս : Ի բանից աս-
 տի՝ պատճառս ՚իներքս արկեալ իմաս-
 տասիրին՝ խելամոեցոյց զԳարեհ՝ թէ
 անպատեհ է համակել ՚ի տխրութիւն՝
 զի և չիք ոք յաշխարհի անկարեկիր
 վշտաց :

Դարձ արարեալ Դեմոկրիտոսի յԱբղերա՝ եկեաց մենաւոր և կարօտեալ . զի սպառեալ էր զամենայն ստացուածս իւր ՚ի հետազօտութիւնս և ՚ի ճանապարհորդութիւնս . վասն որոյ եղբայր նորա Դամասկոս, յանձին կալաւ խնամ ունել կենաց նորա : Օրէնք էին յաշխարհին յայնմիկ զի ոչ թաղէին ՚ի շիրիմս հարց իւրեանց զորս վատնէին զինչս նոցա . արդ զի ընդ սովին դատակնքով անկեալ էր Դեմոկրիտոս, և զի ոչ կամէր թէ թըշնամիք իւր խաղ առնիցեն զնովաւ, ընթերցաւ առաջի համօրէն ժողովրդեան՝ զմին ՚ի գրաւոր վաստակոցն իւրոց՝ անուանեալ յազագս աշխարհի : Հրաշացեալ ամբօխին ընդ քաջի մատենագրութեանն՝ ազատ կացուցին զնա ՚ի խստութենէ օրինացն . ետուն նմա ՚ի պարզե տաղանդս հինգ . և անդրիս կանգնեցին յանուն նորա ՚ի հրապարակս :

Հանապաղած իծաղ ոմն էր Դեմոկրիտոս . յառաջ դայր այս սովորութիւնս նորա ՚ի խորարմատ քննութենէ մարդկային տկարութեան և ունայնութեան, որ բազմադէմ ծաղու արժանի խորհուրդս արկանէ ՚ի մեղ . և այն զի հաստատեալ էր նորա ՚ի միտս՝ թէ ամենայն ինչ դործ է զխպուածոյ, և

լատ բաղդի զուզընթացութեան հիւ-
 լէից: Ակնարկեալ Յոբնաղի քերթողի
 յերգս իւր 'ի քաղաքն Աբդերա՝ որոյ
 թանձրամած է օդն, և մարդիկն թան-
 ձրամիտք, ասէ՝ թէ հանձար այսր իմաս-
 տասիրի յայտ յանդիման ծանուցանէ
 թէ ծնանին արք հոյակապք և 'ի տե-
 ղիսն յորս անուսումն է ժողովուրդն:
 Դոյն այդ բանաստեղծ յաւել ասել՝
 թէ Դեմոկրիտոս անխտիր ծիծաղէր
 ընդ տխրութիւն և ընդ ուրախութիւն
 մարդկան, և առնու նկարագրել զի-
 մաստասէրդ իբրև այր հաստատուն որ
 ոչ դրդուեսցի յիրաց ինչ, և որ շղթայ-
 եալ սանձեսցէ զբաղդ ընդ ոտիւք իւ-
 րովք:

Աբդերացիք որք յար 'ի ծաղր տե-
 սանէին զնա՝ համարեցան զնա թա-
 փեալ 'ի մտաց, և յղեալ կոչեցին
 զՀիպոկրատէս՝ գալ և ապաքինել
 զայրն: Առեալ Հիպոկրատեայ զհան-
 դերձանս դեղոցն գնաց յԱբդերա, և
 զառաջինն՝ կաթն մատոյց Դեմոկրի-
 տեայ, նայեցեալ Դեմոկրիտոսի ընդ
 կաթն քննողական աչօք, ահա, ասէ,
 կաթն սեաւ այծի՝ որ մի անդամ և եթ
 ծնեալ է: Եւ ճմարիտ էր զոր ինչ ա-
 սացն Դեմոկրիտոս: Յապուշ հարաւ
 Հիպոկրատէս ընդ խելամտել նորա ի-
 րացն այնոցիկ, ընդ ժամս ձիգս խօսա-

կից եղեալ նմա , սքանչացաւ ընդ իւր
 ըին իմաստութիւն և ընդ անօրինակ
 գիտութիւն նորա . վասն որոյ ասաց
 աբղերացիք կարօտ են եղբորոսի , և ոչ
 իմաստասէրն՝ որում զայն մատուցա-
 նել կամէին նոքա : Այսպէս դարձ ա-
 բար անտի մեծապէս զարմացեալ ընդ
 խորհուրդս նորա :

Չհետ ընթացեալ Դեմոկրիտեայ
 զվարժապետին իւրոյ զԼեւկիպպոսի՝
 դնէր նախասկիզբն ամենայն իրաց
 զհիւլէս և զդատարկութիւն : Յոչնչէ
 ոչինչ լինի . և ոչինչ դառնայ յօչնու-
 թիւն : Ոչ ապականին հիւլէք , և ոչ
 այլափոխին . վասն զի ամրապինդ սեր-
 տութիւն նոցա պահէ զնոսին յամե-
 նայն արկածից : Ի հիւլէից աստի , ա-
 սէր , կազմեալ են աշխարհք բազումք .
 յորոց իւրաքանչիւր մաշեալ ծախի
 յետ անցնիւր սահմանեալ ժամանա-
 կի . այլ յեղծելոց անտի դարձեալ
 այլք յօրինին :

Չհոգի մարդոյ՝ զոր նա ինքն նոյն
 համարէր ընդ շնչոյ կամ ոգւոց կեն-
 դանութեան , շարադրեալ ասէր ՚ի
 հիւլէից . նոյնպէս և արեգակն և լու-
 սին , և այլ ամենայն աստեղք : Եւ թէ
 այս հիւլէք յուզեալ տատանին շար-
 ժող իմն շարժնութեամբ՝ որ է պատ-
 ճառ ծննդեան ամենայն էակաց . և զի

այս շարժողութիւնն ցանգ միօրինակ է, յայն սակս և Դեմոկրիտոս հաւատոս ընծայէր ճակատագրին, և զամենայն ինչ 'ի հարկէ եղեալս համարէր: Իսկ Եպիկուրոս որ 'ի վերայ հիմանց Դեմոկրատեայ ամբարձ զվարդապետութիւնն իւր, այլ զի ոչ ընդունէր զհարկ Դեմոկրատեայ, հանձարեաց զշարժումն խոտորնական, ըստ որում աւանդել ունիմք 'ի վարս նորա: Համարէր Դեմոկրիտոս թէ հոգին սիւռեալ է ընդ ամենայն մասունս մարմնոյ, և պատճառ զգայունութեան մերոյ յամենայն մասունս նորա՝ այն է, զի մէն մի հիւլէ հոգւոյ առնչակից է առ իւրաքանչիւր հիւլէ մարմնոյ:

Վասն շարժման լուսաւորաց վարկաւ ասել Դեմոկրիտոս՝ թէ ընթանան ընդ միջոց ամենեին ազատ. ուստի չկան անդէն շրջանակք հաստատունք յորս մած կռուեալ իցեն: Մի միայն պարզ շարժումն է նոցա ընդ արեւմուտս կոյս: Հապշտապ երագութեամբ պարաբերին նոքա 'ի հոսանուտ յորձանսն՝ որոյ կենդրոն է երկիրս. և ամենայն աստղ ըստ չափումերձենալոյն յերկիր՝ յամրագոյն շարժի. վասն զի բռնութիւնն շարժման պարաբերութեանն նուազէ ըստ չափու հպելոյն 'ի կենդրոն: Արդ ըստ

այսմ երևին շարժիլ ընդ արևելս՝ որք դանդաղագոյնս շարժին ընդ արևմուտս . և որպէս հաստատուն աստեղք երազ հօլովելով քան զամենայն աստեղս՝ ՚ի քսան և չորից ժամուց պահու կատարեն զչրջան իւրեանց , նոյնպէս և արևն ծանրաշարժ թաւալմամբն պարաբերի ՚ի քսան և չորս ժամս և ՚ի յաւելուածս սակաւ վայրկենից . և լուսինն որ յապաղէ յընթացսն քան զամենայն լուսաւորս , ՚ի գլուխ հանէ իբրև ՚ի միջոց քսան և հինգ ժամուց . որպէս զի ոչ թէ շարժել նմա իւրով շարժութեամբն դէպ յաստեղս արևելեայս , այլ զի յընթացսն յետս կոյս թողուն զնա աստեղքն որ յարևմուտս են առ նովաւ , և եկեալ դարձեալ զուգընթաց լինին նմա յետ աւուրց երեսնից :

Աւանդեն պատմագիրք թէ եռանդն փափաքանաց որով բորբոքեալ էր Ղեմոկրիտոս առ ուսմունս՝ յայն հասոյց զնա , զի ոչ ևս բաւական գոլով առայնս՝ իւրովի կուրացոյց զաչս իւր , դնելով յանդիման արևու տախտակ պղնձի՝ յորմէ հատեալ ճառագայթք բախէին ընդ աչս իւր . և ՚ի տապոյ անտի նշուղիցն խաւարեցան տեսանելիքն : Իբրև տեսանէր Ղեմոկրիտոս զանձն ՚ի ծերութիւն խոնարհեալ , և

մօտ 'ի դրուենս մահու, խորհուրդ ան-
 կաւ 'ի միտսն՝ թէ գուցէ ծանու
 տխրութեամբ վարակեսցի քոյր նորա
 ընդ մահ իւր, զի խիթայր թէ մեռա-
 նիցի յառաջ քան զտօն Դեմետրի դից,
 և կոծ նորա խափան լինիցի նմա մտա-
 նելոյ 'ի պաշտօն աստուածուհւոյն .
 վասն որոյ ետ բերել հաց ջերմ՝ դեռ
 ևս եփեալ, որոյ հօտն կենդանի պա-
 հէր զնա, և տածէր զկենսական ջեր-
 մութիւնն: Յանցանել երից աւուրց
 զկնի տօնին՝ 'ի բաց մերժեաց Դեմո-
 կրիտոս զհացսն, և անդէն եհան զո-
 դին: Էր յայնժամ ըստ հասարակաց
 կարծեաց ամաց հարիւր և ինուեսց:

Ե Մ Բ Ե Տ Ո Վ Ղ

Քաջանուն երևեալ առ ութսներորդ
չորրորդ ողբմպիադաւ :

ԵՄԲԵՏՈՎՂ, աշակերտ էր Պիւ-
թագորայ, ըստ որում համարեցան
բազումք: Ծնաւ յԱկրականդ քաղա-
քի Սիկիլիոյ, որ այժմ անուանի Ճիր-
ճէնդի. յականաւոր աղգէ գաւա-
ռին. և տեղեկագոյն 'ի բժշկական
հրահանգս: Բաց 'ի ճարտարասաց
պերճութենէն, յօժարամիտ հպատա-
կէր և բանաստեղծութեան, և առ-
ամենայն ինչ որ հայի 'ի դիցն պաշտօն:
Պատուասիրէին զնա ակրականդացիք
մեծապէս պատկառանօք, համարեալ
զայրն՝ իբրու դերազանցիկ ոմն քան
զամենայն մահկանացուս: Լուկրետիոս
քերթող 'ի համար արկեալ զսքանչե-
լիս երևեալս 'ի Սիկիլիա, յաւել 'ի
վերայ զպանծալ բնակչաց տեղւոյն
թէ չիք ինչ յաւէտ դերապանծ 'ի
փառս կղզւոյ իւրեանց, քան զայն՝ զի
գտաւ հայրենի երկիր այսպիսի առն.
զի և զքերթուածս նորա՝ իբրև զպատ-
գամս մեծարէին :

Ապաքէն այս չէր ինչ անտեղի. քան
 ղի և բազում անցք 'ի կեանս նորա՝
 սքանչելի ցուցին զնա յայս ամենե-
 ցուն. կարծեցին և ոմանք՝ անսալ նմա
 մոգութեան: Պատմէ Սատիրոս թէ
 Գորգիաս լէոնդացի՝ մին 'ի գլխաւոր
 աշակերտաց այսր իմաստասիրի յիշա-
 տակէր յոլով անգամ, թէ ինքնին գրէ
 խովին սատար մատուցեալ է նմա յայն
 գործ. և թուի իմն թէ և Եմբետոկղ
 'ի միումն 'ի տաղերգութեանց իւրոց
 յիշեցուցանէ քաջածանօթ լինել Գոր-
 գիայ 'ի գաղտնի խորհուրդս իրացդ.
 վասն որոյ 'ի քէն միայն՝ ասէ, ուսա-
 նել յօժարեցի զթագուն հնարս բու-
 ժելոյ զախոս ամենայն, ժրացուցա-
 նել զծերս մանկութեամբ, հողմն զար-
 թուցանել, հանդարտել զմրրիկս, տալ
 անձրևել և ջեռուցանել. նա և մե-
 ռեալս իսկ կենդանացուցանել: Ե-
 այն ինչ յաւուր միում շնչէին գոռա-
 լով հողմք սաստիկք, մինչև ամենայն
 արմտեաց առ հասարակ ապականել,
 մորթեալ Եմբետոկղի էշս, զմորթս
 նոցա ետ տիկ հանել, և եդ 'ի գագա-
 թունս լերանց, և բլրոց բարձանց:
 Ասեն՝ թէ առ նմին լուցին հողմք, և
 անդորրութիւն եղև 'ի վայրսն:

Անձնակամակ նուիրեալ էր Եմբե-
 տոկղի 'ի վարդապետութիւն Պիւթա

գորայ վարդապետին իւրոյ. և զի պիւ-
թագորեանք բացէ 'ի բաց խորշէին
յարիւնոտ պատարագաց, յօժարեալ
Եմբետողի երբեմն 'ի նուէրս ողջակիւ
զաց մատոյց պատկեր եզին յօրինեալ
մեղու և ալերբ, և եզեն 'ի զոհ դիցն:

Առ ժամանակօք Եմբետողի լիա-
ցեալ մեծացեալ էր Ակրականդ քա-
ղաք, ութ հարիւր հազար բնակիչք
էին անդէն, վասն որոյ իբր 'ի նշանակ
մեծութեանն՝ մեծ քաղաք անուանէր.
զեղխութիւն և անձնդիւր հաճութիւն
բարձր 'ի գլուխ թագաւորէին 'ի քա-
ղաքի անդ. մինչև յառակս առնուլ
զնոսա Եմբետողի և ասել, կեան
խնդամիտ՝ իբրու թէ վաղիւ մեռանե-
լոց իցեն, և կանգնեն ապարանս մե-
ծակառոյցս՝ իբր այն թէ յաւիտեան
ապրելոց իցեն: Անձնապահ լինէր յա-
մենայն հասարակաց բազմակնձիւն
գործոց. բազում անգամ մատուցաւ
նմա թագաւորութիւն Ակրականդայ,
նա միշտ բացէ 'ի բաց հրաժարէր.
քանզի սիրելի էին նմա կեանք առանձ-
նական՝ հրաժարեալ 'ի մեծութեանց
և 'ի զբաղմանց աշխարհի. թէպէտ և
նախանձայոյզ էր ազատութեանն և
իշխանութեան ժողովրդեան:

Հրաւիրեալ երբեմն 'ի կոչունս ու-
րեք, իբրև յակումբ բոլորեցան կոչնա-

կանքն, տեսեալ Եմբետողի զի ոչ ոք
 սպաս արկանէ բերել կերակուր, և ոչ
 ոք ընդ այն քրթմնջէ, տխրեցաւ ընդ
 այն. և յարեաւ՝ պաշտել ինքնին հրա-
 ւիրելոցն. յայնժամ ազգեաց նմա կոչ
 նատէրն՝ մնալ առ վայր մի՝ ի դալուստ
 նախագահի ծերակուտին. զի և նա ՚ի
 հրաւիրելոց անտի էր: Եւ անդէն ՚ի
 մտանել այնր կոչեցելոյ նախարարին՝
 տանուտէրն և ամենայն կոչնականք
 տեղի ետուն նմա՝ յառաջ անցանել
 ՚ի բարձն պատուականագոյն. և զնա
 ինքն կացուցին թադաւոր և հրամա-
 նատար ընթրեացն: Այս այր անդէն
 անյապաղ ՚ի վեր երևեցոյց զներգոյա-
 ցեալ յոխորտ բարս իւր, և զողին
 բռնակալ. պատուիրեաց բազմելոցն
 ամենեցուն՝ ըմպել այր իւրաքանչիւր
 զղինի իւր անապակ. իսկ որ ոչն կա-
 միցի ըմպել այդպէս՝ բաժակ մի լի
 գինուով ընդ երեսս հարցեն նորա: Ոչ-
 ինչ յայնժամ խօսեցաւ Եմբետողէս.
 և յաւուրն երկրորդի ետ գումարել
 զժողովուրդն. և ամբաստան եղև հրա-
 պարակաւ զկոչնատեառնէն, և զառ-
 նէն որ անասհման բռնութեամբ վա-
 րեցաւ յընթրիսն. յայտ արարեալ
 ամենեցուն՝ թէ այդ՝ նախասկիզբն է
 բռնակալութեան, և տարադէպ բռ-
 նագատութիւն այդպիսի՝ ընդդէմ է

օրինաց և հասարակաց ազատութեան :
Պարտաւոր ցուցեալ յառեմնի անդ
զերկոսին զնոսա, փութանակի ետ
սպանանել : Չեռնարկութեամբ նորա
լռեալ դադարեաց ատեան Հազար ա-
ւադաց, և զի կուսակից էր ժողովըր-
դեան՝ ետ օրէնս հաստատել՝ զի հրա-
մանատարք փոփոխեսցին յերեամ՝ որ-
պէս զի ակնկալելի իցէ ամենեցուն՝
ամբառնալ յաւադութիւն :

Յաւուրս սորա Ակրոն բժիշկ խրն-
դրեաց տեղի ՚ի ծերակուտէ՝ կոթող
յիշատակի կանգնել անդէն յանուն
հօր իւրոյ՝ որ ներհուն էր յարուես-
տին իւրում, և մեծահամբաւ քան զա-
մենայն բժիշկս ծաղկեալս յիւրում
դարու : Յարուցեալ Եմբետոկղեայ ՚ի
բազմահոյլ ժողովի անդ՝ ջանացաւ
շրջել զժողովուրդն ՚ի մտաց՝ զի մի շը-
նորհեսցեն նմա զխնդիրն. քանզի զայն
դիմամարտ համարէր նա հաւասարու-
թեանն՝ զոր առ ամենեսին միօրինակ
կամէր լինել, որպէս զի մի ոք բարձ-
րացի առ այլովք. վասն զի այդ իսկ
է, ասէր, հիմն հասարակաց ազատու-
թեան :

Չայնու ժամանակաւ խանձեցաւ
ախտ սրածութեան ՚ի Սելինոս քաղաք
Սիկիլիոյ, և անապատ կացոյց ՚ի բնակ-
չաց. ընդ օր ամենեքին յողիս ապաս-

տան տազնապէին, և կանայք ծննդա-
կանք տարածամ վիժէին: Քննեալ
հասու եղև Եմբետողէս թէ այդ շա-
րատանջ հիւանդութիւն՝ ազդեցու-
թիւն է ապականեալ ջուրց գետոյն որ
ընդ քաղաքն հոսէ: Դարձոյց իւրովք
ծախիւք զընթացս երկուց վտակաց և
հոսեցոյց ՚ի գետն քաղաքին. յայնժամ
՚ի յորդութեամբն խաղալ ջուրց, դա-
դարեցին ՚ի գետոյ անտի մահ և ապա-
կանութիւն: Ընդ այս առողջարար
փոփոխութիւն ջուրցն, և ընդ ազա-
տութիւնն ՚ի կոտորածէն՝ տօն և խրն-
ջոյս կարգեցին բնակիչք քաղաքին. անդ
՚ի Սելինոս էր յայնժամ և Եմբետող-
վասն որոյ պար առեալ զնովաւ՝ պա-
տարագս մատուցանէին նմա, և դիւ-
ցական պատուով մեծարէին, որոց յօ-
ժարամիտ էր Եմբետողէս:

Նախկին սկիզբն դնէր Եմբետողէս
զչորս տարերս զհող, զջուր, զօդ և
զհուր: Միաբանութիւն իմն համա-
րէր լինել ընդ տարերսդ ընդ այդոսիկ՝
որ միաւորէ զնոսա, և հակառակու-
թիւն՝ որ անջրպետէ ՚ի միմեանց: Դար-
ձեալ թէ յար ՚ի փոփոխութեան են,
այլ ոչինչ վատնի ՚ի նոցանէ. ընդ ամե-
նայն յաւիտեանս այս կարգ անյեղ լի
էր, և նոյնպէս յաւերժացի: Արե-
գակն՝ հրեղէն մարմին է: Լուսին տա-

փարակ է, և սկաւառակաձև: Նիւթ
կազմութեան երկնից է իբրև ական
վանի: Յաղագո հողոց կարծէր՝ ան-
ցանել նոցա անխորաբար ընդ ամե-
նայն աղգս մարմնոց. և պնդէր առ
այս յիշատակելով իմն թէ յառաջն
մանուկ էր, ապա ՚ի ձուկն փոխեցաւ,
յետ այնորիկ ՚ի հաւ թռչուն. ևս և ՚ի
տունկ:

Բազմօրինակ պատմի անցք մահու
այսր իմաստասիրի: Բազմաց կարծիք
են՝ թէ իղձք փափաքանաց էին նորա
աստուած ոմն կարծեցուցանել զանձն,
և զի զբաղումս ևս առ այն յօժարամիտս
տեսանէր, հաստատեաց ՚ի միտս իւր
լրումն տալ խորհրդոցն: Ասան ու-
րոյ յորժամ ծանրացան ՚ի վերայ նո-
րա կարիք ծերութեան՝ կամեցաւ գե-
րահրաշ իմն օրինակաւ կնքել զկեանս
իւր: Ապաքինեալ նորա զկին զոմն ակ-
րականդացի՝ Պանթէս անուն՝ որ
լքեալ էր ՚ի բժշկաց, և յոգւոց պար-
զել ապաստան էր, հանդերձեաց պա-
տարագ նուիրական՝ յոր հրաւիրեաց
կոչնականս ութսուն. և առ ՚ի խե-
լամտեցուցանել զնոսա թէ ինքն փո-
խեցաւ ՚ի կենդանեացս, իբրև ելին նո-
քա ՚ի կոչնոցն, և ցրուեցան այր իւ-
րաքանչիւր հանգչել ուրեք՝ ոմանք ընդ
ծառովք, և այլք այլուր, Եմբետող

առանց ինչ ասելոյ ընդ ումք, եւ ՚ի գլուխ լերինն Ետնայ, և դահավէժ ընկէց զանձն ՚ի վիհ հնոցի լերինն: Յի շատակեալ Ուրատիոսի զկատարած առնս՝ ասէ .

Այն ինչ ցանկայ գող Եմբետոկը անմահ աստուած ,

Յրտացեալ ծերն յԵտնա վառեալ զանձն մղեաց :

Այր ծանրաբարոյ էր Եմբետոկը զէս, երկայնասեր, և պսակ սարգենի հանապազ ունէր ՚ի գլուխ: Ո՛չ գնայր միայն զճանապարհայն, այլ ուղեկցու թեամբ բազմաց ՚ի միասին . այսպէս պատկառելի ցուցանէր զանձն առ ամենեսին: Ազանէր միշտ յոտսն սանդալ պղնձի . և իբրև հոսեցաւ ՚ի խորամանկ հրածորան՝ բռնութիւն կրակին ՚ի դուրս զգայուեաց զմի սանդալ նորա, որ իբրև գտաւ՝ յայտնի եղև խորամանկութիւն նորա: Ահա ըստ այսմ օրինակի եղկելին այն Եմբետոկը զէս, զի ոչ քաջ զամենայն խորհեցաւ յառաջագոյն, փոխանակ աստուած համարելոյ, անձնամատն ցուցաւ այր խաբեբայ:

՚ի բնաւորութիւնս նորա սքանչելի այն էր՝ զի բարիոք քաղաքացի էր, և ՚ի բաց վճարեալ ՚ի շահուց անձին:

Յետ մեռանելոյ Մեթոնի հօր նորա՝
 հնարեցաւ ոմն յինքն գրաւել զբռնա-
 կալութիւն Ակրականդայ . փութա-
 նակի գումարեաց Եմբետոկղ զժողո-
 վուրդն . ցածոյց զամբօխն , և արգել
 զյառաջադիմութիւն վատ խորհրդոցն .
 և զի յայտ յանդիման երևեցուսցէ
 զսէր իւր ՚ի հաւասարութիւն , մասն
 եհան միաչափ յընչից իւրոց որոց
 նուազ էր քան զիւրն :

Երևեցաւ այս իմաստասէր առ
 ութսներորդ չորրորդ ողիմպիադաւ :
 Անդրի կանգնեցին նմա ակրականդա-
 ցիք , և ընդ երկար մեծարեցին զյիշա-
 տակ նորա : Մեռաւ յալիս ծերու-
 թեան . այլ չէ յայտ թիւ ամաց ա-
 լուրց կենաց նորա :

Ս Ո Կ Բ Ա Տ

Ճնեալ 'ի չորրորդ ամի եօթանասնե-
րորդ եօթներորդ ողիմպիադին, մեռեալ
յառաջին ամի իննաներորդ հինգերորդ
ողիմպիադին, 'ի հասակի ամաց եօթա-
նասնից :

ՍՈԿԲԱՏԷՍ իմաստասէր, որ ըստ
զուգաձայն աւանդութեան վաղեմի
դարուց՝ գերապանծ հանդիսացաւ յա-
ռաքինութիւնս, և յստակագոյն 'ի
տեսութեան մտաց քան զամենայն ի-
մաստասէրս կռամոլ ժամանակին,
քաղաքացի էր Աթենայ, յԱլոպէկ
գեղջէ: Ծնաւ 'ի չորրորդ ամի հէ ո-
ղիմպիադին, որդի հօր Սոկրոսինոսի
անդրիագործի, և մօր Փարանետիայ
մանկաբարձի: Ուսաւ զիմաստասիրու-
թիւն նախ առ ոտս Անաքսագորայ .
և ապա յԱրքեղայոսէ զբնաբանու-
թիւն: Սակայն միտ եղեալ խորա-
գոյնս՝ թէ այն ամենայն սնոտի զննու-
թիւնք իրաց բնութեան՝ ոչինչ օգուտ
մատակարարեն, և ոչ յառաքինու-
թիւն անդր առաջնորդեն իմաստասի-
րի, հպատակեաց յուսումն կարեօ-

րացն 'ի հրահանգս բարուց . և՛ թէ
 ասել օրէն իցէ՛ եղև նախասկիզբն բա-
 րոյական իմաստասիրութեան 'ի մէջ
 յունաց , որպէս աւանդէ Վիկերոն՝
 յերրորդ գիրս Տուսկուլեան խնդրոց :
 Այլ յայտնագոյն և ճոխագոյն բա-
 նիւք աւանդէ զայս յայլ գիրս իւր ,
 ունելով բանին այսպէս . «Թուի ինձ,
 և ամենեքին 'ի սոյն ձայնակից , են թէ
 առաջին ինքն Սոկրատ է՝ որ 'ի բաց
 պարուրեալ զիմաստասիրութիւն 'ի
 հետազօտութենէ գաղտնեաց բնու-
 թեան , առ որ միայն հետամուտ էին
 ամենայն իմաստասէրք յառաջ քան
 զնա , շրջեաց զայն առ որս հային 'ի
 պարտս հասարակաց կենացս . որպէս
 զի բովանդակ պարապել նմա 'ի քննու-
 թիւն առաքինութեանց և ախտից .
 իսկ երկնաւորքդ , ասէր , կամ՝ հեռի են
 'ի մերմէ գիտութենէս . կամ՝ թէ
 և յայտնի իցեն , ոչինչ սատար լինին
 նոքին 'ի բարիոք շեկավարութիւն
 մեր :

Արդ՝ յամենայն զօրութենէ իւրմէ
 զհետ պնդեցաւ զայնր մասին իմաստա-
 սիրութեան՝ որ ակնարկէ 'ի բարե-
 կարգութիւն վարուց կենաց . և ձգի
 առ ամենայն հասակ և վիճակ կե-
 նաց : Այս նորօրինակ իմաստասիրու-
 թիւն այնու առաւել ընդունելի դա-

տեալ եղև՝ զի նա ինքն որ հեղինակ էր
 ուսմանն, օրինակաւ դործոց իւրոց
 քարոզէր զվարդապետութիւնն, միտ
 եղեալ՝ կատարել որչափ մարթ էր զա-
 մենայն զպարտս առաքինի քաղաքաց-
 ւոց ՚ի ժամանակի խաղաղութեան և
 պատերազմի :

Յամենայն ՚ի քաջանուն իմաստա-
 սիրաց Սոկրատէս միայն առաքինացաւ
 և ՚ի պատերազմի . որպէս յուշ առնէ
 Լուկիանոս ՚ի տրամախօսութեան
 Պորտաբուծին : Հանդիսացաւ յեր-
 կուս կռիւս . և յերկոսին իսկ թէ-
 պէտ պարտեցաւ կողմն իւր , այլ նա
 միջամուխ խաղաց ՚ի վտանգս ծա-
 նունս , և ծանուցաւ այր քաջազօր : ՚ի
 միումն թափեաց զՔսենոփոն ՚ի մա-
 հուն վտանգէ , որ ՚ի փախչելն անկեալ
 յերիվարէն՝ փոքր մի ևս՝ սպանեալ էր
 ՚ի թշնամեաց , թէ ոչ ՚ի բաց կորզէր
 զնա Սոկրատ ՚ի խռանէ անտի , շալա-
 կեալ զանձամբ , զոր՝ մինչ յերկարէր
 մարտն՝ տարաւ հեռի ընդ բազում
 ասպարէզս , և գտեալ զերիվարն փա-
 խուցեալ՝ հեծոյց ՚ի վերայ նորա .
 երաշխաւորէ պատմութեանս Ստրա-
 բոն : Յերկրորդումն ՚ի խորտակիլ ա-
 թենացւոց և ՚ի փախչել , յետինն եղև
 նա ՚ի յետադարձս , և ցայն վայր զգէմ
 կալաւ՝ զի որք հետամուտքն էին փա-

խրատէից՝ տեսեալ զնա զի կտամակար
պատրաստէր լինել նոցա դիմագրաւ .
ոչ ևս իշխեցին բախել ընդ նմա . և
վկայէ այսմ Աթենէոս : Յետ երկուց
արշաւանացս՝ ոչ յաւել Սոկրատ ե-
լանել արտաքս ըստ Աթէնս . եկաց ՚ի
քաղաքի անդ՝ վարեալ տարազ կենաց
ամենեւին աննման այլոց իմաստասի-
րաց , որք վատնէին ՚ի ճանապարհոր-
դութիւնս զառաւելագոյն ժամանակ
կենաց իւրեանց՝ վասն նորանոր իրաց
խելամուտ լինելոյ , մտանելով ՚ի կե-
նաց կցորդութիւն ընդ իմաստունս
իւրաքանչիւր աշխարհաց : Սակայն զի
օրինակ իմաստութեանն առ որ սահ-
մանեալ էր Սոկրատայ զուսումնասի-
րութիւն իւր՝ առաջնորդէր մարդոյ
ջանահնար լինել յաւէտ ՚ի ծանօթու-
թիւն անձին , քան ծանրաբեռնել
զմիտս գիտելեօք որք ոչինչ օգտեն ՚ի
բարեկարգութիւն կենաց , վասն այնր
ոչինչ պարտ վարկաւ անձին մաշել
զաւուրս իւր ՚ի տարադէմ ուղևորու-
թիւնս . յորոց ոչ մի ինչ արդեօք ա-
ռաւել ուսանէր՝ քան զորս ուսան
յԱթէնս ՚ի մէջ քաղաքակցաց իւրոց ,
յորոց ՚ի հրահանգս արդարացի դա-
տէր աշխատութիւն յանձին ունել ,
քան ՚ի վերայ օտարաց : Եւ քանզի զի-
մաստասիրութիւն բարոյական օրի-

նակօք քան թէ բանիւք է ուսուցա-
 նել, օրէնս հաստատեաց անձին իւ-
 րում՝ կատարել գործով զոր ինչ պա-
 հանջեսցեն ՚ի նմանէ ողջամիտ խոր-
 հուրդ, և առաքինութիւն անդրդուե-
 լի: Մինչ նա յայս մտաց խորհրդի էր՝
 ամբարձաւ ՚ի պատիւ ատենակալաց
 քաղաքին, և երդումն տուեալ՝ անա-
 ջառութեամբ յայտնաբանել զկարծիս
 իւր յամենայնի, հրաժարեաց քաջու-
 թեամբ ՚ի ձեռնադրելոյ դատակնքոյն՝
 որով ժողովուրդն մահու պարտաւոր
 առնէր զինն զօրավարս ընդդէմ օրի-
 նաց. և թէպէտ ամբոխն ղչարեցաւ
 ընդ այն, և բաղուժ յաւադաց սպառ-
 նալեօք ջանային պակուցանել զնա,
 ոչինչ թուլացաւ ՚ի հաստատութենէն,
 կէտ եղեալ անձին իւրում՝ թէ չէ
 արժան զգօն մարդոյ, սուտ երդնուլ
 ՚ի հաճել զժողովուրդն:

Չունիմք մեք հաւաստել ուստեք՝
 արդեօք ընտրեցաւ նա յայլ աւագու-
 թիւն բաց յայսմանէ. սակայն թէ-
 պէտ անբաժ էր նա իշխանութեանց,
 այլ իմաստութեամբ իւրով և առա-
 քինութեամբ՝ ՚ի պատկառանս իւր
 ձգեաց զԱթէնս ողջոյն, զի և քան զա-
 ւագանին առաւելեալ էր ՚ի մեծա-
 բանս պատուոյ: Որ ինչ վասն անձին
 իւրոյ էր հոգ խնամոց՝ փութաջան էր

ըստ բաւականութեանն . և մեղադիր
 լինէր որոց ոչ խնամ տանէին ան-
 ձանց , կամ որք պանծային ընդ դժուծ
 անհոգութիւնն . սիրող էր մաքրու-
 թեան , քաջավայելուչ և պատշաճա-
 կան 'ի հանդերձս , զմիջինն ունելով ընդ
 փցուն և շինական , և ընդ պերճ կամ
 մեղկասէր : Թէպէտ և չէր ինչ յղփա-
 ցեալ ճոխութեամբ , այլ յամենայնի
 հրաժարեալ էր 'ի խնդրելոյ զօգուտ
 անձին . զի ոչինչ առնոյր յորոց աշա-
 կերտէին նմա . և նովին արհամարհ
 ցուցանէր զզնացս այլոց իմաստասի-
 րաց , որք 'ի շահավաճառ արկանէին
 զվարդապետութիւն իւրեանց , և հար-
 կէին զաշակերտս իւրեանց բաղում
 կամ նուազ վարձու : Նա մանաւանդ
 սովոր իսկ էր ասել՝ ըստ յառաջ բե-
 րելոյ Քսենոփոնի . Ո՛չ իմանամ թէ
 զհարդ այր որ յանձին կալեալ իցէ
 վարդապետել զառաքինութիւն՝ խոր-
 հուրդ կալցէ յանձին՝ շահ կլթել ան-
 տի . քանզի ստանալ անձին զայր առա-
 քինի , և զաշակերտն առնել իւր բա-
 րեկամ՝ օգտակարագոյն է և անկա-
 պուտ մեծութիւն՝ քան զշահ անձին :
 'Ի սակս այսր անօգտախնդիր բարուց
 Սոկրատայ՝ Անտիփոն ոմն սովեստէս՝
 որ պարծէր ունել զգիտութիւն բա-
 րուց , այլ 'ի հրահանգացն վերջացեալ

էր, ասաց ցնա յաւուր միում. Իրաւացի է քեզ ոչ առնուլ վարձս յաշակերտաց քոց, և դովին այր առաքինի ցուցանես զքեզ: Քանզի թէ բանք լինէին 'ի վաճառ հանել զտուն քո, կամ զհանդերձս, կամ զկարասի, ոչ միայն առանց գնոյ կամ նուազ գնով ոչ տայիր, այլ գուն 'ի վերայ դնէիր արդար գնով վաճառել գնոսին, և դանգի միոյ պակաս ոչ տայիր: Արդ զի դու ինքնին քաջ խելամուտ ես թէ ոչինչ դիտես, և յաղագս այնորիկ ոչ կարես վարդապետել այլոց, խիզճ համարիս քեզ պահանջել յայլոց փոխանակ որոց ուսուցանել ոչ դիտես: Այս զգոնութեան քո ներքող է, քան թէ անշահասիրութեան: Իւրաւ ամաչեցոյց զնա Սոկրատէս՝ յուշ արարեալ նմա թէ կան իրք բազումք զորս մարթ է 'ի բարիոք պէտս 'ի վար արկանել, և 'ի թիւր. և ևս ընծայել բարեկամին զպտուղս քաղեալս 'ի պարտիդէ իւրմէ, և վաճառել, այլ և այլ են 'ի միմեանց: Արդ դու միասէ՛ կարծեր յանձին քում, թէ ես վարդապետեմ աշակերտաց խոց ըստ օրինակի այլոց խմաստասիրաց՝ որոց դոյ տեղի հաստատուն 'ի ժողովել անդ զաշակերտս իւրեանց, և վարդապետել ըստ ժամադրեալ պահուն. իսկ

Սոկրատ իմաստասիրէ ընդ որս առ ըն-
թեր գտցին նմա, երբ և իցէ, և ուր և
իցէ:

Ընդ գլուխս ամբաստանութեանց
զՍոկրատայ՝ զորս դատախազէր Մելի-
տոս, յաւելաւ և այս՝ թէ փոխանակ
երկրպագելոյ դից պաշտելոց յԱթէնս,
այլ իմն անծանօթ աստուածութիւն
'ի մէջ մատուցանէ. սակայն բովան-
դակն զըպարտութիւն էր, և պատ 'ի
պատ զըոյցք. քանզի կանոնն զոր 'ի
դմին յայդմ հաստատուն օրինօք կար-
գեալ էր Սոկրատ անձին իւրում, և
զայն տայր խրատ որոց խորհուրդ հար-
ցանէին ընդ նա, այս էր՝ հպատակ
կալ պատգամաց դեղփեանն Ապողո-
նի, որ իբրև հարցաւ թէ զիարդ օրէն
իցէ պաշտել զդիս, ետ պատասխանի՝
թէ ամենայն այր կատարեսցէ զդոյն
ըստ կրօնից երկրի իւրոյ: Այս իսկ էր
զոր առնէր Սոկրատէս նուիրելով և
պատարագելով դից 'ի սակաւուն զոր
ունէր, և թէպէտ դոյզն ինչ էր զոր
ընծայէրն, սակայն այնպէս հաւա-
նեալ էր յանձին իւրում թէ զուգա-
չափ հաւասարութեամբ հաճոյ գտցին
պատարագք իւր ընդ մեծատանցն, զի
մատուցանէր ըստ գոյին իւրում. և
չառնոյր յանձն ասել թէ հաճոյա-
կան գտանիցին յաչս աստուածոց բազ

մածախ դահամուհք, քան զսակաւս .
 նա՛ ընդ հակառակն ասէր՝ թէ ոչինչ
 առաւել ընտրելի է նոցա՛ քան զոր
 յառաքինեաց մեծարանս :

Չէր ինչ յաւէտ անպաճոյճ, և
 միանգամայն ասել՝ կրօնից պաշտա-
 մանցն զուղաձայն, քան զաղօթսն զոր
 նա մատուցանէր դից, ոչ մի ինչ ան-
 ձին առանձին աղերսելով, այլ զայն
 և եթ խնդրելով զոր նոքայն բարիոք և
 օգտակար համարեսցեն նմա . քանզի՛
 ասէ, ճոխութիւն և աւազութիւն
 հայցել ՚ի նոցանէ՛ այնպէս է, որպէս
 թէ խնդրիցես շնորհս՛ ՚ի մարտ մխելոյ,
 կամ նարտ խաղալոյ, առանց դիտելոյ
 զելս պատերազմին, կամ խաղուն :

Ա՛չ միայն ոչ հրաժարեցուցանէր ՚ի
 պաշտամանց զորս յաճախէին առ ՚ի
 նոյն, այլ և խնամովք ջան ՚ի վերայ
 դնէր առաջնորդել ՚ի նոյն որոց հետ-
 տեալ էին ՚ի ճանապարհէ կրօնասի-
 րութեան: Պատմէ Քսենոփոն առ այս
 զհնարս նորա որով ազդեաց եռանդն
 պաշտօնասիրութեան առ դիս՝ յերի-
 տասարդ ոմն Արիստողեմոս անուն՝
 որ բացէ ՚ի բաց հրաժարեալ էր ՚ի
 պաշտմանէ կրօնից, և ծաղու նշաւա-
 կէր զորս փութային ՚ի նուէրս պա-
 տարագաց: Ընթերցեալ միանգամ առ
 Քսենոփոնի զոր ինչ յայդ դէպս ա-

սաց Սոկրատէս յաղագս նախախնա-
մութեան զից ՚ի վերայ մարդկան,
սքանչասցի ոք՝ տեսանելով զիմաստա-
սէրդ որ ՚ի հեթանոսութեան տատա-
նեալ՝ սակայն գերազանցեալ յոյժ յոյժ
յողջմտութեան խորհրդոց՝ ՚ի խնդիրն
որ յաղագս աստուածութեան :

Աղքատ էր յընչից, այլ ամենեին
շատացեալ. զի թէպէտ առ ձեռն պա-
տրաստ էր նմա լիանալ ճոխութեամբք՝
ընդունելով զպարգևսն զոր բարեկամք
նորա և աշակերտք մատուցանէին նմա,
զայն ամենայն ՚ի բաց յղէր առ մա-
տուցանելիսն, թէպէտ և զայրանայր
ընդ այն կինն նորա՝ որ անձաշակ էր ա-
մենեին վայելից իմաստասիրութեան :

Օրինակ կենաց նորա ՚ի կերակուրս
և ՚ի հանդերձս անպաճոյճ էր յոյժ .
մինչ զի Անտիփոն սովեստէս զոր ՚ի
վերոյ յիշեցաք՝ նախատէր զնա՝ թէ չիք
ոք ստրուկ այնչափ աղքատ և հէզ՝ որ
անձին շատ գրեսցէ զայդ տարազ, և
առ ՚ի դոյն զանձն պատկանեսցէ .
քանզի կերակուր քո, ասէ, անարգա-
գոյն է քան զամենայն երկրի : Դար-
ձեալ ոչ միայն հնոտի է պարեգօտ քո,
այլ և մի միայն, զամառն և զձմեռն .
և բոկոտն ընթանաս : Այլ Սոկրատ
յայտ յանդիման երեւցոյց զլրիպակ
նորա՝ որ համարէր թէ երջանկու-

Թիւն մարդոյ 'ի լիութեանն և 'ի հեշտութեանն հաստատեալ կայցէ. և թէ և, ասէ, աղքատ և ջքաւոր կարծիմ, այլ երջանիկ եմ քան զքեզ: Նա ապա քէն՝ զոր օրինակ չկարօտելն իմիք՝ աստուածոց միայն սեփական է, նոյնպէս որոց նիազ իցէ կարօտութիւն՝ մերձաւորագոյն դատեալ լինին աստուածեղէն բնութեան:

Այս անարատ առաքինութիւն Սոկրատայ սքանչացոյց զամենայն մարդ, մանաւանդ զԱթէնք քաղաք, ուր անօրինակ էր գործդ. քանզի և որոց անբաւական իցէ զօրութիւն՝ զառաքինութեանց զհետ ընթանալ, հրաշանան ընդ որս ընթանան զայն ճանապարհ անստերիւր: Առաքինութիւն Սոկրատայ զհամբաւի հարաւ 'ի սուղ ժամանակի առ ամենայն բնակիչս քաղաքին, ձգեաց առ նա յօլով աշակերտս յամենայն հասակէ, որք գեր 'ի վեր դնէին զվարդապետութիւնն նորա և զկենաց կցորդութիւնն՝ քան զամենայն հաճոյակատար սիփփանս: Այլ որ յաւէտ ձգէր զնոսա առ Սոկրատայն էր, զի որչափ ժուժկալ և խստակեաց էր յանձին իւրում, նոյնչափ քաղցր էր և մարդասէր առ այլս: Առաջին զոր հնարէր տպաւորել 'ի սիրտս երիտասարդաց աշակերտելոց նմա՝ էր

պաշտօնն և երկիրն առ դիս. յետ այնո-
րիկ՝ ըստ մարթելոյ առաջնորդէր նո-
ցա ՚ի ժուժկալութիւն, և ՚ի հեշտու-
թեանց հրաժարել, ցուցեալ նոցա՝
թէ որպէս այնորիկ կապտեն զմարդ
յանգին դանձուցն զոր ստացեալ ու-
նի. իմա՝ յազատութենէ: Համոզա-
կեր էր յոյժ եղանակ վարդապետելոյ
նորա զբարոյական իմաստասիրու-
թիւն, քանզի զբովանդակն ՚ի խօսս և
՚ի բազմականս կատարէր՝ առանց ինչ
պատուասէր հանդերձանաց, և ա-
ռանց բանս ՚ի մէջ արկանելոյ ՚ի քննել
հետազօտութեամբ, բունն հարկանէր
՚ի բանսն որ անկանէր ՚ի կարգ խօ-
սիցն, կամ զոր դէպքն ինքնին առար-
կանէին: Չառաջինն անդ հարցանէր
ինչ՝ որպէս այր՝ որ ուսանել կամիցի .
և ապա յարգեալ զբանսն որ զոյգ լի-
նէին խորհրդոց նորա ՚ի խնդիրն այն,
առաջնորդէր աշակերտելոցն ՚ի հակա-
ռակս առաջնոց բանից հաստատելոց:
Չմասն ինչ աւուրն անցուցանէր
յայդ հրահանգս բարոյականին, առ
որ ամենեքին յօժարամիտ ընթանային,
և ոչ որ մեկնէր անտի՝ չև իմաստա-
ցեալ լիագոյն, որպէս հաստատէ Քսե-
նոփոն:

Թէպէտ և ոչինչ աւանդեաց Սո-
կրատ՝ դրոշմեալ ՚ի դիր, սակայն դիւ-

րին է դատաստան առնել վասն հան-
 գամանաց բարոյական իմաստասի-
 րութեան նորա, և օրինակին որով
 վարդապետէր՝ յորոց ինչ գտանի վասն
 այնր ՚ի գիրս Պղատոնի և Քսենոփո-
 նի: Այլ ՚ի վեր քան զամենայն՝ նմա-
 նութիւնն զոր նշմարեմք ՚ի քննու-
 թիւնս նորա՝ որպէս պատմեն համա-
 ձայնութեամբ երկոքին այդ աշակերտք
 Սոկրատայ, քաջայայտ նշանակ է ո-
 ճոյ վարդապետութեան նորա: Այլ
 քչ զնոյն է ասել հաստատութեամբ և
 վասն իսկութեան բանից ուսմանն .
 մանաւանդ հայեցեալ ՚ի բանս Պղա-
 տոնի՝ որպէս ինչ ասէ ունել նմա վար-
 դապետութիւն, որպէս ասացն իսկ
 Սոկրատ՝ յետ ընթեռնլոյ զնորայն
 լիւսիսեան տրամախօսութիւնն . այլ
 յաւէտ իմն արդարացի դատեալ է
 արժանահաւատ համարել զՔսենո-
 փոն . քանզի զոր ինչ յառաջ բերէ հա-
 տուածս բանից խօսեցեալս ընդ Սոկ-
 րատ և ընդ այլ ոք դերասան, յայտ
 յանդիման կացուցանէ՝ թէ զգործ
 պատմաբանի կատարէ անդէն, զոր
 ինչ լուեալն էր՝ զայն ևեթ առաջի
 առնելով:

Դժուարաւ արդեօք հաւատս ըն-
 ծայեսցուք՝ թէ որպէս այր որ զամե-
 նայն մարդ յօժարէր ՚ի պաշտօն դից,

և զի այսպէս ասացից՝ քարոզէր երիտասարդաց զգուշանալ յամենայն ախտից, ինքն մահու պարտաւոր գտանիցի այնու՝ թէ հրաժեշտ տայր ՚ի պաշտամանց դից որ յԱթէնս, և ապականէր զկեանս երիտասարդաց : Սակայն այդ անօրէն անդթութեան գործ կատարեցաւ յանգլուխ ժամանակին, առ իշխանութեամբն երեսուն բռնակալաց : Եւ ահա այս ինչ է սկզբնապատճառ իրացդ :

Արիտիաս հզօրագոյնն ՚ի բռնակալաց այտի՝ յառաջ ժամանակաւ աշակերտեալ էր Սոկրատայ, որպէս և Աղկիբիատէս. սակայն տաղտկացեալ երկոցուն սոցա ՚ի սոկրատեան իմաստասիրութենէ, որոյ վարդապետութիւնն ոչ զուգաձայնէր ամբարտաւանութեան և անժուժկալութեան նոցա, զանց արարին զնովաւ : Արիտիաս յաշակերտութենէ անտի Սոկրատայ՝ փոխեցաւ նմա յօխերիմ թշնամի, վասն անդրդուելի հաստատութեանն՝ որով կշտամբէր սա զամօթալի զակատիլ նորա զհետ ախտից. և խոչընդոտն լինէր յաջողութոյ թիւր կամաց նորա. մինչև զի ՚ի դասակարգել Արիտիայ ՚ի թիւ բռնակալացն երեսնից, յոչինչ առաւել զաչս հաստատեաց, քան յարևէ

արկանել զՍոկրատ . մանաւանդ զի և
 սորա ոչ ժուժելով անօրէն գործոց
 նոցա, ազատաբերան ընդդիմաբանէր :
 Քանզի տեսեալ նորա զի զօր ամե,
 նայն 'ի մահ մատնեն զբազումս 'ի քա,
 ղաքացեաց և յաւագանւոյն, ասաց
 յայտնաբանութեամբ յակմբի ուրեք
 օրինակաւ, եթէ նա որում հաւատա-
 ցան անդեայք 'ի պահպանութիւն՝ օր
 զաւուրք նիհարացուցէ և սակաւա-
 ցուցէ զնոսա, հարկաւորաբար խոս-
 տովան լիցի զանձնէ գոլ վատ ան-
 դէորդ : Արիտիաս և Քարիկլէս երկուք
 'ի գլխաւորաց երեսնիցն հասու եղեալ
 թէ 'ի նոսա հայի այլաբանութիւնն,
 զառաջինն անդ օրինադիր եղեն՝ որով
 արդելին ուսուցանել յԱթէնս զա-
 րուեստ խօսելոյ : Եւ թէպէտ Սոկրատ
 ոչ առնէր զայդ, սակայն քաջ իսկ հա-
 լաստեցաւ՝ ընդդէմ նորա լինել հրա-
 մանիդ, որով ջանային նոքա կրճիմն
 արկանել ազատօրէն վարդապետելոյ
 նորա 'ի բարոյական խնդիրս՝ ընդ որս
 խմբէին զնովաւ . որպէս նորայն սովո-
 րութիւն էր : Ինքնին գլխովին Սոկրատ
 մատուաւ առ երկոսին պատուիրողս
 օրինացդ, 'ի նոցանէ խնդրեալ զիմաստ
 հրամանին . սակայն զի 'ի նեղ արկա-
 նէր զնոսա նրբութեամբ հարցուածոց
 իւրոց, իշխանաբար պատուիրեցին

նմա՛ մի՛ ևս շուրջ զիւրե կուտել ըզ-
 մանկտին . եհարց ցնոսա, թէ ցորվայր
 տարածեն զչափ հասակի երիտասար-
 դութեան . ասեն, զամենայն հասակ
 որ ՚ի վայր քան զերեսնամեան տիս :
 Ասէ Սոկրատ . իսկ ոչ տաց պատաս-
 խանի որոց հարցանիցեն ցիս՝ թէ ո՞ւր
 է Քարիկլէս, կամ Արիտիաս : Այո՛,
 ասէ Քարիկլէս . այլ յաւել ՚ի վերայ
 Արիտիաս, թէ արգելեալ է քեզ ամե-
 նեին ժողովս կուտել զքեզ զձեռագի-
 տաց արուեստից . որոց ծանրացեալ
 են լսելիք ՚ի բանից քոց : Սոկրատ ա-
 սէ . Ապա թէ որք զհետ իմ եկեսցեն՝
 հարցցեն ցիս վասն զթութեան և ար-
 դարութեան : Այո՛, ասէ Քարիկլէս .
 նոքին իսկ անդէորդք անդուհ հսկեն ՚ի
 վերայ քո չառնել պակաս զթիւ կու-
 վուց : Հատ եղև այս Սոկրատայ խե-
 լամտել թէ խէթ է նմա յերեսաց նոր
 բռնակալացն . և զի օրինակ առակին
 իւրոյ ՚ի խոր խոցեալ է զնոսա :

Վասն առաքինի կենաց առն այս-
 պիսւոյ մահ երդուան ոմանք ՚ի խոռ-
 վայոյզ աթենացւոց . և վասն այնր ա-
 ռակ նշաւակի լինէր մոլեգնելոցն այ-
 նոցիկ . որք և յորդորեցին զԱրիստո-
 փանէս քերթող՝ այպն կատականաց
 կացուցանել զՍոկրատ ՚ի թատրոնա-
 կան տեսարանի . և նա միտեալ ՚ի

բանս նոցա՝ երևեցոյց յԱմպբ անուա-
նեալ կատակերգութեանն դերասան
զոմն Սոկրատ անուն՝ բաղմեալ ՚ի սա-
կառի ՚ի մէջ ամպոց. և կուտեաց զնո-
վաւ բազում բանս նախատականս, ՚ի
ծաղր շարժել զբաղմութիւն ժողովե-
լոցն ՚ի զնին: Այլ սքանչելին Սոկրատ
որ գտաւ ՚ի ժողովի անդ, եկաց մնաց
անխռով ՚ի դէմս և ՚ի խորհուրդս ընդ
այն ամենայն կծանող արհամարհու-
թիւն: Եւ քանզի ՚ի հանդիսականս
անդ էին բազում օտարականք՝ որոց
անձկալի էր տեսանել զայրն զայն զա-
ռակեալն նախատանաց, կանգուն
արձանացաւ Սոկրատ ՚ի կայի իւրում,
ցուցանել ամենեցուն զանձն, և զնա-
խատինսն որ յիւր վերայ կուտէին:
Այս առաջին յարձակումն էր ատե-
լեաց Սոկրատայ ընդդէմ նորա: Ան-
ցին ՚ի վերայ ամք քսան, և ահա ամ-
բառնայր Մելիտոս ռխերիմ թշնամի
նորա, գուն ՚ի վերայ եղեալ՝ օրինօք
դատաստան մահու ածել ՚ի վերայ նո-
րա: Արկին վնասս ծանունս գրէին
զնմանէ. առաջին այն՝ թէ ոչ պաշտօն
հարկանէ դիցն պաշտելոց ՚ի ժողովը
դենէ, այլ փոխանակ նոցա նորանոր
աստուածոց պաշտամունս ուսուցա-
նէ: Երկրորդ՝ ապականէ զվարս երի-
տասարդաց աթենացոց: Երկրորդ

զըռւխ ամբաստանութեանս սուտ էր
 ամեննին. առաջինն քննութեան պէտս
 ունի. 'ի դէպ է ասել, թէ 'ի խուժել
 անբաւութեամբ սնոտի պաշտամանցն
 յԱթէնս, զտարադէպ առաւելեալն
 յապաւել ջանացաւ Սոկրատ 'ի վար-
 դապետութիւնս իւր, 'ի բաց թողեալ
 զկարկատուն առասպելն, զպատշաճ
 և զողջամիտ կարծիսն ունել վասն ա-
 բարչին աշխարհի:

Իբրև 'ի վեր ել դաշնակից դաւա-
 ճանութիւնն ընդդէմ Սոկրատայ, 'ի
 հանդէս արձանացան և բարեկամքն ու-
 րա՝ պատսպարան լինել նմա: Լիւ-
 սիաս որ զայնու ժամանակաւ նա-
 խապատիւ էր յատենաբանս, քաջա-
 բուեստ պատասխանատուութիւն յօ-
 ըրինեալ 'ի դիմաց Սոկրատայ՝ մատոյց
 նմա: Առ ընկալաւ Սոկրատ. ընթեր-
 ցաւ մտադիւրագոյնս, այլ զի արհեստ
 ճարտարասաց լեզուին ճոխապանծ էր
 յայնմ, ոչ 'ի դէպ դատեցաւ զայն
 առն իմաստասիրի. շնորհ ունելով
 դարձոյց առ յօրինողն: Եւ իբրև ըզ-
 վասն էրն հարցաւ 'ի Լիւսիայ, պա-
 տասխանի ետ Սոկրատ օրինակաւ.
 Որպէս թէ քաջ արուեստաւոր մա-
 տուսցէ ինձ հանդերձս կամ կօշիկս
 շքեղս և ոսկեթելս, որոց ոչինչ պակա-
 սեսցէ, այլ զի ոչ պատկանաւոր են ինձ:

Եկաց մնաց աներկիւղ հաստատու-
 թեամբ, ոչ առ 'ի ձեռին զարհեստ պեր-
 ճախօսութեան, ոչ զհետ եղև մուրո-
 ղաբար քուէ որսալ 'ի դատաւորաց,
 ոչ աղերս արկ, ոչ մատոյց առաջի դա-
 տաւորաց զկինն և զորդիս. ակն յան-
 դիման եցոյց 'ի գործս իւր զարիու-
 թիւնն և զանմեղութիւն: Ատենախօ-
 սութիւն նորա 'ի դատաստանի՝ վեհ-
 անձն էր, աներկիւղ, և ոչ զայրաց-
 կոտ, արժանի իմաստասիրական ազա-
 տութեան. զարդ՝ զճշմարտութիւնն
 միայն ունելով և զանմեղութիւն: 'Ի
 գիր դրոշմեաց զայն Պղատոն՝ որ անդ
 ունկնդիր էր առանց ինչ յիւրմէ յա-
 ւելուածոյ. անուն մակագրեաց նմին՝
 պատասխանատուութիւն Սոկրատայ.
 որ 'ի յաջորդել դարուց՝ համարեցաւ
 մին 'ի չնաշխարհիկ գրոց հնութեանն:
 'Ի սահմանեալ աւուր դատաստա-
 նին՝ ընթերցաւ ըստ օրինի փուրջիչ
 ամբաստանութեանն. կողմանքն եր-
 կոքին եկին յանդիման եղեն դատաւո-
 րաց, և Մելիտոս սկիզբն արար խօսե-
 լոյ. և քանզի բանք նորա թափուք
 էին յապացուցից՝ միտեցաւ 'ի բազ-
 մադէմ հնարս հայթայթանաց ճոռով
 բանիւք, արձանացուցանել իբրև ան-
 շարժութեամբ զկրկին գլուխս ամբաս-
 տանութեանցն: Յետ պաճոյճ բանից

Մեղիտոսի յաւել Սոկրատ զիւրն ան-
 պաճոյճ և զհաստատուն. ասէ. Ամ-
 բաստանեալ եմ այնու թէ ապակա-
 նեալ իցեմ զընթացս կենաց երիտա-
 սարդաց, և ազդեցեալ ՚ի նոսա վար-
 դապետութիւն կեղակարծ յաղազս
 դիցն պաշտամանց, և օրինաց պետու-
 թեանս: Գիտէք դուք աթենացիք, զի
 ես չառի յանձին պատիւ վարդապե-
 տութեան. և յաչաղկոտք որչափ և
 վառեալ իցեն ընդդէմ ինձ՝ չունին
 յանդիման կացուցանել ինձ՝ թէ ու-
 բեք վարդապետեցի ես: Անխաբ վկայ
 այսմ՝ աղքատութիւն իմ: Հասեալ
 կամ յամենայնի անձնամատոյց լինել
 մեծատան և աղքատի. և ժամ պարա-
 պոյ տալ՝ նոցա հարցանել, և ինձ պա-
 տասխանել. և սպաս հարկանեմ որոց
 կամիցին առաքինի լինել. և թէ է ոք
 յաչակերտաց իմոց այր զգօն կամ խե-
 ղաթիւր, ոչ առաքինութիւն նոցա
 ինձ գրեցի, որում ես չեմ պատճառ,
 և ոչ վատութիւն այլոց՝ որոց ոչինչ
 սաղրեցի: Այս գործ է իմ բովան-
 դակ, խելամուտ առնել զծերս և զե-
 րիտասարդս՝ մի կապիլ ընդ սէր մարմ-
 նական, և մի ընդ այլ ինչ յաստեացս,
 այլ ընդ հողիս իւրեանց: Քանզի ես
 օչ զլացայ ասել ձեզ՝ թէ առաքինու-
 թիւն չէ ծնունդ ճոխութեան, այլ

ընդ հակառակն՝ մեծութիւնք յառա-
քինութենէ անտի յառաջ դան, և ՚ի
դմանէ ծնանին այլ ամենայն բարիք
յորդեալք ՚ի մարդիկ առ հասարակ,
կամ առանձինն:

Թէ բանք իմ այսպիսի՝ ապականու-
թիւն է ոգւոց երիտասարդաց, խոս-
տովան լինիմ, աթենացիք, թէ մեղա-
պարտ եմ ես և պատուհասի դատա-
պարտ. թէ բանք իմ չեն ճշմարիտ, չի-
ցէ և դժուարին՝ իբրև ստախոս յաղ-
թահարել զիս: Ահաւասիկ բազմու-
թիւն աշակերտաց իմոց, թող յա-
ռաջ մատիցեն և վկայութիւն դիցեն.
սակայն թերևս մեծարանք և ակնա-
ծութիւն նահանջէ զնոսա աղաղակ
բառնալ ընդդէմ վարժապետիս՝ որ
հրահանգեացն զդոսա. այլ ազատ են
՚ի պարտուց այտի պատկառանաց առ
իս եղբարք նոցա և ծնողք, որք իբրու
բարիոք հարք և առաքինի քաղաքացիք
կարող իսկ են յատեան ելանել և
վրէժ պահանջել ընդդէմ ապականչի
որդւոց իւրեանց, և թոռանց, և եղ-
բարց. համայն դոքին իսկ են որք ձեռն
օգնութեան շնորհեն ինձ, և ակն ու-
նին բարիոք ելից դատաստանի իմոյ:

Դատաստան արարէք՝ որպէս ձեզ
հաճոյ իցէ. ես ոչ ստրջանամ, և ոչ
փոխեմ զձանապարհս իմ. չէ՛ յիմ ձեռն

Թողուլ կամ զանց առնել զսպասաւո-
րութեամբս՝ յոր կարգեաց զիս Աս-
տուած . նա ինքն արկ հոգ խնամոց 'ի
սիրտ իմ՝ հրահանգել զիմ քաղաքա-
կիցս : Յետ հաւատարմութեամբ 'ի
գլուխ հանելոյ իմ զամենայն զգործա-
կալութիւնսն յորս կարգեցայ 'ի զօ-
րավարաց մերոց 'ի Պոտիդէա, յԱմ-
փիպօլիս, 'ի Դելիոս, այժմ եթէ պա-
կուսցէ զիս երկիւղ մահուն լբանել
զայն յոր կարգեաց զիս վերնախնամ
տեսչութիւնն, պատուիրեալ ինձ դե-
զերիլ յուսումն իմաստասիրութեան
'ի մարդել և զայլս, ապաքէն վատու-
թիւն էր գործս, և արժանի յատեանս
կոչելոյ իբրև ամպարիշտ, և տարազիր
յաստուածեղէն հաւատոց. թէ հաս-
տատեալ է ձեր 'ի միտս՝ արձակել
զիս, պատուիրեալ՝ լռիկ կալ յայսմ
հետէ, անշուշտ այս իմ ձեզ պատաս-
խանի : Աթենացիք՝ մեծարեմ զձեզ
և սիրեմ, այլ լաւագոյն է՝ աստուծոյ
հնազանդել՝ քան ձեզ . և ցորչափ շունչ
իմ յիս է՝ մի լռեցից իմաստասիրել և
յորդորել զձեզ, խրատելով զձեզ ըստ
սովորութեանս իմոյ, և ասել առ մի
մի իւրաքանչիւր 'ի ձէնջ . Ո՛վ սիրելիդ
իմ և քաղաքացիդ հրաշալւոյն 'ի քա-
ղաքս համօրէն աշխարհի իմաստու-
թեամբ և քաջութեամբ՝ ո՞չ ամօթ հա-

մարիս հաւաքել մեծութիւն, ստա-
նալ փառս և պատիւ, և զանց առնել
զգանձութիւն զգոնութեան, ճշմարտու-
թեան, իմաստութեան, և ոչ ջանաս
բարեզարդել զհոգիդ ըստ արժանի
վայելութեանն :

Նախատինս համարիք ինձ, և ար-
համարհէք զինն՝ այնու զի ջանացեալ
խրատել զամենայն մարդ առանձինն,
խորշեցայ գալ երևել յերաստս ձեր,
և խորհուրդ տալ վասն հայրենեաց :
Համարեալ ինձ այնպէս էր թէ շատ
իսկ ցուցի զքաջութիւն իմ և զիորձ
ժրութեան և ՚ի պատերազմի՝ յոր ընդ
ձեզ ՚ի զէն վառեցայ, և ՚ի ծերակու-
տի՝ երբ ես մենաւոր զդէմ կալայ զա-
նիրաւ դատաստանին որով դատեցա-
րութք զտասն զօրագլուխսն՝ որոց ոչ էր
թափեալ և հողոյ տուեալ զգիակունս
անկելոցն յարկինոտեան նաւամար-
տութեան. և ՚ի նուազս նուազս կրը-
ճիմն ընդդէմ արկի տարադէպ և անո-
ղորմ հրամանաց երեսնից բռնակա-
լացն : Այլ որ արգելն զիս յանդիման
լինել ՚ի ժողովս ձեր, ո՛ւր թենացիք, քաջն
այն էր ձայնն աստուածեղէն զորմէ խօ-
սեալ եմ ձեզ բազում անգամ, զոր
և յաւակնեցաւ Մելիտոս ծաղու նշա-
ւակել : Այդ հոգի որ ՚ի մանկութենէ
ընդ իս է, ձայն իմն է ազդողական՝

նահանջել զիս 'ի խորհրդոց խնոց, զի
 մի ձեռն մխեցից յիրս ինչ. այս ձայն
 միշտ արգել զիս՝ երբ անձնամատոյց
 լինէի միջամուխ լինել 'ի գործ հասարակաց.
 սակայն յոյժ ճահողակի. քանզի կանուխ ուրեմն կարձէի ես 'ի
 կենաց՝ թէ 'ի գործս անդ պետու թեան
 ինձ բաժին խնդրէի. և ոչինչ գործէի
 յօգտակարացն՝ ոչ ձեզ, և ոչ ինձ: Ա
 ղաչեմ զձեզ՝ մի դժկամակ լինիցիք, թէ
 ոչինչ քողարկեմ 'ի ձէնջ, և բարբա
 ոխմ ազատօրէն և ճշմարտութեամբ:
 Ամենայն որ արու թեամբ քաջու
 թեամբ զդէմ ունիցի համօրէն ժողո
 վրդեանդ ձերում կամ օտարի, և գուն
 'ի վերայ դնիցէ ընդդէմ կալ խափա
 նածոյ օրինաց, և չթողուցու լինել 'ի
 քաղաքիդ եղեուն գործոց, այր այնպի
 սի ոչ կայ ընդ երկար զերծ յաղետից.
 հարկ է զի որոց զպատերազմ արդա
 բութեան մղել յանձն առեալ է, թէ
 և սակաւօրեայ կենաց իցէ խնդիր, մե
 կին վարեսցէ կեանս, և մի ձեռներէց
 լիցի 'ի գործ հասարակաց:

Արդ ո՞ աթենացիք՝ թէ 'ի մօտա
 լուտ վտանգիս որ զիս պաշարեալն է՝
 ոչ յանձին կալայց զօրինակ քաղաքա
 ցեաց բազմաց, որք 'ի դոյզն կասկած
 վտանգի երդմնեցուցանեն և արտա
 սուօք թախանձեն զգատաւորս իւ

րեանց, և 'ի մէջ մատուցանեն զորդիս
 իւրեանց, զծնողս, զբարեկամս. զայդ
 թէ չառնեմ ես, ոչ առ ամբարտաւա-
 նութեան է, կամ արհամարհութեան
 զձեօք, այլ 'ի պատիւ ձեր և քաղա-
 քիդ բովանդակ: Գիտելով դիտասլիք՝
 զի ե՛ն ձեր քաղաքակիցք, որք ոչ իբրև
 ընդ չար ակնարկեն ընդ մահ, և զչա-
 րութեանդ անուն տան անիրաւու-
 թեան և վատութեան: Ես ինքնին
 յաւագոյթ հասակիս՝ և 'ի ճշմարիտ
 կամ 'ի կարծեցեալ փառս իմ՝ մի
 թէ գործ արժանի գործէի՝ եթէ յետ
 վարդապետութեանս իմոյ՝ արհամար-
 հել զմահ, ես գլխովին երկնչէի 'ի մահ-
 ուանէ, և 'ի կատարած կենացս զող-
 ջախոհ իմաստ աւուրց իմոց անցելոց
 եղծանէի:

Ձանց արարեալ զպատուովս, որ
 ընդ աղօտ մնացէ 'ի գործոյ աստի իմ
 մէ, տարադէպ վարկանիմ ես աղեր-
 սել զդատաւորս, և կամ թախանձա-
 նօք արձակուրդ գտանել. այլ համո-
 զել և յաղթահարել փաստից տեղի
 գտցեն 'ի դմին: Ոչ ամբարձաւ դա-
 տաւորն 'ի գահ եղծանել զօրէնս, այլ
 արդարութիւն գործել՝ որում արժան
 իցէ. չէ արժան թէ մեք զձեզ 'ի ստերդ
 մնութիւնս յորդորեսցուք, և մի դուք
 զմեզ. քանզի երկոքին իսկ ընդդէմ

կան արդարութեան և կրօնից, և միանգամայն մեղապարտ գտանիմք:

Մի ակնկալ ջիբ յինէն, աթենացիք, թէ ապաստան լինիցիմ առ ձեզ հնարիւք՝ զորս ոչ արժանի համարիմ, և ոչ շնորհեալ յօրինաց. մանաւանդ ՚ի դատաստանի աստ, յորում իբրև այր ամբարիշտ ամբաստանիմ ՚ի Մելիտոսէ: Չի թէ մաղթանս արկից ձեզ, և բռնադատիցեմ անցանել զերդամամբ ձերով, ՚ի յայտ գայցէ՝ թէ ուսուցանեմ չհաւատալ դից, և ՚ի խնդրելս պաշտպանել և արդարացուցանել զիս՝ զէն ՚ի ձեռս տաց հակառակորդաց իմոց, և ցուցից հակառակ անձին թէ ոչ հաւատամ աստուածոց: Այլ քալ յինէն խորհուրդ այդպիսի. հաստատուն խորհրդով ճշգրտեալ եմ զգոյու թիւն Աստուծոյ առաւել քան զոսոխս իմ, և վասն այնր աներկիւղ ապաստան առնեմ զանձն իմ ձեզ և Աստուծոյ. զի դատեսցիք դատաստան՝ որպէս արժանի վարկանիցիք վասն ձեր, և վասն իմ:

Հրապարակախօս եղև Սոկրատ հաստատուն անդրդուութեամբ. չէին իբրև առն ամբաստանելոյ երևոյթք նորա և շարժութիւնք ՚ի դէմս: Վեհանձն և համարձակաձայն ատենաբանել նորա՝ կարծեցուցանէր զնա՝

տէր դատաւորաց իւրոց : Այլ յերկրորդում ատենին մինչդեռ կամէին դատաւորք քաղել բանս 'ի բերանոյ նորա, նա արիագոյնս ետ պատասխանի՝ թէ արժան դատիմ կերակրել ինձ զմնացեալ աւուրս կենաց իմոց՝ հասարակաց ծախիւք, յապարանս քաղաքին : Այս ամենայն և ևս դառնացոյց զսիրտ երեսնից բռնակալացն՝ որք մահու պարտաւորեցին զնա՝ ըմպել զմոլեխինդն, որ զայնու ժամանակաւ յաճախեսալ պատուհաս էր առ աթեւնացիս :

Անխռով սրտիւ ընկալաւ Սոկրատ զհրաման դատակնքոյն. իսկ Ապողոդոթոս մին յաշակերտաց նորա աղաղակեաց յատենի անդ, անպարտ մեռանի Սոկրատ. նա ասէ. իսկ խնդրէիր թէ ես մեղապարտ մեռանէի. Անիտոն և Մելիտոս սպանանեն զիս, այլ մնասեն ինչ ոչ : Այս աներկիւղ արիութիւն նորա ցանգ ընդ նմա էր՝ մինչև 'ի շունչն յետին :

Արկաւ 'ի բանտ՝ և անադանեաց 'ի նմին զաւուրս երեսուն, առ որ յաճախէին երթևեկք բարեկամաց նորա և աշակերտաց. զի այնուհետև դառնութիւն բանտին փոխեցաւ 'ի լսարան առաքինութեան : Պատճառ յերկարելոյն նորա յարգելանս՝ այս էր :

Օրէնք էին աթենացւոց՝ ամ յամէ
 յղել նաւ մի ՚ի Դելոս կղզի՝ զոհ մա-
 տուցանել զիցն Ապողոնի. և ՚ի պսա-
 կել քրմաց զղեկ նաւուն ՚ի նշանակ
 ուղւոյ լինելոյ, ոչ ևս մարթ էր սպա-
 նանել պարտաւոր զոք, մինչև ՚ի դարձ
 նաւուն: Արդ՝ զի յերկրորդում ա-
 ւուր ճանապարհորդութեանն հա-
 տաւ վճիռ ՚ի վերայ Սոկրատայ, վասն
 որոյ հարկ եղև մնալ դարձի նաւուն
 զաւուրս երեսուն: Ընդ աւուրսն ընդ
 այնոսիկ յայտ յանդիման արձանա-
 ցեալ էր Սոկրատայ աղէտք մահուն,
 որ և անսասան արիութեամբ ցուցա-
 նէր զհաստատութիւն իւր ՚ի շղթայս
 անդ, և յանխուսափ ստուերս մօտա-
 լուտ կատարածի իւրոյ: Ի տխրամած
 յայն արկածս՝ անվրդով հանդարտու-
 թեամբ իւրով սքանչացոյց զամենեսին,
 զուարթ դիմօք խօսէր ընդ բարեկամսն:
 Առ ձեռն պատրաստ էր նմա խուսել
 ՚ի բանտէն, և թափել զանձն ՚ի մահ-
 ուանէ. այլ չէառ յանձն՝ փոխանա-
 կել ընդ վատութեան զկեանս իւր.
 Քանզի ընդ հասանել նաւուն դար-
 ձելոյ ՚ի Դելոսէ՝ Արիդոն ոմն ՚ի սերտ
 բարեկամաց նորա ընթացաւ առ նա՝
 մատուցանել դոյժ և աւետիք զուզա-
 խսուն. ասէ, ՚ի քո ձեռս է ապրեցու-
 ցանել զկեանս քո, զի կաշառաբեկ

բանդապանն զանց առնէ զպահպանութեամբն, և բաց են դրունք բանտիս առ ՚ի փախչել քեղ. զի թէ ոչ այնպէս՝ աստէն առ դուրս հասանէ արբուցումն լեղի բաժակին: Ժպտեցաւ Սոկրատ ընդ բանսն. եհարց ցԱրիտոն. դուցէ՞ տեղի յԱտտիկէ ուր մահ ոչ հացէ մարդոյ: Տառապեցաւ պարտասեցաւ Արիտոն յօժարել զՍոկրատ ՚ի բանս իւր, այլ նա գովեաց զնախանձ նորա, շնորհ կալաւ զբարեսէր խնամոցն. այլ և առ նմին քննել կամեցաւ իմաստասիրաբար. արդեօք, ասէ, արժան իցէ ելանել ՚ի բանտէ առանց կամաց արթնացւոց. կամ թէ յանիրաւի վարեալն ՚ի մահ՝ կարիցէ՞ անպատու հաս ՚ի դերև հանել զդատակնիքն. զանհնարութիւն իրացն ամ ՚ի վերայ, և հրաժարեաց ելանել ՚ի բանտէն. յանձին կալաւ մտադիւր՝ մեծարել զօրէնս հայրենեաց, թէ և տարապարտ մահուամբ:

Ժամանեաց նաւն նուիրական՝ որ առեալ բերէր զկատարած կենաց Սոկրատայ. յաւուրն երկրորդի կանուխ ընդ առաւօտն զեղան հոսեցան բարեկամք նորա առ դուրս բանտին. աղաչեաց զնոսա բանտապետն մնալ վայր մի՝ զի մետասան հրամանատարք ՚իներքս էին ընդ Սոկրատայ՝ որոց գործ

էր հող պատժաւորաց : Ապա մտին 'ի
 բանտն և գտին զՍոկրատ արձակեալ
 'ի շղթայից, ըստ սովորութեանն աթե-
 նացւոց, և յայնմ հետէ համարեալ
 լինէր անհրաժեշտ պատարագ մահու :
 Առ նմա էր և կին նորա Քսանտիպ-
 պա. զմի 'ի մանկանց ունելով 'ի գիրկան.
 որոյ տեսեալ զբարեկամն Սոկրատայ
 որք 'ի ներքս մտանէին, ձայն եբարձ
 արտասուադին՝ զհերան փետէր, և կոծ
 դնէր դառնադէտ. մինչև հնչել որմոց
 բանտին 'ի ձայն ողբոց նորա. Ո՛վ, ա-
 սէ, Սոկրատ, ահա դան բարեկամք
 զյետինն տալ քեզ ողջոյն : Ազաչեաց
 Սոկրատ զկինն, և յղեաց զնա 'ի տուն,
 զի մի խռովեսցի յողբոց նորա. զմնա-
 ցուած աւուրն զբանիւք անկաւ ընդ
 բարեկամացն՝ իմաստասիրելով վասն
 անմահութեան հողւոյ, յաւելան 'ի
 բանտն անդ և խօսք՝ թէ արժան
 իցէ ճշմարիտ իմաստասիրի ցանկալ
 մահու. և յասել ոմանց թէ իշխան է
 մարդ զիւրովին գնալ, զդէմ կալաւ
 նոցա Սոկրատ, 'ի վերայ բերեալ, զի
 մարդ արարած է Աստուծոյ, չմարթի
 զանց առնել զվնձակաւ իւրով յոր
 եղաւ՝ ընդդէմ կամաց արարչին, և
 ոչ կարէ 'ի կենաց իւրոց հրաժարել
 առանց նորայն հրամանաց. վասն որոյ
 անպատասխանի մնայ անձնասպանն .

մինչև ՚ի տեսառնէ փոխադրեսցի յանտի
կեանս յակնկալեալ երջանկութիւնն
որ պատարուն է անմահութեամբ :
Այս զըոյցք էին Սոկրատայ ՚ի յետին
աւուր կենաց իւրոց . զոր արձանա-
ցոյց Պլատոն ՚ի Փեդոն անուանեալ
հրաշալուր տրամախօսութեանն . ուր
ճառ արկեալ վարդապետէ Սոկրատ
առ բարեկամսն զամենայն փաստս ան-
մահութեան հոգւոյ, հերքելով զհակա-
ռակորդացն պատճառաբանութիւն :

՚ի կատարել բանիցն՝ Արիտոն և
այլք որ անդ կային՝ հարցին զկամս նո-
րա վասն կնոջն և որդւոցն և ստա-
ցուածոց, զի խնամ կալեալ այնոցիկ՝
պատուեսցեն զլիշատակ նորա : Նա
ասէ . կանխաւ ուրեմն խրատեալ է
իմ զձեզ զգոյշ կալ ՚ի վերայ անձանց
ձերոց, ոչ այլ իւիք զսոյն կարէք շք
նորհս առնել բարեկամիդ ձերում :
Յաւել հարցանել Արիտոն վասն յու-
ղարկաւորութեան թաղմանն . որպէս՝
ասէ, ձեզ հաճոյ իցէ . զի թէ խնամ
կալ ջիք վասն իմ, ես ոչ մեկնեցայց ՚ի
ձէնջ : Ապա ժպտեալ նայեցաւ ընդ
բարեկամսն և ասէ . Ոչ կարացի խե-
լամտել զԱրիտոն թէ ընդ Սոկրատայ
խօսի . զի համարի դա թէ ես այլ եմ
յայնմանէ որ լինիցիմ յետ սուղ ժա-
մուց . զի կարծէ զիս ընդ մարմնոյս, և

զթաղումնս հարցանէ : Յետ այսորիկ
 եմուտ յայլ սենեակ և լուացաւ , յե-
 լանելն անտի մատուցին առ նա զոր-
 դիսն , ետես և խօսեցաւ ընդ նոսա , և
 յանձն արարեալ զնոսա արձակեաց ՚ի
 տուն : Իբրև արևն ընդ մուտս լինէր
 մատեաւ առ նա նուիրակն մետա-
 սանից հրամանատարացն , ծանուցա-
 նել նմա զսահմանեալ ժամանակն
 ըմպելոյ զլեղին . և առ զթոյն գալա-
 ըել շփուծեալ արտասուացն ՚ի բաց
 մեկնեցաւ : Տեսէք զմարդասիրութիւն
 առնդ , ասէ Սոկրատ . ցորչափ կայի ՚ի
 բանտիս ցանդ սփոփէր զիս , և այժմ
 դառնապէս արտասուէ : Մատուցին
 նմա զմահու բաժակն . եհարց Սոկ-
 րատ . զի՞նչ օրէն է առնել . ետուն պա-
 տասխանի , զգնայցես յետ ըմպելոյդ
 մինչև ՚ի կթոտել ծնդացդ , և ապա
 պարզեսցիս ՚ի մահի՞ծս : Առ ՚ի ձեռին
 զբաժակն անխռով և անալէկոծ , ան-
 քթիթ աչօք նայելով ընդ այրն որ տայր
 ցնա . և ասէ . Չի՞նչ ասես վասն բա-
 ժակիս . արժան իցէ նուէր մատուցա-
 նել աստի : Ետուն պատասխանի ,
 փոքր ինչ և եթ : Ապա ուրեմն արժան
 է , ասէ , աղերսել զերեսս աստուածոց
 յաջողել զելս իմ յերկրէ և զլետին
 իմ զայս ուղևորութիւն . զոր յամե-
 նայն սրտէ մաղթեմ առ ՚ի նոցանէ :

Ասաց, և լռեաց առ վայր մի. և ապա արբ քամեաց զբաժակն սքանչելի աբիուլթեամբ և վեհանձն քաջուլթեամբ, զոր գրիչ պատմագրի՝ ոչ բովանդակէ:

Մինչև ցայն վայր բարեկամք նորա բուռն առնէին անձանց՝ խափանել զաղտասուս, այլ իբրև տեսին զնա արբեալ զթոյնն մահաբեր՝ այնուհետև ոչ ևս ժուժալ կարացին, այլ բովանդակ ՚ի կոծ համակեցան. զՍոկրատ միայն էր տեսանել ՚ի նոսա անխուով և զուարթ. յանդիմանեաց զնոսա քաղցր բանիւք: Չի գործէք աւսէ, ո՞ր է առաքինուլթիւն ձեր. ես ՚ի բաց հանի զկանայս՝ զի մի տեսից զկական նոցա. դուք քան զնոսա՞ մեղկադէտ եղերուք. ապաքէն բաղում անգամ ասացեալ էր իմ ընդ ձեզ, թէ արժան է մարդոյ անդորր ոգևով մեռանել, և յելս իւր ՚ի կենացս օրհնել զաստուած. հանդարտ լերուք, և լռեսցեն արտասուք ձեր: Ճեմ առեալ զգնայր ՚ի բանտին Սոկրատ, և իբրև յոգևոց պարզել ապաստան եղև, անկաւ ՚ի վերայ անկողնոյն. և այն ինչ թոյնն մաշէր զոգիս նորա՝ ծածկեաց զերեսն, զի մի տատանեսցին միտք իւր. յանձն արար Արիտոնի մատուցանել յիւրն կողմանէ Ասկղեպիայ դից զուխտեալ նմա զաքաղաղն. և անդէն

փշեաց զողին : Այսպէս մեռաւ Սոկրատոս հրաշալին 'ի հեթանոսս . յառաջին ամի ձէ ողիմպիադին . 'ի հասակի եօթանասուն ամաց :

Ո՛չ յետ բազում ժամանակաց 'ի վերայ անցանելոյ ստրջացան աթենացիք ընդ անիրաւել իւրեանց . և ապաշաւ կալան յանձինս . ընդ քաղաքն ողջոյն անձկանօք կարդային զանուն Սոկրատայ . հռչակ հարկանէր անուն նորա յԱկադէմիա , 'ի Լիկէոն , 'ի վաճառափողոցս , և 'ի տունս : Աստ , ասէին , հրահանգէր Սոկրատոս զերիտասարդս մեր , ուսուցեալ նոցա սէր առ հայրենիս և առ ծնողս : Անդ հրաշապատում վարդապետէր . իրաւամբք կշտամբէր զմեզ . և յառաքինութիւնս թեակոխել ուսուցանէր . մեք զի՛նչ հատուցուք ընդ այսչափ երախտիս նորա : Ըստ այսմ օրինակի 'ի դառն տխրութիւն համակեցաւ քաղաքն աթենացւոց . փակեցան դպրոցք , և լռեցին գործառնութիւնք հասարակաց : 'ի դատ կոչեցին զդատախազս նորա համար տալ զանմեղ սպանութեան առն արդարոյ . 'ի մահ դատեցաւ Մելիտոս , և այլքն տարագրեցան . նա և ըստ Պուտարքոսի՝ ամենեքեան որք հաղորդ էին 'ի սպանութիւն Սոկրատայ՝ նշաւակ եղեն ատելութեան

քաղաքակցաց իւրեանց, իբրև օրդ-
 ծեալս և անարժանս և արեան արդա-
 ըոյ պարտապանս նախատէին զնոսս :
 Ո՛չ շատ համարեցան պատուհասել
 զոսոխս Սոկրատայ, այլ անդրի պղնձի
 ձուլեցին նմա, և կանգնեցին յերևելի
 տեղւոջ քաղաքին . կառուցին և տա-
 ճար յանուն նորա իբրև անմահի և
 դիւցազին . անուանեալ տաճար Սոկ-
 րատայ :

Պ Ղ Ա Տ Ո Ն

Ճնեալ յառաջին ամի ութսներորդ ութերորդ ողիմպիադին . մեռեալ յառաջնումն հարիւրորդին , 'ի հասակի ութսուն և մի ամաց :

ՊՂԱՏՈՆ , աստուածախօս կոչեցեալ առ վսեմ վարդապետութեանն . էր յականաւոր տոհմէ աթենացոց , ծնեալ յութսուն և ութ ողիմպիադին : Հայր նորա Արիստոն էր յազգէն Կողրոսի թագաւորին Աթենայ . և մայրն Պերիկտիոնէ 'ի ծննդոցն Սողոմնի : Նախկին անուն Պղատոնի Արիստոկղ էր , այլ զի աւարտահասակ էր , թիկնաւէտ , և ճակատ նորա լայն՝ Պղատոն անուանեցաւ . զի Բլաթոս լայնութիւն լի առ Յոյնս . այս անուն մնաց նմա :

Առասպելեն զնմանէ թէ մինչդեռ ստնդիաց յօրոցի էր՝ մեղը սիռեցին մեղուք 'ի շրթունս նորա , որ նախագուշակ ազդեցութիւն համարեցաւ հրաշալի ճարտարախօսութե՛ն նորա , որով նշանաւոր դտաւ 'ի մէջ Յունաց : Յերիտասարդութեանն հետամուտ եղև

բանաստեղծութեան, յօրինեաց եղեր-
 քերգութիւնս, և ողբերգութիւնս եր-
 կու. այլ իբրև հաստատեաց ընդ միտս
 անձնատուր լինել իմաստասիրու-
 թեան, զայն յօրինուածսն ՚ի հուր կի-
 ղեաց: Քսան ամաց էր՝ երբ հայր նո-
 րա մատոյց զնա յաշակերտութիւն
 Սոկրատայ: Եւ յառաջնումն գիշերի
 երազ տեսանէր Սոկրատ, զի թուէր
 նմա ունել ՚ի գիրկան կարապ մի մա-
 տաղ. յորոյ աճել փետրոցն հոլաթե-
 լեալ թռեալ սլացաւ, և ամբարձաւ
 յօղս, քաղցրանուագ երգելով: Ոչինչ
 երկմտեաց իմաստասէրս թէ երազն
 զՊլատոն նշանակէ, և այդ՝ կանուխ
 գուշակութիւն է մեծահոգի համբա-
 լոյն, յոր ամբարձցի աշակերտն իւր:
 Տորչափ կենդանի էր Սոկրատ՝ ցանդ
 առ նմա կայր հաւատարմութեամբ.
 Իսկ յետ մահու նորա աշակերտեցաւ
 Արատիլոսի՝ որ ընդ հետս ընթանայր
 զԵրակլիտեայ. մատեալ և առ Երմո-
 գենէս՝ որ Պարմենիդեայ հետևողն էր:
 Ի հասակի քսան և ութ ամաց զնաց
 ՚ի Մեգարա՝ ուսանել առ ոտս Եւկ-
 ղիդէսի ընդ այլոց աշակերտաց Սոկ-
 րատայ. անտի զնացեալ ՚ի Աիւրէնէ՝
 անդէն ուսաւ զչափաբերութիւն: Յետ
 այնորիկ անց յիտալիա՝ աշակերտիլ
 երից քաջանուն պիւթագորեանց այնր

ժամանակի, որք էին Փիլոլայոս, Արքիտաս տարենտացի, և Եւրիտոս: Ոչ շատ համարեալ զսոցա ուսումն, դնաց և յԵդիպոս, աշակերտել առ դիտունս և առ քուրմն երկրին. կամէր գնալ մինչև 'ի հնդիկս, և ուսանել 'ի մոգուց նոցա, [թէ ոչ խափան լինէր նմա հրդեհ պատերազմին որ յայնժամ բորբոքեալ վառեալ էր յԱսիա:

Յետ այսչափ ուղեգնացութեանցն դարձ արարեալ յԱթէնս բնակութիւն կալաւ 'ի [թաղ մի քաղաքին՝ անուանեալ Ակադեմիա 'ի դիձին վայրի՝ զոր ընտրեաց կամակար յօժարութեամբ իբրև 'ի կարևոր դարման տարապայման գիրութեան իւրոյ և առողջութեան: Յուցան 'ի նմա արդիւնք իրացն, քանզի անդէն 'ի սկրզբանն հարաւ 'ի նա տենդ քառօրեայ, որ ձգեցաւ ընդ ամ մի և կէս, այլ ջանացեալ նորա 'ի ժուժկալութիւն և 'ի զգուշութիւն՝ յաղթեաց ջերմանն, և յայնմ հետէ սերտագոյն հաստատեցաւ յառողջութեանն:

Երիցս դնաց 'ի պատերազմ. առաջին 'ի Տանագրա. երկրորդ 'ի Կորընթոս, և երրորդ 'ի Գեղոս՝ յորում 'ի յաղթականաց կողմն էր: Գնաց և 'ի Սիկիլիա երիցս անգամ, յառաջնում նուազին յորդորեցաւ 'ի դոյն յըղձա-

նաց հետադարձութեան, ինքնին ահա
 նատես լինել հրաբուղի լերինն Եւո-
 նայ: Էր յայնժամ ՚ի հասակի ամաց
 քառասնից. զնաց յարքունիս Դիո-
 նեսիոսի երիցու բռնակալի, որոյ ցան-
 կացեալ էր տեսանել զնա. այլ աներ-
 կիւղ համարձակութիւնն՝ որով ար-
 համարհ եցոյց զբռնակալութիւնն՝
 անշուշտ կարճէր ՚ի նմանէ զկեանսն,
 թէ ոչ բարեխօս լինէին վասն նորա
 Դիոն և Արիստոմենէս. սակայն ՚ի
 վերայ այնր ամենայնի ետ զնա բռնա-
 ւորն ցՊոլիդէս՝ որ ՚ի հրեշտակութիւն
 եկեալ էր առ նա ՚ի Լակեդեմոնէ,
 վաճառել իբրև զգերի: Տարաւ Պոլի-
 դէս զՊղատոն յԵգինա կղզի, և անդ
 վաճառեաց: Օրէնք էին առ եգինա-
 ցիս՝ որ մահու պարտապան առնէր
 զամենայն այր աթենացի՝ որ հասցէ ՚ի
 կղզի նոցա. արդ ընդ պատրուակաւ
 օրինացս Կարմանդր ոմն ամբաստան
 եղև զնմանէ իբրև զմահապարտ առ-
 նէ. այլ ոմանց ՚ի վերայ բերեալ ճար-
 տարութեամբ, թէ ՚ի վերայ մարդկան
 է հրամանդ, և ոչ ՚ի վերայ իմաստա-
 սիրաց, շատ դատեալ եղև զանազա-
 նութիւնն, և ՚ի վաճառ արկին զնա:
 Անդ յաջողեաց բազդ նորա. զի զնեաց
 զնա քսան մնասու Անիկերիս կիւրե-
 նացի՝ որ յայնժամ անդ էր, և դար-

ճոյց զնա յԱթէնս առ բարեկամս իւր։
 Իսկ Պօլիդէս լակեղեմոնացի որ վա-
 ճառեացն զնա՝ վանեցաւ ՚ի Քաբրիա-
 սայ, և ծովայեղց կորեաւ ՚ի պատու-
 հաս ամենայնի զոր հասոյցն Պղատոնի
 իմաստասիրի, որպէս կարծի՝ յայտ-
 նեալ զայն նմա այսոյն։ Լուեալ Դիո-
 նեսիոսի երիցու զգարձ նորա յԱ-
 թէնս, խիթացեալ զի մի վրէժ խնդրեսցէ
 ՚ի նմանէ՝ համբաւ վատ հռչակելով ՚ի
 վերայ նորա, նամակ արար նմա՝ թո-
 ղութիւն խնդրել ՚ի նմանէ. պատաս-
 խանի ետ նմա Պղատոն թէ չիք նը-
 մա տեղի երկիւղի. քանզի իմաստասի-
 րութիւն, ասէ, գրաւեալ ունի զիս և
 ոչ պարապեմ հոգալ վասն իրացդ։ Իսկ
 իբրև ոմանք ՚ի թշնամեաց բանս ՚ի մէջ
 արկանէին նմա թէ լբաւ թողաւ ՚ի
 Դիոնեսիոսէ բռնակալէ. ասէ, ոչ թէ
 Դիոնեսիոս անտես արար զՊղատոն,
 այլ ինքնին Պղատոն արհամարհեաց
 զԴիոնեսիոս։

Իարձեալ երկրորդ անգամ զնաց
 ՚ի Սիկիլիա յաւուրս Դիոնեսիոսի փո-
 քու՝ ակն ունելով համոզել զբռնա-
 կալն՝ ազատութիւն շնորհել քաղա-
 քակցաց իւրոց, կամ գէթ զթով
 քաղցրութեան խնամ ունել նոցա.
 այլ յետ դեզերելոյ անդէն զամիսս իւ-

բու շորս, տեսեալ զի ոչ միայն խնուն
 լսելիք Դիոնիսեայ լսել բանից իւրոց,
 այլ և յաւել տարագրել զԴիոն, և
 յառաջ վարէր զգործ բռնաւորու-
 թեանն օրինօք հօր իւրոյ, դարձ արար
 յԱթէնս. թէպէտ և բազումս թա-
 խանձէր զնա Դիոնեսիոս մնալ առ
 իւր: Իսկ երբորդ անդամ զնաց ՚ի Սի-
 կիլիա՝ մաղթել ՚ի բռնակալէն՝ զյե-
 տադարձ Դիոնի, և յօժարել զնա՝
 հրաժարել ՚ի բռնակալ իշխանու-
 թենէն. այլ զի Դիոնեսիոս խոստումն
 տուեալ նմա, կասէր յարդեանցն,
 կշտամբեաց զնա Պղատոն վասն հա-
 ւատադրժութեանն. և այնչափ յու-
 զեաց զցասումն նորա, զի փոքր մի ևս
 մահուն իւրով վճարէր զգործն, թէ
 ոչ Արքիտաս տարենտացի աղաչաւորս
 առաքեալ նաւու հանդերձ՝ խնդրէր
 զնա ՚ի բռնաւորէն: Ո՛չ միայն զիջաւ
 Դիոնեսիոս յաղաչանս Արքիտասայ,
 և շնորհեաց զնալ Պղատոնի, այլ և
 ետ պատրաստել ՚ի նաւուն զպաշար
 ճանապարհին: Յայնժամ դարձ արար
 Պղատոն յԱթէնս եղեալ ՚ի մտի՝ չե-
 լանել անտի բնաւ: Ընկալան զնա ա-
 թենացիք մեծապատիւ շքով, և թա-
 խանձանօք աղաչէին զնա ՚ի գործակա-
 լու թիւնս հասարակաց. այլ նա բացէ
 ՚ի բաց հրաժարեցաւ, անդարման հա-

մարելով զիրան վասն տարադէպ զօրացելոց անկարգութեանց : Այլ ոչինչ է հաւաստի նշանակ մեծի պատուոյ նորա առ Յոյնս քան զոր դիպաւ յողիմպիական խաղս : Ընկալեալ եղև անդ իբրև աստուած ոմն իջեալ յերկնից . և իւրաքանչիւր ժողովուրդ ելլադայ ցանկասէրք տեսարանաց ձգեալք անդր 'ի զնին ողիմպիական խաղուցն, զանց արարին զկառամարտկօքն՝ և ըմբշամարտկօքն՝ զի միայն դէտակն ունիցին յայրն յայն հոյակապ, զորոյ զբազում սքանչելիսն լուեալ էր նոցա :

Ոչ ամուսնացաւ Պղատոն, յամենայնի զգուշացեալ խնամով ժուժկալութեան և պարկեշտութեան : Նա և այնչափ զգաստ էր յերիտասարդութեանն անգամ, զի ոչ որ տեսանէր զնա 'ի ծաղրլուծեալ անչափութեամբ . և գիտաց բռնանալ 'ի վերայ կրիցն՝ որպէս զի ոչ 'ի բարկութեան տեսանել ումեք զնա : Աւանդեն առ այս և զայն, թէ երիտասարդ ոմն աշակերտեալ նմա, իբրև դառնայր 'ի հայրենի տուն իւր, տեսեալ յաւուր միում զհայրն բրդեալ 'ի ցասումն, յապուշ հարաւ մեծապէս, և 'ի վերայ եբեր, թէ իմ չիք տեսեալ զայդ առ Պղատոնի : Առ մի նուագ և եթ դիպաւ նմա զայ-

րանալ 'ի վերայ միոյն 'ի ստրկաց իւրոց , որոյ յանցուցեալ էր ծանրագոյն . ետ պատուհասել զնա այլոյ ուրումն . զի այժմ , ասէ , գրգռեալ եմ ցասմամբ , չկարեմ ես ինքնին խրատել զդա : Ձի թէպէտ և բնաւորապէս ծանր էր և խորհեցող , ըստ որում աւանդէ Արիստոտէլ , սակայն քաղցր էր և զուարթուն , և սիրելի էին նմանն վնաս կատակք . խորհուրդ տայր երբեմն Քսենոկրատայ և Դիոնի , որոց դժնեայ թուէր նմա հանգամանք բարուց , նուիրել պատարագս Շնորհք անուանեալ աստուածուհեաց , զի զուարթաբարոյ լինիցին :

Բազում եղեն նորա աշակերտք . յորս նշանաւոր դտան Սպեւսիպպոս որդի քեռն իւրոյ Պոտոնայ և Եւրիմեդոնի . Քսենոկրատէս քաղկեդոնացի , և հռչակեալն Արիստոտէլ : Աւանդի թէ և Թէոփրաստոս էր 'ի թուոյ աշակերտաց նորա , և Դիմոսթենէս անգամ համարեցաւ զնա վարդապետ իւր . վասն զի ապաստան եղեալ երբեմն 'ի տեղի ուրեք ապրեցուցանել զանձն 'ի ձեռաց Անտիպատրոսի , և այն ինչ հասեալ առ նա Արքիաս 'ի դիմաց նորին իսկ Անտիպատրի զի կալցէ զնա , ապրեցուցանել խոստանայր , որպէս զի 'ի դուրս ելցէ յապաստանէն . Քաւ ,

ասէ, թէ յետ լսելոյ 'ի Քսենոկրատայ և 'ի Պղատոնէ յաղագս անմահութեան հոգւոյ, զեր 'ի վեր դասեցից զամօթալից կեանս քան զմահ արութեամբ քաջութեան: Յիշատակին և երկու կանայք 'ի թուոյ աշակերտաց Պղատոնի. առաջինն Լասթենիա մանտինէացի. երկրորդն Աքսիսթէա փիլասիացի, որոց սովորութիւն էր առնացի զգենուլ, իբրու պատշաճագոյնս իմաստասիրութեան յոր պարապէին: Սիրէր յոյժ զերկրաչափութիւն. և այնչափ կարևոր դատէր զայն իմաստասիրի, մինչև արձանագրել 'ի գաւիթ իւրումն Ակադեմիայ. Աներկրաչափ ոք մի ներսամտեսցէ:

Ամենայն մատենագրութիւնք Պղատոնի՝ բաց 'ի թղթոցն յորոց երկոտասան և եթ կան, տրամախօսութեամբ յօրինեալ են: Յերիս ազգս մարթիսք բաժանել զայսոսիկ տրամախօսութիւնս: Յառաջինն հերքէ զսփեստէսսն կամ զիմաստակս. յերկրորդն ջանայ 'ի հրահանգս պատանեաց. և յերրորդն՝ որոց անկ են հասունացելոց: Ունիմք դարձեալ զանազանել զգոսին այսպէս. քանզի զոր ինչ բան վարդապետութեան աւանդէ Պղատոն 'ի թուղթսն, 'ի դիրս օրինաց, և յԵ-

պին ումի տրամախօսութեանն՝ ինքնօրէն վարդապետութիւնք են նորա. իսկ զոր ինչ ասէ յայլ տրամախօսութիւնսն ընդ այլ և այլ անուամբ՝ Սոկրատայ, Տիմէի, Պարմենիդեայ կամ Չենոնի, իբրև հաւանականս աւանդէ, առանց ճշմարտութեանն երաշխաւորելոյ: Սակայն զոր ինչ բան ՚ի բերան դնէ Սոկրատայ ՚ի տրամախօսութիւնսն, թէպէտ յարմարեաց ըստ ոճոյն և ըստ կարգի զըուցաց այնր իմաստասիրի, ոչ է հարկ հաւատալ թէ այն ամենայն յատուկ ըստ սոկրատեան մտաց գրեալք իցեն, քանզի ընթերցեալ Սոկրատայ զտրամախօսութիւնն աւանուանեալ՝ Լիւսիս կամ յաղազս բարեկամութեան, զոր Պլատոնի էր յօրինեալ մինչդեռ կենդանին էր Սոկրատ, վկայեաց ընդ ստութիւնն, և ասէ. Անմահ աստուածք, զինչ ինչ տայ ինձ խօսել այդ երիտասարդ, զոր իմ չիք խորհեալ բնաւ:

Ոճ բանից Պլատոնի՝ ըստ վկայելոյ աշակերտի նորա Արիստոտելի՝ զմիջոցն ունէր զվսեմութեան քերթողականին, և զպարզութեան արձակ շարադրածոյ: Աիկերոնի սքանչացեալ ընդ ազնուութիւնն՝ ոչինչ երկմտեաց ասել՝ զի թէ յօժարէր Արամազդ խօսել ՚ի լեզու մարդկան՝ ոչ այլազգ ինչ

բարբառէր քան զՊղատոն: Պանտիոս
 փիլիսոփայ կոչէր զնա Հոմերոս իմաս-
 տասիրաց. ՚ի գոյն միտս եղև յետոյ և
 և Աուինտիլիանոս. որ ՚ի գրելն վասն
 պերճախօսութեան նորա՝ անուանէ
 դիւցական և հոմերական:

Հանգամանք վարդապետութեան
 նորա զուգախառն են ՚ի կարծեաց երկց
 իմաստասիրաց. զակատեալ տեսանի
 ՚ի Հերակղիտոս ՚ի բնաբանութեան
 կարգի, և յիրս որք անկանին ընդ ըզ-
 դայութեամբք. միտեցաւ ՚ի Պիւ-
 թագորաս ՚ի բնաղանցութեան, և
 յորս ոչ անկանին ընդ զգայութեամբք.
 իսկ ՚ի քաղաքականս և ՚ի բարոյականն՝
 գեր ՚ի վեր դասեաց քան զամենեսին
 զՍոկրատ, և ամենայնիւ յարեցաւ ՚ի
 նորայն վարդապետութիւն:

Ըստ աւանդելոյ Պլուտարքոսի յա-
 ռաջին գիրս որ յաղագս կարծեաց ի-
 մաստասիրաց երիս սկզբունս զնէր
 Պղատոն. զԱԺ, զնիւթ և զգաղա-
 փար: ԱԺ՝ իբրու ընդհանուր գոյա-
 ցութիւն: Նիւթ՝ իբրու առաջին սա-
 տար ծննդեան և ապականութեան:
 Գաղափար՝ իբրու աննիւթական
 գոյացութիւն հանգուցեալ յիմացու-
 թեանն ԱԿ: Սրտի մտօք ընդունէր
 թէ աշխարհս արարած է ԱԿ ստեղ-
 ծողի. այլ ստեղծմամբ ոչ իմանայր

ստեղծութիւն յատկապէս. վասն զի համարէր նա՝ թէ կազմեալ և կերտեալ է Այ զաշխարհս, զի այսպէս ասասցուք, 'ի նախեղակ նիւթոյ որ կայր 'ի յաւիտենից. որպէս զի ըստ նորա արարիչն Աժ ոչ արար զաշխարհս լուծանելով զանդունդս և կազմելով յանկերպարան նիւթոյ, այլ իբրու ճարտարապետ և որմագիր, որք կտրելով և դասաւորելով դբարինս յառաջնանկոփս, շարադրեալ կանգնեն զշինուածն:

Հաստատութեամբ հաւատացեալ է՝ թէ Պղատոն խելամուտ էր ճշմարտին Այ եթէ լուսաւոր քննութեամբ մտաց իւրոց, և եթէ յորոց քաղեացն յեբրայական գրոց. սակայն 'ի նոցուն սակի համարեալ է որք ըստ բանից Պօղոսի առաքելոյ՝ ծանեան զնձ, և ոչ իբր զնձ փառաւորեցին, այլ նանրացան 'ի խորհուրդս իւրեանց:

Եւ արդարև յԵպինոմի տրամախոսութեանն՝ երբեակ ազգս աստուածոց դոլ համարեցաւ. վերնագոյնս, ստորնագոյնս և միջականս: Ա երնագոյնքն ըստ նորա՝ բնակին յերկինս, և այնչափ առաւել վերնագոյն են քան ըլմարդիկ գերազանցութեամբ բնութեան, և տեղեացն բնակութեամբ, մինչև զի չկարեն մարդիկ՝ ինքնին հա-

զորդել ընդ նոսա, այլ 'ի ձեռն միջա-
 կան աստուածոց՝ որք յօղս բնակեն,
 զոր այսս կոչէր: Սոքա իբրև պաշտօ-
 նեայք են դիցն երկնայնոց, զի սոցա է
 ծանուցանել մարդկան զպատուէրս
 դից. և տանին յերկինս զնուէրս և զա-
 ղօթս մարդկան: Սոքին դարձեալ
 խնամ ունին աշխարհի յիւրաքանչիւր
 հասեալ բաժնի նոցա. վերակացուք
 են պատգամախօսութեանց և գուշա-
 կութեանց, և նոցա է գործել զսքան-
 ջելիսն և զհրաշս որ լինին: Օրէն է
 կարծել թէ յորոց 'ի սբ. գիրս զհրեշ-
 տակաց ճառին՝ անտի ընդ միտս ան-
 կաւ հնարել Պղատոնի զայս երկրորդ
 կարգ աստուածոց: Դնէ և երրորդ
 դաս աստուածոց ստորին քան զեր-
 կրորդսն, զորս 'ի գետս բնակեցուցա-
 նէ, շատ համարելով կիսաստուածս
 դնել զնոսա. և իշխանութիւն 'ի ձեռս
 տայ նոցա 'ի վերայ երազոց և այլոց
 սքանչելեաց, ըստ օրինակի միջակայ-
 նոցն: Համարի առ այսօրիւք թէ ա-
 մենայն տարերք և ամենայն մասունք
 տիեզերաց լցեալ են բազմութեամբ
 կիսաստուածոց, որք՝ ըստ նորա՝ երևին
 երբեմն, և ապա անհետանան յաչաց
 մերոց: Աւասիկ 'ի սոցուն վերայ հի-
 մնեալ են մտացածին վէպք այսոց
 օղոյ, և ջրայոյղ, և գետնաբնակ

օգուց խորհրդաբան ծածկադիտու-
թեան :

Դարձեալ ուսուցանէր Պղատոն
զհոգեփոխութիւն, զոր ուսեալն էր 'ի
Պիւթագորայ, և յարմարեալ ըստ իւ-
րոց կարգի բանիցն, որպէս է տեսա-
նել 'ի տրամախօսութիւնս նորա մա-
կանուանեալս Փետրոս, Փետոն, Տի-
մէոս, և յայլն : Թէպէտ և յօրի-
նեաց Պղատոն սքանչելարուեստ իմն
տրամախօսութիւն յաղագս անմահու-
թեան հոգւոյ, սակայն սխալեաց 'ի
դմին ծանունս, և 'ի բանսն յաղագս
հոգեղէն գոյացութեանն զոր համա-
րէր ևս շարադրեալ յերկուց մասանց
'ի հոգւոյ և 'ի մարմնոյ . ևս և 'ի բան
սկզբնաւորութեան հոգւոց, համարե-
լով թէ հոգիք կային յառաջ քան
զմարմինս. և թէ՛ իջեալք յերկնէ վասն
հոգևորելոյ հետզհետէ զանազան մար-
մինս, կրկին անգամ դառնան յերկինս՝
յետ սրբելոյ : Աացեալ նոցա անդ ամս
ինչ՝ հրաման լինի նոցա՝ իջանել և
հոգևորել դարձեալ զայլ մարմինս,
որպէս զի անընդհատ գոլ շրջանակի
շաղաշարութեանցն և մաքրութեանց,
դարձուածոյ յերկինս, և իջանելոյ
յերկիր 'ի մարմինս զորս հոգևորեն :
Եւ քանզի համարէր նա թէ այդ հո-
գիք բնաւ ոչ մտանան զորս ուսեալն

էին 'ի մտանել նոցա յայլ և այլ մարմինս, ըստ նմին 'ի վերայ բերէր՝ թէ զոր ինչ ուսանին դոքին՝ շէն նորք, այլ յիշատակութիւնք որոց յառաջն գիտէին. և 'ի վերայ այսր յիշատակութեան հիմնէր և զվարդապետութիւնն որ յաղագս նախագոյակ ստեղծման հոգւոց :

Այլ զի մի ընդարձակեսցին բանք մեր յաղագս կարծեաց այսր իմաստասիրի, որ ընդ աղօտ և եթ աւանդեաց, շատ լիցի ասել թէ վարդապետութիւն նորա 'ի բազում գլուխս նոր և սքանչելի իմն երևեցաւ, մինչև անդէն յաւուրս նորա դիւցական անուն կարդալ նմա, և յետ մահուն աստուածոմն համարել զնա :

Մեռաւ յառաջնում ամի ճշ ողիմպիադին, 'ի հասակի ութսուն և մի ամաց, յօր ծննդեան իւրոյ :

ԱՆՏԻՍԹԵՆԷՍ

Աշակերտ Սոկրատայ, ժամանակակից
Պղատոնի, և այլոց աշակերտաց Սոկ-
րատայ :

ՅԵՏ մահուն Սոկրատայ կացու-
ցին աշակերտք նորա ուսմունս պէս,
պէսս որք անուանեցան Աիւնիկեան,
Ակադեմեան և Աիւրենական : Ան-
տիսթենէս՝ առաջնորդ եղև կիւնի-
կեանց : Բազում ինչ աւանդի վասն
կոչելոյ դոցա յայդ կիւնիկեան անուն
որ Շնական թարգմանի. ոմանք թարգ-
մանեն զի շնաբար կենօք կէին նորա. և
այլք՝ թէ ուր ուսուցանէրն Անտիսթե-
նէս՝ դոյզն ինչ ՚ի բացեայ էր ՚ի դրա-
նէն Աթենայ՝ անուանեալ Գենոսար-
դէս որ թարգմանի Շուն սպիտակ :

Որդի էր իմաստասէրս հօր աթենաց-
ւոյ, որ յիւր անուն կոչեաց և զորդին
Անտիսթենէս, և մօր ստրկի : Յորժամ
որ ընդ երեսս նախատէր զնա թէ մայր
նորա փոխւգացի է, և զի՞նչ այտի, ա-
սէր, ոչ ապաքէն ՚ի գաւառէ անտի
էր և Աիւրելէ դիցամայր : Աշակերտե-

ցաւ զառաջինն Գորգիայ ատենախօսի, յետ այնորիկ ինքնին առանձին ուսոյց առ ժամանակ մի, և զի պերճախօս էր՝ խուռն ընթանային բազումք ՚ի տեղեաց տեղեաց՝ լսել նմա: Այլ հռչակ անուանն Սոկրատայ փափաքումն արկ ՚ի սիրտ նորա, և զնացեալ ունկն զնել վարդապետութեանն հրաշալւոյն յիմաստասէրս, այնպէս իմն յափշտակեցաւ ՚ի սէր նորա, զի դարձարարեալ անտի՛ էառ զամենայն աշակերտս իւր զնալ առ Սոկրատ, և աղաչեաց զնոսա զնալ ընդ իւր ՚ի լսարան Սոկրատայ. եղեալ ՚ի մտի ոչ ևս այլ յայնմ՝ հետէ ունել աշակերտս: Բնակէր նա ՚ի Պիրէոն նաւահանգստի քաղաքին, և աւուր աւուր ընթանայր զճանապարհ ասպարիղաց քառասնից՝ զուարճանալ ՚ի տեսութիւն և յունկնդրութիւն Սոկրատայ:

Բնաւորութիւն Անտիսթենեայ խիստ էր, և հանգամանք կենացն ժուժկալ: Աղաչէր զգիս՝ արկանել ՚ի վերայ իւր՝ յաւէտ յիմարութիւն, քան հեշտութիւն ՚ի զգալիս: Խստութեամբ վարէր առ աշակերտս իւր, և թէ հարցանէր զնա ոք զպատճառն, տայր պատասխանի, ոչ զնոյն առնեն և բժիշկք առ հիւանդս:

Նա ինքն սկիզբն կալաւ ազանել

կրկին վերարկու լայն , և ունել մա-
խաղ և դաւազան , որք յետոյ սահմա-
նեցան իբրև յատուկ կարասիք կիւ-
նիկեանց , և այն միայն էր հարստու-
թիւնն ում ցանկային , և նովին իբր
թէ մրցէին նա և ընդդէմ Դիոսի :
Թողոյր զմօրուսն աճել՝ անյարդար ա-
մենեին , որպէս և 'ի զգեստսն ան-
խնամ էր և անհոգ :

'Ի գիտութեանց մասին՝ յարեալ էր
'ի բարոյականն և եթ , իսկ այլ ամենայն
գիտութիւնք ասէր՝ չունին ինչ օգուտ
բնաւին . որպէս և զծայրագոյն բարին
եղեալ ունէր յառաքինութիւնս , և
յարհամարհանս պերճութեան :

Ամենայն կիւնիկեանք առ հասա-
րակ հրաժարեալ կային 'ի պաճուճա-
նաց . սովորական կերակուր էր նոցա
միրգք և ունդք , և ջուր միայն էր ըմպե-
լի նոցա , և ոչինչ դժուարէին գետ-
նախշտի լինել : Ասէին՝ աստուածոց
միայն է չունել ինչ պէտս . և որոց 'ի
մարդկանէ նուազ իցեն պիտոյք՝ նոքին
առաւել քան զայլ մարդիկ մերձաւորք
են աստուածութեան : Ամենեքին նո-
քա պանծային յանձինս՝ յարհամար-
հանս ունել զմեծութիւն . զազնուա-
կանութիւն , և զամենայն օգուտ ըղ-
բնութեան և զբաղդի : Սակայն անա-
ռակ էին նոքա , և յոչինչ իրաց ոչ ա-

մաչէին և ոչ իսկ յիրաց դարշութեան .
 ոչինչ խտրէին զպատշաճն , և ոչ յու-
 մեքէ ակնածէին :

Քաջուշիմ էր Անտիսթենէս , և
 քաղցր յընկերութեան . զի զակումք
 բազմականին ողջոյն կապէր 'ի բանս
 բերանոյ իւրոյ : Աւհագոյն ցուցաւ 'ի
 զինուորական նահատակութեան 'ի
 տունագրեան պատերազմին . ընդ որ
 յաւէտ իմն խնդամտեալ Սոկրատայ ,
 յորժամ դէպ եղև երբեմն ասել ումեք
 արհամարհելով թէ մայրն Անտիսթե-
 նի փոխւգացի է , ետ պատասխանի . և
 զիարդ հաւատայցես ծնանել այդպի-
 սում հոյակապ առն յամուսնութենէ
 ամենացի առն ընդ կնոջ ամենացւոյ :
 Թէպէտ և յետոյ ձեռն արկ կշտամ-
 բել զԱնտիսթենէս վասն մեծամիտ
 ամբարտաւանութեան նորա : Ետես
 զնա երբեմն պարզել զվերարկուն՝ առ
 'ի ցուցանել զպատառուած նորա . ո՞վ
 Անտիսթենէս՝ ձայնեաց Սոկրատ , տե-
 սանեմ ես զամբարհաւածութիւնդ
 ընդ ծակս վերարկուիդ քոյ :

'ի լսել Անտիսթենէսայ զմեծաբանել
 ամենացւոց թէ անդատին բնիկք են
 'ի գաւառէ իւրեանց , ասէր ցնոսա
 ընդ ծաղր . նա և կրիայք և խխունջք
 ցանդ բնակեն 'ի տեղւոջն յորում ծնա-
 նին : Ասէր Անտիսթենէս . ուսումն

կարևոր քան զամենայն՝ այս է, մեր կանալ զուսմունս չարեաց: Այր ոմն մատուցեալ ցնա զորդի իւր յաշակերտութիւն, ասէ, որոյ իրաց այժմ կարօտի որդի իմ. ետ պատասխանի Անտիսթենէս. նոր գրոց, նոր դրչի, և նոր պնակտի. ցուցանել կամեցեալ սովին՝ թէ ոգւոյ որդւոյ նորա պարտ է լինել կակուղ իբրև զմով որ չիցէ տակաւին ընկալեալ դրոշմ: Հարցաւ երբեմն. զի՞նչ առաւել ցանկալի յաշխարհի. ասէ, երջանիկ մահ: Թշնամի էր ընդ յաշաղկոտս՝ որք հանապազօր անձամբ զանձինս կրծեն և մաշեն՝ որպէս երկաթ մաշի ՚ի ժանգոյ՝ զոր ինքն ծնանի: Համարէր զի թէ բռնադատեսցի ոք յընտրութիւն, լաւ իցէ ազոաւ լինել՝ քան մախացող. վասն զի ազոաւք միայն զդիակունս ուտեն զմեռելոց. իսկ նախանձօտք զկենդանիս գէշագէշ պատառեն: Յասել ուրուք ցնա թէ պատերազմն բառնայ յաշխարհէ զբազում տառապեալս. այո՛, ասէ. սակայն և զբազումս տառապեցուցանէ:

Աղաչէր ոմն զնա՝ տալ դաղափար իմն զաստուածութեան, ետ պատասխանի, չիք ինչ յէակաց նման նմա. վասն որոյ անմտութիւն է խնդրելն իմանալ զնա զղալի օրինակօք: Խրատէր՝ պատիւ

դնել թշնամեաց, զի նորա զառաջինն
 քննեն զմեր թերութիւնս, և նշաւա-
 կեն բազմաց. որք և յաւէտ օգտակա-
 րագոյնք են մեզ քան զբարեկամս մեր,
 զի պատճառս տան ուղղութեան ան-
 ձանց մերոց: Ասէր. պարտ է մեծ հա-
 մարել զբարեկամ զգօն, քան զազգա-
 կան մերձաւոր. քանզի լծորդութիւն
 առաքինութեան ազդողագոյն է քան
 զարեանն: Լաւ է անսալ փոքր թուոյ
 իմաստնոց՝ ընդդէմ անմտաց բազմու-
 թեան, քան միանալ ընդ բազմութիւն
 յիմարաց ընդդէմ սակաւուց իմաստ-
 նոց: Իմացեալ նորա երբեմն թէ արք
 ոմանք վատք ՚ի դնացս վարուց՝ ներբո-
 ղեն զնա, Ո՛վ աստուածք մարդա-
 սէրք, ասէ, զի՞նչ դործեցի ես չարիս:
 Իմաստունն, ասէ, չէ պարտապան
 կեալ ըստ պատուիրանի օրինաց, այլ
 ըստ կանոնացն առաքինութեան: Յա-
 ղագս այնորիկ՝ իմաստնոյ է գլխովին՝
 ոչ նոր ինչ հանդիպել նմա, և ոչ
 դժուարահաճ, քանզի պարտ իսկ է
 նմա կանուխ տեսանել զամենայն որոց
 մարթ է պատահել, և կազմ կալ առ
 ամենայն դիպուածս: Ազնուականու-
 թիւն և իմաստութիւն ասէր՝ մի և
 նոյն են. յաղագս այնորիկ ոչ այլ ոք
 աղնուական՝ բայց որ իմաստուն իցէ:
 Զգօնութիւն՝ պարիսպ է ամրակուռ՝

որ ոչ կործանի և ոչ անկանի: Հնարա-
դիտութիւն անմահութեան՝ անարա-
տութիւն կենաց . և վասն գոհու-
թեամբ կալոյ յաշխարհի՝ սոկրատեանն
պահանջի արիութիւն: Եհարց զնա
ոմն վասն հանգամանաց կնոջ, զի խըն-
դրէր կին առնուլ . ետ պատասխանի .
եթէ զտգեղն առնուցուս ոչ անագան
ատելի լիցի . թէ զգեղեցիկն՝ հասա-
րակաց լիցի: Տեսեալ շնացեալ զոմն
որ փախչէր, եղո՛ւկ քեզ՝ ասէ, ՚ի քանի՛
վտանգից ազատ մնայիր միով խերեւէ-
շիւ: Խրատ տայր աշակերտաց իւրոց՝
հանդերձել մթերս՝ որք նաւաբեկու-
թեամբ ոչ կորնչիցին: Թշնամւոյ իւ-
րում մաղթէր զամենայն բարօրու-
թիւն՝ բաց յիմաստութենէ: Թէ որ
բանս ՚ի մէջ բերէր նմա յաղազս հեշ-
տալից կենաց, աղաղակէր . դիք ար-
դարք՝ այդ մեզ մի լիցի, այլ որդւոց
թշնամեաց մերոց: Տեսեալ կին՝ շքեղ
հանդերձիւք զարդարեալ՝ գնայր վաղ-
վաղակի ՚ի տուն նորա, և աղաչէր
զայր կնոջն՝ ցուցանել նմա զդէնս իւր
և զերիվար . թէ զբովանդակն բարե-
կարգեալս տեսանէր՝ թոյլ տայր կնոջն
առնել զոր ինչ և կամեսցի, քանզի
այր նորա ձեռնհաս է պաշտպանել
նմա . իսկ եթէ անյարդար գտանէր
զկազմութիւնն, խորհուրդ տայր կնոջն՝

ի բաց մերկանալ ՚ի զարդուց անտի ,
 զի մի յաւար մատնեսցի առն որ զա-
 ուաջինն յարձակեսցի ՚ի վերայ նորա :

Խրատ ետ աթենացոց՝ լծել յա-
 րօտ անխտիր զէշս և զերիվարս . և յա-
 սել ուրուք ցնա թէ ոչ բարիոք են
 իրքդ . զի էջք շեն բաւական ՚ի գործել
 զերկիր , ետ պատասխանի Անտիսթե-
 նէս . իսկ զինչ ապա՝ միթէ նայիցիք
 դուք ընդ բաւականութիւն առնն
 յընտրելն զիշխանս . այլ շատ է ձեզ
 ընտրել և եթ զնոսա :

Յասել ուրումն ցնա թէ Պղատոն
 չարիս խօսի զբէն , ետ պատասխանի .
 այս ինձ հաւասար է ընդ թաղաւո-
 րաց , անիրաւել ՚ի նոցանէ որոց բա-
 րիս արարեալ իցեմ : Ծաղու արժանի
 է՝ ասէր , սրբել զցորեանն յորումանց ,
 և ՚ի բաց հանել ՚ի զօրուէն զզինուորս
 վեհերոտս , առ որովք ոչ բուռն հար-
 կանեն ՚ի քաջ խորհուրդ՝ վտարել ՚ի
 բաց ՚ի հասարակապետութենէ զյա-
 շաղկոտս : Իբրև յանդիմանէին զնա
 վասն կենաց կցորդ լինելոյ ընդ արս
 խեռս և ընդ հանդանակողս , և զինչ
 այտի , ասէ , ապաքէն և բժիշկք զօր
 ամենայն յաճախեն առ հիւանդս , և
 ոչ հարկանին ՚ի տենդ նոցա : Ստգտա-
 նէր յոյժ զՊղատոն , և մեղադիր լինէր
 նմա ստէպ վասն զակատելոյ նորա ՚ի

պերճութիւն և 'ի շքեղութիւն : 'Ի
 հարցանել ումանց զնա , զոր քաղեցեր
 օգուտ յիմաստասիրութենէ , տայր
 պատասխանի , զայն՝ զի կարացից կեալ
 առանձինն հանդարտիկ , և առնել յօ-
 ժարութեամբ , զոր այլք դժուարաւ
 գործեն :

Մեծարէր Անտիսթենէս յամենայ-
 նի զյիշատակ Սոկրատայ վարժապե-
 տի իւրոյ : Նա ինքն գլխովին համարի
 վրէժխնդիր մահուն Սոկրատայ . քան-
 զի յորժամ բազումք խուռն բազմու-
 թեամբ ելեալք 'ի սահմանաց եւքսի-
 նեան ծովու հասանէին յԱթէնս ,
 ըսել զիմաստութիւն Սոկրատայ , Ան-
 տիսթենէս առեալ զնոսա տանէր առ
 Անիտոն . ահա՛ ձեզ , ասէր , այրն որ ի-
 մաստնագոյն է քան զՍոկրատ , զի սա
 ինքնին ամբաստան եղև զնմանէ : Յիշա-
 տակ Սոկրատայ այնպէս իմն ազդողա-
 գոյնս դրոշմեցաւ 'ի սիրտ մարդկանն ,
 զի անդէն վաղվաղակի 'ի բաց վտարե-
 ցին զԱնիտոն 'ի քաղաքէն , և զՄելի-
 տոս զերկրորդ դատախազ Սոկրատայ
 արկեալ 'ի բանտ՝ անդէն սպանին :

Ախտացաւ Անտիսթենէս զախտ
 թոքացաւութեան : Թուի իմն թէ
 յոյս ազատութեան 'ի ցաւոց անտի
 յորդորամիտ արար զնա 'ի վտազին
 ցաւսն , քան 'ի մահ յօժարակամ .

Վասն զի աչակերտ նորա Դիողինէս
 իբրև մտանէր 'ի սենեակ նորա, ունե-
 լով ընդ վերարկուաւն դաշոյն 'ի ձե-
 սին, ասէ ցնա Անտիսթենէս, իցէ՞ ոք
 որ ազատեսցէ զիս յաղետից իմոց. և
 Դիողինէս ձգեալ զդաշոյնն ասէ. աւա-
 սիկ սա : Ասէ Անտիսթենէս. փափա-
 քեմ՝ զերծանել 'ի ցաւոցս, այլ ոչ և 'ի
 կենաց : Կարծեալ այնպէս է թէ պան-
 ծայր Անտիսթենէս 'ի յաղանդն կիւ-
 նիկեանց, իբրև Հերակլեայ սահմա-
 նեալ. քանզի Աւսոնիոս լատին քեր-
 թող 'ի վերտառութիւնս իւր բան 'ի
 բերան դնէ նորա օրինակ զայս .

Սկզբնահայր կիւնիկեանց կարծե-
 ցայ ես. բայց լսեմ,

Կանուխ ուրեմն Հերակլեայ յառա-
 ջեալ յայդ դահ վսեմ .

Վարժապետին Հերակլեայ էի եր-
 բեմն ես երկրորդ,

Արդ կիւնիկեանց ես նախկին, նա
 աստուածոց է զուգորդ :

ԱՐԻՍՏՏՈՊՊՈՍ

Ժամանակակից Պղատոնի . եկաց զիննս,
ներորդ վեցերորդ ողիմպիադաւ :

ԱՐԻՍՏՏՈՊՊՈՍ կիւրենացի էր
ազգաւ 'ի Լիբիոյ : Հռչակ համբաւոյն
Սոկրատայ ազգեաց նմա լբանել զհայ-
րենի երկիր բնակութեան իւրոյ , և
գնալ բնակել յԱթէնս , զի ունկնդիր
լիցի բանից վարդապետութեան նո-
րա . յազազս այնորիկ համարեցաւ
ընդ երիցագոյնս յաշակերտաց Սոկ-
րատայ . այլ կեանք նորա ներհական
էին վարդապետութեանն աւանդելոյ
յայնմ սքանչելի լսարանի : Ինքն Ա-
րիստիպպոս հեղինակ համարեցաւ ա-
զանդոյն կիւրենական . վասն զի կիւ-
րենացի էր :

Բնաւորութիւն Արիստիպպոսի աշ-
խոյժ էր , և պատասխանիքն եռան-
դուն . բանք նորա քաղցունք , և ընդ
ամենայն իրս դուզնաբեայս գտանէր
հնարս իմն կատականաց . ջանայր բո-
վանդակ շնթել թաղաւորաց և մե-
ծամեծաց , և կազմ էր առ ամենայն
զոր նորայն կամէին . զուարթացու-

ցեալ զնոսա 'ի ծաղը և 'ի խնդութիւն,
 կորզէր 'ի նոցանէ զոր ինչ և կամէր .
 'ի կատականս շրջէր զնախատինս և
 զթշնամանս որ լինէին առ նա , որպէս
 զի անհնարին գոլ նոցա թշնամանալ
 ընդ նմա՝ թէ և կամէին : Այնպէս ճար-
 տարաւիտ էր և հնարագէտ , զի զա-
 մենայն յոր ձեռն արկանէր՝ ժամանե-
 ցուցանէր յամբոկ գործոյն : Ըստ զա-
 նազանութեան վիճակացն որք հասա-
 նէին նմա՝ յամենայնի յերիւրէր զանձն,
 և ոչինչ խտիր դնէր ընդ պատշաճա-
 կանն . մինչև ասել նմա Պղատոնի եր-
 բեմն , Ո՛վ Արիստիպպոս՝ չիք ոք 'ի տիե-
 ղերս համօրէն այր նման քեզ , որ գի-
 տասցէ հաճ և հաւան կալ ընդ հնո-
 տի ձորձովք , և ընդ ծիրանի հան-
 դերձիւ :

Ուրատիոս քերթող բան 'ի մէջ ար-
 կեալ յաղագս այսր իմաստասիրի ասէ՝
 թէ գիտէր յանձին կերպարանել զնկա-
 րագիր ամենայն մարդոյ . և շատացեալ
 էր ընդ սակաւն զոր ունէր՝ մինչդեռ
 բազմին 'ի խնդիր ելանէր : Այս ամ-
 մենայն հանգամանք առնն՝ սիրելի ա-
 րարին զնա Դիոնեսիոսի բռնակալին՝
 առաւել քան զամենայն պալատականս
 իւր . այնր աղապաւ յաճախ երթևե-
 կէր Արիստիպպոս 'ի Սիրակուսա՝
 վայելել 'ի բազմաճախ խնջոյս նորա .

և իբրև տաղտկանայր 'ի Թագաւորէն՝
 դնայր առ այլս յաւագանւոյն . և զի
 ամենայն կեանք նորա յածէին 'ի
 դրունս Թագաւորաց , պատճառս առ
 Դիողինէս կիւնիկեան՝ որ ժամանա-
 կակիցն էր նորա՝ անուանել զնա Շուն
 արքունի : Եղև երբեմն Դիոնիսեայ
 Թքանել ընդ երեսս Արիստիպպոսի ,
 ընդ որ դժկամակ եղէն որ անդն կային .
 Արիստիպպոս ժպտեալ ընդ այն՝ ա-
 սէ , իսկ ընդէր զայրացայց . եթէ ճըկն-
 որսք առ որսալ ձուկն մի փոքրիկ՝ ոչ
 ծանր դրեն 'ի ջուր Թաթաւիլ բովան-
 դակ , ես ոչ հանդուրժեցից փոքու լոր-
 ձանցն՝ յըմբունել կէտ մի մեծ : Դար-
 ձեալ այլ օր , զի ցասուցեալ էր Դիո-
 նեսիոս ընդ նա , իբրև բազմէր 'ի ճաշ՝
 հրամայեաց նմա զյետին տեղին ունել
 'ի բազմակիանին : Ոչինչ դժուարեցաւ
 ընդ այն Արիստիպպոս , և ասէ . կար-
 ծեմ պատուել կամիս զտեղիս զայս :

Սա ինքն Արիստիպպոս յաշակեր-
 տութենէ Սոկրատայ՝ առաջին դտաւ
 'ի պահանջել վարձս յաշակերտացն .
 և զի հաստատուն արասցէ զայդ սովո-
 բութիւն , ինքն իսկ յղեաց քսան մնաս
 առ Սոկրատ : Այլ նա ոչ ընկալաւ
 զարծաթն , և 'ի բովանդակ կեանս
 իւր տխուր էր ընդ խեղաթիւր գնացս
 աշակերտին իւրոյ . այլ Թուի Թէ ոչ

ինչ համարեցաւ զայն Արիստիպպոս :
 Իբրև սողիւտ ածին զնովաւ, և ա-
 ոաջի դնէին նմա զվեհանձնութիւն
 վարդապետին իւրոյ՝ որոյ ոչինչ ըն-
 կալեալ էր յումեքէ՛ ՚ի վարձ. տայր
 պատասխանի, բնաւ հանդէտ չէ
 բանդ. ամենայն մեծատունք աթե-
 նացւոց փառս անձանց համարին՝ հայ-
 թայթել զպիտոյսն Սոկրատայ, մինչև
 հարկ լինել նմա յետս յղել զաւելին.
 Իսկ ինձ հաղիւ ուրեմն խնամ տանի
 ստրուկ ոք: Այր ոմն մատոյց նմա զոր-
 դին իւր հրահանգել, աղաչեալ՝ մտա-
 դիւր ջանիւք հսկել ՚ի վերայ նորա.
 Արիստիպպոս վարձ խնդրեաց ՚ի նմա,
 նէ յիսուն դրաքմայ. զարմացաւ այրն
 և ասէ, յիսուն դրաքմայիւք ստրուկ
 մի դնեմ ես: Լաւ է՝ ասէ Արիստիպ-
 պոս. երթ գնեա՛. և իցեն քեզ երկուք:
 Ո՛չ թէ առ ադահութեան զայս գոր-
 ծէր Արիստիպպոս. այլ ընդ հակա-
 ոակն, արծաթոյ ՚ի խնդիր էր՝ ծախե-
 լոյ սակս, և ցուցանել զղիարդն վա-
 բելոյ նովաւ: Յանցանել նորա երբեմն
 ընդ ծով՝ հասու եղև յումեմնէ թէ
 նաւն յորում կայ՝ հինից է. յայն-
 ժամ հանեալ Արիստիպպոսի ՚ի ծո-
 ցոյն զբսակ դրամոցն զոր ունէր, կեղ-
 ծեաց համարել զայն, և մեղմով իմն
 թողացոյց անկանիլ ՚ի ծով. և անդէն

առ նմին յոգևոց եհան հեծելով իբրու
 ընդ անկանիլ քսակին 'ի ձեռաց իւ
 բոց . և դաշն ձայնիւ ասաց . Լաւ է
 Արիստիպպոսի կորուսանել զինչա իւր,
 քան ընչիցն զԱրիստիպպոս : Դար
 ձեալ յայլում նուագի տեսեալ թէ
 ստրուկ նորա որ զհետ նորա ընթա
 նայր, չկարէ երագել յընթացս իբրև
 զինքն, զի դրամ բազում բարձեալ ու
 նէր, ասէ . 'ի բաց արկ զոր աւելին է,
 և տար զայն միայն զոր կարես : Ովրա
 տիոս 'ի դրելն վասն նոցա որք զամե
 նայն շահ իւրեանց 'ի ճոխութիւնս
 դնեն' 'ի համեմատութիւն առնու ընդ
 նոսա զայս իմաստասէր :

Սիրելի էր Արիստիպպոսի հեշտին
 կեանք, և 'ի ծախս կերակրոց յոչինչ
 խնայէր : Ի գնել նորա երբեմն կաքաւ
 մի ընդ յիսուն դրաքմայից, այր ոմն
 չհանդուրժեալ ընդ այն՝ կշտամբեաց
 զնա : Ասէ Արիստիպպոս . թէ այդ
 կաքաւ դանկ մի ևեթ արժէր՝ ոչ ար
 դեօք գնէիր : Այո՞ գնէի, ասէ այրն .
 յաւել և Արիստիպպոս, և ես խուն
 ինչ գրեմ զյիսուն դրաքմայսն, քան
 եթէ դու զմի դանդ : Յայլում նուա
 գի՛ գնեաց խորտիկ համադամ ծանր
 գնով . այր ոմն որ անդ էր՝ մեղադրեաց
 նմա . և Արիստիպպոս ասէ . ոչ տայիր
 դրամս երիս ընդ այսր ամենայնի : Այո՞,

ասէ այրն . Արիստիպպոս ասէ . ապա
 շնմ ես այնչափ պորտաբոյժ՝ որչափ
 դու ազահ ես : Դարձեալ յորժամ
 նախատէին զնա իբրև որկորեայ և շա-
 տակեր , տայր պատասխանի եթէ հա-
 մադամ կերակուրք խոտելի ինչ էին ,
 ոչ արդեօք լինէին մեծածախ կոչունք
 յամենայն տօնս դից : Նա և Պղատոն
 անդամ՝ որոյ ամենայն ինչ շքեղ էր՝
 խրատեաց զնա երբեմն վասն զեղխու-
 թեան . Արիստիպպոս ետ պատասխա-
 նի . համարիցիս դու զԴիոնեսիոս այր
 զգօն : Այո՛ , ասէ Պղատոն . իսկ արդ ,
 ասէ Արիստիպպոս , նա փափկակեաց
 է քան զիս . ապա կենաց դիւրութիւն
 ոչինչ արատէ զընթացս վարուց կե-
 նաց : Յաւուր միում Դիոզինէս մինչ
 դեռ բանջարս լուանայր ըստ սովորու-
 թեան իւրում , ետես զԱրիստիպպոս
 որ անցանէր ընդ այն , և ասէ ցնա , ե-
 թէ շատացեալ էր քո բանջարովք որ-
 պէս եսս , ոչ դեղերէիր առ դրամբք
 թաղաւորաց : Պատասխանի ետ Ա-
 րիստիպպոս , եթէ և դու քաջ գիտէիր
 զհնարսն կենցաղակից լինելոյ թաղա-
 ւորաց , լբանէիր արդեօք զբանջարդ
 քո : Մատոյց երբեմն Դիոնեսիոս ա-
 ռաջի նորա երիս օրիորդս գեղեցիկս
 յարքունեաց անտի , հրաման տուեալ
 ընտրել զմին ՚ի նոցանէ ընդ որս հա-

Ճեօցի : Արիստիպպոս ընկալաւ զերեւսինն համանդամայն . և ասէ . ընտրութիւնն չէ հաւաստի , ոչ անգիտանաս դու զաղէտսն որ խուժեցին առ ձախողակ ընտրութեամբն Պարիսի . երկուք կարեն այնչափ շար գործել , որչափ բարի ոչ առնէ մին ևեթ : Տարազնոսա մինչև 'ի դաւիթ տան իւրոյ , և անտի արձակեաց 'ի բաց : Յայլում նուագի եհարց ցնա Դիոնեսիոս . զի է զի յաճախ երթևեկեն իմաստասէրք 'ի տունս մեծամեծաց , և ոչ մեծամեծք առ իմաստասէրս . ասէ Արիստիպպոս . քանզի իմաստասէրք գիտեն որոց պէտս ունին . այլ ոչ նոյնպէս և մեծամեծքն : Այսպիսի ինչ եհարց ցնա այլ ոմն . նա ետ պատասխանի . ապաքէն ճահաւոր են բժիշկք առ հիւանդս . սակայն ամենայն ոք կամի դարման տանել հիւանդի մանաւանդ , քան ինքնին զհիւանդութիւնն ախտանալ :

Աքանչելի իմն է՝ ասէր Արիստիպպոս գիտելն զեկավարել զկիրս բնութեան , այլ ոչ յարմատոց քանցել : Ոչ են յանցանք վայելել 'ի բերկրականս՝ ցորչափ ոչ վարեցի ոք 'ի գերութիւն նոցա . և յազագս այսորիկ յորժամ այպն առնէին զնովաւ վասն յաճախելոյ նորա առ Լաիա պոռնիկ , ասէր . այո՛ . ունիմ ես զնա . այլ ոչ

Թէ և նա զիս ունիցի: Մինչդեռ մտա-
 նէր նա յաւուր միում ՚ի տուն անդր
 պոռնկին, ոմն յաշակերտաց նորա որ
 ընդ նմայն էր՝ զամօթի հարաւ ընդ
 այն. զգաց Արիստիպպոս զիրան. և ա-
 սէ. Բարեկամ, չէ ամօթ մտանել ՚ի
 տեղիդ յայդ, այլ ամօթ է թէ ոչ կա-
 րասցես ելանել այտի: Պողիքսենէս ի-
 մաստասէր եկեալ երբեմն յայցելու-
 թիւն նորա, և ՚ի մտանելն անդ տե-
 սեալ քաղմականս ընթրեաց, և երա-
 խանս պճնելոց, անդէն այլ յայլմէ
 եղեալ սկսաւ բողոք ունել վասն այնր
 տարապայման զեղխութեան: Արիս-
 տիպպոս եհարց քաղցրութեամբ եթէ
 կամի՞ քաղմել ՚ի սեղան ընդ նոսա: Պա-
 տասխանի ետ Պողիքսենէս. այո՛:
 Եւ որպէս ասէ, Արիստիպպոս, ո՛չ դու
 արդ ևս զազմուկդ յարուցեր. ո՛չ ար-
 համարհէիր դու զքաղմախորտիկ կո-
 չունս, և զսկումբս աղարտիւի. բայց
 եթէ թերևս վասն աւելի ծախուցն ա-
 սէիր: Դէպ եղև երբեմն Արիստիպպո-
 սի մաքառել ընդ Եսքինեայ. և այն-
 պէս ցրտացեալ էր նոցա ՚ի միմեանց,
 մինչ յայնմ հետէ ոչ ևս տեսանել զի-
 րեարս: Յարուցեալ Արիստիպպոսի
 գնաց առ Եսքինէս. և մինչև ցերբ,
 ասէ, ո՛չ հաշտիցիմք ընդ իրեարս. կա-
 միս զի ամենեքին ծաղր արասցեն զմեօք,

և պորտաբոյժք ծաղրելով զմեզ՝ խնդու-
թիւն շնորհեսցեն 'ի սեղանս նոցա առ
որովք բազմեսցին : Ետ պատասխանի
Եսթինէս . այս մեծ է ինձ , և 'ի բովան-
դակ սրտէ յօժարամտեմ 'ի հաշտու-
թիւն :

Դիոնեսիոս բռնակալ ընթրիս տու-
եալ երբեմն մեծամեծաց իւրոց , 'ի
կատարել ընթրեացն հրաման ետ ա-
մենեցուն 'նոցա՝ երկայն հանդերձ ծի-
րանի զգենուլ , և կաքաւել 'ի մեծի
դահլճին : Պղատոն ոչ կալաւ յանձին
զիրսն , զի այր եմ , ասէ , զգեստ կանա-
ցի ոչ պատշաճէ ինձ : Իսկ Արիստիպ-
պոս առանց ինչ ընդ բանս ածելոյ
զկաքաւն կաքաւեաց , և ասէ , զսոյն
առնեմք և 'ի տօնին Բաքոսի , և սա-
կայն չիք ինչ անդէն խէթ ապականու-
թեան վարուց , թէ այլուստ չգուցէ
պատճառ ապականարար : Դարձեալ
յայլում նուազի աղերսէր Արիստիպ-
պոս զԴիոնեսիոս վասն միոյ 'ի կարևոր
բարեկամաց իւրոց . Դիոնեսիոս մեր-
ժեաց զնա , և ոչ լսէր խնդրուածոցն .
մինչև յոտս նորա անկանել Արիս-
տիպպոսի և թախանձել : Եւ 'ի ստղը-
տանել ուրումն զայն գործ նորա , ա-
սէ Արիստիպպոս . յանցումնդ չէ իմ ,
այլ Դիոնիսեայ , որոյ ականջք յոտսն
են : Մինչդեռ էր նա 'ի Սիրակուսա ,

Միմոս փոխւգացի դանձապետ Դիո-
նիսեայ եցոյց նմա զհոյակապ ապա-
րանս իւր, և ճեմ առեալ 'ի նմին՝ տայր
նմա նայել ընդ սալայատակացն պա-
տուականութիւն: Արիստիպպոս հա-
զաց, և անդէն եթուք ընդ երեսս Մի-
մոսի. 'ի զայրանալ նորա, ետ պատաս-
խանի Արիստիպպոս. բարեկամ ես ոչ
տեսի ուրեք վայր ազտեղի ուր կարէի
թքանել առաւել քան զերեսս քո: Են
որք զսոյն, կամ զնմանն սորին Դիոզի-
նէսի տան. սակայն երկոքին իսկ բա-
ւական էին 'ի դործդ:

Յարհամարհել ուրուք զնա երբեմն
և 'ի նախատել, մեկնեալ 'ի բաց զնաց
անտի Արիստիպպոս. իսկ այրն պնդե-
ցաւ զկնի նորա և ազազակէր, զնա
աստի այր շարագործ: Ետ պատաս-
խանի Արիստիպպոս. այ՞ դնամ. զի
կարողութի է քեզ թշնամանել զիս,
այլ ինձ օրէն է ոչ լսել այնմ: Էր
երբեմն նմա անցանել ընդ ծով 'ի
Կորնթոս քաղաք, յորում պահու եղև
մրրիկ ուժգին. և Արիստիպպոս յահի
մեծի կայր վասն մօտալուտ վտանդի
նաւաբեկութեան. ոմն 'ի նաւորդացն
խաղ արար զնովաւ և ասէ, մեք որ
տոգէտքս եմք՝ ոչինչ երկնչխմք. իսկ դուք
իմաստասէրք զլ՞ պակուցեալ էք: Ա-
րիստիպպոս ասէ. ոչ թէ վասն կոր-

ստեան հոգւոյ երկնչիմք մեք, այլ զի մեծ խտիր է ընդ այն՝ զոր հասանէ մեզ կորուսանել :

Իբրև հարցանէին ցնա՝ զի՞նչ անջր պետութիւն է ընդ այր իմաստուն և ընդ տգէտ. ասէր՝ պարտ է մերկել զերկաքանչիւրն՝ ի հանդերձիցն, և այն պէս մերկս յղել առ օտարս. որք անդէն փութանակի իմանան զայն : Լաւագոյն դատէր լինել աղքատ քան տգէտ. վասն զի աղքատի ոչ պակասէ արծաթ. և ընդ հակառակն՝ տգիտի չեք բարեմարդութիւն, որով այնպէս իմն է առ կիրթ մարդով, որպէս ամեհի երխլար առ մարդելով : Եւ եղև յաւուր միում ետ Դիոնեսիոս Արիստիպպոսի դրամ, և Պղատոնի գիրս. ՚ի ստղտանել ուրուք զզանազանութիւն պարգևացն, սա ետ պատասխանի, ինձ պիտի արծաթ, և Պղատոնի գիրք : Դարձեալ այլ օր խնդրեաց սա տաղանդ մի ՚ի Դիոնեսիոսէ. և նա ասաց, հաւաստէիր դու ինձ թէ իմաստնոց չպակասէ դրամ. ետ պատասխանի Արիստիպպոս. դու այժմ տուր ինձ, և ապա քննեսցուք զիրսդ. և ՚ի տալ նմա Դիոնեսիոսի, սա յաւել ՚ի բանս իւր. իսկ արդ ոչ տեսանես՝ զի բնաւ չեմ կարօտեալ : Եւ քանզի ստէպ էր երթ սորա ՚ի Սիրակուսա, եհարց ցնա

Դիոնեսիոս, զի՞ գործել զաս աստ. ետ պատասխանի Արիստիպպոս. տալ քեզ զոր ունիմ, և փոխարէն ընդունել զոր դուդ ունիս: Այլ 'ի մեղադիր լինել ումեք ցնա թէ լքեալ զՍոկրատ՝ ընթանաս առ Դիոնեսիոս, ասէ, ցորվայր կարօտէի իմաստութեան՝ առ Սոկրատէս գնայի, այժմ՝ զի ընչից պէտք են ինձ, առ Դիոնեսիոս ընթանամ: Ետես երբեմն զերիտասարդ զօմն մեծաբանեալ ընդ քաջավարժութիւն իւր 'ի լեզ. ոչ ամաչես, ասէ, պանծալ ընդ այդ գործ սնոտի. ոչ ապաքէն դլբինք լաւ ևս լուղին քան զքեզ: Հարցաւ, զի՞նչ շահ կ'թեցեր յիմաստասիրութենէ. զայն՝ զի համարձակագոյն խօսիցիմ ընդ ամենայն մարդկան: Եհարց այլ ոմն. զի՞նչ առաւելութիւն է ձեզ իմաստասիրաց քան զայլ մարդիկ: Արիստիպպոս ասէ. այն՝ զի թէև ոչ դուցեն օրէնք, մեք հանապազ նոյն օրինակ կեցցուք:

Ազանդ կիւրենեան իմաստասիրութեանն 'ի բարոյականն և եթ սերտ յօժարեալ էր, դոյզն ինչ միայն տրամաբանութեան հպատակէին. զանց առնէին զընաբանութեամբ, քանղիանհնարին դատէին զայն 'ի խելամտել բովանդակ: Համարէին թէ նպատակ ամենայն գործոց մարդկան՝ է բեր-

կրութիւնն հաճոյականաց . ոչ պակա-
սութիւնն իմն 'ի ցաւոց , այլ բերկրու-
թիւնն իսկապէս՝ շարժմամբ սահմա-
նեալ : Երկու զանազան շարժմունս
դնէին 'ի հոգւոջ , զմին քաղցր՝ բեր-
կրեցուցիչ , զերկրորդն բուռն՝ ցաւե-
ցուցիչ . և զի ասէին ամենայն մարդիկ
ընդաբոյս աղքեցութեամբն յօժարեն
'ի մին , և խորշին 'ի միւսմէն , այս յայտ
իսկ ապացուցանէ թէ բերկրութիւնն
հեշտացուցիչ՝ նպատակ է մարդոյ :
Չանցաւութիւնն սահմանէին քուն
իմն՝ ոչ հեշտացուցիչ , և ոչ ցաւեցու-
ցիչ : Ոչ մեծ ինչ գրէին զառաքինու-
թիւնն , այլ այնչափ միայն՝ զի սատար
լինի 'ի հեշտականս՝ որպէս դեղ օդ-
տակար առողջութեան : Նպատակ
գործոց ոչ ասէին զերջանկութիւնն
լինել . զի նպատակ գործոց է 'ի մաս-
նական հեշտալիս . իսկ երանութիւնն
լրումն է ամենայն հեշտալեաց . և ևս
մարմնոյ հեշտութիւնք դիւրագգացք
են քան զհոգւոյն . յազազս այնորիկ
կիւրենեանք մեծապէս խնամ տանէին
մարմնոյ իւրեանց քան հոգւոյ : Հաս-
տատութեամբ պնդէին թէ պարտ է
պահել զբարեկամութիւնն միայն վասն
առ 'ի նոցանէ օգտին , իբրու զօգտա-
կար անդամս մարմնոյ : Ասէին . չիք
ինչ 'ի մեզ արդար կամ անիրաւ ,

վայելուչ կամ տարադէպ, այլ բո-
 վանդակն այդպէս համարի ըստ օրի-
 նաց և ըստ սովորութեան տեղեաց
 տեղեաց: Այր իմաստուն չպարտի
 առնել ինչ անպատեհ վասն դիպուա-
 ծոցն որ մարթին հանդիպել նմա: Պարտ է նմա յամենայնի յերիւրել
 զանձն ըստ օրինաց երկրին յորում
 կայ, և խորշել ՚ի վատութենէ անուան:
 Դարձեալ՝ այս բանք էին նոցա. չիք
 ինչ ՚ի մեղ հաճոյական և անհաճոյ.
 և ամենայն ինչ անուանի այդպէս՝
 վասն սովորութեանն և յաճախութեան,
 կամ վասն այլոց պարագայից՝ որով
 այն ամենայն քաղցրանայ մեղ կամ
 տաղտկալի լինի: Անհնարին է երջան-
 կանալ մեղ բովանդակ յաստի կեանս,
 քանզի ՚ի ներքոյ եմք բազմադէմ տկա-
 րութեանց և կրից, որք խափանեն
 զմեղ ՚ի վայելիցն հեշտութե, նա և ՚ի
 վայելսն անդ աղմկեն: Ո՛չինչ սատարեն
 ՚ի հեշտութիւնն ոչ ազատութիւն և ոչ
 ստրկութիւն, ոչ ճոխութիւն և ոչ ազ-
 քատութիւն, ոչ ազնուականութիւն
 և ոչ անտոհմութիւն. քանզի յամենայն
 վիճակի հնար է մարդոյ երջանկու-
 թեամբ կեալ: Իմաստնոյ չէ օրէն ա-
 տելութեամբ դնալ ընդ ումեք, այլ
 ջանալ յօգուտ ամենեցուն. զամենայն
 զգործս իւր՝ միայն յանձն իւր շրջես:

ցէ. քանզի չէ որ արժանաւոր քան զնա
 'ի ստացումն շահեկանաց, և ոչ որ
 քան զնա դերապատուեալ: Ահա յայս
 բովանդակի վարդապետութիւն Ա-
 րիստիպպոսի և կիւրենականաց:

Էր Արիստիպպոսի դուստր մի Ա-
 րետա անուն, որում առաջնորդեաց
 յիմաստս վարդապետութեան իւրոյ.
 և յաջողեաց նմա յառաջադէմ լինել
 'ի նմին: Նա ինքն Արետա հրահան-
 դեաց զորդի իւր զԱրիստիպպոս զմա-
 կանուանեալ Մետրողիդատոս որ
 վարժապետ եղև ամպարշտին Թէոդո-
 րոսի: Այս Թէոդորոս բաց 'ի կիւրե-
 նական վարդապետութեանց՝ ձեռն
 արկ ուսուցանել հրապարակաւ Թէ-
 չկան աստուածք. բարեկամութիւնն
 մտացածին իմն է. քանզի բարեկամու-
 թիւն չմարթի կալ 'ի մէջ անմտաց,
 իսկ իմաստունն բաւական է անձին
 իւրում, վասն որոյ չունի պէտս բարե-
 կամաց: Չէ արժան իմաստնոյ մատ-
 նել զանձն 'ի վտանգս վասն իւրոց
 հայրենեաց. հայրենիք նորա աշխարհս
 է, և տարադէպ է մահու մատնել
 զանձն վասն անմտաց բազմաց: Օրէն
 է գողանալ. զսեղանս կողոպտել, և
 շնալ՝ երբ գործն յաջողեացէ նմա.
 քանզի յանցանք սահմանեալ են միայն
 'ի կարծիս ռամկին, այլ իսկութեամբ

ոչ մի ինչ չար գոյ 'ի նմա : Եւ հնար
իսկ է գործել 'ի հրապարակի զոր ինչ
միանգամ ժողովուրդն ամօթ համարի :

Յաւուր միում անկաւ 'ի վտանգ
մահու յԱթէնս յարիսպագոսն վասն
յանդգնութեան իւրոյ . մինչև գետնա-
քարչ ձգել տանել զնա . այլ Դեմե-
տրիոս Փաղերէոս թափեաց զնա : Բնա-
կեաց ժամանակս ինչ 'ի Աիւրենէ 'ի
մեծի պատուի առ Մարիոսի : Տարա-
գրեցին զնա կիւրենացիք . որ 'ի վտա-
րանդի ելանելն անտի , ասէ . ոչ գի-
տէք դուք զինչ առնէք մերժելով զիս 'ի
Լիբիոյ յաքսորս յԵլլագա : Պողո-
մէոս Լագոս՝ առ որում բնակէր՝ յղեաց
զնա հրեշտակութեամբ առ Լիւսիմա-
քոս . ընդ որում այնպէս յանդուզն
խօսեցաւ , զի գործակալն Լիւսիմա-
քեայ որ յայնժամ անդ դտաւ՝ ասաց
ցնա . կարծեմ ես թէ ոգոյէ՝ զի զոր օ-
րինակ ասես թէ չկան աստուածք ,
նոյնպէս խորհիս թէ չկան և թագա-
ւորք :

Պատմէ Ամիիկրատոս թէ այդ ի-
մաստասէր 'ի մահ դատապարտեցաւ ,
և պատուհասն էր ըմպել զթոյն :

ԱՐԻՍՏՈՏԵԼ

Ճնեալ յառաջին ամի իննսներորդ ին-
ներորդ ողիմպիադին. մեռեալ յերրորդ
ամի հարիւրորդի չորեքտասաներորդին.
'ի հասակի վաթսուն և երից ամաց :

ՔԱՐՈԶԵՅԱԻ Արիստոտէլ
մին 'ի մեծանուն իմաստասիրաց հա-
մօրէն դարուց հնութեան. և անուն
նորա մինչև ցայսօր ժամանակի հռչա-
կեալ է յամենայն դպրոցս : Որդի էր
Նիկոմաքոսի բժշկի և բարեկամի Ա-
մինտասայ արքայի Մակեդոնացոց,
և 'ի սերնդոց Մակաովնի թոռինն
Ասկղեպիադեայ : Ճնաւ 'ի Ստագիրա
քաղաք Մակեդոնիոյ յառաջնում ա-
մի ղթ ողիմպիադին : Մեռան ծնողք
նորա 'ի մանկութեան նորա, և ինքն
անխնամ մնաց յորոց յանձն էր հոգ
դաստիարակութեան նորա : 'ի պա-
տանեկութեանն անձնատուր եղև
յանձնդիւր կեանս և 'ի շուայտու-
թիւն, յորում վատնեաց զամենայն
ինչս իւր : Հպատակեաց զառաջինն
գործոյ զինուորութեան. այլ զի ոչ
զուգաւորէր այն բնաւորութեան իւ-

բոււմ, գնաց 'ի Ղեղիոս՝ խորհուրդ
 հարցանել ընդ պատգամախօսն : Պա-
 տուէր եղև առ նա 'ի դաբիրայէն՝ գնալ
 յԱթէնս, և աշակերտիլ իմաստասի-
 րութեան : Էր յայնժամ 'ի հասակի
 եօթնևտասն ամաց : Ուսաւ զամս քսան
 յԱկադեմիայն առ ոտս Պղատոնի, և
 զի ծախեալ էր յառաջնմէ զստա-
 ցուածս իւր՝ միտ դնէր և 'ի տուր և
 առ վաճառուց դեղոց ոմանց յԱ-
 թէնս՝ հայթայթել նովին զպարէնս
 կենաց պիտոյից :

Սակաւ ուտէր, և սակաւ ննջէր .
 եռանդն նորա յուսմունս այնպէս
 բորբոքեալ էր՝ մինչև զի վասն յաղթե-
 լոյ բռնութեան քնոյն՝ դնէր կոնք
 պղնձի առ մահճօքն, և յընկողմնելն՝
 'ի դուրս ձգէր յանկողնոյն զմի ձեռն
 իւր յորում ունէր գունտ երկաթի .
 որպէս զի 'ի շառաչմանէ անտի անկա-
 նելոյ գնտոյն 'ի կոնք անդր 'ի պահու-
 նիրհելոյ իւրոյ, զարթիցէ վաղվաղա-
 կի : Պատմէ Լաերտիոս թէ ձայն նորա
 սուր էր, աչքն մանուկք, սրունքն նըր-
 բին, և զի միշտ շքեղս զգենոյր :

Յաջողութիւն մտաց նորա գեր 'ի
 վեր էր յոյժ, և դիւրին էին նմա ամե-
 նայն խնդիրք գժուարինք : Յառաջա-
 դէմ զարգացաւ 'ի դպրոցին Պղատոնի,
 և անուանի գտաւ քան զամենայն ա-

կաղեմականս . որպէս զի ոչ մի ինչ
 խնդիր առնոյր հաստատութիւն յԱ-
 կաղեմիա՝ առանց հարցանելոյ զԱ-
 րիստոտէլի կարծիան, թէպէտ բազում
 ուրեք տարածայն գտանէր ՚ի Պղատո-
 նէ : Ամենայն աշակերտակիցք նորա
 իբրև ընդ այր ոք գերահամբաւ նայ-
 էին ընդ նա . և ոմանք յօժարամիտ
 ընդունէին զբանս նորա , զանց արա-
 բեալ զվարդապետաւ իւրեանց : Յայն-
 ժամ տեղի տուեալ մեկնեցաւ անտի
 Արիստոտէլ . ծանրացասումն եղև ընդ
 այն Պղատոն , դատեալ զնա իբրև
 ապստամբ և դասալիք , և բողոք ունէր
 թէ աշակերտ իւր անկուշեաց զնա՝ իբ-
 րև մտրուկ զմայր իւր :

Յղեցին աթենացիք զԱրիստոտէլ
 հրեշտակութեամբ առ Փիլիպպոս ար-
 քայ հայր Աղեքսանդրի . վասն այնր
 հրեշտակութեան և գործոյ աթենաց-
 ւոց եկաց ժամանակս ինչ ՚ի Մակե-
 դոնիա . և ՚ի դառնալն յԱթէնս՝
 գտանէ զՔսենոկրատէս գլուխ կա-
 ցեալ յԱկաղեմիա . յայնժամ ՚ի միտ
 առեալ զի այն աւագութիւն ընդ
 բռամբ կայ այլոյ , ասէ . ամօթ է ՚ի
 լռութեան կալ՝ մինչ խօսեսցի Քսենո-
 կրատէս : Հաստատեաց և ինքն նոր ու-
 սումն , ձեռն արկեալ ՚ի նոր վարդապե-
 տութիւն այլազդ ՚ի պղատոնականէն :

Մեծահոջակ համբաւ Արիստոտելի վասն հմտութեանն յամենայն գիտութիւնս, և մանաւանդ յիմաստասիրութեան և ՚ի քաղաքականութեան՝ խորհուրդ ՚ի միտս արկ Փիլիպպոսի արքայի Մակեդոնացւոց՝ ընտրել զնա վարժապետ որդւոյ իւրում: Էր յայնժամ Աղեքսանդր չորեքտասան ամաց: Ընկալաւ Արիստոտէլ զհրաւէրն, և եկաց առ Աղեքսանդրի ամս ութ. ուրում ըստ պատմելոյն Պուտարքոսի՝ ուսոյց իրս իրս թագունս զորս ոչ ուսուցանէր այլոց: Պարապելն Արիստոտելի յիմաստասիրութիւն ոչինչ խափան արկանէր նմա յայլոց գործոց. քանզի բաժանորդ լինէր ՚ի մատակարարութեան իրաց կարևորաց, և կցորդ էր ամենայնի որոց զայնու ժամանակաւ լինէին ՚ի Մակեդոնիա: ՚ի պատիւ նորա կրկին կանգնեաց Փիլիպպոս արքայ զՍտագիրա զհայրենիս իմաստասիրիդ որ ոտնակոխն էր յերեսաց պատերազմաց, և դարձոյց ՚ի նոյն զամենայն բնակիչս, յորոց բազումք վարեալ էին ՚ի գերութիւն, և այլքն ապրեալք փախստեամբ:

Հրաժարեալ Արիստոտելի յԱղեքսանդրէ դարձ արար յԱթէնս՝ ուր եգիտ ընդունելութիւն մեծ. վասն զի ՚ի շնորհս նորա Փիլիպպոս արքայ բա-

զուժ երախտիս եցոյց աթենացոց :
 Ընտրեաց տեղի իմաստասիրութեան
 զ Լիկէոն անուանեալ տեղի յարուար-
 ձանս Աթենայ , յորում էին կարգա-
 ծառատունկք 'ի զբօսանս : Անդ հաս-
 տատեաց զնոր լսարան իւր , և զի սո-
 վորութիւն էր նորա յօլով անգամ
 ճեմելով դաս ասել աշակերտաց իւ-
 րոց , պատճառս ետ՝ ճեմական անուն
 կարդալ ամենայն հետեւողաց նորա :
 Ոչ յետ բազում ժամանակաց 'ի վե-
 րայ անցանելոյ՝ զհամբաւի հարաւ ա-
 նուն Լիկէոնի առ խուռն ընթանալոյ
 մարդկան անդր 'ի տեղեաց տեղեաց
 ունկնդիր լինել բանից իմաստութեան
 նորա . որոյ անուն տարածեալ էր ընդ
 ամենայն Ելլադա :

Աղեքսանդր գործ 'ի ձեռս տուեալ
 էր Արիստոտելի հետամուտ լինել
 քննութեան բնաբանութեան . վասն
 որոյ հրամայեաց 'ի սպասաւորութիւն
 նորա որսորդս բազումս գաղանաց և
 ձկանց՝ զի որսացեալ յամենայն կող-
 մանց տարցեն առ նա՝ յորոց 'ի զննու-
 թիւն աշխատասիրեսցէ . առաքեաց
 առ նա և հարիւր տաղանդ վասն առ
 'ի նոյն կարևոր ծախուցն : Յայնժամ
 'ի վեր երևեցոյց Արիստոտել զբնա-
 բանութեան և զբնազանցութեան
 դիրսն իւր . իմացաւ զայն Աղեքսանդր՝

որ յայնժամ անցեալ էր յԱսիա . և զի ցանկայր նա ամբարհաւածութեամբ յամենայնի առաջին լինել, տխրեցաւ յանձն իւր՝ ընդ այն, զի գիտութիւն Արիստոտելի սփիւռ ծաւալի ընդ ամենեսին: Ծանոյց նմա զխորհուրդ իւր, գրեալ նմա թուղթ ըստ այսմ օրինակի. «Աղեքսանդր առ Արիստոտէլ: Ոչ բարւոք արարեր զի սփռեցեր 'ի ձեռս ամենեցուն զբո գիրս տեսական գիտութեանց. զի ոչնչ մնաց մեզ գեր 'ի վերոյ զանցանել առ այլովք, եթէ զոր առանձինն ուսուցեր մեզ, յածեսցի 'ի ձեռս ամենայն մարդկան: Յանկայի գիտել քեզ՝ զի յաւէտ խնդրելի էր ինձ գերապանծ գոլ քան զայլս 'ի գիտութիւնս իրաց բարձրագունից, քան 'ի մեծութեան իշխանութեան»: Արիստոտէլ 'ի հաճել զմիտս թագաւորին՝ պատասխանի արար նմա՝ թէ այնպէս 'ի դուրս հանի զիրսդ՝ որպէս թէ չիցեմ հանեալ: Միտք բանիցս այն էր, թէ կարգ նրբախօս վարդապետութեան իւրոյ՝ ամենեցուն չէ գիւրիմաց:

Ոչ մնաց Արիստոտէլ ընդերկար 'ի շնորհս Աղեքսանդրի. անցին հակառակութիւնք ընդ մէջ նոցա, զի պընդեալ 'ի բանս իւր զկողմն կալաւ ըզկալիսթենեայ: Այս կալիսթենէս

Թոռնորդի էր Արիստոտելի . զի մայր նորա՝ իւր Թոռն էր : Մնուցեալ էր զնա Արիստոտելի առ իւր , և խնամ կալեալ դաստիարակութեան նորա . և եղև ՚ի Թողուլ նորա զԱղեքսանդր յղեաց զսա ընդ նմա զնալ ՚ի պատեւրազմ , և ջանասէր փութով ապսպարեաց զնա ՚ի խնամս արքայի : Բնաւորութիւնս Կալիսթենեայ համարձակ էր ՚ի խօսելն ընդ Թագաւորին , և չէր ինչ մարդահաճոյ : Նա ինքն արգել մակեդոնացւոց երկրպագել նմա իբրև աստուծոյ , որպէս սովորութիւն էր առնել Պարսից : Աղեքսանդր որ ատելութեամբ էր ընդ նմա սակս կամաւ , կորութեանն ՚ի բանս իւր , ըստ յաջողել ժամուն՝ վրէժ խնդրեաց ՚ի նմանէ՝ սպանեալ զնա : Արկ զնա յուխտ դաւաճանութեանն Երմողայոսի աշակերտին Կալիսթենեայ , և ոչ Թոյլետո նմա ՚ի հանդէս հանել զփաստ անմեղութեան իւրոյ . արկ զնա կերակուր առիւծուց . ըստ այլոց՝ ՚ի կախաղանի անշնչացոյց , կամ ՚ի տանջանս :

Ընդ մահ Կալիսթենեայ ՚ի խոր խոցեցաւ Արիստոտէլ , և Աղեքսանդր յամենայնի ջանահնար եղև ընկձել զնա . մեծացոյց զՔսենոկրատէս , և յղեաց նմա պարզևս բազումս , ընդ

որ մախացաւ Արիստոտէլ: Նա՛ և ումանք ստղտանեն զնա թէ կցորդ էր 'ի նենդութիւն դաւոյն Անտիպատրոսի, և թէ ինքն հնարեաց զթոյնն, որով ասեն սպանաւ Աղեքսանդր:

Թէպէտ և յամենայնի անդրդուելի էր Արիստոտէլ, սակայն և ուրեք թերի գտաւ 'ի հաստատութենէն իւրմէ: Յետ ժամանակաց 'ի վերայ անցանելոյ՝ լիք եթող զուսումնարանն, և զնաց առ Երմիանդ բռնաւոր ատարնացւոց. ոչ որ հաւաստէ զպատճառայսր ճանապարհորդութեան նորա, ոմանց հաճոյ թուեցաւ պատճառս իմն 'ի մէջ բերել արձակերասան կենաց: Ամուսնացաւ ընդ քեռ կամ ընդ հարձի այնր թագաւորի. այնպէս իմն 'ի գերութիւն գրաւեցաւ չարաչար ախտիւ 'ի սէր այդր կնոջ՝ մինչև զոհս մատուցանել նմա, զոր օրինակ առնէին աթենացիք դիցն Դեսմտրի Ելիւսինեայ. և յօրինեաց նուազս զովեստից 'ի պատիւ Եւմիանդեայ 'ի շունորհս երախտեաց նորա, որ զամուսնութիւնն զայն թողացոյց նմա:

Տրոհեաց Արիստոտէլ զիմաստասիրութիւն 'ի գործնական և 'ի տեսական: Գործնական է որ ուսուցանէ մեզ զճմարտութիւնս պատկանաւորս 'ի կարգաւորել զներգործութիւնս

Հողւոյս մերոյ, իմա՛ զտրամաբանու-
 թիւն . և որ ազդէ մեզ կարևոր սկզբ-
 բունս՝ ի պէտս քաղաքական կենաց,
 այն իսկ է բարոյական և քաղաքակա-
 նութիւն : Իսկ տեսական իմաստասի-
 րութիւն է, որ յայտ բերէ տեսական
 ճշմարտութիւնս, զորօրինակ բնա-
 զանցութիւնն է և բնաբանութիւն :
 Ի բնաբանութեան անդ երիս դնէր
 սկզբունս իրաց բնականաց . պակա-
 սութիւն, նիւթ և տեսակ : Առ ՚ի ցու-
 ցանել թէ պարտ է զպակասութիւնն
 դասել ընդ սկզբունս՝ ասէ, թէ նիւթն
 յորմէ բաղադրի ինչ՝ հարկ է զի չունի-
 ցի տակաւին զտեսակ այնր իրի . զորօ-
 րինակ՝ նիւթն յորմէ կազմի սեղան,
 հարկ է զի չունիցի զտեսակ սեղանոյ .
 իմա՛ մինչև եղեալ սեղանոյ՝ նիւթն
 այն յորմէ կազմի՝ ոչ իցէ սեղան :
 Զպակասութիւնն ոչ դնէ սկիզբն բաղ-
 կացութեան մարմնոց, այլ իբրև ար-
 տաքին սկիզբն արտադրութեան նո-
 ցուն . իբր զի արտադրութիւն է փո-
 փոխութիւն իմն՝ որով նիւթն անցա-
 նէ ՚ի վիճակէն զոր ոչն ունէր՝ յայն
 զոր ստանայ . օրինակ իմն՝ տախտակք
 որք զի յառաջն չէին սեղան, արդ
 սկսանին լինել սեղան :

Զնիւթն կրկին օրինակաւ սահմա-
 նէ Արիստոտէլ . յորոց մին որ պակա-

սական կամ հրաժարական է, այս է .
 Նիւթն առաջին, ասէ, ոչ գոյացու-
 թիւն է, ոչ քանակութիւն, ոչ որա-
 կութիւն, և ոչ այլ ինչ : Այսպէս ըստ
 նորա՝ որպէս թէ նիւթն փայտի ոչ
 քանակութիւնն է, ոչ ձևն, ոչ գոյնն,
 ոչ հաստատութիւնն, ոչ ծանրու-
 թիւնն, ոչ պնդութիւնն, ոչ չորու-
 թիւնն, ոչ խոնաւութիւնն, ոչ հոտն,
 և ոչ այլ ինչ պատահումն որ ՚ի փայ-
 տի անդ : Երկրորդ սահմանն հաստա-
 տական է կամ թէ ասել՝ իսկական,
 բայց ոչ աւելի ինչ իմացուցանէ քան
 զառաջինն . ասէ . Նիւթն է ենթակայ
 յորմէ բաղկանայ իմն . և յոր լուծա-
 նի յետոյ : Խնդրելին այն է, ո՞ր իցէ
 այդ նախկին ենթակայ յորմէ բաղկա-
 նայցեն իրք բնութեանն :

Դարձեալ նա ինքն Արիստոտէլ
 վարդապետէ թէ առ ՚ի կազմութիւն
 բնական մարմնոյ՝ բաց ՚ի նիւթոյ խնդրի
 և այլ սկիզբն . իմա՛ տեսակ : Կարծեն
 ոմանք թէ գովին իմանայ Արիստո-
 տէլ զդասաւորութիւն մասանց . այլք
 պնդեն, թէ յայդմ զնէ նա էակու-
 թիւն իմն ՚ի գոյ ելեալ՝ ամենայնիւ
 զատուցեալ ՚ի նիւթոյ . զոր օրինակ
 յաղալ ցորենոյն . ՚ի վերայ գայ նմա
 նոր տեսակ գոյացուցիչ՝ որով ցորեանն
 փոխարկի յալիւր . և յորժամ խառ-

նեսցես ջուր ընդ ալեր, ամենայնն 'ի մի զանգուած բոլորի, յայնժամ հասանէ 'ի վերայ նորա այլ տեսակ գոյացուցիչ, որ զալիւրն և զջուր 'ի խմոր փոխէ. և յեփելն հրով զայն խմոր՝ այլ տեսակ դարձեալ գայ 'ի վերայ, որ զեփեալ խմորն առնէ հաց :

Այսպիսի գոյացուցիչ տեսակս դնէ յայլ ամենայն բնական մարմինս. զոր օրինակ յերիվարն բաց յոսկերաց, 'ի մսոյ, 'ի ջրաց, յուղղոյ, յարեանէ որ շուրջ եկեալ ընդ երակս և ընդ նեարդս սնուցանէ զամենայն մասունսն, և բաց յողոց կենդանութեան՝ որք են սկըզբունք շարժման, ընդունի այլ տեսակ գոյացուցիչ՝ զոր ասէ լինել հոգի երիվարին : Պնդէ հաստատութեամբ 'ի բանս իւր թէ այս կարծեցեալ տեսակ ոչ 'ի նիւթոյ ելանէ այլ 'ի կարողութեանէ նիւթոյն. էակ է զատուցեալ 'ի նիւթոյ, որոյ ոչ մասն է և ոչ հանգամանք :

Կարծիք են Արիստոտելի թէ ամենայն մարմինք երկրայինք կառուցեալ են 'ի չորից տարերաց. իմա՝ 'ի հողոյ, 'ի ջրոյ, յօդոյ և 'ի հրոյ : Հող և ջուր ծանունք են. զի ձգտին միաւորիլ 'ի կենդրոն աշխարհիս. և ընդ հակառակն՝ օդ և հուր զի հեռագոյն ձգին 'ի սմանէ, վասն որոյ թեթեւք են : 'ի վե-

բայ չորից այսոցիկ տարերաց յաւել
 և զհինգերորդն . յորմէ յօրինեալ ա-
 սէր զերկնայինս ամենայն , և զչար-
 ժումն նորա շրջաբերական առդնէր :
 Կարծեաց թէ 'ի վեր քան զօդս ընդ
 պարունակաւ լուսնի գուցէ կամար
 հրեղէն՝ յոր ելանէ և գումարի հուրն ,
 ըստ օրինակին որով վտակք և գետք
 հոսեն 'ի ծով :

Վասն նիւթոյ կարծիք են Արիս-
 տոտելի թէ յանհունս բաժանիցի .
 տիեզերք լի է բովանդակ , և չիք բնաւ
 տեղի դատարկ : Աշխարհս յաւիտե-
 նական է . շեղև երբէք առաջին սկիզբն
 մարդկեղէն ծննդոց . զի թէ եղև ոք
 նախաստեղծ մարդ՝ 'ի հարկէ , ասէ ,
 պարտ էր ծնանել նմա առանց հօր և
 մօր , որ է անհնարին : Չնոյն նոյնպէս
 իմաստասիրէ և վասն թռչնոց , ան-
 մարթ է , ասէ , թէ եղեալ իցէ ձու ա-
 ռաջին սկիզբն թռչնոց , և կամ թրո-
 չուն առաջին սկզբնաւորիչ ձուոց .
 քանզի թռչուն 'ի ձուոյ ելանէ , և ձու
 'ի թռչնոյ . և այսպէս կարգ ըստ կար-
 դէ վերտանէ , առանց դնելոյ առաջին
 սկիզբն : Նոյնօրինակ է մտածութիւն
 նորա և յաղադս այլում ամենայնի
 եղելոյ 'ի տիեզերս : Անապական դնէ
 զերկին , և թէպէտ որ ինչ գուցէ ընդ
 լուսնիւ 'ի ներքոյ է ապականութեան ,

այլ մասունքնոցա բնաւ ոչ սպառին, փոփոխեն զտեղին և եթ. 'ի մնացուածոյ միոյն այլ իմն յօրինի. և այսպէս յօրինուած տիեզերաց միշտ մնայ նոյն: Երկիրս 'ի կենդրոն կայ տիեզերաց, և Էակն առաջին շարժէ զերկինս զառանցիւք իւրովք 'ի ձեռն գերաբուն ողոց առ 'ի նոյն սպասաւորութիւն հրամայելոց: Յաւելու դարձեալ Արիստոտէլ, թէ որ ինչ այժմ ծածկեալ է ընդ ջրով ծովու՝ կանխաւ երկիր հաստատուն էր, և այժմու հաստատուն երկիրս ողողեսցի երբեմն յերեսաց ջուրց:

Զպատճառ այսր ամենայնի առնու 'ի փորձոյ՝ նայեցեալ ընդ այն՝ զի գետք և հեղեղատք ձգեն տանին հանապաղ աւաղ և հող, որով աճեն ծովափունք, և ծով նուազէ անզգալի օրինակաւ. այս յեղափոխութիւն ցամաքի 'ի ծով և ծովու 'ի ցամաք՝ սկսեալ և լինին 'ի բազում դարուց հետէ: Յաւել և զայն, թէ ընդ բազում վայրս մէջերկրեայս և 'ի բարձունս՝ եթող ծով խեցեմորթս 'ի մեկնել իւրում անտի. և 'ի պեղել զերկիր գտանին խարիսխք և բեկորք նաւաց: Ուլիդիոս 'ի Պիւթագորաս հանէ զչոյն կարծիս:

Արդ յայտնի երևի 'ի բանից աստի՝ զիտաւորութիւն մտաց Արիստոտէլի՝

Թէ այս ամենայն փոփոխութիւնք ծովու 'ի ցամաք, և ցամաքի 'ի ծով որք լինին անդդալի օրինակաւ և ընդ ժամանակս դարուց բազմաց՝ եղծանեն զյիշատակ անցից անցելոց : Եւ ևս, ըստ հասանել ունել աղղի աղղի պատճառաց՝ 'ի մոռացօնս լինին և արհեստք : Պատահարք այդպիսի՝ է զի ժանտախտ է, կամ պատերազմ, անպտղութիւն, սասանութիւն երկրի, և աղէտք անհնարինք՝ որք ծախսեն և սպառեն զամենայն մարդ դաւառին, թէ ոչ մազապուր անկցին ոմանք յանապատս . յոր կեան լշտօք չարչարանաց, և անդ ծնանին որդիս, որք ըստ հոլովել ժամանակաց մշակեն զերկիր, և արհեստս ճարտարամտեն : Եւ սովին օրինակաւ նոյն կարծիք խորհրդոց, և նոյն արհեստ կրկին անգամ դառնան և նորոգին : Այսպէս 'ի վերայ բերէր իմաստասէրս, թէ առ այս ամենայն յեղափոխ այլայլութեամբք՝ կազմած տիեզերացս անապական մնայ :

Չեռն արկ Արիստոտէլ 'ի խորագնին քննութիւն այնր ամենայնի որինչ միանգամ երջանկութիւն շնորհէ մարդկան յաստի կեանս : Ասիւ հերքէ զկարծիս հեշտասիրաց, որք 'ի մարմնապարար փափկութիւնս սահմանեն զեր-

Չանկութիւն կենաց : Ասէ , առ այնու զի հեշտութիւնք արագավախճան են , տհաճութիւն 'ի վերայ բերեն , տկարացուցանեն զմարմին , և ողջոյն իսկ զմարդ վարակեն ապշութեամբ :

Յետ այնորիկ մերժէ և զփառասիրացն հետապնդութիւն՝ որք 'ի պատիւս բովանդակէին զերջանկութիւն , և առ 'ի ժամանել 'ի նոյն ձեռն 'ի գործառնէին յամենայն տարադէպ հնարս : Ասէ , պատիւն 'ի պատուողն է . և թէ՛ փափաքեն ամբարտաւանք ընդունել մեծարանս 'ի փոխարէն առաքինութեանց՝ զոր որպէս թէ ունիցին , ապա ուրեմն յաւէտ յառաքինութիւնս ամրացեալ է երջանկութիւն , և ոչ թէ 'ի պատուի , որ և չէ իսկ 'ի մեզ :

Դարձեալ ընդոտնէ զարծաթասէրս՝ որք զերջանկութիւնն 'ի ճոխութեան համարէին : Ճոխութիւնք , աւսէ , ինքնին չեն փափաքելի , և հէզ թշուառական գործեն զայրն որ ունի զնոսին , և խիթայ 'ի կիրառութենէն . փոխանակ զի պարտ էր 'ի վար արկանել և բաշխել զնոսին՝ զի օգուտ մատակարարեցեն . վասն զի զերջանկութիւնն 'ի հաստատուն իրս արժան է խարսխել , որով պահպանեցի :

Յետ այսր ամենայնի յայն ապաս-

տան առնէ Արիստոտէլ զվարդապետութիւն իւր, թէ երջանկութիւնն սահմանի 'ի կատարելութիւն մտաց մերոց և 'ի կատարումն առաքինութեանց : Դարձեալ պատուականագոյն գործողութիւն մտաց մերոց՝ է հետազօտութիւն իրաց բնականաց, երկնի, աստեղաց, համօրէն բնութեան. և ևս առաւել՝ առաջին Էպկին : Սակայն հանդերձ այսու ամենայնիւ իմաստասիրէ թէ անհնարին է բովանդակութեամբ երջանկանալ մինչև ստացեալ զոր ինչ կարևորն իցէ առ իւրաքանչիւր վիճակ կենաց. քան զի առանց այնր՝ դժուարին ուրեմն է միտ դնել 'ի զննութիւն իրաց պատուականաց. և ոչ իսկ հնարաւոր է գործել զառաքինութիւն : Օրինակ իմն. չկարեմք բարերարել բարեկամաց. քանզի ընդ մեծագոյն հեշտութիւն աստի կենացս համարեալ է՝ բարի առնել որոց սիրենն զմեզ : Այսպէս բովանդակէ իմաստասիրաբար, թէ երջանկութիւն յերիս իրս սահմանի, 'ի հոգեղէն բարիս, իմա՛ իմաստութիւն, զգօնութիւն. 'ի մարմնեղէնս, որք են գեղեցկութիւն, զօրութիւն, քաջողջութիւն. և 'ի շնորհս բաղդի. այն է՝ ճոխութիւն և ազնուակասութիւն : Ասէ՛ առաքինութիւն և եթ

ոչ է ձեռնհաս երջանիկ առնել զայնու
 սիկ որք կարօտ իցեն կարևոր բարեաց
 մարմնոյ և բաղդի. և հիգացեալ է
 այր իմաստուն թէ կարօտ մնացէ յի
 րաց աստի: Հաւաստէ առ այսորիւք
 թէ ախտք իւրաքանչիւր ձեռնհաս են
 'ի թշուառութիւն խոնարհել զմարդ,
 և այր յօրացեալ փափկացեալ, որում
 յաջողեալ իցէ յամենայնի, ոչ երջան
 կանայ ցորչափ զհետ ախտից զակա
 տեալ իցէ: Իմաստունն չէ ազատ ամե
 նայնիւ 'ի խռովութեանց հոգւոյ, թէ
 պէտ և փոքու վարակեալ: Առաքինու
 թիւնք և ախտք ոչ յամենայնի ներ
 հականք են ընդ իրեարս, քանզի 'ի մի
 և 'ի նոյն մարդ պերճացեալ արդարու
 թեամբ և զգօնութեամբ, երբեմն բու
 նեալ դադարէ հեշտախտութիւն:

Յերիս տեսակս զատուցանէ զբարե
 կամութիւն. ազգականութեան, յօ
 ժարամտութեան և հիւրընկալու
 թեան: Զգեղեցիկ անուանեալ ուս
 մունսն պատկանաւորս կարծէր առա
 քինութեանց, և զայն մեծապէս միսի
 թարութիւն դնէր աւուրց ծերու
 թեան: Դաւանէր ընդ Պղատոնի զա
 ռաջին Էակն՝ ամենայնի նախախնամ:
 Ամենայն գաղափարք իրաց զորս ընդ
 ունին միտք՝ 'ի զգայութեանց մատա
 կարարին. յազազս այնորիկ կոյրն

չմարթի իմանալ զերանգս . և ոչ խուլն
զձայն :

Ի քաղաքականութեան գիրս իւր՝
զմիահեծան տէրութիւն գեր ՚ի վերոյ
դնէ քան զայլ ամենայն վիճակ պետու-
թեանց , զի յայլս բազումք են բաժա-
նորդք ՚ի գործ իշխանութեան . զոր օրի-
նակ թէ գունդ զօրու առաջնորդեալ
՚ի միոյ միայնոյ քաջնտիր հրամանա-
տարէ՝ լաւ է քան զառ ՚ի բազմաց
հրամայեալն , զնոյն է իմանալ և վասն
տէրութեանց : Այն ինչ հրեշտակք և
հրամանատարք բազմիշխան պետու-
թեան ժամովաճառ լինիցին ՚ի ժողովել
և ՚ի խորհիլ , թագաւոր ինքնիշխան՝
ամբարձաւ յաթոռն , և զխորհեալն
տարաւ ՚ի գլուխ : Գործակալք բազմիշ-
խանութեան ակնարկեն իսկ ոչ ՚ի
վզեան տէրութեանն , շատ է ճոխա-
նալ նոցա . նախանձու մաշին ընդ ի-
րեարս . և անտի հերձիք , մինչև կոր-
ծանումն ՚ի վերայ բերել տէրութեան .
և այն զի ՚ի միապետութեան՝ ամենայն
յոյս շահու թագաւորին ակնարկէ յօ-
գուտ պետութեան իւրոյ , և աշխարհն
ողջոյն բարգաւաճ՝ ծաղկազարդէ :

Հարցաւ երբեմն Արիստոտէլ , զի՞նչ
շահին ստախօսք . ետ պատասխանի .
զայն՝ զի ոչ դք հաւատայ նոցա , թէ և
զձմարիտն խօսիցին : Իբրև այր ոմն

մեղադիր լինէր նմա՝ փոխանակ զի ետ
 ողորմութիւն առն ուրումն վատթա-
 րի. ասէ, ոչ զի չար է՝ եղէ նմա կարե-
 կից, այլ զի մարդ է: Այս էր խրատ
 նորա առ բարեկամսն և աշակերտսն .
 թէ գիտութիւն այնպէս է առ հոգի՝
 որպէս լոյս առ աչս. որոյ թէ դառինք
 են արմատք, քաղցրահամ են պտուղք:
 Առ անգամ մի յուզեալ ՚ի ցասումն
 ընդդէմ աթենացւոց, նախատէր ըզ-
 նոսա, զի գտեալ զօրէնս, առ նմին և
 զցորեան, բովանդակ յոյս նոցա ՚ի ցո-
 րեանն էր, զանց արարեալ զօրինօք:
 Իբրև հարցաւ թէ ո՞ր այն է որ փու-
 թով եղծանիցի. ետ պատասխանի .
 Երախտագիտութիւն: Իսկ զի՞նչ յոյսն.
 ասէ. Երազ առն զարթուցելոյ: Եղև
 երբեմն Գիողինեսի մատուցանել նմա
 թուզ մի. քաջ խելամուտ լեալ Ա-
 ըխտոտելի զի ՚ի չառնուլ իւր զպտուղն՝
 պատճառս տայ ծաղու բանից Գիո-
 գինեսի, ընկալաւ զայն, և ասէ ժպտե-
 լով. կորոյս Գիողինէս և զթուզն և
 զօր կամէր առնել նովաւ: Երեք իրք
 են, ասէ, կարևորք մանկանց, աշխոյժ
 մարդութիւն և խրատ: Ի հարցանել
 ոմանց, զի՞նչ խտիր է ընդ իմաստունս
 և ընդ տգէտս. որ ինչ, ասէ, ընդ կեն-
 դանիս և ընդ մեռեալս: Գիտութիւնն,
 ասէր, զարդ է ՚ի յաջողուածս, և ա-

պաւէն 'ի ձախողակս: Որք միանգամ
բարիօք դաստիարակեն զմանկունս՝ ա-
ռաւելագոյն իրաւամբք հայր անուա-
նին նոցա, քան որք ծնանն զնոսա-
քանզի ծնողք կեանս միայն ետուն նո-
ցա. իսկ վարժապետք զբարիօքն կեալ:
Գեղեցկութիւն՝ յանձնարարութիւն
է ազդողագոյն քան զամենայն նամակ:
Եհարց ոմն ցնա՝ թէ զլինչ արժան է
դորձել աշակերտաց նորա առ 'ի բա-
րիօք յառաջադիմութիւն. ետ պա-
տասխանի. նկրտել պարտ է՝ ժամա-
նել յառաջացելոց, և ոչ մնալ որոց
զկնի դայցեն: 'Ի պանծալ ուրուք թէ
ծնունդ է մեծի քաղաքի. ասէ Արիս-
տոտէլ, ոչլինչ է բանդ. զայն մտածեա՝
թէ արժանի իցես քաղաքացի լինել
մեծի քաղաքի:

Ակնարկեալ Արիստոտելի երբեմն
ընդ կեանս մարդկան՝ ասէր, են մար-
դիկ որք ամբարեն ճոխութիւն անյազ-
ցանկութեամբ՝ որպէս թէ անմահք
իցեն. և այլք վատնեն զոր ունին, իբ-
րև թէ առ վաղիւ մեռանիցին: Հար-
ցեալ. զլինչ է բարեկամ. ասէ. Մի հո-
դի յերկուս մարմինս: 'Ի հարցանել
ուրուք ցնա, որպէս վարեսցուք ընդ
բարեկամս մեր. ետ պատասխանի Ա-
րիստոտէլ, որպէս կամիմք վարել այ-
լոց ընդ մեզ: Հոգւոց հանէր բազում

անգամ. Ո՛վ բարեկամք իմ. չիք որ բարեկամ յաշխարհի: Ի հարցանել ուրուք ցնա. զի է զի գեղեցիկ մարդիկ հաճոյ թուին մեզ, և ոչ տգեղք. ասէ, զառն կուրացելոյ հարցումն հարցանես ընդ իս: Իբրև հարցեալ լինէր, զի՞նչ օգուտ կ'թեցեր յիմաստութենէ. տայր պատասխանի. առնել յօժարութեամբ զայն ամենայն, զոր այլք ՚ի հարկէ առնեն առ ահի օրինաց: Աւանդեն թէ մինչ բնակէր Արիստոտել յԱթէնս՝ ընտանի էր օրինօք բարեկամութեան առն ուրումն հրէի իմաստնոյ, յորմէ ուսաւ բովանդակ զգիտութիւն և զկրօնս եղիպտացւոց, զոր այլք զայնու ժամանակաւ երթային ուսանել յԵգիպտոս:

Յետ զամս երեքտասան ուսուցանելոյ Արիստոտելի ՚ի Լիկէոն մեծապատիւ շքով, Եւրիմիդոն քուրմ Դեմետրեայ դից ամբաստան եղև զնմանէ իբրև գործօն ամբարշտութեան լինել. ահարկ ՚ի սիրտ Արիստոտելի յիշատակ աղետից Սոկրատայ, վասն որոյ եդ ՚ի մտի տարազնաց մեկնիլ յԱթենայ: Գնաց ՚ի Քակիս Եւբէոյ, (որ այժմ է յըրիպօզ): Ըստ բանից ոմանց՝ մեռաւ առ վշտաց սրտին վասն ոչ բովանդակ ՚ի վերայ հասանելոյ պատճառաց տեղատութեան և մակընթացու-

Թեան որ առաւելու 'ի նեղուցն եւ
բէական: Ե՛ն որք 'ի վերայ յաւելուն՝
Թէ դահավէժ կորեաւ 'ի ծով անդր, և
ասաց յանկանելն . Թող ընկլցէ զիս
ծով, փոխանակ զի ես նմա չեղէ հա-
սու: Այլք դարձեալ հաւաստեն Թէ
մեռաւ 'ի խիթս ցաւոց սաստկու-
թեան՝ 'ի հասակի վաթսուն և երից
ամաց, երկու ամօք զկնի մահու Աղեք-
սանդրի: Ստագիրացիք կանգնեցին
նմա սեղան իբրև աստուածոյ:

Եթող Արիստոտէլ 'ի մահուն իւ-
րում զամենայն զգիրս յօրինեալս իւր
'ի Թէոփրաստոս. 'ի նմանէ անցին առ
Նելէոս ոմն և առ Ժառանգս նորա .
որք խիթացեալ Թէ մի արդեօք բռնի
առնուցուն զայնս 'ի նոցանէ Թադա-
ւորք Պերգամոնի՝ և դիցեն 'ի մեծի
գրատան իւրեանց՝ զոր կառուցեալ էր
նոցա, Թաղեցին ընդ հողով, ուր ա-
պականեցան ըստ բազում տեղեաց:
Յետ ամաց հարիւր և երեսնից գտան
և վաճառեցան Ապելլիկոնի ումեմն
տէացւոյ, որ զպակասորդսն և զապա-
կանեալսն լրացոյց ըստ իւրոց քմաց:
Նոյնպէս արար յետոյ և Տիւրաննիոն
քերական՝ որում յանձն արար զայնս
Սիլւա դիկտատոր հռովմայեցի, որ
յԱթենայ տարաւ զգիրսն զայնոսիկ
'ի Հռովմ: Զայս ամենայն Անդրոնի-

կոս հռոդացի կարգաւորեալ 'ի լոյս
 եհան. որ յետ դասաւորելոյ զտրամա-
 բանութիւնն, զբարոյականն և զբնա-
 բանութիւն, որ ինչ ճառք յաւելան
 անտի յաղագս էակաց, և չգիտելով
 թէ յինչ կարգ դասաւորեսցէ, յա-
 բեաց 'ի բնաբանութիւնն, մակագիր
 եղեալ Յետ բնաբանականաց. կամ
 ըստ յոյն ձայնի Մէդադաֆիզիկա.
 յորմէ ձայնդ Մէդաֆիզիկա, որ այժմ
 նշանակէ զայն մասնն իմաստասիրու-
 թեան որ աւանդէ յաղագս հոգեղէն
 գոյացութեանց :

Արիստոտէլ արար կտակ 'ի մահուն
 իւրում, որոյ կատարիչ եղև Անտի-
 պատրոս: Եղև նորա ուստր մի Նիկո-
 մաքոս անուն, և դուստր մի՝ զոր առ-
 իւր 'ի կնութիւն թոռն Դեմարատոսի
 արքայի լակեղեմոնացւոց :

Ք Ս Ե Ն Ո Կ Ր Ա Տ Է Ս

Յաջորդեաց զՍպեւսիսպոս յառաջ-
նորդութիւն պղատոնեան դպրոցին յեր-
կրորդ ամի հարիւրորդ տասներորդ
ողիմպիագին. կալաւ զայն ընդ ամս
քսան և հինգ. մեռաւ յերրորդ ամի
հարիւրորդի վեշտասաներորդի ողիմ-
պիագին :

Ր Ե Ղ քաջանուն իմաստասէրս
նախնոյն Ակագեմիայ համարեալ է
Քսենոկրատէս՝ առ զղօնութեան, ի-
մաստութեանն և անարատ զգաստու-
թեան : Քաղկեդոնացի էր, որդի Ա-
ղաթենորի. անդստին ՚ի պատանեկու-
թենէն աշակերտեցաւ Պղատոնի, յոր
յարեալ էր ՚ի սերտ սրտէ. զի զնաց
ընդ նմա ՚ի Սիկիլիա՝ մինչև յարքու-
նիս Դիոնեսիոսի բռնակալի : Յաջո-
ղակ էր ՚ի ժրութեան մտացն, խորա-
զնին, այլ յուշիկ : Ի զուգակշռել զնա
Պղատոնի ընդ Արիստոտելի՝ ասէր
թէ միոյն սանձ պիտի, և երկրորդին
խթան : Ասէր երբեմն և ընդ կատակս.
Ըծեմ ես զայս էշ ընդ այնմ ձիոյ : Սա-
կայն բնաւորութիւն վարուց Քսենո-

կրատայ ծանր էր և խիստ . մինչև ընդ
խաղ ասել ցնա Պղատոնի . Երթ
Քսենոկրատէս՝ աղաչեմ զքեզ՝ երթ
զոհեա՛ աստուածուհեացն Շնորհաց ,
Հանսպաղորդէր յԱղաղեմիայն , և
անդ մնայր ցանդ :

Յանցանել իւրում երբեմն ընդ փո
ղոցս Աթենայ՝ երիտասարդք խենէչք
սպասեալք մնային նմա՛ վշտագնել և
տառապեցուցանել զնա : Հանդուր-
ժեաց նա դժնդակ անցից , լարեալ
խաբէութեանց , և հրապուրիչ հնա-
րագիտութեանց : Արութեամբ քա-
ջութեամբ սանձ արկ նա եռանդեան
կրից իւրոց . և գիտաց ՚ի դերև հա-
նել զբռնամարտիկ փորձանսն զլա-
րեալսն ՚ի կախարդասար պոռնկէն
Փրինեայ՝ որոյ դուն ՚ի վերայ եղեալ
էր յաղթել անպարտելոյն Քսենո-
կրատեայ : Յաւուր միում մինչ առա-
ւել քան զսովորականն արբեալ էր նո-
րա . եմուտ առ նա վատշուէրն . և
թէպէտ բազում ժամս մնաց առ նմա՛
այլ ոչինչ յաջողեաց յանօրէն խոր-
հուրդս իւր : Այնուհետև ամօթ հա-
մարեալ անձին կնոջն՝ զի վստահու-
թիւն իւր հողմոյ ցնդեցաւ , խորհուրդ
կալաւ ջնջել զնախատինսն դրուագօք
ամօթալի բանից՝ որք սովորեալ զէնք
են ապիկարի և հիգացելոյ :

Վճարեալ վերջացեալ էր Քսենոկրատայ յամենայն անձնդիւր շահու։ 'ի յղել երբեմն առ նա Աղեքսանդրի արծաթ բազում, ընկալաւ միայն երիս մնասս ատտիկեան, և զաւելին ետ տանել անդրէն, ասելով ցպատարադաբերսն. Բազում մարդիկ են Աղեքսանդրի կարօտք խնամոց նորա, վասն որոյ բազում արծաթոյ պէտս ունի նա առաւել քան զիս։ Յայլում նուազի Անտիպատրոս արքայ կամեցաւ նոյնօրինակ նուիրօք պատուել զնա. շնորհս կալաւ նմա Քսենոկրատէս, և ոչինչ էառ 'ի պարգևաց նորա։

Մինչդեռ 'ի Սիկիլիա էր՝ ընկալաւ պսակ ոսկի իբրու տրիտուր և վարձ քաջութեան նորա յըմպել առաւել քան զայլս։ Ոչ յօժարեաց Քսենոկրատէս շահել 'ի մրցանակէ անտի. այլ 'ի դառնալ իւրում յԱթէնս՝ տարաւ եղ զպսակն առ ոտիւք Հերմեսի դից՝ նուիրեալ զայն նմա, որում յառաջն մատուցանէր յաճախ պսակ բոլորեալ 'ի ծաղկանց։

Առաքեցաւ Քսենոկրատէս առ Փիլիպպոս արքայ ընդ այլ բազում հրեշտակս. ընկալաւ զնոսա թագաւորն մարդասիրութեամբ, արար նոցա խընջոյս, և բազում պարգևօք մեծարեաց զնոսա, 'ի բազում նուազս լուաւ բա-

նից պատգամաւորութեան նոցա, և
 յարդարեաց դյօժարութիւն նոցա՝
 կամակատար լինել հաճոյից իւրոց :
 Քսենոկրատէս միայն բացէ ՚ի բաց
 հրաժարեաց ՚ի պարգևաց Փիլիպպոսի,
 և ոչ երևեցաւ ՚ի կոչունսն և յա-
 կումբս նորա ընդ նոսա : ՚ի դառնալ
 իւրեանց յԱթէնս՝ ցուցին պատգա-
 մաւորքն առ ժողովուրդն՝ թէ վայրա-
 պար էր յղել նոցա զՔսենոկրատէս
 ընդ ինքեանս, զի յոչինչ իրս սատար
 եղև նոցա : Ժողովուրդն համօրէն
 ստրջացաւ ընդ այն, և փոքր մի ևս՝
 պատժապարտ տուգանաց դատէր զնա.
 յայնժամ Քսենոկրատէս ՚ի վեր առ
 զպատրուակն, խելամտեցոյց նոցա ըզ-
 բովանդակն, և զգացոյց աթենացւոց՝
 քան զայլ ամենայն ինչ կամակար միտ
 դնել այնմ գործոյ հասարակաց. և զի
 Փիլիպպոս ճոխապանժ պարգևօք իւ-
 րովք կաշառաբեկս վատթարեաց ըզ-
 հրեշտակսն ամենայն՝ որք միայն ջա-
 նան առնել զոր ինչ հաճոյ է յաչս նո-
 րա. իսկ ինձ՝ ասէ, ոչ մարթացաւ
 Փիլիպպոս պարգևել ինչ : Յայնժամ
 մթերեալ արհամարհութիւնն ՚ի վե-
 րայ Քսենոկրատայ՝ փոխեցաւ ՚ի մե-
 ծարանս նորա, և հռչակաւ զհամբա-
 ւի հարան իրքն. խոստովան եղև Փի-
 լիպպոս՝ թէ ՚ի մէջ ամենայն հրեշտա-

կացն յղելոց՝ միայն Քսենոկրատէս
չհայեցաւ ՚ի պարզեւս իւր, և ոչ ընկա-
լաւ ինչ անտի:

Առ լամեան պատերազմաւ՝ Անտի-
պատրոս գերեաց զյոգունս յաթե-
նացւոց. յայնժամ առաքեցին աթե-
նացիք զՔսենոկրատէս՝ փրկանաւորել
յԱնտիպատրոսէ զկալանաւորսն: Ի
հասանել նորա՝ Անտիպատրոս չև խօ-
սեցեալ ինչ վասն որոց իրաց եկեալն
էր՝ արկ նմա սեղան: Քսենոկրատէս
ետ պատասխանի, կացցէ առ վայր մի
սեղանդ. զի ճաշակեցից և ոչ ինչ՝ մինչ-
չև ՚ի գլուխ հանեալ իցեմ զպատգա-
մաւորութիւն իմ, և զքաղաքակիցս
զերծուցեալ: Աքանչացեալ Անտի-
պատրոսի ընդ յօժարութիւն Քսենո-
կրատայ առ հայրենիս իւր, ձեռն ՚ի
գործ արկ, և զարմացաւ ընդ կորով
մտաց նորա: Սահմանեցաւ գործն և
գերեալքն ելին յազատութիւն:

Եւ եղև մինչ տակաւին ՚ի Սիկիլիա
էր Քսենոկրատէս, ասաց Դիոնեսիոս
ցՊղատոն. հատցէ ոք զգլուխ քո.
Քսենոկրատէս որ անդ մօտ կայր, ա-
սաց. անհնար է լինել իրացդ՝ մինչև
հատեալ զխոյս իմոյ: Յայլում նուա-
զի երբ յԱթէնս էր Անտիպատրոս՝
գնաց յողջոյն Քսենոկրատայ. և զի
նա ընթեռնոյր յայնժամ ճառս իմն՝

ոչ խրամատեաց զընթերցումնս, և շեռ նմա պատասխանի, մինչև աւարտեաց զկարդացումնս :

Յորժամ Սպեւսիպպոս իմաստասէր եղբօրորդի և յաջորդ Պղատոնի Սկադեմիայն՝ ծերացաւ խօթացաւ և մերձեցաւ ՚ի յետին աւուրս կենաց իւրոց, յղեաց կոչեաց զՔսենոկրատէս, և աղաչեաց զնա նստել դահա գլուխ լսարանին ՚ի տեղի իւր: Յանձն առ Քսենոկրատէս, և ձեռն արկ ՚ի հրապարակաւ վարդապետութիւն: Եթէ երթայր ոք ՚ի դպրոց նորա՝ անձաշակ ամենեին երաժշտութեան, կամ երկրաչափութեան, կամ աստեղաբաշխութեան, բարեկամ, ասէր, ՚ի բաց կաց աստի, զի ոչ գիտես զհիմունս և զգեղեցկութիւն իմաստասիրութեան:

Արհամարհէր Քսենոկրատէս ըզփառս և զպերճութիւն, սիրելի էր նմա առանձնութիւն, և աւուր աւուր ժամս ինչ կայր միայնացեալ:

Մեծապատիւ մեծարէին զնա աթե նացիք, և ակնածէին յանարատութենէ կենաց նորա. այնչափ՝ զի երբ յաւուր միում մատուցեալ առաջի դատաւորաց տալ վկայութիւն իրաց ինչ, այն ինչ մատչէր ՚ի սեղան գից երդնուլ՝ ըստ օրինաց աշխարհին թէ ճշմարիտ է զոր ինչ ասացն, յոսն կա-

ցին դատաւորք և արգելին զնա յերդմանէն. ասեն, վայրապար է երդումն քո, զի հաւատամք մեք որոց ասացերդ :

Զայնու ժամանակաւ երիտասարդոմն ասթենացի Պողեմոն անուն՝ որդի Փիլոստրատոսի՝ կայր ՚ի քաղաքի անդ կեանս իմն ունելով ցովի և խենէշ : Եւ մուտ սա յաւուր միում ՚ի լսարան Քսենոկրատայ արբեալ և ծաղկապսակ՝ խաղ առնել զիմաստասէրն, մինչ դեռ նա ճառ արկեալ վարդապետէր յաղագս անժուժկալ շուայտութեան : Քսենոկրատէս ոչինչ ընդհատեալ ըզբանսն՝ յառաջ խաղաց ազդողազոյնս և հլօրագոյնս իբրև զառաջինն : Ի սիրտ և հոգի հարաւ Պողեմոն, զի յայնմ հետէ հրաժարեաց ՚ի տարօրէն կենացն՝ և ուշ եդ ՚ի հրահանգս խրատուց բարեկրթութեան. որպէս՝ զի ՚ի սուղ ժամանակի ՚ի զլուխ առաքինութեանցն ժամանեալ, յաջորդեաց ըզվարժապետ իւր զՔսենոկրատէս :

Են Քսենոկրատայ և վաստակք մատենագրութեան ՚ի քերթուած և յարձակ խօսս. ՚ի բազմաց անտի՛նուիրեաց զմին Աղեքսանդրի, և միւս ևս Եփեստիոնի : Սակայն զի անաչառ էր, եղեն նորա թշնամիք բազումք : Աթենայիք վաճառեցին զնա որպէս զի ան-

օգնական կորիցէ . զնեաց զնա Դե-
մետրիոս Փաղերէոս՝ որ յայնմ ժա-
մանակի մեծապէս պատուեալ էր յա-
թենացւոց , և արձակեաց յազատու-
թիւն . մինչև ուր ուրեմն շատ գրեցին
աթենացիք ՚ի բաց տարագրել զնա :

Հասեալ Քսենոկրատայ ՚ի հասակ
ամաց ութսուն և երկուց , անկաւ գի-
շերայն ՚ի վերայ կոնքի ընդ որ հարաւ
՚ի մթութեան ժամուն , և անդէն մե-
ռաւ : Վարդապետեաց ՚ի լսարանին
զամս քսան և երկու : Ծաղկեաց յա-
ւուրս Լիւսիմաքեայ մակեդոնացւոց
արքայի ՚ի հարիւրորդ երկրորդ ողիմ-
պիադին :

Դ Ի Ո Գ Ի Ն Է Ս

Մեռաւ յառաջնում ամի հարիւր չորս
բերասան ողիմպիագին, 'ի հասակի
իննսուն ամաց. զորոյ զհետ դայ դնել
զնա ծնեալ յերրորդ ամի իննսներորդ
առաջներորդ ողիմպիագին:

Դ Ի Ո Գ Ի Ն Է Ս կիւնիկեան որդի
Իսեկիոսի սեղանաւորի՝ ծնաւ 'ի Սի-
նոպ քաղաք Պատիզագոնիոյ՝ զինսներորդ
առաջներորդ ողիմպիագաւ: Ամբաս-
տանութիւն եղև զնմանէ վասն խար-
դախելոյ ընդ հօրն սուտ դրամս: 'Ի
բանտ արկաւ Իսեկիոս և անդ մեռաւ.
զարհուրեալ ընդ այն Դիոզինէսի՝
փախեալ յԱթէնս և անյապաղ մա-
տեաւ առ Անտիսթենէս՝ որ 'ի բաց
մղեաց և վանեաց զնա գաւազանաւ,
զի հաստատեալ էր նորա 'ի մտի՝ ոչ
աշակերտել զոք բնաւ: Ոչ պակեաւ
ընդ այն Դիոզինէս, խոնարհեցոյց
զգլուխն և ասէ, հար հար և մի երկն-
չիւր, ոչ գտանես գաւազան ամրակուռ
'ի բաց մերժել զիս 'ի քէն ցորչափ կայ
քօ լեզու: Յաղթահարեալ Անտիս-

Թենէսի 'ի կամակարու-թենէ նորա՝
յօժարամտեաց աշակերտել զնա :

Ազգատու-թեամբ անցուցանէր Դիո,
գինէս զաւուրս իւր՝ իբրև այր տարա-
գիր 'ի հայրենի երկրէն, և ոչ ընդու-
նէր ուստեք օգնու-թիւն: Տեսեալ նորա
յաւուր միում զի մոռկն մի կայտուա-
լով վազվազէր, և ոչ զարհուրէր 'ի վե-
րահաս գիշերոյ, և ոչ ուրեք ապաստան
խնդրէր, և ոչ կերակուր հանդերձէր,
այս զօրավիգն եղև նմա 'ի կարօտու-
թեան իւրում. այնուհետև հաստա-
տեաց 'ի խորհուրդս՝ կեալ հանդար-
տու-թեամբ առանց տազնապելոյ և ոչ
մթերել զայն ամենայն առանց որոց
հնարաւոր իցէ կեալ: Արկնապատ-
կեաց զաղաբողոն իւր՝ զի պատատեալ
'ի նմին՝ շատ լիցի ինքեան իբրև անկո-
ղին և օթոց. ստացաւ գաւազան մա-
խաղ և սկուտեղ մի. այսոքիկ էին ա-
մենայն կարասիք նորա: Ոչ երթայր
օւրեք՝ առանց ընդ իւր տանելոյ զայն
ամենայն հանդերձանս. իսկ զգաւա-
զանն վարէր՝ երբ յանդաստանս գնայր,
կամ յորժամ հիւանդ էր: Սովորու-
թիւն էր նորա ասել. իսկապէս տա-
ռապեալք ոչ կոյրք են, և ոչ խուլք,
այլ որոց պակասիցի մախաղ: Միշտ
բոկոտն ընթանայր, և ոչ երբէք ագա-
նէր սանդալս նա և 'ի ձիւնեղն յոր-

դուժեամբ : Չեռն 'ի գործ արկ վար-
 ժել զանձն ուտել հում միս , այլ ոչ
 մարթացաւ :

Աղերս արկ Դիողինէս առ այր ոք՝
 տալ ինքեան 'ի տան իւրում խորշ մի ,
 զի անդ բնակեսցէ երբեմն . և տեսեալ
 զայրն զանդաղկոտ 'ի պատասխանի
 հայցուածոցն , եզիտ տակառ մի , զոր
 յամենայն տեղիս ընդ իւր յածեցու-
 ցանէր , և ոչ ևս կարօտացաւ տան :
 'Ի հրատապ ջերմութեան ամարայնի
 թաւալէր 'ի վերայ կիզանող աւազոյ ,
 և 'ի ձմեռնային խստաշունչ ցրտու-
 թեան գիրկս արկանէր ձիւնապատ
 արձանաց , զի սովորեսցի դիւրաւ հան-
 դուրժել վշտաց սօթոյ և ցրտոյ :

Աբհամարհէր զամենեքումբք . զեղիսս
 և շուայտոտս համարէր զՊղատոն և
 զաշակերտս նորա , և զատենաբանս
 կոչէր ստրուկս ժողովրդեան : Ասէր ,
 մրցանակք պսակաց են զաղփաղփուն
 նշանակք փառաց , իբրև զպղպջակ
 ջուրց որք ընդ երևելն և ցնդին . և տե-
 սարանք 'ի զարմանս են միայն ան-
 մտաց : Այսպէս ոչինչ զերծ էր յան-
 սանձ երգիծանաց նորա : Ուտէր , խօ-
 սէր , և ննջէր անխտիր յամենայն տե-
 ղիս ո՛ւր և գտանէր : Երբեմն ցուցեալ
 զսրահն Դիոսի՝ աղաղակէր . Աթենա-
 ցիք շինել ետուն վասն իմ հոյակապ

տեղի, զի անդ դնացեալ կերից : Սո-
վորութիւն էր նորա ասել . Ակնար-
կեալ իմ ընդ աւագանին, ընդ բժիշկս
և ընդ իմաստասէրս որք են յաշխար-
հի, համարեցայ ընդ միտս իմ հաւա-
տալ թէ մարդ իմաստութեամբ իւ-
րով գեր 'ի վեր է քան զանասունս .
սակայն առ նմին յորժամ տեսանեմ
զմոզս, զերազահանս, և զփբացեալն
ճոխութեամբք և պատուով խորհուրդ
ինձ ընդ միտս հարկանի՝ դնել զմարդ
անմիտ քան զպաճարս :

Տեսեալ նորա 'ի զգնալն զմանուկ
մի որ ջուր բմպէր ափով ձեռինն, զա-
մօթի հարաւ և ասէ . որպէս քաջ գի-
տեն մանկունք առաւել քան զիս՝ զոր
ինչ աւելորդ իցէ . և հանեալ զսկու-
տեղն 'ի մախաղէն խորտակեալ փըշ-
րեաց, իբրև անօգուտ և աւելորդ կա-
րասի :

Դրուատէր գովութեամբ զորս յօ-
ժարեցցին յամուսնութիւն, այլ ոչ
ամուսնացին . ըստ օրինակի ուղևո-
րաց, որոց հանդերձեալ զպէտս ճա-
նապարհին ուղևոյ լինել նաւուք, կա-
ռուցեալ մնասցեն 'ի ցամաքի : Ոչ
նուազ 'ի նմանութենէս զուգակշռէր
զորս ընտրին 'ի գործ հասարակաց մա-
տակարարութեան, և ոչ կամիցին
յանձին ունել զայն . որպէս որոց այն

ինչ հասանիցէ բաղմել 'ի սեղան ընդ
Թագաւորս և ընդ մեծամեծս, դարձ-
ցին 'ի տունս իւրեանց :

'Ի բարոյականն միայն հպատակէր
Դիողինէս, և զանց առնէր բովանդակ
զայլ ամենայն գիտութեամբք . աշ-
խոյժ էր ոգւով, և կանուխ զառաջ
առնոյր զբանիցն զոր ինչ հնար էր ընդ
դէմ առարկանել նմա : Չամուսնու-
թիւնն ոչ դրէր նա յօրինաւորաց սա-
կի, ամենայն կանայք, ասէր, հասարա-
կաց լիցին, և ամենայն այր զայն կալ-
ցի՝ որ սէր յօրդորեսցէ 'ի նա : Բնաւ
ոչ դնէր անպատշաճ առնուլ զիրս ո-
րոց պէտս ունէր, մանաւանդ թէ չէ
արժան ասէր, տազնապիլ 'ի պակա-
սութիւն կարեւորացն : Լաւագոյն է
մխիթարել, քան անձամբ զանձն կա-
խել :

Չեռն արկ երբեմն բանս 'ի մէջ առ-
նուլ վասն հարկաւոր և օգտակար ինչ
խնդրոյ, և ամենայն մարդիկ որ ան-
ցանէին առ նովաւ, զանց առնէին
ուսկն դնել բանից նորա . յայնժամ
ձայն բարձեալ սկսաւ երգել Դիողի-
նէս . և ահա կուտեալ խոնեցան մար-
դիկն մի զմիով 'ի վերայ նորա, յորմէ
պատճառ կալաւ Դիողինէս կշտամ-
բել զնոսա վասն յօժարութեան իւ-
րեանց առ անպիտանս, և անհոգու-

Թեան յուկնդրութիւն շահեկան խորհրդոց :

Չարմացեալ էր նորա ընդ քերականս՝ որք ծանու վշտօք տաղնապէին հասու լինել բովանդակ՝ ամենայն աղետիցն Ոգիսեայ յուղեգնացութեան իւրում, և այն զի բնաւ ոչ ակնարկէին յաղէտս նեղութեանն զոր ինքեանք կրեն : Երգիծանէր զերաժիշտս որք ջան՝ ի գործ արկեալ վաստակեն ՚ի զուգայարդար յարմարութիւն նուագաց. փոխանակ զի պարտ էր, ասէ, սկիզբն առնել հանդերձանաց ոգւոց իւրեանց : Աշտամբէր զչափաբերս՝ որոց զհետ պնդեալ զարեգական, զլուսնի և զայլոց աստեղաց՝ ոչ ակնարկեն խելամտել որոց գուցեն յայսմ աշխարհիս : Նոյնպէս զայրացեալ էր ընդդէմ ատենախօսաց՝ որք ՚ի բարւոք խօսել ժամավաճառ լինին, և ոչ ՚ի բարիօք գործել : Ածանէր ծանր նախատանօք զազահս ոմանս՝ որք վճարեալ ցուցանեն զանձինս յամենայն շահուանձին, և ՚ի գովութիւն առնուն զորս արհամարհեն զինչս. սակայն ամենայն խորհուրդք նոցա ջանան հնարին շեղջակուտել արծաթ :

Չիք ինչ, ասէր, ծաղու արժանի քան զգործս ոմանց ՚ի մարդկանէ, որք պատարագեն դից՝ առողջութեան շնորհ

մաղթեալ 'ի նոցանէ, և ելեալ 'ի պաշտամանց անտի զեղիսին 'ի խնջոյս մահարարս: Դարձեալ բազումք են, ասէ, որք ջանան ճգնին յաղթել իրերաց 'ի կատականս, այլ ոչ ոք զբարիոք նախանձն նախանձի՝ յառաջ նահատակել 'ի ճանապարհս առաքինութեանց:

Տեսեալ Դիողինեայ յաւուր միում զՊղատոն որ 'ի բազմախորտիկ կոչունս ուրեք՝ ուտէր ձիթապտուղ և եթ, ասէ ցնա, զի է զի դու որ իմաստնաբար կեաս, ոչ ուտես ազատօրէն 'ի կերակրոցն՝ որք քեզ անցանել ետուն 'ի Սիկիլիա: Ետ պատասխանի Պղատոն. սովորական կերակուր էր իմ 'ի Սիկիլիա՝ կապար, ձիթապտուղ, և որ ինչ նոցին նման է, որպէս և աստ նոքք կերակրիմ: Դիողինէս, ասէ, իսկ ընդէր գնայիր 'ի Սիրակուսա. թերևս չկայի՞ն քեզ յայնժամ յԱթէնս կապար և ձիթապտուղ:

Էր երբեմն Պղատոնի հիւրընկալել և ընթրիս տալ ոմանց 'ի բարեկամաց Դիոնիսեայ բռնաւորի. եմուտ Դիողինէս 'ի տուն նորա. և կոխոտեալ ոտիւքն զգորգ մի պատուական, կոխոտեմ՝ ասէ, զամբարտաւանութիւն Պղատոնի՝ Այո, ասէ Պղատոն, սակայն այլով իմն ամբարտաւանութեամբ:

Սոփեստէս ոմն ցուցանել կամեցեալ Բիողինեայ զհանձար մտաց իւրոց, ասէ ցնա. շես դու՝ որ ինչ ես եմ. իսկ զի ես մարդ եմ, ապա դու շես մարդ: Ճամարիտ լինէր բանդ, ասէ Բիողինէս, եթէ այսպէս սկսանէիր, շեմ ես այն որ ինչ դուդ ես. քանզի զհետ բերէիր յայնժամ թէ դու ինքն շես մարդ:

Հարցաւ երբեմն, յոր սահմանս Ելլադայ տեսեր արս իմաստունս. ետ պատասխանի. տեսի մանկունս ՚ի Լակեդեմոն, իսկ արս կատարեալս՝ ոչ ուրեք: Յաւուր միում լուցեալ լապտեր շրջէր ՚ի հրապարակս ՚ի միջօրէի. և ՚ի հարցանել թէ զի գործես. ետ պատասխանի. մարդ խնդրեմ: Բարձեալ յայլում նուազի ձայն բարձեալ ազաղակէր ՚ի փողոցի. ո՛վ մարդիկ. ո՛վ մարդիկ. և ՚ի խոնել բազմաց զնովաւ, ՚ի բաց մերժէր զնոսա Բիողինէս՝ ասելով. զմարդիկ կոչեմ ես: Բիմոսթենէս մինչ ուտէր յաւուր միում ՚ի պանդուկի, ետես զԲիողինէս զի անցանէր ընդ այն, և թազեաւ վաղվաղակի. այլ Բիողինէսի տեսեալ զնա, ասէ. մի թազչիր. զի որչափ հնարիս ծածկել զքեզ ՚ի պանդուկիդ, այնչափ ՚ի խորս մտանես: Ետես յայլում նուազի զօտարականս ոմանս եկեալս ՚ի տե-

սանել զԴիմոսթենէս . մատեաւ առ
 նոսա Դիոգինէս . եցոյց զնա մատամբ
 իւրով և ասէ ծիծաղելով . ահա սա է,
 տեսէք զմեծ ատենախօսն աթենացւոց :

Ի մեծակառոյց ապարանս ուրեք՝
 ուր յաճախութեամբ էր ոսկի և մար-
 մարիոն , մանր զննեալ զգեղեցկակեր-
 տութիւնսն , հազաց , ելից զբերանն
 խխով , և եթուք յերեսս փռիւգացւոյ
 ուրումն որ ցուցանէր նմա զապա-
 րանսն . ասէ . բարեկամ , չգտի այլ տե-
 ղի յոռեգոյն յոր թքանէի : Յաւուր
 միում գերծեալ նորա զմօրունն կխտով
 մասամբ՝ եմուտ ՚ի տեղի ուրեք ուր ժո-
 ղովեալ էին երիտասարդք ոմանք և
 զբօսնուին , յորոց բազմադէմ նախա-
 տանօք ծաղրեալ և արհամարհեալ ել
 արտաքս , և վասն վրէժ լուծանելոյ ՚ի
 նոցանէ՝ գրեաց ՚ի քարտի զանուանս
 ամենեցունն նոցա , և կարեալ զայն
 զթիկամբք իւրով զգնայր ընդ փողոցս՝
 իմացուցանել զայն ամենայն տեսո-
 ղաց , և համբաւ չար հանել զերիտա-
 սարդացն : Այր ոմն չարագործ նա-
 խատէր զնա երբեմն վասն աղքատու-
 թեանն . ետ պատասխանի Դիոգինէս՝
 իմ չիք տեսեալ պատուհասել զոք
 վասն այդր բանի , թէպէտ և յոլովս
 տեսեալ եմ անզգամս վարեալ ՚ի կա-
 խաղան : Բազում անգամ սովորու-

Թիւն էր նմա ասել, բազում ուրեք
 դործոց շահաւորաց նիազ է պատիւ.
 արձան վաճառի ընդ երեք հազար դա-
 հեկանի, և գրիւ մի ալեր ընդ քսան
 փողոյ: Ի մտանել նորա երբեմն ՚ի բա-
 ղանիս, տեսեալ զձուրն ազտեղեալ,
 ասաց, յազտեղիլ ուրուք աստէն՝ յո՞
 երթիցէ լուանալ: Արք ոմանք մա-
 կեդոնացիք ՚ի վերայ հասեալ Դիողի-
 նեայ առ Քերոնէա քաղաքաւ՝ կալան
 զնա, և ածին կացուցին առաջի Փի-
 լիպպոսի արքայի. եհարց Փիլիպպոս՝
 ով ես դու. ետ պատասխանի Դիողի-
 նէս, լրտես եմ անյադ ցանկութեան
 քում. հաճեցաւ թագաւորն ընդ պա-
 տասխանին, և արձակեաց զնա յազա-
 տութիւն: Այս բանք էին Դիողի-
 նեայ, թէ իմաստունք յիրս ինչ ոչ
 թերացեալ գտանին, և նոցա հասանէ
 հրաման տալ վասն ամենայն իրաց աչ-
 խարհի: Այս ամենայն ասէր՝ դործ է
 դից, և զի իմաստունք բարեկամ են
 նոցա, ամենայն ինչ հասարակաց է
 ընդ մէջ բարեկամաց. վասն որոյ ամե-
 նայնն ընդ ձեռամբ կայ իմաստնոց:
 Այսր ազագաւ յորժամ պէտք ինչ լի-
 նէին նմա, ասէր՝ խնդրել ՚ի բարեկա-
 մաց իւրոց:

Էր երբեմն Ազեքսանդրի անցանել
 ընդ Կորնթոս, և խորհուրդ ՚ի միտս

անկաւ նորա տեսանել զԴիողինէս ,
որ ընդ աւուրսն ընդ այնոսիկ անդ
դեգերէր . եզիտ զնա նստեալ յարևու
մերձ 'ի Արանէոն 'ի վարժարանն Կորն
թոսի , ուր յարմարէր զտակառն 'ի
հայեցուած արևուն . ասէ . Ես մեծ
թագաւորն եմ Աղեքսանդր : Իմաս
տասէրն ասէ . Ես եմ շունն Դիողի
նէս . յաւել Աղեքսանդր . ոչ երկնչիս
յինէն : Ետ պատասխանի Դիողինէս .
բարի ես , թէ չար . Աղեքսանդր ասէ .
բարի եմ : Դիողինէս ասէ . և ով եր
կիցէ 'ի բարւոյ : Չարմացաւ Աղեք
սանդր ընդ լրջմտութիւն և ընդ օղատ
պատասխանիս Դիողինեայ . եկաց առ
նմա ժամս ինչ . և յաւել ասել ցնա .
տեսանեմ քաջ , Դիողինէս , զի պէտք
են քեզ իրաց բազմաց , ես յօժարա
կամ մատուցից քեզ զկարևորսն . խըն
դրեալ յինէն զլինչ և կամիս : Դիողի
նէս ետ պատասխանի . զի 'ի բաց
կացցես շխտիանել զարևդ : Յապուշ
հարաւ Աղեքսանդր՝ տեսեալ զայրն
գեր 'ի վեր քան զամենայն մարդկեղէն
մտածութիւնս : Յաւել դարձեալ ա
սել Դիողինէս . ով իցէ մեծատուն ,
այն որ շատացեալ իցէ վերարկուաւն
և մախաղով , եթէ այն՝ որ ոչ շատ ա
սէ ընդ դահ թագաւորութեանն , և
հանապազօր նշաւակ դնէ զանձն բազ

մադէմ արկածից՝ ընդարձակել զսահմանսն : Որք առընթեր կային Ազեքսանդրի ծանրացասուամն եղեն՝ տեսեալ զթագաւորն խոնարհեալ ՚ի մեծարանս շանն Դիողինեայ, որ և ոչ յոտն յառնէր առաջի արքայի : Ծանեալ Ազեքսանդր զխորհուրդս նոցա . դարձաւ առ նոսա և ասէ . Թէ ես չէի Ազեքսանդր՝ խնդրէի լինել Դիողինէս :

Յանցանել երբեմն Դիողինէսի ընդ Եգինա՝ անկաւ ՚ի ձեռս հինից, որք վարեցին զնա ՚ի Կրետէ և արկին ՚ի վաճառ : Ոչինչ տխրութիւն կալաւ զԴիողինէս վասն իրացն . գող թէ և իմացաւ ոչ զաղէտոնն : Տեսեալ նորա զՔսենիադէս ոմն այր գէր, և շքեղ զգեցեալ, ասէ . պարտ է վաճառել զիս առնդ այդմիկ . քանզի տեսանեմ քաջ՝ զի տեառն պէտս ունի : Իբրև մերձեցաւ Քսենիադէս սակ արկանել վասն նորա, ասէ ցնա Դիողինէս . եկ որդեակ, և գնեա՛ մարդ : Յորժամ հարցաւ թէ զինչ գիտես գործել, ետ պատասխանի . գիտեմ հրամայել մարդ կան . և ցմուռնտիկն ասէ . կարդա՛ թէ որք պէտս ունիցի տեառն՝ եկեսցէ ՚ի գնել . և որ վաճառէրն զնա՝ ցասնոյր նմա և արգելոյր ՚ի նստելոյ . Դիողինէս ասէ, ո՞վ խորէ ՚ի գնել զձուկն՝ զղիրս մարմնոյն ըստ որոց կացցէ . այլ

և այդ ևս զարմանք են ինձ՝ զի՛ ՚ի գնելն
 զմարդ՝ շատ համարին նայել ևեթ ՚ի
 նա, իսկ ՚ի գնելն զխուփ սանի՛ ոչ սակ
 արկանեն՝ մինչև զննեալ զհնչիւնն, և
 ծանուցեալ զորպէսն պղնձոյն: Իբրև
 արկին զգինն, ասէ ց՝ Քսենիադէս. թէ-
 պէտև այժմ ես ստրուկ եմ քո, սա-
 կայն զոր ինչ ենն կամիմ զայն պարտ
 է առնել քեզ. զի թէպէտ իբրև ըզ-
 բժիշկ վարեցայց ընդ քեզ, թէպէտ
 իբրև վերակացու կամ ստրուկ, կամ
 ազատ, յամենայնի հպատակութիւն
 պահանջեմ ՚ի քէն: Յանձն արար նմա
 Քսենիադէս զորդիս իւր ՚ի հրահան-
 գել. յորոց ՚ի խնամն սրտի մտօք ջան
 եդ Դիողինէս. ուսոյց նոցա զընտիր
 ընտիր հատուածս ՚ի գրոց քերթողաց,
 հանդերձ փոքու գրովք իմաստասիրու-
 թեան առ ՚ի յիւրմէ յօրինելով ՚ի
 պէտս նոցա: Մարգէր զնոսա ՚ի գօտե-
 մարտութիւն, յորսորդութիւն, ՚ի հե-
 ծելութիւն, յաղեղնաւորութիւն և ՚ի
 պարսաքարել: Արժեաց զնոսա յան-
 պաճոյճ տարազ կենաց, և ընդ կե-
 բակրոյ ջուր ևեթ ըմպել. հրամայէր
 նոցա ամենևին գերծուլ զվարսս: Շրբ-
 ջեցուցանէր զնոսա ընդ իւր ընդ հրա-
 պարակս՝ զգեցեալ անյարդար, և բա-
 զում անգամ առանց հողաթափի և
 պատմուճանի: Ըստ այսմ օրինակի և

մանկուհին սիրով յարեալ էին ՚ի վարժապետ իւրեանց ՚ի Դիողինէս, և խնամոտ գլխով աղերս արկանէին վասն պիտոյից նորա առ հայր իւրեանց: Եւ եղև մինչդեռ ՚ի ստրկութեան էր Դիողինէս՝ ոմանք ՚ի բարեկամաց նորա հետամուտ եղեն ՚ի զերծուցանել զնա. ասէ ցնոսա Դիողինէս. անմիտք էք և պատրանք ունի զձեզ վասն իմ. ոչ զի տիցէք արդեօք զի առիւծն չէ ստրուկ սնուցողին իւրում. նա մանաւանդ կերակրողք նորա գերի են նմա:

Տեսանէ Դիողինէս յաւուր միում զի ազազակէր մուկնետիկն՝ թէ Դիող սիպոս յաղթեաց մարդկան յողիմ պիական մրցանս. ասէ ցնա. բարեկամ, ասա՛ թէ յաղթեաց գերեաց և ապիկարաց. զի յաղթող մարդկան՝ ես ինքն եմ:

Յորժամ ասէին ցնա, թէ ծերացեալ է քո, պարտ է հանգչել քեզ ՚ի վաստակոց. նա տայր պատասխանի. և զի՛նչ, եթէ յընթանալ էի՝ արժանինչ էր ինձ յապաղել ՚ի կատարած ընթացից իմոց. ոչ լաւագոյն է մինչև ցվախձան ճգնել: Յանցանելն երբեմն ընդ փողոցս տեսանէ զայր ոմն յորոյ ՚ի ձեռացն անկեալ հացքն զոր ունէր, ամաչէր կորանալ յերկիր, և առնուլ զայնս: Յայնժամ առեալ Դիողինեայ

սրուակ մի խորտակեալ՝ ընթացաւ
 ընդ քաղաքն ողջոյն . ցուցանել կամե-
 ցեալ՝ թէ չէ արժան ամօթ համարիլ՝
 ուր բանք իցեն չկորուսանել և ոչինչ :
 Ասէր նա ինքն . իբրև զքաջ երաժիշտ
 եմ ես , որ թողում զճշգրիտ հնչումն
 ձայնին , զի առեալ կցեսցեն այլք :
 Մատեաւ առ նա այր ոմն՝ կամեցեալ
 աշակերտիլ նմա . ետ Դիողինէս ՚ի
 ձեռս նորա ապուխտ խողենի՝ բերել
 զկնի իւր . ամօթ համարեցաւ այրն
 տանել զապուխտն ընդ փողոցս , վասն
 որոյ ընկէց զայն ընդ գետին , և ՚ի բաց
 մեկնեցաւ : Յետ քանի ինչ աւուրց
 դիպաւ նմա Դիողինէս և ասէ , ա-
 պուխտն խղեաց զբարեկամութիւն մեր :
 Տեսանէ զկին ոմն անկեալ ՚ի վերայ
 երեսաց առաջի դից իբր ՚ի խնդրուածս՝
 տարադէպ օրինակաւ , զի յետուստ
 անժածկոյթ երևէր . մատեաւ առ նա
 Դիողինէս և ասէ . ոչ երկնչիս դու
 ո՛վ կին հիգացեալ՝ զի դիք յետուստ և
 ՚ի դիմաց մօտ կան քո , և տեսանեն
 զքեզ անկեալ յորսայս անվայելուչ :

Ակնարկեալ Դիողինեայ ընդ հան-
 դամանս կենաց իւրոց՝ ասէր ծիծաղե-
 լով . ամենայն երգիծանք որք նկարա-
 գրին ՚ի թատրոնս՝ յիմ վերայ անկա-
 նին . չիք իմ ոչ տուն , ոչ քաղաք , ոչ
 հայրենիք , աւուրն պարենի ակնկա-

լեալ, այլ հաստատուութեամբս ընդդէմ մաքառիմ բաղդին . բնութեամբս կռուիմ ընդ սովորութեան, և մտօք վանեմ զամբոխմունս : Խորհուրդ եւ հարց ցնա այր ոմն թէ յորում ժամու ուտել արժան իցէ, ետ պատասխանի . թէ մեծատուն ես՝ կեր երբ և կամիս . թէ աղքատ՝ երբ կարես :

Ազերս արկին նմա աթենացիք հաղորդել ՚ի խորհրդական տօնս իւրեանց . վկայութիւն եղեալ նմա՝ թէ խորհրդազգաձքն յիրս այնպիսիս՝ զառաջին բարձն ունին յանտիս . ետ պատասխանի Գիողինէս . ծաղրական ուրեմն է թէ Ագեսիղայոս և Եպամինոնդ ՚ի տղմի զեռայցեն . և ձեր թշուառական խորհրդածուք բնակեսցեն ՚ի կղզիս երանելեաց :

Սովորութիւն էր նորա ծուխ խնկոց մատուցանել առ ոտիւքն . և հարցեալ զպատճառն, ասէր . հոտ խնկոց մատուցեալ ՚ի գլուխն՝ շոյտ ցնդի ընդ օդիսկ առ ոտամբք մատուցեալ՝ ելանէ հասանէ հոտն մինչ ՚ի ոնգունս : Ներքինի ոմն վատանուն դրեաց առ դրամբք տան իւրոյ . մի ոք ՚ի շարաց մտանիցէ ընդ այս դուռն : Ընթերցեալ զայն Գիողինէս՝ ասէ . իսկ ուստի մտանէ տէր տանն : Իմաստասէրք ոմանք հաւաստէին նմա թէ

շիք շարժումն . յարեաւ Դիոգինէս
 և ճեմել սկսաւ . ասէ ոմն . զի՞ գոր-
 ծես . Դիոգինէս ասէ՝ Հերքեմ ըզ-
 փաստս քո : Ի խօսել ուրուք ընդ նա
 վասն աստեղաբաշխութեան , ասէր
 ցայնպիսին . բազում ժամանակք են
 յորմէ հետէ դարձար դու յերկնից :
 Պղատոնի սահմանեալ էր զմարդ՝ կեն-
 դանի երկոտանի անփետուր . փետեալ
 Դիոգինեայ աքաղաղ մի՛ թադոյց ընդ
 վերարկուաւն և ել գնաց յԱկադե-
 միայն . հասեալ անդր ընկէց ՚ի ներքս
 զաքաղաղն և ասէ . ահա՛ մարդ Պղա-
 տոնեան : Ի բանից աստի հարկաւո-
 րէր Պղատոն յաւելուլ յառաջին
 սահման իւր՝ թէ այդ կենդանի լայնե-
 ղունգն է : Յանցանել Դիոգինեայ ընդ
 Մեգարա քաղաք , ետես անդէն ման-
 կունս մերկս ամենեին , և ոչխարս գեղ-
 մնաւորս . և ասէ . լաւագոյն է լինել
 ոչխար ՚ի քաղաքի աստ , քան մանուկ :
 Յուտել իւրում երբեմն տեսանէ
 մկունս ընդ սեղանով իւրով որք զան-
 կեալ փշրանսն հացի հաւաքէին . յո-
 գւոց եհան և ասէ . Ո՛հ , և Դիոգի-
 նէս անկոչ բազմականս պարարէ : Յե-
 լանելն ՚ի բաղանեաց , հարցին ցնա .
 բազումք են որք լուանան ՚ի բաղանիս
 անդր . ասէ , ոչ . յաւելին դարձեալ .
 իսկ ոչ է անդ աղաղակ բազմութեան

մարդկան . ասէ , այ՛ն մեծ յոյժ : Հրա-
 ւիրեցաւ ուրեք ՚ի կոչունս . նա ոչ առ
 յանձն . քանզի և երէկ , ասէ , կոչե-
 ցայ անդր , և ոչ ոք շնորհս կալաւ զի-
 նէն : Այր ոմն որ շալակեալ տանէր
 գերան մի , ընդ հարաւ յոչ կամաց
 ընդ Բիողինէս , և ապա ասէ ցնա . ՚ի
 բաց կաց . Բիողինէս ասէ . մի՞թէ երկ-
 րորդ անպամ հարկանել զիս կամիցիս :
 Յայլում նուագի նոյնօրինակ անցք դի-
 պան նմա . յայնժամ եհար դաւաղա-
 նաւ զհարկանողն և ասէ . ՚ի բաց
 կաց և դու : Բիպեալ ուրեք Բիողի-
 նեայ տեղ տարափոյ մինչև ողողել
 բովանդակ վերարկուի նորա , վշտա-
 կից լինէին նմա որք տեսին զնա :
 Պղատոն որ անդ էր՝ ասէ ցնոսա .
 թէ ոչ կամիք զաղէտս առնդ , ՚ի բաց
 մեկնեցարուք , և մի նայիք ընդ դա :
 Այր ոմն ամ ապտակ նմա . ետ պա-
 տասխանի Բիողինէս . ոչ գիտէի թէ
 պարտ է գնալ ՚ի ճանապարհ զրահա-
 ւորեալ զլիսով : Բարձեալ հարցաւ
 յայլում նուագի , զի՛նչ խնդրես զի
 թողցես ամել քեզ ապտակ . ասէ , սա-
 ղաւարտ : Միդիաս ոմն կռփեաց զնա
 բազումս և ասէ . երթ բողոք կալ , և
 առցես ՚ի տոյժ երեք հազար դահեկան :
 Յաւուրն երկրորդի ադուցեալ Բիողի-
 նեսի ՚ի բաղկին վերտս զրահից , կռուի

ուժգին եհան 'ի դուռն Միդիասայ, և
 ասէ. երթ բողոք կալ. և նոյնչափ
 տուժեսցես զիս: Լիւսիաս դեղագործ
 եհարց ցնա. հաւատամ թէ գուցեն
 դիք. Դիոգինէս ասէ, և որպէս ոչ հա
 ւատացից, զի գիտեմ թէ չիք նոցա
 թշնամի ոխերիմ քան զքեզ: Տեսանէ
 զայր ոմն որ լուանայր 'ի ջուր՝ յուսա
 ցեալ սրբել զանձն, եղուկ քեզ, ասէ.
 ոչ գիտես՝ զի թէ մինչ 'ի վաղիւն լուա
 նայցես՝ ոչինչ օգնէ քեզ չսխալել 'ի
 կանոնս քերականութեան. իսկ արդ
 'ի յանցանացդ սրբեսցէ՞ այդ զքեզ:
 Տեսեալ մանուկ զոմն անվայելուչ
 բազմեալ, ընթացաւ եհար զմանկա
 ծուն. ասէ. զի՞ այդպէս պղերդու
 թեամբ ուսուցանես զաշակերտդ: Մե
 ղադիր լինէր որոց գանգատ ունէին
 զբազդէն. ասէր, մարդիկ խնդրեն
 միշտ զայն որ նոցա բարիոք թուի,
 այլ ոչ զոր իսկապէս բարին է: Քաջ
 գիտէր Դիոգինէս թէ բազմաց հաճելի
 են վարք կենաց իւրոց. այլ զի սակաւք
 ոմանք յանձն առնուին նմանել նմա,
 ասէր. Շուն եմ ես հաւատարիմ.
 բայց ոչ ոք յորոց գովեն զիս խրախու
 սէ յորս ելանել ընդ իս: Աշտամբէր
 զորս երկնչէին յերազոց. խրատ տայր՝
 ոչ յառել յիրս որ ընդ միտս անկա
 նիցի նոցա յարթնութեան. և մի սնա

պաշտ հողուովք 'ի քնին առնուլ զոր
ինչ երազեսցեն 'ի քուն հանդստեան :
'ի զգնալն իւր ընդ վայրս ուրեք՝ տե-
սանէ զկին ոմն 'ի պատգարակի . և ա-
սէ , չէ 'ի դէպ վանդակդ այդպիսում
չար դազանի :

Աթենացիք որ սիրէին յոյժ զԴիո-
գինէս , և պատուով մեծարէին զնա ,
ետուն դան հարկանել հրապարակաւ
զերիտասարդ զոմն որ խորտակեալ էր
զտակառ նորա , և այլ տակառ ետուն
նմա : Չայնու ժամանակաւ յաճէր 'ի
բերանս ամենեցուն անուն Վալիսթե-
նեայ՝ իբրու յօրացելոյ երջանկու-
թեամբ , այն զի զօր ամենայն հացակից
էր Աղեքսանդրի . իսկ Դիոգինէս ընդ
հակառակն ասէր , ամենայնիւ թշուա-
ռացեալ համարիմ ես զՎալիսթենէս՝
վասն զի հանապազօրդ ճաշէ և ընթրէ
առ Աղեքսանդրի : Արատեր՝ մին 'ի
գործակցաց Աղեքսանդրի բռնադա-
տէր յոյժ զԴիոգինէս երթալ առ նա ,
այլ նա՝ յաւէտ ախորժեմ ասէ՝ ու-
տել աշտուճ հաց յԱթէնս , քան մե-
ծաշուք կեանս վարել յարբունիս
անդր : Պերդիկաս հազարապետ Աղեք-
սանդրի սպառնացաւ սպանութիւն
Դիոգինեայ՝ թէ ոչ երթիցէ 'ի տուն
նորա : Ետ պատասխանի Դիոգինէս ,
դու ոչ մեծ ինչ գործես այդուիկ .

քանզի կարեն զգոյն և փոքունքն ՚ի
 թունաւոր կենդանեաց. և ես հաւաս-
 տեմ քեզ թէ Դիոզինէս ոչ կարօտ է
 բնաւ Պերդիկասայ, և ոչ մեծութեան
 նորա առ ՚ի պատահումն երջանկու-
 թեան. եղև զիս. առատաբաշխ են
 դիք ՚ի շնորհել կեանս մարդկան, այլ
 ամենայն որ նմին կից են հեշտութիւնք
 անծանօթ են նոցա որք զզեղխելն և
 զշուայտելն միայն դիտեն: Ետես զայր
 ոմն՝ որում ստրուկ նորա ագուցանէր
 կօշիկս, և ասէ. ոչ շատ համարեցիս
 դու զայդ, այլ յաւուր միում և զորն-
 զունս քո դմա տացես սրբել. և զի՛նչ
 գործեն ձեռք քո: Դարձեալ ՚ի գնալն
 իւրում հանդիպի դատաւորաց որք ՚ի
 պատուհաս վարէին զայր ոմն որոյ գո-
 ղացեալ էր սրուակ մի փոքրիկ ՚ի հա-
 սարակաց դանձուէ. և ասէ. Աւասիկ
 մեծ գողք զփոքրն դատին: Սովոր էր
 ասել Դիոզինէս. մեծատուն տգէտ՝
 դառն է ծածկեալ ոսկի գեղմամբ:
 Դէպ եղև ՚ի վաճառատեղիս ուրեք զի
 քերէր զմարմին իւր, և առ նմին ձայն
 բարձեալ աղաղակէր. իցէ՛ թէ քերելով
 զփոր իմ անցուցանէի զինև զքաղց երբ
 և կամէի: Մտեալ նորա երբեմն ՚ի
 բաղանիս՝ տեսանէ զոմն երիտասարդ
 զի առնէր երագ և սթափ շարժմունս,
 այլ ՚ի համեստութենէն թերացեալս.

ասէ ցնա . որչափ բարւոք առնես՝ նոյն չափ և դսրովելի ես : Յայլում նուազի ընդ երթալն ՚ի ճանապարհս ուրեք՝ ետես քարտէս ՚ի վերայ տան առն ուրումն շռայլի , որ նշանակ էր վաճառելոյ զտունն , ասէ իբրև առ տունն . քաջ գիտէի թէ սաստիկ արբեցու թիւն փսխել տայ ստացողին քում : Էր երբեմն առն ումեմն նախատել զնա՝ իբրև այր տարագիր . Դիողինէս ասէ . Աւաղ քեզ այր անմիտ . ես ընդ այդ խնդամիտ եմ , և դոյն էր որ արար զիս իմաստասէր : Յետ սակաւ ժամանակի այլ ոմն ասաց ցնա . Մինոպեցիք պարտաւոր արարին զքեզ յանդարձ օտարութիւն . սա ասէ . և ես պարտաւոր կացուցի զնոսա կալ մնալ յանշուք երկրի իւրեանց առ ավամբք Եւբսի նեան ծովուն :

Աղերս արկանէր երբեմն առաջի արձանաց՝ ընձեռել ինքեան շնորհս . և որոց հարցանէին զպատճառ սնտոի խնդրուածոյն՝ ասէր . զի ուսայց հանդուրժել տարամերժութեան : Յորժամ աղքատութիւն նրա բուռն առնէր նմա խնդրել յումեքէ ողորմութիւն՝ ասէր ընդ առաջինն որում հանդիպէր . թէ տուեալ է քո ինչ ումեք , զնոյն շնորհ արա՛ և ինձ . և թէ չև ետուր՝ յինէն սկսիր : Իբրև հարցին

ցնա յաւուր միում, որպէս վարէր ընդ
 բարեկամս իւր Դիոնեսիոս բռնաւոր,
 ասէ. որպէս ընդ շիշս. զորս 'ի ձեռին
 առնու մարդ թէ լի իցեն, և 'ի բաց
 ընկենու թէ դատարկ են: Ցանկու
 թիւնք պարականոնք՝ աղբերք են ա-
 մենայն աղետից որ հարեալ ունին
 զազգ մարդկան: Չգօն մարդիկ՝ նկա-
 րագիր են դից: Որովայն՝ անդունդք
 կենաց: Բան համեստ՝ թել մեղրածո-
 րան. և սէր՝ զբաղումն դատարկապոր-
 տից: Հարցաւ Դիոդինէս. որ է դժն-
 դակ վիճակ. ետ պատասխանի. լինել
 ծեր և աղքատ: Դարձեալ՝ որ լաւա-
 գոյն է յաշխարհի. ետ պատասխանի.
 ազատութիւն: Ո՞ր է դազան չարա-
 չար խածատող. ասէ. 'ի վայրենիս չա-
 րախօսն, և յընտանիս մարդելոյն:
 Դէպ եղև նմա տեսանել ուրեք կին
 մի կախեալ զոստոց ձիթենեաց, հա-
 ռաչեաց և ասէ. իցիւ թէ ամենայն
 ծառք պտուղ բերիցեն այսպէս: Այր
 օմն մատուցեալ եհարց զնա, յորում
 հասակի արժան է ամուսնանալ. ետ
 պատասխանի. ցորչափ դեռահաս է ոք՝
 տարածամ է. իսկ 'ի ծերանալն անա-
 դան է: Հարցին ցնա. ընդէր դեղին է
 ոսկի. ասէ. զի բաղումք են նախան-
 ձոտք նորա: 'ի յորդորել ոմանց զնա՝
 զհետ պնդել Մանեսի ստրկի իւրոյ որ

փախուցեալն էր. ասէ. ծաղու ար-
ժանի գրեցի, թէ Մանէս կարասցէ
գործել առանց Դիողինեայ, և ոչ
Դիողինէս առանց Մանեսի: Բռնա-
կալ ոմն եհարց ցնա ո՞ր պղինձ յան-
կաւոր է 'ի ձուլել արձան. արար
պատասխանի. այն՝ յորմէ ձուլեցան
արձանք Արմողիոսի և Արիստոգիտո-
նի թշնամեաց բռնակալութեան:

Այն ինչ յաւուր միում վարդապե-
տէր Պղատոն վասն գաղափարաց՝ որ-
պէս իւր կարծիքն էին, և խօսէր զտե-
սակէ սեղանոյ և բաժակի, ասէ ցնա
Դիողինէս. քաջ տեսանեմ ես զսե-
ղանն և զբաժակ. այլ չգիտեմ զի՞նչ
տեսակն իցէ սեղանոյն և բաժակին:
Ճշմարիտ է, ասէ Պղատոն. քանզի առ
'ի տեսանել զսեղանն և զբաժակ՝ շատ
է թէ իցեն քեզ աչք. իսկ մտաց կա-
րօտիս առ իմանալ զտեսակ նոցուն:
Հարցեալ զի՞նչ ասես վասն Սոկրա-
տայ. ասէ. յիմար ոմն է նա: Տեսեալ
նորա զպատանի ոմն շառագունեալ
առ ամօթոյ, ասէ. քաջալերեաց որ-
դեակ իմ. այդ՝ առաքինութեան ե-
րանգ է: Երկու արք օրէնսդէտք կա-
ցուցին զնա դատաւոր իրաց իւրեանց.
Իսկ նա՝ զերկոսին ևս դատապարտ կա-
ցոյց. զմին՝ զի գող էր, և վասն այնր
ամբաստանութիւն էր զնմանէ. և

զերկրորդն՝ զի զոր կորուսեալն էր՝ գո-
 ղօն էր յայլմէ և ինքն յանիրաւի բո-
 Ղոքէր : Հարցին ցնա . ընդէր տան ու-
 ղորմութիւն կուրաց և կաղաց , և ոչ
 իմաստասիրաց . ետ պատասխանի . զի
 յաւէտ դիւրին է մարդկան լինել կոյր
 կամ կաղ , քան թէ իմաստասէր : Ե-
 հարց ոմն ցնա . չունիա ընտանի զոմն ,
 և ոչ սպասաւոր . ասէ , ոչ . միւսն ա-
 սէ . և ով թաղեսցէ զքեզ . Գիողինէս
 ասէ . որ ոք պէտս ունիցի տան իմոյ :
 Ի նախատել ուրումն զնա վասն սուտ
 դրամս խարդախելոյ երբեմն . յիրաւի
 է , ասէ Գիողինէս . ես այն էի եր-
 բեմն՝ որ ինչ դու այժմ ես . այլ
 դու ոչ երբէք լինիցիս այն՝ որ ինչ ես
 այժմս եմ : Հարցին ցնա յորմէ՞ քաղա-
 քէ ես . ասէ աշխարհաքաղաքացի եմ :
 Տուցանել կամեցաւ բանիւքս թէ չէ
 արժան իմաստնոց կառչել մնալ յաշ-
 խարհ ուրեք : Ետես զի անցանէր այր
 ոք շոայլ , և խնդրեաց ՚ի նմանէ մնաս
 մի . ասէ այրն . ընդէր յայլոց դրամ
 մի խնդրես , և յինէն զմնաս . քանզի՝
 ասէ , այլք կարեն տալ ինձ և յայլ
 նուազս . իսկ վասն քո խիթամ թէ
 դուցէ ոչ ևս կարասցես տալ : Առ-
 հարցումնն թէ չար իցէ մահ , ետ պա-
 տասխանի . զիարդ չար իցէ՝ զոր ոչն
 իմանամք թէ և մօտ կայցէ : Տեսեալ

երբեմն զանհմուտ որ 'ի նետաձգու-
թիւն որ լարէր զաղեղն 'ի ձգել . գնա-
ցեալ եկաց առ նպատակին . 'ի հար-
ցանել ոմանց թէ զի՞ գործես . ասէ,
զի մի արդեօք նետահար սպանայց :
Յասել ոմանց ց'Դիողինէս՝ թէ բա-
զումք խաղ առնեն զքե . ասէ, և զի՞նչ
այտի թէ ընդ կատակս եղէց , թերևս
և էջք ծիծաղիցին զնորք յորժամ
կրճտեն զատամուկս իւրեանց : Ասեն
ցնա . այլ նորա ոչ համարին ինչ զէշս :
Դիողինէս ասէ, ես անպիտան ևս հա-
մարեցայց զնոսա :

Այլ որ եհարց ցնա . ընդէր ամենեքին
շուն կոչնն զքեզ : Քանզի ասէ , ողո-
քեմ որոց տան ինձ , հաջեմ որոց ոչն
տան , և խածատեմ զչարս : Դարձեալ
այլ որ եհարց ցնա . յորո՞ց շանց ես
դու . ասէ՝ թէ նքթեցայց՝ բարակ եմ
որսական , և քծնիմ զամենեքումք .
իսկ թէ յադեալ իցեմ՝ գամիւ եմ ,
խածատեմ զամենեսին որք ինձ ընդ
առաջ ելանիցեն : 'ի յանդիմանել զնա
ոմանց թէ զի՞ անհեթեթ ուտես 'ի
ճանապարհս և 'ի վաճառափողոցս ,
տայր պատասխանի . քանզի անդ հա-
սանէ ինձ քաղց՝ որպէս և յայլ տե-
ղիս : 'ի դառնալն Դիողինէսի 'ի Լա-
կեղեմոնէ յԱթէնս՝ հարցին ցնա՝ ուս-
աի՞ դաս . ետ պատասխանի՝ գամ 'ի

քաղաքէ արանց, դարձ արարեալ 'ի քաղաք կանանց: Չպոռնիկ կանայս գեղեցիկս օրինակէր թունաւոր դինւոյ: Չթագուհիս՝ թագաւորս կոչէր, զի զոր ինչ կամին ընդունին 'ի թագաւորաց: 'Ի զարմանալ առն ուրումն ընդ յուլովութիւն նուիրացն մատուցելոց 'ի տաճարին Սամոթրակեայ, աւսէ Դիոգինէս. շատ ևս լինէր արդեօք թէ նուիրէին ամենեքեան որ կորեանն՝ փոխանակ նոցա որք ապրեցան: Այս կղզի է Արշիպեղագոսն՝ որ այժմ աւուանի Սէմէնտրէք. նուիրական էր, և տեղի ապաստանի մեղապարտից, և որք անկանէին անդ՝ ընծայէին նուէրս տաճարին:

Յուտելն երբեմն Դիոգինեայ 'ի հրապարակի՝ խոնեցաւ զնովաւ ժողովուրդն՝ կոչելով զնա շուն. նա ետ պատասխանի՝ դուք ինքնին շունք էք՝ զի ժողովեալ էք առ այր կերակրող: Այր ոմն ըմբիշ ապիկար՝ որ անբաւական էր հայթայթել զպէտս անձին՝ ձեռն արկ 'ի բժշկութիւն. որում յաւուր միում հանդիպեալ Դիոգինէսի ասէ, արդ քաջ հնարս ճարտարեցեր վրէժ լուծանել 'ի նոցանէ՝ որք յառաջն հարկանէին զքեզ: 'Ի զգնալն ընդ վայրս ուրեք՝ տեսանէ զմանուկ ոմն պոռնկորդի որ քարաձիգ լինէր 'ի

վերայ բազմութեան մարդկան՝ ՚ի մի վայր խմբելոց . և ասէ ցնա . որդեակ իմ, զգոյշ կաց, մի զուցէ հարկանիցես զհայր քո : Այր ոմն խնդրեաց ՚ի նմանէ զվերարկուն իւր՝ զոր յանօթ տուեալ էր նմա . ետ պատասխանի Ղիողիթնէս՝ թէ եզու ետուր ինձ զայն արդ իմ է . և թէ յանօթ ետուր՝ տակաւին ՚ի վար արկանեմ . համբեր ցոր վայր շիցէ ինձ պիտոյ : Հարցեալ զինչ կ'ընէր օգուտ յիմաստասիրութենէդ քու մէջ, տայր պատասխանի . թէ և ոչ այլ ինչ շահէի՝ բայց անխաօլ տանել ամենայն պատահարաց . այս և եթ շատ էր ինձ :

Իմացեալ զհամբաւել աթենացւոց թէ Աղեքսանդր ինքնին Բաքոսն է, ասէ ցնոսա ընդ կատակս . ընդէր և զիս ոչ ասնէք Սերապիս : Յասել ուրուք ցնա՝ զու ոչինչ գիտես, և որպէս ընդ իմաստասէրս համարիս զքեզ . ասէ Ղիողիթնէս . թէ և ես ոչ այլ ինչ գիտիցեմ, բայց զնմանութիւն բերել յիս զիմաստասիրաց, բաւական է իմաստասէր անուանել զիս : Մատուցին առ նա պատանի մի յաշակերտութիւն, և գովէին զնա իբրև իմաստուն, հրահանգ և գիտուն, որոց ամենայնի հանդարտութեամբ ունկն մատուցեալ Ղիողիթնեայ, ետ պատասխանի . թէ

այդչափ կատարեալ է մանուկդ՝ ոչ
ևս կարօտ է ինձ . ընդէր ածէք զնա
այսր :

Յորժամ Գիտնեսիոս բռնաւոր մեր-
ժեալ 'ի թագաւորութենէն Սիրա-
կուսայ առանձնացաւ 'ի Աորնթոս, և
առ աղքատութեանն ձեռն 'ի դորժ
արկ ուսուցանել մանկունս՝ զի մի
սովալլուկ կորիցէ, եմուտ յաւուր
միում Գիողինէս 'ի դպրոց նորա, և
լուաւ զհեծել և զարտասուել ման-
կանց . իսկ Գիոնիսեայ կարծելով թէ
մտանէ Գիողինէս միսիթար մատու-
ցանել 'ի վիշտս տարագրութեան իւ-
րոյ, ասէ ցնա . Շնորհակալ եմ զքէն,
Գիողինէս . տես աւասիկ զայլափոխ
կերպարանս բաղդին : Ետ պատասխա-
նի Գիողինէս . Ա՛յ հիզացեալ . սքան-
չացեալ եմ մեծապէս ընդ ապրել քո
ցայս վայր՝ որ այնչափ զեան գործեցեր
'ի թագաւորութեան քում . և արդ
տեսանեմ զի չես ընդհատ 'ի վարժա-
պետութեանդ՝ քան զոր էիր յարքայու-
թեանդ : Դէպ եղև նմա տեսանել զո-
մանս՝ որք զոհ մատուցանէին զից՝
խնդրելով զծնունդ որդւոց . և ասաց
ցնոսա, հետամուտ էք առաւել ստա-
նալ որդի քան այր առաքինի : Տե-
սեալ զերիտասարդ անկեալ 'ի քանս
անհամեստս, ասէ . ո՛չ ամաչես ձգել

զսուր կապարեայ՝ ՚ի փղոսկրեայ պա-
 տենէ : Որք միանգամ դրուատեն , ա-
 սէր , զառաքինութիւն , և ոչ ինչ գոր-
 ծեն յորոց ուսուցանենն՝ նման են
 նուագարանաց՝ որք քաղցր ներդաշ-
 նակեն , առանց ինչ զգալոյ : Ասաց
 ցնա ոմն . շեմ ես պատկանաւոր յի-
 մաստութիւն . ետ պատասխանի Ղիո-
 գինէս , իսկ ընդէր կեաս՝ թէ վերջա-
 ցեալ է քո ՚ի յուսոյ բարիոք կենաց :
 Ամենայն մարդիկ՝ ասէր , ՚ի ստրկու-
 թիւն կեան . ստրուկք հպատակք են
 տերանց իւրեանց , և տեարքն՝ կրից
 իւրեանց : Ամենայն ինչ ՚ի սովորու-
 թեան սահմանի : Այր յորացեալ ՚ի
 փափկութիւնս և ՚ի հեշտութեան՝ ոչ
 ևս կարէ հրաժեշտ տալ անտի . և
 ընդհակառակն՝ արհամարհութիւն
 հեշտին կենաց քաղցր է որոց զներհա-
 կանն վարժեալք իցեն : Ըստ շնական
 անուանն՝ տկարութիւն իմն անուա-
 նէր զամօթխածութիւն . և բնաւ ոչ
 ամաչէր զանարժանս դործել ՚ի հրա-
 պարակի : Թէ ընթրելն՝ ասէր , բա-
 րիոք է , ընդէր ոչ կերիցեմ ՚ի վաճա-
 ռափողոցս որպէս ՚ի սենեկի : Հարցին
 ցնա , թէ մեռանիս՝ ո՞ւր թաղեսցուք
 զքեզ . ասէ . ՚ի բացօթեայ վայրի : Եւ
 որպէս ոչ երկնչիս՝ ասեն , թէ կերիցեն
 զքեզ հաւք և դազանք . ետ պատասխա-

նի Դիողինէս . զիք առ իս գաւազան
մի , զի 'ի բաց վանեցից զնոսա թէ գայ
ցեն յիմ վերայ : Ասեն . այլ դու յայն
ժամ իմանաս և ոչինչ . յաւել և Դիո
ղինէս . ապա զի երկնչիցիմ թէ կերիցեն ,
և կամ ոչ , թէ ես ոչ իմանամ բնաւ :

Ըստ աւանդելոյ ոմանց՝ մեռաւ
Դիողինէս 'ի հասակի ամաց իննսնից ,
առ անմարսողութեանն 'ի սակս ու
տելոյ հում զոսն եզին : Այլք պատ
մեն՝ թէ տեսեալ զանճն յեցեալ յա
լիս ծերութեան՝ զիւրովին դնաց՝ ար
գելս արկեալ տուրեւառի շնչոյն : Յեր
կրորդում աւուր վաղ քաջ ընդ առա
ւտն կանխեցին առ նա բարեկամք նո
րա , և գտին զնա պատատեալ 'ի վե
րարկուի իւրում . բացեալ զնա երկ
մտէին թէ 'ի քուն իցէ , զի արթուն
էր նա բնութեամբ . և ահա գտին զնա
անշնչացեալ : Եւ եղև հերձուած 'ի
մէջ նոցա՝ թէ ո՞ թաղեսցէ զնա , մինչև
փոքր մի ևս՝ և կռուով մաքառել . այլ
'ի վերայ հասեալ իշխանաց և աւագաց
Կորնթոսի՝ խաղաղացուցին զնոսա :
Մեծաշուք յուղարկաւորութեամբ
թաղեցաւ Դիողինէս մօտ 'ի դուռն
քաղաքին՝ 'ի կողմն կրճին Կորնթոսի .
և առ գերեզմանաւն կանգնեցաւ սիւն ,
յորոյ վերայ եզին անդրի շուն 'ի պա
րսեան մարմարիոնէ : Մեռաւ Դիո

գինէս յաւուր մեռանելոյ Աղեքսանդրի
 'ի Բաբելոն 'ի ճժի՞ ողիմպիադին :
 Կանգնեցին յանուն Գիողինեայ ան-
 դրիս բազումս՝ հանդերձ արձանա-
 գրութեամբ :

Կ Ր Ա Տ Է Ս

Ժամանակակից Պողեմոնի՝ որ յաջորդն էր Քսենոկրատեայ՝ ՚ի սղլաստոնեան դպրոցին, առ ճժի՞ ողիմսլիադաւ :

Կ Ր Ա Տ Է Ս կիւնիկեան էր մին ՚ի նշանաւոր աշակերտաց մեծահամբաւն Դիոգինեայ, որդի Ասկոնդոսի՝ թեբացի, յազնուական և ՚ի մեծատուն ազգէ : Առաջիկայ գտեալ նորա ուրեք թատերական ողբերգութեանց՝ յորում տեսանէր զի Տեղեփոս լբանէր զամենայն զոր ինչ ունէր ճոխութիւն՝ զի աշակերտեսցի կիւնիկեանց, ՚ի նոյն նախանձ վառեցաւ և ինքն, եդ ՚ի մտի զայնր ուսման զհետ ընթանալ վաճառեաց զամենայն ստացուածս իւր, և զոր ինչ հաւաքեացն առաւել քան զերկերիւր տաղանդ՝ յանձն արար սեղանաւորի ումեմն՝ աղաչեալ զնա՝ դարձուցանել զայն առ որդիա իւր՝ թէ կարօտ գոցին և անձեռնհաս . իսկ թէ և նորա յիմաստասիրութիւն թեակոխեսցեն՝ բաշխել զայն արծաթ առ քաղաքակիցս իւր առ թեբացիս . քանզի իմաստասէրք չկարօտին և ոչ

խմիք : Աղերս արկին նմա ազգականք
նորա՝ փոխել զտարազ կենացն զոր
յանձին կալաւ . այլ նա ՚ի բաց վանեաց
զնոսա ՚ի տանէ իւրմէ՝ սպառնացեալ
դանակոծ առնել զնոսա :

Ամարայնի ազանէր վերարկու
թանձր , և ձմերայնի նօսր և թեթե՛ զի
մարզեսցի ամենայնի հանդուրժել :
Անխտիր անամօթ մտանէր յամենայն
տունս կշտամբել զոր ինչ անդ տեսա .
նիցէ դժպատեհս . զհետ ընթանայր ա-
մենայնի որոց խեղաթիւր էին կեանք՝
նախատէր և յանդիմանէր զնոսա՝ զի
յիւր վերայ շրջեսցէ զցասումն նոցա ,
և կազմ լիցի տանել ամենայնի ըստ
իւրաքանչիւր պատահարաց . դժնդակ
էին կեանք նորա՝ որպէս և այլոց կիւ-
նիկեանց . և ջուր միայն էր ըմպելի
նորա :

Չայնու ժամանակաւ էր ատենա-
խօս ոմն Մետրոկղ անուն . սա ոչ ևս
իշխէր երևել ՚ի հրապարակս և ՚ի դա-
տաստանս . զի բազում անգամ դէպ
լինէր նմա յատենաբանելն փուքս ար-
ձակել շառաչմամբ , ընդ որ պատկա-
ռէր յոյժ . այնր աղազաւ փակեալ
կայր ՚ի փան իւրում . եղեալ ՚ի մտի՝
անդէն անցուցանել տխրութեամբ
զմնացուած աւուրց կենաց իւրոց : Ի-
մացեալ Արատեսի զիրան , անդէն վաղ-

վաղակի առեալ եկեր լովիաս շատ՝
 վերսկ ուռուցանել զորովայնն . և յա-
 բուցեալ զնաց ՚ի տուն Մետրոկի .
 խօսեցաւ ընդ նմա բազում ինչ ՚ի հա-
 ւանեցուցանել զնա մի ինչ պատկառել
 ընդ այն , զի ոչ չար ինչ էր եղեալն .
 այդ , ասէ , ամենայն մարդոյ պատահար
 է , և չեն ինչ զարմանք թէ և ինձ լինի-
 ցի : Մինչդեռ բանքն ՚ի բերանի էին ՚ի
 յայտ գայր ազգեցութիւն լովիասին :
 Յօրինակէ անտի Արատեսի քաջալերե-
 ցաւ Մետրոկ , և ծանուցեալ զպատ-
 ճառս վեհերոտութեանն՝ ՚ի բաց ե-
 թող զամենայն ակնածութիւն . ՚ի
 հուր կիզեաց զամենայն գիրս զմնա-
 ցեալս նմա ՚ի Թէոփրաստեայ յորս
 պարապեալ էր յընթերցումն . և յա-
 բեցաւ ՚ի Արատէս՝ եղեալ ընդ ձե-
 ոամբ նորա քաջանուն կիւնիկեան .
 Նա և զկնի նշանաւոր գտաւ Մետ-
 րոկ ՚ի կարգի իմաստասիրաց այնր
 ուսման . և եղեն նորա բազում աշա-
 կերտք երևելիք : Սակայն ՚ի ծերու-
 թեան իւրում տաղտկացեալ ՚ի կե-
 նաց՝ անձամբ զանձն խեղդեաց : Այլ
 մեր դարձցուք ՚ի Արատէս :

Այր տգեղ էր սա . և զի օտար իմն
 և սոսկալի երևեսցի՝ կարէր զվերար-
 կուաւ իւրով մոր թս խոյոց , մինչև զի
 ՚ի տեսանել ուրուք զնա՝ ասչեալ հիա-

նայր, թէ մի գուցէ վայրենի գազան
 ինչ իցէ: Դարձեալ և յաջողակ էր
 յամենայն ազգս հրահանգաց, և իբրև
 երևէր ՚ի կրկէսս և ՚ի հրապարակս ՚ի
 դօտէմարտութեան սակս և յայլ ինչ
 գործ՝ ծաղու զուարթացուցանէր զա-
 մենայն հանդիսականս կերպարանօքն
 իւրովք և այլատարազ պճնութեամբն.
 Թէպէտ ինքն ոչինչ ցասնոյր ընդ այն
 ամենայն, այլ ամբարձեալ զձեռն ա-
 զաղակէր. Համբեր վայրիկ մի ո՞վ Արա-
 տէս. զի որք ծիծաղինն զքե՛ւ լացցեն
 յետ սուղ ժամու, և դու բերկրեսցիս
 յանձն քո՝ տեսեալ զի երանի տան
 քեզ, և աւաղ կարդան անձանց վասն
 վատութեան իւրեանց:

Գնացեալ երբեմն առ վարժապետ
 ոմն՝ միջնորդ լինել վասն միոյն յաշա-
 կերտաց նորա. փոխանակ փարելոյ
 զճնգօք վարժապետին՝ գիրկս արկ զառ-
 դերօք նորա: Անպատեհ իմն համա-
 բեալ զայն առնն մինչ փոքր մի ևս ՚ի
 ցասումն բրդէր, ասէ ցնա Արատէս,
 և զի՛նչ խտիր է, ո՞չ քո են ազդերքդ
 իբրև զժունգս քո:

Յանհնարիցն է, ասէր, գտանել
 այր՝ որ ոչ երբէք յանցուցեալ իցէ.
 բայց և ՚ի նռան թէպէտ իցեն հատք
 ինչ ապականեալք, ոչ վասն այնր չի-
 ցեն դեղեցիկ:

Խրատէր Արատէս զաշակերտս իւր
 հրատարել յամենայն ընչից աշխար-
 հիս. ես զայն ունիմ ասէր, զոր ու-
 սեալն եմ. զայն ամենայն թողի որոց
 սիրեն զպերճութիւն: Յորդորէր զնո-
 սա՝ խուսել ամենևին ՚ի հեշտալեաց.
 զի չիք ինչ պատկանաւոր առն իմաս-
 տասիրի քան զազատութիւն. և քան
 զկամս չիք տէր բռնակալ, Քաղցն, ա-
 սէր, շիջուցանէ զսէր. և թէ ոչ բա-
 ւեսցէ այդ դարման, անդ ժամանակն
 զայն ՚ի գլուխ հանէ. ապա թէ ոչ,
 շինայ ինչ այլ, բայց առնուլ պա-
 րան, և խեղզել զանձն: Երբ բանք
 լինէին վասն ապականեալ սովորու-
 թեան աւուրց իւրոց՝ սողտանէր և
 զանմտութիւն մարդկանն՝ որք յիրս
 ամօթալիս բնաւ յարժատ ոչ խնայեն,
 շատ է թէ յագեսցին ցանկութիւնք
 նոցա. իսկ խուսեն և խորշին եթէ լի-
 նիցին վասն օգտակար իրաց:

Արատեսի է և հռչակեալն այն յի-
 շատակարան, տալ խոհակերի տասն
 մնաս, և բժշկի դրամ մի. հինգ տա-
 զանդ մարդելուզի, և ծուխ՝ քաջ
 խորհրդականի. տազանդ մի պոռնկի,
 և դանդ մի իմաստասիրի:

Իբրև հարցանէին ընդ նա՝ յինչ
 պէտս սատարէ քեզ իմաստասիրու-
 թիւն, տայր պատասխանի. զի ընդովք

շատացայց, և կեցից անհոգ և անխոռվ:
 Յղեաց առ նա Դեմետրիոս Փաղերէոս
 գինի և հաց: Տասուցեալ Արատեսի
 ընդ այն զի կարծեաց Դեմետրիոս կա-
 րօտեալ գինւոյ զայր իմաստասէր,
 դարձոյց առ նա զգինին, յողոց ե-
 հան և ասէ, իցէ թէ գոյին և աղբերք
 հացի: Արձակ համարձակ ազատու-
 թիւն Արատեսի մեծապէս հաճոյ գտաւ
 Իպարքեայ քեռ Մետրոկղի. մինչև զի
 զանց արարեալ զինդրովք բազմաց,
 օրք զՏետ էին ՚ի կնութիւն առնուլ
 զնա, սպառնացաւ ծնողաց իւրոց ան-
 ձին առնել՝ թէ ոչ ամուսնացուցեն
 զնա ընդ Արատեսի: Զան ՚ի գործ ար-
 կին ծնողք նորա քաղցրութեամբ ՚ի
 բաց հանել ՚ի նմանէ զայն խորհուրդ.
 այլ զի ոչ յաջողեաց նոցա զոր կա-
 մէինն, դարձեալ ՚ի նա ինքն Արա-
 տէս ապաստան եղեն, աղաչեալ զնա
 մերժել յաղջկանէն զմտածութիւնն
 զայն: Իսկ նորա յաւուր միում գէպ
 ժամանակ գտեալ՝ մերկացաւ առաջի
 նորա՝ ցուցանել նմա զսապատողն և
 զանգեղեայ կերպարանս իւր, միան-
 դամայն առաջի արար նմա զվերար-
 կուն, զմախաղն և զդաւազան, և ա-
 սէ. զի մի խաբեսցիս ինչ, ահա՛ այր քո,
 և զոր ինչ ունի նա. արդ տես քաջ զոր
 ինչ կամիցիս առնել. զի թէ ինձ կին

լիցիս՝ այս միայն լիցի հարստութիւն
քո : Ոչինչ երկմտեցաւ Իպարբիա, ըն-
տրեաց զԱրատէս քան զամենայն ինչ
իւր՝ և քան զայն ամենայն որոց ակն-
ունէր. ոչ եթող երբէք զայր իւր, ըզ-
հետ ընթանայր նորա յամենայն տե-
ղիս. և ընդ նմա էր ՚ի ժողովս ամենայն :

Մինչդեռ էին սոքա երկոքեան ՚ի կո-
չունս ուրեք առ Լիւսիմաքեայ, Իպար-
բիա առակս արկ թէողորոսի ամ-
պարշտի որ յայնժամ անդ էր, և ասէ.
Եթէ թէողորոս ՚ի գործելն չէ ստգտա-
նելի, ապա նոյնպէս և Իպարբիա ՚ի
գործելն զնոյն. արդ թէողորոս հարկա-
նելով զանձն ոչ գործէ տարադէպ, ա-
պա և ոչ Իպարբիա ՚ի հարկանելն ըզ-
թէողորոս. ասաց, և եհան ապտակ
թէողորոսի : Ոչինչ պատասխանի ետ
թէողորոս յայնժամ բանիցն այնո-
ցիկ. այլ կորզեալ ՚ի թիկանց Իպար-
բեայ զվերարկուն ընդ որ ոչ եցոյց զար-
մացումն կինն. ասէ, ահա՛ կին՝ որ ՚ի
բաց եթող զթոցն և զոստայն : Ճըշ-
մարիտ է՝ ասէ Իպարբիա. այլ կարծի-
ցես դու թէ ես յանխորհուրդս ընտրե-
ցի զիմաստասիրութիւն քան զգործ-
կանացի :

Յամուսնութենէ երկոցուն ՚իմաս-
տասիրացդ ծնաւ որդի Պասիկոս ա-
նուն, յորոյ ՚ի դաստիարակութիւն

խնամ կալան հայր և մայր նորա՝ սնու-
ցանել զնա կիւնիկեան իմաստասիրու-
թեամբ: Եհարց ցնա Աղեքսանդր. թէ
կամիցիս զի նորոգեցից զհայրենիս քո-
ետ պատասխանի Արատէս, թերևս ե-
կեսցէ այլ որ Աղեքսանդր ՚ի քակտել
զայն: Չկան, ասէր, այլ հայրենիք քան
վաղբատութիւն և զարհամարհու-
թիւն փառաց՝ յորոյ վերայ չկայ իշ-
խանութիւն բաղդի. քաղաքակից եմ,
ասէր, Դիողինեայ. և վասն այսր
զերծ եմ ՚ի նախանձոտաց: Ճոխու-
թիւնք մեծատանց ծառք են՝ բուսեալ
՚ի լերինս և ՚ի ժայռս անմատոյցս, զո-
րոց զպտուղսն ցինք և ազուաբ ուտեն.
նոյնպէս մարդելոյզք և կանայք պոռ-
նիկք ուտեն զինչս մեծամեծաց: Մե-
ծատուն շուրջ պատեալ ՚ի շողոքոր-
թաց որթ է մատնեալ ՚ի բերան գայ-
լոց:

Հարցեալ մինչև ցերբ արժան է
հպատակել իմաստասիրութեան, տայր
պատասխանի. մինչև յայտ յանդիման
լիցի թէ նորա՝ որոց տուաւ իշխանու-
թիւն առաջնորդութեան զօրու, ա-
բածողք են իշոց:

Արհամարհէր Արատէս՝ որպէս և
այլ կիւնիկեանք զամենայն գիտու-
թիւնս բաց ՚ի բարոյականէն. ապրե-
ցաւ ընդ երկաբ, և կորացաւ ՚ի յե-

տին ամս ծերութեանն : Կմացեալ ըզմօտել կատարածի կենացն՝ ուշի ուշով միտեղեալ ՚ի քննութիւն անձին՝ ասէր .
 Ա՛հ եղկելի սապատողն, ծերութիւն քովարէ զքեզ ՚ի գերեզման . տեսցես ընդ հուպ զգոթսական ապարանսն : Մեռաւ առ սպառել ուժոյ զօրութեանն .
 Ծաղկեաց զժամանակօք ճժի՛, ողիմպիադին, յորում զհամբաւի հարեալ էր ՚ի Թերէ քաղաքի, և ստուերածածէր զայլովք իմաստասիրօք որք էին ՚ի նմին ուսմանէ : Սա ինքն էր վարժապետ Չենոնի՝ առաջնորդի մեծահամբաւ աղանդոյն ստոյիկեանց :

Պ Ի Ի Ռ Ո Ն

Երիցագոյն ժամանակաւ քան զԵպի.
կուրոս, երևեալ զհարիւրորդ քսանե.
րորդ ողիմպիադաւ :

ԼՌԱԶՆՈՐԴ Է ՊԻԼՈՌՆ՝ ուսման
անուանելոյ պիլոռոնեան կամ սկեպ.
տիկեան, որդի էր Պլիստարքոսի ու.
րումն յԵԼէա քաղաքէ 'ի Պեղոպոնե.
սոս. զառաջինն միտեցաւ 'ի նկարչու.
թիւն. յետ այնորիկ աշակերտեցաւ
Դրիսոնի ումեմն, և ապա իմաստասի.
րին Անաքսագորայ, յոր յարեցաւ
սրտի մտօք, և զհետ ընթացաւ զնորա
մինչև 'ի Հնդիկս: Յերկարաձիգ ուղևո.
րութեան անդ բովանդակ ջան և դործ
էր Պիլոռոնի ելանել և մտանել առ
մոգս, առ մերկիմաստակս, և առ ամե.
նայն իմաստասէրս արևելեայց, զորոց
'ի միտ առեալ բովանդակ զգիտու.
թիւն նոցա, ոչինչ եգիտ 'ի նոսա ար.
ժանի իմաստասիրութեան. ամենայն
ինչ անըմբռնելի թուեցաւ նմա, ճըշ.
մարտութիւնն թաղուցեալ յան.
դունդս, և ոչ այլ ինչ բանաւոր՝ բայց
յերկմիտս լինել զամենայն իրաց, և

ոչինչ երբէք սահմանել որոշակի: Ամենայն մարդիկ՝ ասէր, կարգաւորեն զկեանս իւրեանց ըստ կարծեաց կարծեաց. գործեն միշտ առ սովորութեան, և քննեն զամենայն ինչ ըստ օրինաց և ըստ սովորութեանց հաստատելոց յաշխարհս իւրաքանչիւր, այլ զիտէ բնաւ և ոչ ոք զլաւութիւն և զյոռութիւն իրացդ այդոցիկ:

Աղքատ ոմն էր Պիւռոն, և ՚ի սակաւուց ոմանց ծանուցեալ, պարապեալ նախ յարհեստ նկարչութեան. բազումք յընտիր ընտիր նկարուց նորա ընդ երկար ժամանակ պահեցան յԵլէա: Մենակեաց էր բնութեամբ, և բնաւ ոչ երևէր ՚ի ժողովս ուրեք: Ստէպ ճանապարհորդէր, և ոչ ումեք ծանուցանէր զտեղին ուր գնայր. հանդուրժէր ամենայնի երկայնմտութեամբ. չէր վստահ ՚ի զգայութիւնս իւր, մինչև չկամել խոտորել ոչ յապառաժից, ոչ ՚ի վախից, և ոչ յայլոց վտանդից. և յանձն առնոյր արդեօք խորտակիլ ընդ կառօք, քան խուսել ՚ի բաց. վասն օրոյ ոմանք ՚ի բարեկամաց նորա ցանգառ նմա կային՝ խնամ ունել նմա: Անդրդուելի էր բնաւորութիւն նորա. նոյնպէս և հանդերձք նորա յամենայն ժամ միօրինակ: Յորժամ խօսէր ինչ ընդ ումեք, և այրն թողեալ զնա ՚ի

բաց գնայր, ոչ լռէր Պիւռոնն 'ի բա-
նիցն՝ մինչև 'ի դլուխ հանել զխօսանս :
ընդ ամենայն մարդկան միօրինակ ան-
խորաբար վարէր :

'ի սուղ ժամանակի զհամբաւի հա-
րաւ անուն Պիւռոնի ընդ համօրէն
Ելլադա . և բազումք զհետ գնացին
զուաման նորա : Ծանուցեալ ելէաց-
ւոց զվաստակս Պիւռոնի պատիւ մե-
ծասպաս ձօնեցին նմա , կարգեալ զնա
գերագոյն քրմապետ կրօնից պաշտա-
մանց՝ և ութենացիք գրեցին զնա քա-
ղաքացի իւրեանց : Սիրելի էր Եպի-
կուրոսի՝ կենաց կցորդ լինել ընդ սմա,
և սքանչացեալ էր ընդ հանգամանս
կենաց սորա : Յաչա ամենեցուն համա-
րեալ էր այր ազատ, և զերծ յամենայն
ամբօխմանց , յունայնութեանց , և 'ի
սնոտեաց բովանդակ : Եւ միով բանիւ
ասել աստուած ոմն համարեալ էր 'ի
վերայ երկրի՝ ըստ հաւաստելոյն Տիմո-
նի իմաստասիրի . անվրդով անցուցա-
նէր զաւուրս իւր ընդ Փիլիստայ քեռն
իւրոյ՝ աշակերտելոյ իմաստասիրու-
թեան : Գնայր 'ի վաճառանոցս վաճա-
ռել ձագս թռչնոց և խոչքորս . և ինք-
նին աւել ամէր տան իւրոյ :

Յաւուր միում գիմեաց շուն մի 'ի
վերայ նորա խածանել զնա , և Պիւ-
ռոնն 'ի բաց վանեաց զնա . իսկ յաղ-

գել ուրուք ցնա՝ թէ զընդդէմն գործէ
 զվարդապետութեան իւրոյ, ետ պա-
 տասխանի Պիւռոն. որչափ դժուարին
 է՝ թողուլ զմոլորութիւնն կանխա-
 կալ, և ծանր է՝ աղատ կացուցանել
 զանձն յամենայնէ. սակայն հանդերձ
 այնու ամենայնիւ՝ պարտ է մեզ բուռն
 առնել անձանց մերոց, և զմտաց մե-
 րոց զօրութիւն ՚ի գործ արկանել :
 Գարձեալ յանցանել նորա երբեմն
 ընդ ծով, յարեաւ մրրիկ ուժգին, մինչև
 նաւն ՚ի վտանգի լինել ՚ի խորտակիլ .
 և ամենեքին որք ընդ Պիւռոնի էին՝
 ահիւ մեծաւ տազնապէին, միայն Պիւ-
 ռոն անվրդով կայր ՚ի խռովայոյզ պա-
 հուն, և ցուցանէր նոցա զխոչքոր մի
 որ անյագութեամբ ուտէր մօտ նոցա,
 որպէս թէ ՚ի նաւահանգստի կայր
 նաւն. և ասէր ցնոսա՝ թէ պարտ է
 իմաստնոց նմանել աներկիւղ հանդար-
 տութեան այդր փոքու կենդանւոյ. և
 անալէկոծ մնալ ՚ի վիշտս ամենայն :

Ունէր Պիւռոն յանձին իւրում
 կեղս իմն շարաւոտս. և որ խնամէր
 զնա՝ յաւուր միում կտրեաց և խար-
 եաց որպէս պէտք էին, ընդ որ ոչ ցա-
 ւեաց և ոչ տազնապեցաւ Պիւռոն :
 Այս իմաստասէր համարէր յանձին
 իւրում թէ գերագոյն աստիճան կա-
 տալելութեան՝ յոր հասանել կա-

րասցէ մարդ յայսմ աշխարհի՛ է զգու-
 շութիւնն ՚ի սահմանելոյ ինչ։ Նոյն-
 պէս և աշակերտք նորա զուգաձայն
 էին թէ չմարթի հաւաստեալ գիտել
 ինչ. այլ ոմանք ՚ի նոցանէ խնդրէին
 զճշմարտութիւն՝ յուսով գտանելոյ,
 և այլք յուսահատ ելանէին ՚ի գտանե-
 լոյ երբէք. էին որք կարծէին թէ հնար
 է հաւաստել զմի ինչ և եթ, այս ինքն
 զայն՝ թէ գիտեն՝ զի ոչինչ գիտեն,
 թող զորս չգիտէին և զանգիտանալն ։
 Ինչ ինչ ՚ի կարծեաց աստի յածէր և
 յառաջ քան զաւուրս Պիւռոնի. այլ
 զի ոչ ոք մինչև ցայնժամ յայտնու-
 թեամբ բանս ՚ի մէջ արկեալ էր վասն
 ամենայն իրաց յերկմիտս լինելոյ,
 յայնմ հետէ և այսր համարեցաւ Պիւ-
 ռոն գլուխ ամենայն սկեպտիկեանց ։
 Իսկ զայդ անուն կալան ՚ի յոյն ձայ-
 նէ՝ որ մտածող լսի առ նոսա ։ Պատ-
 ճառ բանից իմաստասիրիս որ յերկ-
 բայս արկանէր զամենայն դատաստան
 մտաց՝ այս էր, զի մեք հասու լինիմք ի-
 րաց իրաց ըստ հայեցուածոյ վերբերու-
 թեանն զոր ունին առ միմեանս. զորոց
 զներգործութիւնն տգիտանամք մեք ։
 Օրինակ իմն տերևք ուռենւոյ քաղց-
 րաձաշակ են այժից, և դառնահամ ՚ի
 քիմս մարդկան. մոլեխինդ պարարէ
 զըրամարդիս, և զմարդիկ սպտնանէ ։

Գեմտփոն խնամած ու սեղանոյ Աղեք-
սանդրի՝ կիզոյր ՚ի ստուերի, և զփայր
յարևու : Անտրոն Արգոսացի ընթա-
նայր ընդ աւազուտ անապատն Լիբիոյ՝
ոչ կարօտելով ջրոյ յարբումն : Որ ինչ
իրաւացի է ՚ի գաւառի ուրեք, անիրաւ
դատեալ է յայլում . և որ ինչ առա-
քինութիւն համարեալ է ՚ի միում,
ախտ է անգոսնելի առ այլովք : Առ
Պարսս մտանեն հարք առ դստերս իւ-
րեանց, որ առ Յոյնս յանցումն է
դժնդակ : Մասսագետք ժողովուրդ
Սարմատիոյ՝ շունին խտրութի ամուս-
նաց . իսկ այլ ազինք բաց է ՚ի բաց
հրաժարեն յայդմանէ : Գողութիւն
առ կիլիկեցիս քաջութիւն է, և առ
Յոյնս պատուհաս կրէր : Արիստիպպոս
զայս ինչ հաճոյական գրեաց, և Ան-
տիսթենէս զայլ ինչ, և Եպիկուրոս
զայլ : Ոմանք հաւատան նախախնամու-
թեան, և կէսք բաց է ՚ի բաց մերժեն
զայն : Եգիպտացիք թաղեն զմեռեալս
իւրեանց . կիզուն հնդիկք, և պէոփնա-
ցիք ՚ի լիճս ընկենուն : Որ ինչ ընդ մի
երանդ տեսանի ՚ի լոյս արևու, այլօ-
րինակ երևի ՚ի նշոյլ լուսնի, և այլ
գարձեալ առ լուսով ճրագի : Պարս-
նոց ազաւնոյ ՚ի բազում գոյնս փող-
փողէ ըստ հայեցուածոց զանազան ըզ-
գիրսն ունելոյ : Գինի չափով արբեալ՝

զօրավիզն է սրտի . իսկ առաւելու
 թեամբ զեղծեալ 'ի նմին' ամբօխէ
 զզգայութիւնս, և զմիտս խաւարէ : Որ
 ինչ աջակողմեան է միոյն , ձախակող-
 մեան է հանդիպոյ կացելոյն : Յունաս-
 տան որ յարևելից կայ Խտալիոյ . զարև-
 մտեան զկողմն ունի առ աշխարհաւն
 Պարսից : Որ սքանչելիք են 'ի տեղւոջ ու-
 բերք , սովորական և յաճախեալ է այ-
 լուր : Մի և նոյն այր՝ հայր է ոմանց ,
 և եղբայր այլոց . ըստ այսմ օրինակի
 ներհակութիւնն երևեալ յամենայնի՝
 թելադիր լինէր Պիւռօնի և աշակեր-
 տաց նորա՝ բնաւ ոչինչ որոշել իբր
 հաւաստի . քանզի ասէին չիք ինչ յաշ-
 խարհի՝ լի բովանդակ ծանօթացեալ
 մեզ՝ մինչև ոչ ևս կարօտել համեմա-
 տելոյ զնա ընդ այլոց նմանեաց : Եւ զի
 ընդունէին և ոչ մի ճշմարտութիւն՝
 'ի բաց հերքէին և զապացոյցս ամե-
 նայն . քանզի ասէին . պարտ է զի ա-
 մենայն ապացոյց հիմնեսցի 'ի վերայ
 պարզ և բացայայտ իրաց՝ որ ոչ ևս
 կարօտ իցէ ապացուցի . արդ յաշխար-
 հիս չկայ ինչ մի այդպիսի , զի թէպէտ
 և ինչ ինչ յայտնագոյն թուիցին , սա-
 կայն տակաւին պարտապան եմք ցու-
 շանել զճշմարտութիւն իրացն զոր
 այնպէս հաւատամք :

Պիւռօն՝ որպէս և Հոմերոս , զուգա-

կըշռէր զմարդիկ տերևոց ծառոց՝ որք
 յաջորդեն զմիմեանս, և նոր սաղարթք
 բուսանին փոխանակ անկեղոյն: Մեծ
 եղև պատիւ նորա ՚ի կեանս իւրում
 յամենայն բարեկամաց իւրոց. և մե-
 ռաւ ՚ի հասակի ամաց իննսնից:

Բ Ի Ո Ն

Աշակերտ էր Թէոփրաստոսի յաջորդին Արիստոտելի 'ի Ճեմարանին . առ ժամանակօք հարիւրորդ չորեքտասաներորդ ողիմպիադին :

ԲԻՈՆ իմաստասէր աշակերտեցաւ ընդ բազում ժամանակս 'ի պղատոնեան լսարանին . և տաղտկացեալ անտի՝ ծաղրէր և խաղ առնէր զկանոնօք նորին , մինչև իսպառ հրաժարեաց անտի : Ստացաւ վերարկու մի , դաւաղան և մախաղ , և յարեցաւ յօւսումն կիւնիկեանց . այլ զի էր և 'ի նմա ինչ ինչ՝ ոչ ըստ իւր քմաց՝ յաւել 'ի նոյն բազում ինչ 'ի կանոնացն աւանդելոց 'ի Թէոդորոսէ , յաշակերտէ և յաջորդէ Արիստիպպոսի 'ի կիւրենեան դրպրոցին : Յետ ամենայնի աշակերտեցաւ Թէոփրաստոսի՝ որ յաջորդն էր Արիստոտելի :

Նրբամիտ էր Բիոն , և քաջ տրամաբան . գերապանծ 'ի քերթողութեան և յերաժշտութեան , և մեծապէս յօժարեալ յերկրաչափութիւն : Ոչ ընդ երկար մնայր 'ի տեղւոյն .

րէք . անցանէր քաղաքէ 'ի քաղաք , և գօտանիւր 'ի կոչունս ամենայն , յորս հանձարովն իւրով զբօսեցուցանէր զա-
կումբ բազմականին , և սքանչացուցա-
նէր զամենեսին ընդ վսեմութիւն հօ-
դւոյ իւրոյ : Եւ քանզի ամոք էր բնու-
թեամբ՝ ամենայն մարդ ջան 'ի գործ
արկանէր՝ ունել զնա առ ինքն՝ և մե-
ծապարդև մեծարել զնա :

Զգաց Բիոն թէ ումանք 'ի թշնա-
մեաց իւրոց անյօդ առասպելս կցկցեալ
են առաջի Անտիգոնոսի արքայի վասն
անտոհմ անշքութեան իւրոյ . բնաւ
խռովեցաւ և ոչ ինչ ընդ իրան , և ոչ
զգիտելն իմացոյց : Յղեաց կոչեաց զնա
Անտիգոնոս՝ կարծելով 'ի վարանս
տաղնապի արկանել զնա , և ասէ ցնա .
աղէ պատմեա՛ ինձ զանուն քո , զհայ-
րենիս և զազդ . և զինչ գործ էր ծնո-
ղաց քոց : Ետ պատասխանի Բիոն ան-
խռով . հայր իմ՝ ասէ , ազատագիր ոք
էր՝ որ վաճառէր ճարպ խողի , և կողի
աղի . անհնար իմն էր գիտել՝ արդեօք
գեղեցիկ էր նա թէ տգեղ , քանզի կեր-
պարան դիմաց նորա այլաձևեալ էր 'ի
բազում կռփահարութենէ տեառն իւ-
րոյ : Սկիւթացի էր յազգէ՝ սերեալ 'ի
բնակչաց առ Բորիսթէն գետով , (որ
այժմ՝ Նիէբէր անուանի) հանդիպե-
ցաւ նա մօր իմում 'ի բազմախումբ

տեղւոջ ուրեք, անդ ամուսնացաւ ընդ նմա. և ապա չգիտեմ՝ վասն որոց յանցանաց վաճառեցաւ կնաւ իւրով և որդւովք: Եւ յայնժամ մանուկ էի վայելչագեղ, զնեաց զիս ատենաբան ոմն. և ՚ի մեռանելն՝ զիս կացոյց իւր ժառանգ. իսկ իմ պատառեալ զկտակն և այրեալ ՚ի հուր՝ անցի յԱթէնս, ուր հպատակեցի իմաստասիրութեան: Ահա արդ գիտես զանուն իմ, զհայրենի երկիր, զհայր իմ, զմայր, զծագումն որպէս և զիս իսկ գլխովին: Ոչ ևս քեզ նորանոր առասպելս կարկատեցեն Պերկէոն և Փիլոնիդէս՝ առ ՚ի զուարթացուցանել զքեզ:

Հարցաւ Բիոն երբեմն՝ ո՞վ է հիգացեալ քան զամենայն մարդ. ետ պատասխանի. նա որ հնարի երջանկանալ քան զամենայն մարդ, և վարել կեանս հեշտին և անդորր: Ծերութիւն՝ ասէր, նաւահանգիստ է ամենայն ջարեաց, յոր հասանեն ամենայն աղէտք: Պարտ է ՚ի համար արկանել զայն ամս միայն՝ յորս ոք եհասս փառաց: Գեղեցկութիւն՝ պարականոն իմն բարի է՝ որ չէ ընդ մերով ձեռամբ: Ճոխութիւն՝ շողկապ է ամենայն մեծամեծ գործոց. և առանց նորին՝ որչափ և աջողաձեռն իցէ մարդ՝ կատարէ և ոչինչ:

Հանդիպեալ երբեմն առն ումեմն որ վատնեալ էր զամենայն ինչս իւր՝ ասէ ցնա . եկուլ երկիր զԱմիլիարաոս հարցուկ թերացի, իսկ դու զերկիր կլեր : Ատենախօս ոմն՝ այր վայրագ բարոյիւք՝ ասէ ցնա . կամիմ՝ աղերսել զքեզ վասն իրաց ինչ . ետ պատասխանի Բիոն . մտադիւրագոյնս կատարեցից, միայն թէ ՚ի ձեռն այլոյ ասացես ինձ զոր խնդրես, և ոչ դու քեզէն : Դարձեալ՝ մինչ անցանէր ընդ ծով նաւու, և բազում արք չարագործք կային անդ, դերի վարեցաւ ՚ի հինից նաւն . յայնժամ ասէին ընդ միմեանս եղեռնաւորքն, չեմք ապրանաց եթէ ՚ի ծանօթութիւնս դայցեմք : Եւ ես, ասէ Բիոն, անշուշտ ՚ի մահ մատնիմ թէ անծանօթ մնացից :

Տեսեալ զայր ոք ադահ զի անցանէր՝ ասէր ցնա . դու ոչ ունիս զճոխութիւնս քո, այլ նորա գրաւեալ ունին զքեզ : Դժնդակ չար համարէք զչգիտելն հանդուրժել չարեաց : Չէ արժան, ասէր, անդոսնել զծերութիւն ուրուք, քանզի ամենայն մարդոյ հնար է հասանել ՚ի դոյն վիճակ : Լաւագոյն է յիւրմէն տալ, քան զօտարին խնդրել . քանզի առ ձեռն պատրաստ է երջանկութիւն՝ նա և ՚ի նուազութեան ստացուածոց . և ցանկացողն

յամենայնի կարօտեալ է : Յանձնա-
 պաստանութիւն չէ միշտ յանցումն
 ծանր յերիտասարդս . իսկ ծերոց
 պարտք են ամենայն ուրեք խորհուրդ
 հարցանել զգօնութեան : Չբարե-
 կամս ստացեալս միանգամ՝ պարտ է
 պահել միշտ այնպէս, զի մի՛ թուիցիմք
 միանալ մեղ ընդ վատ մարդկան, և
 խորչել ՚ի զգաստից : Խրատ տայր բա-
 րեկամաց իւրոց՝ համարել զանձինս
 յառաջադէմն յիմաստասիրութեան՝
 երբ նովին օրինակաւ ընկալցին զար-
 համարհանս իբրև զպատիւս : Չզգօ-
 նութիւն այնչափ դեր ՚ի վեր դասէր
 քան զամենայն առաքինութիւնս, որ-
 պէս տեսանելիք պատուականագոյն
 են առ այլովք զգայարանօք : Ամբարըշ-
 տութիւն՝ ասէր, ուղեկից չար է խղճի
 մտաց . քանզի անհնարին է ումեք հա-
 մարձակել ՚ի բանս՝ երբ խիղճ մտաց
 նորա ստգտանէ զնա վասն իրաց իրաց,
 և համարի յանձին իւրում՝ զայրա-
 ցեալ զնձ ՚ի վերայ իւր : Որք միան-
 գամ ոչ կարացեալ վերամբառնալ
 մինչև յիմաստասիրութիւն՝ զեռան
 զմարդկեղէն գիտութեամբք՝ են իբրու-
 սիրողք Պենելոպեայ կնոջն Ողիսեայ,
 որք շատ համարէին լինել ընդ նա-
 ժիշտ նորա՝ առ ՚ի չգոյէ տիկնոջն :

Յորժամ ՚ի Հոգոն կղզւոջ էր

Բիօն, տեսեալ զաթենացիս որ անդ՝
 ջանացեալ բովանդակ ՚ի ճարտասա-
 նութիւն և յատենախօսութիւն, սկը-
 սաւ ինքն ուսուցանել զիմաստասիրու-
 թիւն: Եւ ՚ի սողտանել զնա ոմանց՝
 թէ զի՞ ոչ նմանիս այլոց, տայր պա-
 տասխանի. ցորեան բերի, և դարի՞
 վաճառեցից: Իբրև բանք լինէին ա-
 առաջի նորա վասն պատուհասի Դա-
 նայիսեան դատերաց՝ որոց ըստ առաս-
 պելաց պատուհաս ՚ի վերայ եղաւ
 ցանգ ջուր հանել ծակոտեալ սակա-
 ուօք, տայր պատասխանի, յաւէտ ևս
 վշտակից լինէի նոցա՝ եթէ դատա-
 պարտեալք էին հանել ջուր անօթիւք
 որք ոչ ծակ իցեն:

Կեցեալ Բիօնի կեանս իմն դժնդակս՝
 անկաւ ՚ի մահիճս ՚ի Խալզիս քաղաքի,
 և ծիւրեալ մաշեցաւ ընդ ժամանակս
 երկայն: Եւ զի աղքատ էր յընչից, և
 չէր բաւական ՚ի հատուցումն վարձուց
 դարմանոյ իւրոյ՝ Անտիգոնոս արքայ
 յղեաց առ նա սորուկս երկուս, և
 պարգևեաց նմա պատգարակ՝ զնալ
 նովաւ յ՞ և կամիցի:

Աւանդեն թէ սորջացաւ Բիօն ՚ի
 հիւանդութեան իւրում վասն արհա-
 մարհելոյն զգիս. և ապաստան եղև
 առ նոսա թափել զանձն իւր ՚ի տառա-
 պանաց անտի. զնայր հոտոտէր զառ-

'ի պատիւ նոցա զենեալ զոհոն . խոս-
 տովան եղև զյանցանս իւր , և անկաւ
 առ կինն ոմն վհուկ ձեռն օգնութեան
 մաղթել 'ի նմանէ . տարածեաց առա-
 ջի նորա զթևս իւր և զպարանոց՝
 հմայել հմայիւք իւրովք : Չառածեցաւ
 'ի սնապաշտութիւնս տարապարտս ,
 գաբնազարդ յօրինեաց զգուռն իւր ,
 և յօժարամտեաց առ ամենայն՝ միայն
 զի պահեսցին կեանք իւր , այլ օգտեցաւ
 և ոչինչ : Մեռաւ տառապեալն , ընկ-
 ձեալ 'ի ցաւոցն զոր աղղեցին 'ի նա
 խրախուսքն առաջինք :

Ե Պ Ի Կ Ո Ի Բ Ո Ս

Ճնեալ յերրորդ ամի հարիւր ինն
ողիմպիադին . մեռեալ յերկրորդ ամի
հարիւրորդի քսաներորդի . 'ի հասակի
ամաց եօթանասուն և երկուց :

() ԻՆ Ա Ի Եպիկուրոս յԱթէնս 'ի
Տիլաիդեայց զարմէ 'ի սերնդոց Այա-
սայ առ ժամանակօք հարիւրորդ իննե-
րորդ ողիմպիադին : Անդստին 'ի չո-
րեքտասան ամաց հասակէ յարեցաւ
յիմաստասիրութիւն . ուսաւ ժամա-
նակս ինչ 'ի Սամոս կղզւոջ՝ առ ոտս
Պամփիլոսի պղատոնականի . և առ
չքաղցրանալ նմա վարդապետութեան
նորա , մեկնեցաւ 'ի դպրոցէ անտի , և
այլ ոչ ևս աշակերտեցաւ ումեք : Են
որք ասեն թէ ուսոյց զքերականու-
թիւն , այլ փութով տաղտկացաւ ան-
տի : Սիրելի էր նմա ընթեռնուլ զգիրս
Դիմոկրիտեայ , յորոց վերայ ամբարձ
նա զշինուած վարդապետութեան իւ-
րոյ :

'ի հասակի ամաց երեսուն և երկուց
ուսոյց զիմաստասիրութիւն 'ի Մե-
տելինէ և ապա 'ի Լամպսակոն : Յետ

ամաց հնգից դարձ արար յԱթէնս և
անդ սահմանեաց նոր ուսումն: Գնեաց
դրախտ գեղազուարձ զոր ինքնին մշա-
կէր, և ՚ի նմին հաստատեաց զգլխոց
իւր: Արէր անդ անդորր կեանս և
խնդամիտ ընդ աշակերտաց իւրոց՝ ու-
րոց ուսուցանէր ՚ի զգնալն իւրում և
՚ի վաստակել, և պատուիրէր նոցա ՚ի
միտ առնուլ սերտութեամբ զոր ինչ
նա դաս ասէր: Խուռն ընթանային
առ նա յամենայն կողմանց Ելլադայ՝
լսել ՚ի նմանէ, և տեսանել զնա յա-
ռաքինութեան իւրում:

Այր անկեղծ և անխարդախ էր
Եպիկուրոս. քաղցր և ընտել առ ա-
մենեսին: Սիրէր զազգականս իւր կա-
մակարուց, և տայր նոցա բովանդակ
զոր ինչ ունէրն: Բազում անգամ
խրատ տայր աշակերտաց իւրոց՝ վշտա-
կից լինել առ ստրուկս իւրեանց, և
ինքն խնամոտ մարդասիրութեամբ վա-
րէր առ իւրան. թոյլ առնէր նոցա ու-
սանել. նա և ինքնին մարդէր զնոսա՝
իբրև զաշակերտս:

Կերակուր էր Եպիկուրոսի՝ աշտուձ
հաց և ջուր սոսկ, միրգք և ունդք հա-
սունացեալք յիւրում պարտիղին: Ա-
սէր երբեմն առ ազգականս իւր. բե-
րէք ինձ կաթն և պանիր՝ զի թէ կա-
միցիմ խրախուսս յարդարեցից անձին

խոյ : Այս էին կեանք Եպիկուրոսի
ասէ Լաերտիոս, առնն որ համարեալն
է մտեալ 'ի հեշոութիւնս : Աիկերոն
'ի Տուսկուլեան գիրսն իւր յողոց
հանէ և ասէ . որպէս սահմանափակ
էին ցանկութիւնք Եպիկուրոսի :

Աշակերտք նորա նմանողք դտան
ժուժկալութեան վարժապետի իւ-
րեանց, շատացեալ ընդովք և կ'թովք,
ոմանք ըմպէին սակաւ ինչ գինի, իսկ
այլք ամենեքին ջրով և եթ շատանային :
Ոչ կամէր Եպիկուրոս առնել քսակ
հասարակաց աշակերտաց իւրոց՝ իբրև
ղաշակերտս Պիւթագորայ . քանզի՝ ա-
սէր, այն նշան իմն է երկմտելոյ զվի-
մեանց, քան սերտ միութեան : Ոչինչ
աղնուազոյն համարէր քան զխմաստա-
սիրութիւն . երիտասարդք, ասէր,
վաղազոյն որքան հնար է բռնն հար-
ցեն յխմաստասիրութիւն . իսկ ծերոց չէ
արժան երբէք վհատել յայնմանէ .
քանզի զիտաւորութիւն մտաց նոցա
է հասանել յերջանկութիւն . ապա
ամենայն մարդկան հարկ է 'ի նոյն
պնդիլ սրտի մտօք :

Երջանկութիւն՝ զորմէ ճառ ար-
կեալ աւանդեն իմաստասէրք՝ է բնա-
կան երջանկութիւն . այս է՝ վիճակ
խաղաղութեան յոր հնարաւոր իցէ
յաստի կեանս հասանել զօրութեամբ

բնութեան: Եպիկուրոս դնէ զնոյն ոչ
 'ի զգալի հեշտութեան, այլ յանդոր-
 րութեան ոգւոց, և յառողջութեան
 մարմնոյ: Ոչ այլ ինչ իմանայր զբա-
 րին ծայրագոյն, բայց թէ՛ 'ի ձեռին
 ունել համանգամայն զերկուս զայսո-
 սիկ: Ուսոյց թէ առաքինութիւն սա-
 տար լինի յերջանկութիւն կենաց,
 քանզի չկայ ինչ քաղցրագոյն՝ քան
 կեալ իմաստութեամբ ըստ օրինաց
 զգօնութեան. շունել ինչ տեղի ստոր-
 տանաց. ոչ պարանել բնաւ 'ի յան-
 ցանս. չմտասել բնաւ ումեք. բարե-
 դործել ըստ մարթելոյ. 'ի զլուխ ամե-
 նայնի՛ մի պակաս դտանիլ 'ի պատշաճ
 պարտուց կենացս: Չսոցա ամենեցուն
 զհետ բերէ՛ թէ միայն մարդ զգօն կա-
 րէ լինել երջանիկ. և առաքինութիւն՝
 անանջրպետ է յանդորր և 'ի ինդա-
 միտ կենաց:

Ոչ լռէր 'ի գովութենէ պարկեշ-
 տութեան և ժուժկալութեան՝ որք
 յանդորրութեան պահեն զհոգի, պա-
 հեն զառողջութիւն մարմնոյ. և 'ի հի-
 ւանդանալ նորա՝ ինամարկու լինին:
 Պարտ է, ասէր, մարդել զանձն առ 'ի
 շատ գրել զսակաւն. և այս իսկ է ճո-
 խութիւն մեծագանձ՝ զոր ստանալ
 հնար իցէ: Առ այնու՝ զի իրք սովորաւ
 կանք և նուազունք զնոյն հեշտութիւն

մատակարարեն՝ յորժամ որ քաղցեալ
 իցէ՝ զոր ինչ համադամ կերակուրք
 խահադործաց, նա և անպաճոյճ կեանք
 հաստատուն առնեն զառողջութիւն .
 դուխ ոչ ծանրանայ . ազատ են միտք,
 և յամենայնի ձեռնհաս ՚ի հետապըն-
 դութիւն ճշմարտութեան, և պատ-
 ճառին որ վարէ զմեզ ընտրել ՚ի գոր-
 ծոց մերոց զմին քան զմիւսն : Նա ա-
 պաքէն խնջոյք եթէ սակաւ ուրեք լինի-
 ցին՝ հաճոյական դատին . և դիւր է
 հանդուրժել աղետից բաղդին՝ այնմ
 որ գիտիցէ շատ ասել սակաւուն՝ որ-
 չափ բնութիւնն ինքնին խնդրեսցէ,
 քան որ սովորեալն է յօրանալ ՚ի հեշ-
 տութեան և ՚ի մեծութեան : Ոչ որ
 գիտէ քաջ խորշել զգոյշ կալ ՚ի խրա-
 խութեանց որք ապականեն զմարմին,
 և զհոգին տղեղացուցանեն . և թէպէտ
 ամենայն հեշտութիւն ինքնին ցանկա-
 լի իմն բարի է, սակայն բացէ ՚ի բաց
 հրաժարել պէտք են, մանաւանդ յոր-
 ժամ որ կից նմին չարիք առաւել իցեն
 քան զոր անտի բերկրութիւն . որպէս
 և ընդհակառակն՝ շահեկան իմն է
 հանդուրժել չարին՝ զորոյ անվրէպ
 զճետ գայցէ հատուցումն բազմապա-
 տիկ քան զաղէտան կրեալ :

Այս կարծիք էին նորա ընդդէմ
 կարծեացն կիւրենեանց . թէ անցա-

ւութիւն՝ հեշտութիւն է մշտնջենա-
 ւոր . և հեշտութիւնք հողեղէնք յա-
 ւէտ զգալի են քան զմարմնոյն . քան-
 զի՝ ասէր , մարմին զառժամեան ևեթ
 զգայ զցաւ . այլ հողին բաց յառա-
 ջիկայ չարեացն՝ դիտէ զանցեալն և
 զապառնին : Ըստ Եպիկուրոսի՝ մարմ-
 նեղէն է հողիս մեր՝ զի նա՝ է որ շար-
 ժէ զմարմին մեր . կցորդի հողին ամե-
 նայն բերկրութեանց և վշտաց նորա .
 նա ինքն դրդէ զարթուցանէ զմեզ՝ թէ և
 իցեմք ՚ի քուն թանձրութեան ընկըղ-
 մեալ . նա ինքն այլափոխէ զգոյնս դի-
 մաց ըստ այլ և այլ շարժուածոց իւ-
 բոց : Եւ պնդէր հաստատագոյնս՝ թէ
 անմարթ է հողեոյն կցորդութիւն ու-
 նել ընդ մարմնոյ՝ թէ չլցէ մարմնե-
 ղէն : Քանզի շոշափել և շոշափիլ՝ մարմ-
 նոյ միայն գործ է : Ատրկաւ նա ընդ
 միտս իւր՝ թէ հողիս մեր անկուած
 իմն է նրբին նիւթոց՝ սփռելոց ընդ
 մարմին մեր ողջոյն՝ որոյ մասն է և
 ինքն , որպէս ոտն , ձեռն , կամ գլուխ .
 սմին համաձայն ՚ի վերայ բերէ՝ թէ ՚ի
 մեռանել մեբում կորնչի և հողին ,
 սփռի իբրև զցոլորչի , և ըստ օրինակի
 մարմնոյ ոչ ևս զգայ . այնր աղաղաւ-
 երկնչել ՚ի մահուանէ չէ արժան . քան-
 զի ոչ է շար . վասն զի բարին և չարն
 ՚ի զգացման կուն : Արդ մահն զի դա-

դարումն է ամենայն զգայութեանց,
 ապա ոչինչ է մեզ ընդ նմա և ոչ իւրիք
 հաղորդութիւն. և երբ կեամք մեք,
 չեք մահ. իսկ 'ի հասանել մահու՝ ոչ
 ևս կայ մարդն: Ապաքէն՝ ցորչափ
 յաշխարհի դեգերիցիմք՝ բնաւորական
 է սիրել զյերկարելն 'ի նմին ցորվայր
 ունի զմեզ հեշտութիւն. սակայն և
 լքանելն զայն՝ մի ինչ դժուարին թու
 եացի, ըստ որում թողումք զսեղանս՝
 յետ բաւականութեամբ սւտելոյ յայն
 մանէ: Սակաւք ոմանք են ասէր որք
 դիտասցեն 'ի շահ օգտի վարել զառա
 ջիկայ կենցաղս. ամենայն մարդ դժկա
 մակէ ընդ վիճակն յորում կայ և ցան
 կայ յաջողուածով վայելել 'ի մնա
 ցուած կենացն, այլ ըմբռնին 'ի վե
 րահաս մահուանէ մինչև 'ի դլուխ հա
 նեալ զփափաքումն իւրեանց. այդ իսկ
 է՝ որ հէգ և թշուառական դնէ ըղ
 կեանս մարդկան: Յաղազս այնորիկ
 չեք ինչ առաւել դիպողագոյն՝ քան
 վայելել յառաջիկայս, ոչ միտ եղեալ
 բնաւ 'ի դալոցսն. չէ արժան մեծ հա
 մարել զերջանկութիւն կենացս ըստ
 ամացն թուոյ, այլ ըստ հեշտութեանն
 զոր կ'թեմք անտի: Աեանք համառօտ և
 խնդամիտ ցանկալի է քան՝ զերկայնն և
 զտաղտկալի: Աերակրոցն ընտրութիւն՝
 յանուշակ համն է, և ոչ 'ի բազմադէմ

խոհարարութեանն : Թէ համարիմք մեք թէ յետ աստի կենացս կապուտ մնասցուք ՚ի բովանդակ աստի բերկրութեանց, պարտ է ընդ նմին զմտաւածել թէ ոչ ևս այլ փափաքեսցուք ստանալ զայնս, որպէս և ոչ յառաջն ունէաք :

Վատութիւն է երկիւղ ունել ՚ի բանիցն պատմելոց վասն դժոխոց : Կեղծեալ պատուհասք Տանտաղոսի, Սիսիփոսի, Տիտիոսի, Դանաիսեանց՝ կարկառուն առասպելք են՝ հնարեալք ըստ քմաց, առ ՚ի ծանուցանել զյուզմունս և զտապնապ տարակուսի վշտացելոցն ՚ի կեանս յայս. յաղաղս որոյ պարտ է զանց առնել զամենայն ահաբեկութեամբք՝ որք ամբօխեն զանդորրութիւն և զհեշտութիւն կենաց :

Սահմանէր զազատութիւն ՚ի կատարեալ անհոգութեան. ոչ ընդունէր Եպիկուրոս զճակատագիր. ըզգուշակութեանն արհեստ տղայական իմն համարէր. քանզի և յանհնարիցն է կանուխ դիտել ումեք զլինելոցսն՝ որք յընտրութիւն մարդկան ապաստան են, և ոչ ունին հարկաւոր պատճառս : Բանք Եպիկուրոսի վասն աստուածութեան յամենայնի մեծարոյ են. այս փափաքումն էր նորա, ունել վասն աստուծոյ մտածութիւնս վե-

մականս . արգելոյր յամենայնի՝ մի ըն-
 ծայել նմա անարժանս ինչ անմահու-
 թեան և ծայրապատար երանութեան
 նորա : Ասէր , չէ՛ նա ամպարիշտ որ ոչն
 ճանաչէ զաստուածս պաշտեցեալս ՚ի
 ժողովրդենէ . այլ որ աստուծոց հա-
 մարի զտարադէպսն ամենայն՝ զորս
 նոցա դրէ խուժանն : Խորհեցաւ Ե-
 պիկուրոս ընդ միտս իւր թէ պարտ և
 արժան է երկրպագութիւն մատուցա-
 նել աստուածութեան վասն գերազան-
 ցութեան բնութեան իւրոյ . և մեղ
 պարտ է վասն այսր միայն պաշտօն
 հարկանել նմա , և ոչ առ պատուհա-
 սին երկիւղի , կամ յուսով օգտի : Խո-
 տան և անարժան համարեցաւ զսնտի
 պաշտամունս յորս մօլեզնի սամիկն ,
 որք և բազում այն է զի սաղրեն յե-
 ղեռնաւոր յանցումն : Անկրօն անաս-
 տուածութիւնն յորում ինքն ծնեալն
 էր նշաւակս զնէր զգիս իրաց իրաց
 մարդկեղէն տկարութեանց . իսկ ինքն
 Եպիկուրոս դաւանէր զնոսին իբրու-
 էակս ոմանս երջանկացեալս որք բնա-
 կին ՚ի տեղիս փափկութեան , ուր ոչ
 հողմք հարկանեն , ոչ անձրևէ , ոչ ձիւ-
 նէ , ուր շնչէ օդ քաղցրասիւզ , և ծա-
 դէ լոյս գեղանշոյլ , և յաւերժ ՚ի վայելս
 կան երջանկութեան իւրեանց : Բո-
 վանգակ ՚ի բաց տարաւ ՚ի նոցանէ

շամենայն որ միանգամ աղօտ և դը-
 ժուարահաս թուի մտաց մերոց . եզ
 զնոսա անկարօտս մեզ յերջանիկ վայելս
 իւրեանց , որք ոչն դրդուին ոչ ՚ի բա-
 րեաց մերոց , և ոչ ՚ի շարեաց . և թէ
 ասէր խնամ կալցեն վասն մարդկան ,
 կամ ձեռն մխեսցեն յիրակութիւնս
 աշխարհի , ամբօխի երջանկութիւն
 նոցա : Չայսր ամենայնի զհետ բերէ՝
 թէ անօդուտ է կարդալ զօգնութիւն
 նոցա , նուիրել աղօթս և պատարագս .
 ոչինչ իրք են ընթանալ ապաստանել
 առ դիս , և անկանել առ ոտս սեղա-
 նոց նոցա յամենայն անցս որ հանդի-
 պին . այլ պարտ է ակնարկել ընդ ա-
 մենայն պատահարս անդորր և ան-
 խռով աչօք : Յաւել ասել Եպիկուրոս
 ՚ի վերայ այսր՝ թէ ոչ բանիւ եկին
 մարդիկ յիմացումն աստուածոց , և եր-
 կիւղն զոր երկնչին ՚ի խաղաղասէր
 էակաց անտի՝ բազում այն է զի յա-
 ռաջ գայ ՚ի գիշերային երազոց՝ յորս
 հանդիպի նոցա տեսանել արհաւիրս
 ահաւորս : Թուի իմն թէ այս ցնորք
 գիշերականք դժնդակս իմն սպառնայ-
 ցեն մեզ՝ զուգաչափս ահագին մեծու-
 թեան իւրեանց : Տեսանեմք զնոսա՝ որ-
 պէս ինչ երևոյթքն ցուցանեն՝ զի ՚ի
 գլուխ հանեն դործս մեծահրաշս . և զի
 դարձեալ այդ ցնորք երևին յամենայն

Ժամանակի, և են իրք բազումք՝ որոց
 անժանօթ քողարկին պատճառք, իմա
 յորժամ տղէտք ոմանք մարդիկ պշու-
 ցեալ նային ընդ արև, ընդ լուսին,
 ընդ աստեղս, և ընդ նոցուն բարե-
 կարգեալ շարժութիւնս, և անդէն
 հաստատութեամբ պնդեն յանձինս
 թէ դոքին ամենայն էակք են մշտնջե-
 նաւորք և ամենակարողք: Դնեն ըղ-
 կայս բնակութեան նոցա ՚ի միջոցի
 հաստատութեան՝ յորոց լսեն զթըն-
 դիւն որոտմանց, և տեսանեն փայլա-
 տակել, կարկտել, անձրևել և ձիւ-
 նել. համարին զնոսա վերակացուս ՚ի
 ղեկավարել այսր սքանչելի կազմածոց
 աշխարհիս. և ՚ի նոսա հանեն զամե-
 նայն իրաց զպատճառս որոց գործք
 անյայտութեամբ թափուցեալ են ՚ի
 նոցանէ: Աստի, ասէ, սկիզբն կալաւ
 յաշխարհի յոլովութիւն բազնաց յա-
 ճախելոց ընդ ամենայն տեղիս, և պաշ-
 տօնն մատուցեալ աստուածոց՝ սկըղ-
 բնաւորեաց ՚ի սուտ և ՚ի սնտի ցնորից
 յայսցանէ:

Յաղագս հրաշապատում վայրացն
 յորս բնակութիւն է դից՝ Լուկրետիոս
 լատին քերթող զակատեալ յեպի-
 կուրեան վարդապետութիւն՝ ասէ թէ
 շունին բնաւ տեղի զուղակչութեան
 ընդ մեծակառոյց ասպարանս զորս տե-

սանեմք յայսմ աշխարհի: Նիւթ գոյա-
ցութեան անձանց աստուածոց՝ նրբին
է յոյժ. որպէս՝ զի անկանիլ ոչ ընդ
զգայութեամբ մերով. նա մանաւանդ
և դժուարին ուրեմն է մեզ ակնարկել
ընդ նոսա հոգեղէն աչք: Հարկ է զի
այդ տեղի բնակութեան նոցա պատ-
շաճական գոցի անօտ բնութեան իւ-
րեանց:

Զուգաձայն են ամենայն իմաստա-
սէրք՝ թէ ըստ հաստատուն օրինաց
բնութեանս յոչնչէ ոչինչ լինի. և ոչինչ
երբէք յոչնութիւն դառնայ. ուսու-
ցանէ մեզ փորձն՝ զի բազազրին մար-
մինք իւրաքանչիւր ՚ի մնացուածոյ այ-
լոց բազմաց, ապա է ինչ հասարակաց
՚ի նոսա՝ որ կոչի նիւթ առաջին: Սա-
կայն տարաձայնութիւն է կարծեաց՝
՚ի խնդրել անդ զզինչութիւն այդր ա-
ռաջին նիւթոյ: Եպիկուրոս՝ հիւլէ
համարեցաւ զայնս, այսինքն մարմինս՝
մանունս անբաժանելիս, յորոց ասէ յօ-
րինեալ կազմեալ է ամենայն: Ընդ
հիւլէից դնէ և այլ սկիզբն երկրորդ,
այն է՝ դատարկ. այլ ոչ թէ իբրու-
սկիզբն կառուցիչ մարմնոց, այլ իբրև
սատար շարժման. քանզի՝ ասէ, եթէ
ոչ էին մանր տեղիք դատարկք ասիւս
ընդ ողջոյն բնութիւնս, բովանդակ
իսկ այս զանդուած նիւթեղէն ձու-

լեալ միանայր 'ի մի մարմին, վասն
 որոյ չլինէր և ոչ մի նորոգ գոյացու-
 թիւն: Չհիւլէս մշտնջենաւորս հա-
 մարէր. և թիւ և հանգամանք ձեոց
 նոցա արտաքոյ է սահմանի մտաց, թէ-
 պէտ յինքեանս սահմանափակք են.
 սակայն իւրաքանչիւր ձեւ յօրինուա-
 ծոցն բովանդակին հիւլէք անբաւու-
 թեամբ: Չբնաւորական ծանրութիւն
 նոցա պատճառ դնէր շարժութեան
 նոցա՝ որք 'ի բաղխելն ընդ միմեանս՝
 կռուին յիրեարս. և ըստ բազմադի-
 մի զուգաւորութեանն կառուցանին
 յազգս իւրաքանչիւր, որք և առ հա-
 սարակ գործ են դիպուածոյ՝ որք ըստ
 ձեւ ձեւ կերպարանէ զմիաւորութիւն
 նոցա: Օրինակէր զհիւլէս նշանա-
 դրաց աթութայից՝ որք շաղկապեն
 բառս զանազանս ըստ զանազանեալ
 շարահիւսութեանն. զոր օրինակ՝ կա-
 ղերք. պարհէր, զատուցեալ են 'ի ձայնն,
 այլ նման 'ի տառսն. նոյնպէս և հիւ-
 լէք բաղկացուք մարմնոց՝ ըստ այսմ օ-
 րինակի տրամադրութեանն և ըստ այ-
 լոյ՝ զանազանս կառուցանեն մարմինս:
 Սակայն հանդերձ այսու ամենայնիւ՝
 ըստ նորա՝ ոչ ամենայն հիւլէ անխտիր
 մտանէ 'ի բաղկացութիւն ամենայն
 մարմնոց: Օրինակ իմն. որք նիւթեն
 կծիկ ասուի, ոչ թէ նոյնք պնդիցեն

դարձեալ զանդամանդ . որպէս և 'ի տառս է տեսանել . յորոց ոմանք ոչ մտանեն յամենայն ձայնս : Չայս մանրամասն մարմինս համարէր նա լինել 'ի հանապազորդ շարժութենէ . յազազս այնորիկ՝ ոչինչ կայ յիրաց բնութեան որ միշտ 'ի նմին պայմանի մնացէ . ոմանք նուազեն , և այլք առաւելուն յաւելուածովք նուազելոցն . ոմանք հնանան , և կէսք նորոգին . ուստի ամենայն ինչ մի միայն ժամանակունի յաշխարհի . և ըստ չափու ապականութեան իրաց իրաց՝ հիւլէքն զատուցեալք յայնցանէ՝ յաւելուն յայլս , և բոլորեն այլ մարմին՝ աննման առաջնոյն զոր լին : Ըստ այսմ օրինակի ոչինչ վատնի կորստեամբ , թէպէտ և ամենայն իրաց մի միայն ժամանակ գոյ . և ամենայնն բովանդակ աներևութացեալ տեսանի՝ իբրու դերևացեալ 'ի գոյութենէ :

Արկաւ Եպիկուրոս թէ էր երբեմն յորում զատուցեալ անջրպետեալ էին յիրերաց հիւլէքն ամենայն , և ըստ դիպուածոյ հանդիպելոյն առ իրեարս՝ կառուցին աշխարհս անհամարս , որք վատնեալ սպառին յետ իւրաքանչիւր սահմանադրեալ ժամանակին՝ որ հըրով , իբր թէ մօտ քերեալ արևուզեցկրաւ՝ կիզուցու զնա . որ ահաւոր

Թնդամամբ, որպէս զի 'ի քթթել ական տապալել մեծամարմին այս աշխարհի. և որ այլ ևս ազգի ազգի տարազու, յորս ծախեալ ջնջեսցի աշխարհ, այլ յաւերակաց նորա փութանակի կազմեսցի այլ աշխարհ, յորում նոր կենդանասցին կենդանիք: Իսկ յորում մեքս բնակեմք թուի իմն թէ շեղակոյտ է աւերածոց մեծի և ահաւոր սասանութեան՝ կանխաւ եղելոյ. որում վկայք են՝ գոգեալ ծոցք, երկայնեալ ձգեալ գօտիք լերանցն երկնաբերձից, խաւ 'ի խաւոյք ապառաժից՝ որոց սմանք խոտորնակի ձգեալ կան, կէսք ստորէ 'ի վեր, և այլք առ 'ի շեղայսմ դարձեալ վկայ է անհարթութիւն ընդերաց երկրի, գետքն ստորերկրեայք, լիճք և անձաւք. զսոյն ստուգէ անհաւասարութիւն մակերևութի երկրիս, խրամատեալ 'ի ծովուց, 'ի լճաց, 'ի կրճից, 'ի կղզեաց և 'ի լեռանց:

Անհուն և անսահման կարծեաց Եպիկուրոս զտիեզերս. և թէ այս բոլոր մեծազանգուած ոչ մէջ ունի, և ոչ ծայր, և յոր կողմն սահման դիցես աշխարհի՝ տակաւին մնան յընթանալ միջոցք անսպառք՝ առանց զվախճան գտանելոյ:

Պարտ է, ասէ ըստ իւրում հետեալ

նոսու թեանն, մոռանալ զանձն և թա-
 փել 'ի մտաց՝ որպէս զի հաւատացու-
 ցուք մեզ թէ դիք արարին զաշխարհ
 վասն սիրոյ մարդկան. քանզի և ան-
 տեղի իմն է թէ կացեալ նոցա անգործ
 ընդ ժամանակս բազումս՝ այնուհետև
 յօժարեսցին փոխել զառաջին հանգա-
 մանս կենաց իւրեանց, և 'ի նոյն ձեռ-
 նարկել. և այն զի դիւրին է խորհուրդ
 ընդ միտ ածել՝ տեսեալ զբազմադէմ
 զաշխարհիս այսորիկ զթերու թիւնս,
 թէ այդ չէ գործած աստուածոց: Ա-
 սաց՝ թէ երկիր ծնոյց զմարդիկ և զայլ
 կենդանիս՝ որպէս ծնուցանէ ցայսօր
 մկունս, խլուրդս, որդունս և զայլ ա-
 մենայն միջատս: Երկիրս, ասէ, 'ի սկըզ-
 բնաւորել իւրում՝ յորժամ նոր էր
 տակաւին՝ բարգաւաճէր և բորակոտ,
 որ տակաւ տակաւ ջեռուցեալ յարե-
 ւու՝ դալարեցաւ խոտովք և թփովք.
 բազում ուռոյցք մանունք երևեցան
 զերեսօք նորա իբրև սունկս, որք յետ
 ժամանակաց 'ի վերայ անցանելոյ իբ-
 րև հասունացան այն ուռոյցք՝ հեր-
 ձաւ որ զնոքօք մաշկն էր. և 'ի դուրս
 ելանէր յայնցանէ կենդանի փոքրիկ՝ որ
 առ սակաւ սակաւ մեկնեալ 'ի դիճին
 տեղւոյն յորում ծնեալն էր, սկսանէր
 'ի տուրևառ շնչոյ. իսկ երկիր 'ի վայ-
 րաց անտի ծննդեան նոցա հոսեաց

վտակս կաթին 'ի սնունդ այնց մա-
նունց կենդանեաց :

'Ի յոգնախուռն կենդանեաց աստի՛
էին և հրէշք ոմանք անոտունք, ան-
ղուխք, անբերանք, այլք՝ որոց ան-
դամք մած էին ընդ իրեարս, մինչ ո-
մանց սպառել վասն անձարակ մնա-
լոյ, և այլոց՝ զի ոչ կարէին բազմասե-
րիլ զուգաւորութեամբ. մնացին միայն
որք բարեկազմք էին մարմնով, և նո-
ցուն սերունդք աճեցին մինչև ցաւուրս
մեր: Յայն առաջին հանդամանս աշ-
խարհի՛ ցուրս և տօթ, և յեղանակել
օդոց չէին իբրու զայժմուս. բովան-
դակ ամենայն իրք էին 'ի սկզբան իւր-
եանց ընաւին այլ ինչ. այն մարդիկ
ելեալք յերկրէ հզօրագոյնք քան զոր
մերս եմք. և մարմինք նոցա պատեալ
էին ստեով իբրև զվարազուց. ոչ նե-
ղէր զնոսա ոչ կերակրոցն խոտանու-
թիւն, և ոչ եղանակացն խատութիւն.
չև ծանուցեալ էր առ նոսա կիրառու-
թիւն հանդերձից. գետնախշտի լինէին
մերկս՝ 'ի տեղիան ուր հասանէր նոցա
խաւար գիշերոյ. ամրանային ընդ թը-
փովք՝ առ 'ի պատսպարութիւն յան-
ձրեէ. միաբան ընկերութիւն չէր կա-
ռուցեալ առ նոսա. ամենայն մարդ
անձին իւրում միայնոյ դէտակն կա-
լեալ ունէր, և վասն անձին շահու-

վաստակէր : Բուսուցանէր յայնժամ
 երկիր անտառս ընդարձակս՝ որոց օր
 զաւուրք աճէին ծառատունկք՝ յորոց
 ուտէին մարդիկ կաղինս և այլ ևս
 միրգս և մեղր վայրենի : Եւ զի բազում
 անգամ դէպ լինէր նոցա մարտնչել
 ընդ կինձս և առիւծս , այնր աղազաւ
 բազումք՝ ՚ի մի խմբեցան՝ անբոյթ մնալ
 յերեսաց ամեհի գազանաց : Կանգնե-
 ցին խուղս , հետամուտ եղեն որսոյ , և
 ճարտարամտեցին կազմել հանդերձս
 ՚ի մորթոց անասնոցն զոր սպանանէին :
 Այր իւրաքանչիւր ընտրեաց իւր կին ,
 և եկաց ընդ նմա ՚ի միասին բնակու-
 թեամբ . ՚ի զուգաւորութեանց անտի
 ծնան նոցա որդիք՝ որք գգուանօք իւր-
 եանց և ամօքելով ընդելացուցին ըղ-
 վայրագ բնաւորութիւն հարց իւր-
 եանց : Աւասիկ այս է սկիզբն ընկե-
 րութեան : Բարեկամացան ընդ դրա-
 ցիս , և դադարեցին ՚ի խուելոյ զի-
 րեարս :

՚ի լեզուախօսութեան մասին՝ ան-
 բարբառք էին զառաջինն , և մատամբ
 ցուցանէին զոր ինչ կարևորն էր . յետ
 այնորիկ առ ՚ի պէտս դիւրութեան
 իւրեանց՝ հնարեցին անուանս իրաց ի-
 րաց ըստ պատեհ ժախուն վարժա-
 պետելոյ , յորոց կազմեցաւ նոցա
 խրթնածածուկ իմն բան և լեզու

յարտայայտութիւն խորհրդոց իւրեանց :

Յաղագս հնարագիտութեան արհեստից՝ այսպէս խորհրդաբանէր Եպիկուրոս : Մինչև գտեալ մարդկան զհուր , յարեգակնէ ուսան զպէտոս հրոյ . քանզի առ տապով ճառագայթից արևու խորովէին զմիսն բերեալ յորսոյ . սակայն երբեմն շանթանկեալ յերկնէ ՚ի կիլանուտ իմն նիւթ՝ ՚ի կրակ վառեաց զնա , յայնժամ մարդիկ որոց չէր անծանօթ պէտք օգտի կրակին , փոխանակ շիջուցանելոյ զնա՝ խնամ կալան պահպանել զնա , այր իւրաքանչիւր առեալ տարաւ անտի մասն մի ՚ի խրճիթ իւր , և յայնմ հետէ եփէ , ՚ի նոյն զոր ինչ ուտելոցն էր :

Ապա այնուհետև կառուցեալ ամբարձան քաղաքք , և բաշխեցաւ երկիր յիւրաքանչիւր ստացողս , այլ սնհաւասարութեամբ . ոմանց շատ , և ոմանց սակաւ . որք հզորագոյնք էին և աչալուրջք ընտիր բաժինս անձանց գրաւեցին . զայնու ժամանակօք կարգեցան թագաւորք , և բռնացեալ նուաճեցին զմարդիկ ընդ ձեռամբ իւրեանց . շինեցին ամուրս բերդից՝ ընդդէմ արշաւանաց սահմանակցաց : Ընդ ժամանակսն ընդ այնօսիկ՝ զէնք էին

մարդկանն՝ ձեռք իւրեանց, եղնգունք,
 ատամունք, քարինք և դաւաղանք. այ-
 սորիւք զինուք պայքարէին և մրցէին
 ընդ իրեարս: Իբրև դէպ լինէր նոցա
 ըստ աղգելոյ պատճառաց զանազանից
 կիզուլ զանտառս ուրեք ուրեք, անդ
 ընդ առաջ լինէր նոցա տեսանել բովս
 հալեալս որ ՚ի դուրս սորէր յերակաց
 երկրի, և ՚ի փոսս փոսս հոսեալ պըն-
 դանայր, պայծառութիւն փայլման
 այնր հրահալ նիւթոյն ապշեցուցա-
 նէր զնոսա. ՚ի հալելոցն հասու գտան՝
 թէ զօրութեամբ հրոյ մարթ է վարել
 զայն յոր պէտս իրաց և լինիցի. ան-
 դէն առ նմին խորհուրդ կալան ՚ի գոր-
 ծած զինուց պատկանել զայն. այնր
 աղազաւ առաւ՛ել ընտրէին զպղինձ
 քան զոսկի, քանզի զէնք ոսկեղէնք
 նուազ կտրէին քան զպղինձիս. ապա
 շինեցին սանձս երիվարաց, խովս՝ առ
 ՚ի գործել զերկիր, և զայլ ամենայն
 ինչ առ հասարակ որոց պէտս ունէին:
 Մինչև գտեալ երկաթոյ՝ գործէին
 զգետոս յիրաց յիրաց խառնեալս ՚ի մի-
 մեանս. այլ յետ պատկանելոյ նոցա
 զերկաթ առ ամենայն պէտս. հնարե-
 ցան գործել կերպաս ասուի և հիւս-
 կէն ՚ի դիւրութիւն մարդկան:

Դարձեալ՝ զարգաւանդութիւն և
 զմշակութիւն անդաստանաց ինքնին

բնութիւնն զլիսովին վարդապետեաց :
 Անդատին 'ի սկզբանէ աշխարհի զննե-
 ցին մարդիկ՝ թէ կաղինք անկեալ 'ի
 ծառոյ՝ բուսուցանեն այլ ծառ կաղնի
 նմանատեսակ . սմին հանգոյն 'ի տեղ-
 ւոջն ուր կամեցան կաղնիս ունել՝
 սերմանեցին անդանօր զպտուղս նո-
 ցուն : Չնոյն նոյնպէս տեսին և յայլ
 ամենայն տունկս . յայնմ հետէ սկսաւ
 ամենայն մարդ սերմանել զոր ինչ ան-
 ձին իւրում պիտոյն էր . և զի տեսա-
 նէին թէ ամենայն ինչ առաւել աճէ՝
 երբ քաջ մշակեալ իցէ զետինն՝ սկիզբն
 արարին հպատակել երկրագործու-
 թեան :

Մինչև ցայն վայր զօրացեալ կա-
 լեալ էր բոնութիւն և յաջողակու-
 թիւն . այլ իբրև 'ի հանդէս ել ոսկի ,
 և մարդիկ խաբեցան 'ի նշոյլ զեղոյ
 պայծառութեան նորա , ջան 'ի գործ
 արկին ճոխանալ նովին . և ոմանք
 հարստացան յոյժ յոյժ , յորոց 'ի փառս
 և 'ի պերճութիւն զուարթացեալ ժո-
 ղովրդեան՝ լբին զառաջին զթագա-
 ւորան՝ որոց տիրեալն էր ուժով և
 բոնութեամբ , և յարեցան 'ի մեծա-
 տունս : 'Ի սուր արկեալ սպանան թա-
 դաւորք , և կերպարան պետութեան
 իշխանութեանն փոխեցաւ 'ի ժողովր-
 դական : Կարգեցան օրէնք և ընտրե-

ցան դատաւորք՝ զգուշանալ ՚ի պահ
պանութիւն նորին, և խնամ ունել ՚ի
գործ հասարակաց մատակարարու
թեան :

Որչափ այն առաջին ժողովուրդք
ընդելանային ՚ի կատաղի վայրագու
թենէն իւրեանց, յաւելոյր ՚ի նոսա
միաբան ընկերութիւն. ընթրիս և
խնջոյս տային իրերաց և կերեալ յա
ղեցեալ՝ խնդամտէին յունկնդրու
թիւն քաղցրաձայնութեան թռչնոց,
և ջանացեալ նմանել նոցա՝ յօրինէին
և ինքեանք երգս՝ ՚ի նոյն նուագ յար
մարութեան ուսելոյ ՚ի հաւուցն :

Հեշտացուցիչ շնչիւն հողմոյ ՚ի
բաղխելն և յանցանել ընդ եղեգունս՝
հնարս ուսոյց մարդկան յօրինուածոյ
սրնդաց. և սքանչացումն ընդ հրաշա
կերտս երկնից յօժարեաց զնոսա յաս
տեղագիտութիւն :

Եղծեալ ապականեաց ադահու
թիւն զընդաբոյս բարութիւն բարուց
նոցա. մարտ եղեալ կռուեցան ընդ մի
մեանս՝ առ ՚ի մերկել զյաղթահարեալն
՚ի ճոխութեանցն զոր ունէր : Այդ
իսկ ծնոյց զբերթողս, որք ՚ի շափս բա
նից հաղներգութեանց նուագեցին
զարարուածս դիւցազանց որ ՚ի պա
տերազմունսն անդ : Դա ինքն ստեղծ
և դեղագործ նկարիչս, որք ճշգրիտ

Կենդանապրկցին զկող: Ի վերայ ա
 թեւոյնի՝ խաղաղութիւն և զինքու
 թիւն՝ զարդ աստուծոյ զհայկեան, թող
 սարսփն նոցա Ի զուրիս խաղաղութեան
 թեւան զաստուծոյն զարկեան զարս
 քանազատութիւն խաղաղութեանն
 ճարտար էր. նա և Ի վերայ այլիս այլ
 ևս նորանոցս ճարտարամտեակցին Ի զհա
 տութիւն կենաց:

Ան ներհական առարկու տնս բու
 նից՝ թէ ոչ ևս այժմ ճնուցանել էր կից
 մարդս, առիւծս, շուծս, սոց պատան
 խանի Եւրփիու բուն, թէ պատկշու
 բեղնաւ որութիւն էր կիցի. կին ճանրու
 ցեալ ամբ՝ ոչ ճնանի որդիս. անպատ
 տան՝ Ի բազմոց հետէ ոչ հերկուցոր
 ծեալ իրբև միակեղցի՝ առաւել պապու
 բերէ յառաջին ամսն քան զկնի: Ի
 խել զճառատունկս անտառի՝ ոչ ևս
 այլ նմանիս իրբև զկորզեալան բուսու
 ցանէ զեանն, այլ տունկս անպի
 տանս և ազազունս, փուշ և մազաու
 Ռ՝ զխտէ թերես տակաւին ճնանին
 յերկրէ ճազարք, նապաստակք, ա
 զուէք, վարազք, և այլ կենդանիք
 կատարեալք, այլ զի՛ տեղիս հեռա
 ւորս լինին այդարիկ, և անճանաթք են
 մեղ, զասն այն կարծեմք վարկպարա
 զի՛ թէ անհնարին է լինել իրացդ:
 Ըստ նմին օրինակի թէ տեսանեմք մեք

զմկունս՝ ծնանել ՚ի մկանց միայն, ոչ
հաւատասցուք թէ ծնանին մկունք և
՚ի հողոյ երկրի :

Առ այլ իմաստասէրս տարածայ-
նութիւն է ՚ի քննութեան կանոնին
որով վարիմք ՚ի հետադօտութիւն ճշշ-
մարտութեան . իսկ Եպիկուրոս զոյն
հաստատեալ էր ՚ի խորհուրդս իւր՝ թէ
չիք ինչ յաւէտ ստուգագոյն քան զոր
ընդունիմք մեք ՚ի զգայութեանց . հա-
մեմատութեամբ և եթ խելամտեմք իս-
կութեան իրաց . քանզի և չիք այլ նշա-
նակ յորոշումն ճշմարտին ՚ի ստու-
թենէ : Միտքն, ասէ, զառաջինն անդ
չունի և ոչ մի գաղափար, և է տախտակ
իմն յղկեալ . արդ յորժամ յօրինեալ
կազմին մարմնեղէն գործարանք՝ տպա-
ւորին անդ ճանաչմունք տակաւ տա-
կաւ . ՚ի ձեռն զգայութեանց, սովին
ձգի ՚ի հեռագոյնս՝ մտածել զնոսա . և
սովին պատրի՝ մօտ կարծելով զհեռա-
ւորս, կամ զոր բնաւ իսկ չկայ . և ընդ
հակառակն՝ զգայութիւնք մեր միայն
զառաջիկացեալսն ունին ըմբռնել . ա-
պա ընդ գոյութիւն իրաց առաջիկայից
ոչ խաբին : Յազագս այսր, ասէ, ան-
միտ է որ ոչ խնդրէ յայսպիսիս զազ-
դեցութիւն զգայութեանց և ՚ի պատ-
ճառս ապաւինի :

Ընդ օտարոտի շաւիղս ՚ի միմեանց

ընթանան իմաստասէրք՝ ի բացատրու-
 թիւն հանդամանաց տեսութեան. վար-
 կաւ Ապիկուրոս՝ թէ միշտ կեղեին պա-
 տեանք իմն յիրացն երևելոց և յուղին
 ընդ օդս, և դովին օրինակաւ տեսանեմք
 մեք զիրս նիւթականս : Հուր, ջերմու-
 թիւն, ձայն, լոյս, և այլ իրք զգալիք,
 ասէ, չեն լոկ ըմբռնմունք հոգւոյ, այլ
 այս ամենայն՝ իսկապէս արտաքոյ մեր
 են՝ ըստ օրինակին որով տեսանին ՚ի
 մէնջ. և մասն ինչ ՚ի նիւթոյ անտի
 ձևացելոյ և հասելոյ առ մեղ՝ են հոտ,
 ձայն, ջերմութիւն, լոյս, չունելով
 ինչ յարաբերութիւն ընդ կենդանիս :
 Օրինակ իմն. մասնկունք մանունք զա-
 տուցեալք հանապազօր ՚ի ծաղկանց
 բուրաստանի շուրջ շուրջանակի ընուն
 զօդդ անուշակ հոտով, նման այնմ զոր
 զգայ մարդ՝ եթէ զգնայցէ յայնժամ
 ՚ի պարտիզի անդ : ՚ի հնչել զանդակի,
 որ շուրջ գնովաւ օդն յերերի կայ՝ նը-
 ման ձայնից լսելոց ՚ի մէնջ յայնժամ :
 Յամբառնալ արևու ՚ի վերայ տիեզե-
 րացս՝ է յօդդ շողուն իմն նշուլագեզ՝
 նման լուսոյ զոր յայնժամ տեսանեմք :
 Դարձեալ՝ յորժամ մի և նոյն իր այլ
 օրինակ երևութանայ երկուց զանա-
 զան կենդանեաց, յառաջ գայ այդ ՚ի
 զանազանութենէ ներքին կազմու-
 թեան երկուց կենդանեացդ. զոր օրի-

նակ թէ սաղարթք ուռենւոյ դառն
են ՚ի քիմս մարդոյ, և քաղցր ՚ի բերան
այծի, քանդի զանազան են ներքին հան-
գամանք մարդոյ և այծի :

Ստոյիկեանք որք աշակերտեալս դա-
ւանէին զանձինս անմեղկելի առաքի-
նութեան, այլ իսկապէս՝ լցեալ էին
սնտոի ամբարտաւանութեամբ, վա-
ռեցան տարապարտ նախանձու ընդ
բազմութիւն բարեկամաց և աշակեր-
տաց հետևողաց Եպիկուրոսի, որոյ
վարդապետութիւն բազմօք զատու-
ցեալ անջրպետեալ էր ՚ի բանից վար-
դապետութեան նոցա: Գուն ՚ի վերայ
եղին ամենայն ոգւոյ պնդութեամբ՝
վատանուն երևեցուցանել զնա, նա և
սերմանեցին ՚ի գիրս իւրեանց զբար-
տութիւն բազում ընդդէմ նորա :
Այս ազազաւ որք եկին յետոյ ժա-
մանակաւ, և ՚ի բանից ստոյիկեանց
ծանեան զԵպիկուրոս, խաբեցան ՚ի
բանից նոցա, և անգոսնեցին իբրև
շուայտոտ և հեշտասէր զայրն ժուժ-
կալ, որոյ կեանք և գնացք յամենայնի
չափաւորեալ էր : Սուրբն Գրիգոր
Հռովմայ հայրապետ պանծալի վկայ-
ութիւն արձանացուցանէ ՚ի գովեստ
անարատութեան կենաց այսր իմա-
տասիրի. «Եպիկուրոս, ասէ այս վար-
դապետ Եկեղեցւոյ, ասաց թէ հեշ-

տութիւնն նպատակ է առ որ ձգեալ ընթանան ամենայն մարդիկ . այլ զի մի համարեսցին թէ զզգայական հեշտութեանցն ասիցէ . եկաց ողջախոհ և բարեկարգ կենօք , հաստատելով զոր վարդապետեացն ։

Չէառ յանձն Եպիկուրոս միջամուխ լինել 'ի գործ հասարակաց իշխանութեան , միշտ գեր 'ի վեր համարեցաւ զհանդարտութիւն կենաց քան զյուզումն գործառնութեանց : Արձանք կանգնեալք յաթենացւոց 'ի պատիւ նորա՝ շատ իսկ ցուցանէին զմեծարանս իւրեանց առ այս իմաստասէր : Ամենեքին որք յարեցան 'ի նա՝ ոչ լին զնա , բաց 'ի Մետրոդորոսէ ու մեմնէ , որ թողեալ զնա անց 'ի պղատոնեան աշակերտութիւն յաւուրս Արնէադեայ . այլ վեց ամիս և եթ յամեաց անդր . և դարձաւ անտի առ Եպիկուրոս , և մնաց առ նմա մինչև 'ի մահ իւր . զի մեռաւ յառաջ քան զվարժապետ իւր : Բայրոցն եպիկուրեան անադոտ պայծառանայր նա և յորժամ խափանեալ էին այլ ամենայն աղանդք իմաստասիրաց :

Հասեալ Եպիկուրոսի 'ի հասակ ամաց եթթանասուն և երկուց՝ հիւանդացեալ անկաւ 'ի մահիձս յԱթէնս՝ յորում ոչ դադարեաց 'ի վարդապե-

տութենէն . ախտ նորա միզարդելու
 թիւն էր , որ ազդէր 'ի նա ցաւ ան-
 հանդուրթելի . սակայն նա երկայն
 մտութեամբ տանէր ամենայնի : Իբրև
 զցաց զմերձենալ մահուն իւրոյ՝ ե-
 թող յազատութիւն զամանս 'ի ստրը-
 կացն . հրաման ետ վասն ստացուա-
 ծոց իւրոց . կարգեաց տօն կատարել
 յաւուր ծննդեան իւրոյ և ծնողաց իւ-
 րոց 'ի տասներորդ աւուր Գամելէոնի
 ամսոյ , ըստ աթենացւոցն համարոյ :
 Ետ զպարտէզ իւր և զգիրս Երմակո-
 սի մետելենացւոյ՝ որ յաջորդեացն
 նմա . պարտս սահմանեալ 'ի վերայ նո-
 րա՝ աւանդել զայն ամենայն որոց կալ-
 ցեն զայն նախագահութիւն : Գրեաց
 թուղթ առ Իդոմենոս՝ օրինակ զայս .
 „ Աւասիկ՝ շնորհք աստուածոց , հասի
 'ի կատարած և յերջանիկ օր կենաց
 իմոց . տանջեալ եմ յաղետից հիւան-
 դութեանս իմոյ՝ որ կրծեալ մաշէ զա-
 ղիս իմ , քան զոր կարծեմ՝ չիք ինչ
 դառնագոյն : Սակայն 'ի վիշտս ցաւոց
 իմոց ճաշակեմ մխիթարութիւն պա-
 տարուն՝ 'ի յիշել անդ իմում զգլուխս
 վարդապետութեանցն որովք ճօխա-
 ցուցի զիմաստասիրութիւն : Աղաչեմ
 զքեզ վասն սիրոյդ զոր ցուցեր առ իս
 և առ վարդապետութիւն իմ՝ խնամ
 կալցես որդւոց Մետրոդորոսի „ :

Յետ չորեքտասան ամուրց հիւանդութեանն եմուտ Եպիկուրոս ՚ի ջերմ բազանիս զոր առ ՚ի սոյն պէտս ետ պատրաստել . ընդ մտանելն խնդրեաց բաժակ մի զինի անապակ , արբ զայն , և անդէն փչեաց զհողին՝ խրատելով զբարեկամս իւր և զաշակերտս և զորս մօտ կային՝ յիշատակել զինքն և զխրատոս իւր : Դիպաւ մահ նորա յառաջնում ամի ճիշտ ռղիմպիադին : Սգացին զնա համօրէն ակենացիք սուղ մեծ :

Ձ Ե Ն Ո Ն

Մեռեալ 'ի ճիթ օղիմպիագին :

ՕՁԵՆՈՆ գլուխ ստոյիկեանց աշանդոյն էր 'ի Աիտիա քաղաքէ 'ի Աիպրոս կղզւոյ : Մինչև յօժարեալ յիրսինչ՝ խորհուրդ եհարց ընդ պատգամախօսն՝ որով օրինակաւ հնար իցէ գտանել զերջանկութիւն : Պատասխանի եղև նմա 'ի դարիրայէն . փոխարկեալ 'ր 'ի գոյն մեռելոց : 'ի միտառ ՁԵՆՈՆ 'ի բանից աստի թէ հրամանք են զից՝ պարապել յընթերցումն գրոց նախնեաց . կամակար սիրով յօժարեցաւ 'ի սոյն , պարապեցաւ 'ի նոյն ջանս և յուսումն ամենայն փութոյ պնդութեամբ՝ առ 'ի գլխաւորել ըհհրաման պատգամախօսութեանն :

'ի դարձի իւրում երբեմն 'ի Փիւնիկեայ՝ ուր զնացեալ էր զնել ծիրանի , խորտակեցաւ նաւն յորում էր՝ առ ափամբ նաւահանգստին Պիրէոնի . այս կորուստ ընչիցն 'ի ծանր տխրութիւն համակեաց զնա . դարձաւ յԱթէնս , եմուտ առ գրաւաճառ օմն , և

առ սփոփել 'ի հոգոց սրտին առեալ
 ընթեռնոյր զերկրորդ գիրս Քսենոփո-
 նի, յափշտակեցաւ յընթերցումն գը-
 բոցն, և մոռացաւ զտաղնապ ամբո-
 խելոյ ողւոցն: Եհարց ցտէր գրոցն,
 յո՞ բնակեն արքն զորոց խօսի գիրս. և
 զի անդէն առ ժամն անցանէր ընդ
 այն տեղի Արատէս կիւնիկեան, զնա
 եցոյց գրաւածառն, և ասէ. Ահաւա-
 սիկ. երթ զհետ դորա: Էր յայնժամ
 Չենոն ամաց երեսնից. գնաց զկնի
 Արատեսի, և անտի յառաջ աշակեր-
 տեցաւ նմա: Ամօթխած և ծանրաբա-
 բոյ էր Չենոն, և անհնարին էր նմա
 հաւասարել տարադէպ լըբութեանց
 Աիւնիկեանց: Չգացեալ Արատեսի՝
 թէ այդ կրճիմն արկանէ նմա, կամե-
 ցաւ բժշկել զնա 'ի մտացն երկմոռ-
 թենէ. ետ 'ի ձեռս նորա պոյտն մի
 լցեալ ոսպամբ, և հրամայեաց նմա
 տանել զայն ընդ գիւղն Աերամիկոն:
 Ամաչէր կորանայր Չենոն, և թաքչէր
 զի մի ոք տեսցէ զինքն. ասէ ցնա Արա-
 տէս. զի՞ խուսես այ ստահակ, յորժամ
 զոր արարերդ ոչինչ փնասեաց քեզ:

Հաճոյական էր Չենոնի՝ իմաստա-
 սիրութիւն՝ վասն որոյ յաճախ շնորհ
 ունէր զբաղդէն՝ որ ծովահեղձոյց կո-
 բոյս զամենայն ինչս իւր: Ո՛րպէս յա-
 ջողակ էին ինձ, ասէր, հողմք որք ըլ-

նաւն խորտակեցին : Ուսաւ աւելի քան զամս տասն առ ոտս Արատեսի, սակայն ոչ անկղիտացաւ յանամօթութիւն կիւնիկեանց . այլ յորժամ թողոյր զնա՝ զի երթեալ յարեացի 'ի Ստիլպոն մեղարացի, Արատէս կալաւ զվերարկուէ նորա, և արգելոյր բռնութեամբ . ասէ ցնա Չենոն . ո՞վ Արատէս՝ ընդ ունկն միայն կալեալ արգելուն զայր իմաստասէր, համոզեա՛ զիս արգարացի փաստիւք թէ վարդապետութիւն քո լաւագոյն է քան զՍտիլպոնին . ապա թէ ոչ՝ թէ և 'ի բանտ արկցես զիս, այո՛ մարմին իմ առ քեզ իցէ, այլ միտք իմ ցանդ առ Ստիլպոնի շրջեացի :

Դեգերեալ Չենոնի զամս տասն առ Ստիլպոնի, Քսենոկրատայ և Պողեմոնի, ապա մեկնեցաւ 'ի նոցանէ, և ճարտարեաց նոր իմաստասիրութիւն . սիւսեցաւ ընդ Ելլագայ համբաւ նորա, և 'ի սուղ ժամանակի հոչակաւոր գտաւ քան զամենայն իմաստասէրս աշխարհին : 'Ի տեղեաց տեղեաց ընթանային առ նա բազումք՝ յարիլ 'ի նա, և աշակերտիլ նմա . և զի ուսուցանէր Չենոն 'ի սրահի ուրեք, որ յունարէն Սդոա լի . յայնմանէ հետևողք նորա Ստոյիկեանք անուանեցան, որ թարգմանի Արահեանք :

Մեծապատիւ էին փառք Չենոնի
 յաչս աթենացւոց, մինչ զի աւանդա-
 պահ կացուցին զնա փականաց քաղա-
 քի իւրեանց. կանգնեցին անդրի յա-
 նուն նորա, և նուիրեցին նմա պսակ
 ոսկի: Աքանչացեալ էր Անտիգոնոս
 արքայ ընդ այրդ ընդ այդ. յամենայն
 նուագի յերթալն իւրում յԱթէնս՝
 ոչ զանց առնէր գնալ լսել զդասս
 վարդապետութեան նորա, նա և յա-
 ճախ գնայր ՚ի սեղան Չենոնի, կամ
 ընդ իւր տանէր ճաշել առ Արիստոկ-
 զի քնարահարի: Սակայն յետ այնու-
 բիկ հրաժարեցաւ Չենոն գնալ ՚ի
 ինջոյս կամ յերախանս՝ զի մի յոյժ
 դիւրընտել լինիցի: Բռնադատեաց
 զնա Անտիգոնոս բազում անգամ՝
 ընդ իւր տանել զնա. չէառ Չենոն
 յանձն զայն ուղեգնացութիւն. առա-
 քեաց փոխանակ իւր զՊերսէոս և զՓի-
 լոնիդէս, և արար նմա պատասխանի
 այսպէս «Այս ինձ բերկրութիւն է՝
 տեսանել զքեզ յօժարամտեալ առ
 գիտութիւնս. քանզի և սէր իմաստա-
 սիրութեանն է որ ՚ի բաց առնէ զքեզ
 ՚ի հեշտութեանց զգայութեան, և տայ
 գիրկս արկանել զառաքինութեամբք:
 Սակայն թէ ձերութիւն իմ և հիւան-
 դոտ բնութիւն ոչ խափան առնէին
 ելանելոյ ինձ աստի, ոչ զանդազէի

դալ առ քեղ որպէս փափաքեսդ . և
արդ զի այս անհնար է՝ ահա յղեմ
քեզ զերկուս ՚ի բարեկամաց իմոց ,
արս իմաստունս իբրև զիս , և առողջս
քան զիս : Թէ սիրով մտադիւր կենաց
կցորդ լինիցիս ընդ դոսա , և անսայցես
որոց առ ՚ի դոցանէ պատուիրանաց ,
տեսցես՝ զի ոչինչ պակասէ քեզ առ
բովանդակ ստանալ զերջանկութեան
վայելս » :

Խորշեալ զգուշանայր Չենոն յամ
բարհաւած պերճութենէ . ոչ շրջեր ՚ի
հրապարակի ընկերօք աւելի քան զեր-
կուս . մանաւանդ երբեմն դրամ ևս
բաշխէր ամբօխին խոնելոյ զնովաւ՝ զի
մի նեղեսցեն զանձն իւր : Եւ եղև յա-
ւուր միում իբրև կուտեցաւ զնովաւ
ժողովուրդ բազում ՚ի սրահին յո-
րում ուսուցանէր , եցոյց նոցա ձե-
ռամբ զգունտ փայտեայ՝ որ սեղանոյ
ինչ հատոր էր , և ասէ . Այդ երբեմն
՚ի միջոցի սրահիս էր , այլ զի մի խա-
փան լինիցի՝ բարձաւ ՚ի միջոյ : Նոյն-
պէս և դուք ՚ի բաց ելէք աստի , և մի
կրճիմն արկանէք ինձ :

Ըստ մարմնոյն հանգամանացն բարձ-
րահասակ էր , և վտիտ մարմնով , և
մորթն թխադոյն . յաղագս այնորիկ
ոմանք առին անուանել զնա՝ Արմա-
ւենի Եզիպտոսի : Գլուխ նորա կորա-

ցեալ էր 'ի մի կողմն ուսոյն, սրունքն
 թանձունք, և դանդաչութ. զգենոյր
 հանդերձ թեթև, դիւրագին՝ որչափ
 հնար էր գտանել: Աերակուր էր նո-
 րա՝ հաց, թուղ, մեղր, և դինի անոյշ.
 Իսկ եփեալ ինչ ամենեկն ոչ ուտէր.
 Ժուժկալութիւն նորա մեծ էր և դո-
 վեալ. զի և յորժամ բանք լինէին գո-
 վել զոք վասն ժուժկալութեան՝ գող-
 ցես յառակս էր ասել. Ողջախոհ է
 քան զՉենոն: Գնացք նորա հանդարտ-
 ընթաց, միտք յաջողակ, և բնաւորու-
 թիւն ծանր: 'Ի խօսելն իւրում կնճռէր
 զճակատն և ծամածռէր զբերանն:
 Սակայն 'ի վերայ այսր ամենայնի յա-
 կումբ բազմականաց զուարթուն էր,
 և բերկրեցուցանէր զամենեկին: Իբրև
 հարցանէին ցնա զպատճառ այլափո-
 խութեանս՝ տայր պատասխանի. լո-
 վիաս բնութեամբ դառն է, այլ առ-
 վայր մի թողեալ 'ի ջուր՝ քաղցրանայ:
 Համառօտ էր 'ի բանս իւր. զորոյ յոր-
 ժամ զպատճառն խնդրէին՝ ասէր.
 պարտ է զի և սիւղոբայք բանից ի-
 մաստնոց համառօտագոյնս լիցին՝ եթէ
 հնար ինչ իցէ: Յորժամ դէպ լինէր
 նմա կշտամբել զոք՝ յամենայն նուա-
 դի սակաւ բանիւք վճարէր, և անուղ-
 զակի յայլոյ դէմս: Դիպաւ ել բեմն 'ի
 խնջոյս ուրեք որկորեայ առն ումք՝ ո-

րոյ լափլիղեալ զամենայն զկերա-
 կուրսն՝ նքթեալ թողոյր զսեղանա-
 կիցսն : Չենոն կալաւ առաջի իւր
 ձուկն մի մեծ, յորմէ ոչ կամէր մասն
 հանել ումեք. իբրև տիգօք աչաց նայէր
 ընդ նա որկորեայն, ասէ Չենոն .
 զի՛նչ կարծիցես զհանդուրժել սեղա-
 նակցացդ, եթէ իմում որկորածեոու-
 թեանս օր մի ոչ ներես : Էր երբեմն
 երիտասարդի ումեմն թախանձանօք
 ժտել ՚ի նմանէ զպատասխանին բա-
 նից ինչ որում ոչ էր բաւեալ ՚ի խե-
 լամտութիւն . իսկ Չենոն ետ ածել
 հայելի մի . և ՚ի նայել երիտասարդին
 ընդ հայելին, ասէ Չենոն . կարծիցես
 թէ այդոքիկ հարցմունք պատշաճա-
 կանք դոցին երեսաց քոց : Անպիտան
 զրոյցք ատենաբանից՝ ասէր, նման են
 դահեկանաց Աղեքսանդրիոյ, որք գե-
 ղեցիկ են ըստ երևութին, այլ նիւթ
 բովուցն արժէ և ոչինչ : Անարդու-
 թիւն ծանր է պատանեաց՝ սնուցա-
 նել զնոսա յընդունայնամտութեան .
 այլ պարտ է ՚ի քաղաքականութիւն
 և ՚ի պարտուպատշաճ գործս մարդել
 զնոսա : Յաւելոյր ասել դարձեալ .
 Կափեսոս տեսեալ զմին յաշակերտաց
 իւրոց վիբացեալ ամբարտաւանու-
 թեամբ, ապտակ եհան նմա և ասէ,
 թէպէտ և գեր ՚ի վեր ամբարձեալ ես

զայլուիք, այլ ոչ վասն այդր եղեր մեծարոյ. սակայն թէ դու քեզէն մեծարոյ իցես, յայնժամ և վերագոյն իցես քան զայլս: Հարցեալ ո՞վ է բարեկամքո. ետ պատասխանի. Ա՛յլ որ ես: Քտու ՚ի կոչունս ուրեք եղեալս ՚ի պատիւ հրեշտակացն Պտղոմէոսի արքայի. մինչդեռ ՚ի բազմականին էին՝ խօսեցաւ և ոչինչ. զարմացան ընդ այն հրեշտակքն, հարցին ցնա. ունիցիս աւել ինչ ցարքայ Պտղոմէոս. ետ պատասխանի. ասացէք ցնա. է՛ աստ այր՝ որ գիտէ լուել:

Այս առած էր ստոյիկեանց՝ նպատակ դիտաւորութեան գործոց մարդոյ՝ է կեալ ըստ բնութեան. կեալ ըստ բնութեան՝ է չգործել բնաւ ընդհակառակս թելադրութեան բանին՝ որ է օրէնք ընդհանուր և հասարակաց առ ամենայն մարդիկ: Ամենայն մարդոյ պարտք են ինքնին ջանալ յառաքինութիւն՝ առանց հատուցման և փոխարինի ակն ունելոյ: Առաքինութիւն միայն կարէ երջանկացուցանել զմարդ. և որք ճշմարտիւ ճոխացեալքն են առաքինութեամբք՝ են ՚ի վայելս երջանկութեան՝ նա և ՚ի վիշտս նեղութեանց: Չիք ինչ օգտակար քան ըզպատշաճականն. և չկայ գործ եղեռնաւոր՝ որ շահեկան իցէ: Չգայական

Հեշտութիւնք շնն բարի. քանզի ան-
 պատշաճք են և ամենայն որ անպատ-
 շաճն է՝ չմարթի լինել բարի: Այր
 իմաստուն՝ շերկնչի ուստեք. չունի
 պերճութիւն, զի միօրինակ ակնարկէ
 ընդ փառս և ընդ նախատինս: Նկա-
 բազիր է իմաստնոյ՝ ծանրաբարոյ լի-
 նել և անկեղծ. իմաստնոյ շնն արգելք
 ըմպել գինի, սակայն և արբենալն չէ
 օրէն, զի մի բնաւ հեռասցի յաշաց նո-
 րա ղեկավարութիւն մտաց իւրոց: Պարտք
 են նմա մեծարել զգիտ, զոհել
 նոցա, և ժուժկալել յամենայն ան-
 կարգութենէ: Միայն իմաստնոյ պատ-
 կանաւոր է բարեկամութիւն. պարտ
 է նմա միջամուխ լինել ՚ի գործս պե-
 տութեան առ ՚ի խափանել զտարա-
 դէպ զօրացեալ անկարգութիւնս, և
 յորդորել զբազաքացիս յառաքինու-
 թիւն: Նմա և եթ անկ է կցորդել ՚ի
 գործ հասարակաց մատակարարու-
 թեան, զի նորա միայնոյ գործ է որո-
 շել սահմանաւ ընդ բարին և ընդ
 չարն. նա միայն անսողիւտ է և ան-
 ձեռնհաս փնասել ումք. դարձեալ ի-
 մաստունն միայն անվրդով մնայ յիրս՝
 յորս այլք պշուցեալ ընդարմանան: Առաքինութիւնք ամենայն իբրև ա-
 դոյցք շղթայից վերերաց ունին անան-
 ջրպետութեամբ, և անհնար է ստա-

նալ զմին՝ առանց և զայլս ստանալոյ :
 Չիք միջոց ընդ առաքինութիւն և ընդ
 ախտ . զի զոր օրինակ հարկաւորաբար
 ամենայն ինչ ուղիղ է, կամ խեղա-
 թիւր, նոյնպէս և ամենայն գործք
 կամ բարի են, և կամ չար : Միայն ի
 մաստունն է բարեբաստիկ . ոչ խմիք
 կարօտի . պտրտ է նմա արկանել զանձն
 'ի տանջանս դժնդակս վասն հայրե-
 նեաց իւրոց և բարեկամաց . խիթայ և
 ոչ ուստեք . բարերար է համօրէն աշ-
 խարհի . նա միայն բաւական է առ ա-
 մենայն՝ յորժամ չգտանիցին մարդիկ
 բաւական առ այնս : Օրինակի իմաս-
 տունն քաջավարժ դերասանի որ միօ-
 րինակ կերպարանէ յանձին զԱզա-
 մեմնոն և զԹերսիտէս :

Չամենայն բարի գործս, որպէս և
 զչարս հաւասար զնէին ստոյիկեանք,
 որք ոչ առաւելուլ կարեն, ասէին, և
 ոչ նուազել . քանզի ոչ մի ինչ առա-
 ւել ճշմարիտ է քան զոր էն ճշմար-
 տիւ, և ոչինչ առաւել սուտ քան զոր
 սուտն է իսկապէս : Եւ զոր օրինակ
 այր որ խոտորեալ իցէ յուղիղ ճանա-
 պարհէն ասպարիզաւ միով, ոչինչ ա-
 ռաւելութիւն ունի քան զխոտորեալն
 երկերիւր ասպարիզօք, նոյնպէս որ
 միով ևեթ յանցեաւ մեղօք՝ ոչ ասի ա-
 ռաքինի առ այնու որ զթեաց յեղեոն

չարաչար : Կամէր Չենոն՝ թէ կանայք
 հասարակաց իցեն առ իմաստունս . և
 իւրաքանչիւր վարիցի ընդ որում և
 պատահեցի . զի այս միայն է հնարք
 խափանելոյ զնախանձ և զկասկածանս
 շնութեան . և ամենայն ոք համարի
 զմանկտին իբրև սեփական իւր ծը-
 նունդս :

Ստոյիկեանք մի և եթ զերագոյն էակ
 դաւանէին, սակայն զանազան են, ա-
 սէին, անուանք նորա . է զի անուանի
 Նախախնամութիւն . ուրեք Հոգի . և
 ուրեք երբէք Արամազդ : Այդ էակ՝
 անմահ է, բանաւոր, կատարեալ, ե-
 բանեալ և անմասն ամենայն չարի :
 Դա ինքն է աջն արարիչ՝ իմաստակալ
 աշխարհի և որոց ՚ի նմա : Արկին զնէին
 սկիզբն արարող և կրող . իմա՝ Աս-
 տուած և Աշխարհ : Համարէին ըզ-
 նիւթն բաժանական յանհունս : Մի
 միայն է, ասէին, աշխարհս . և այն
 զնդաձև՝ քաջայարմար ՚ի շարժումն :
 Համարէին ընդ Պիւթագորայ և Պլա-
 տոնի՝ թէ հոգեորեալ է աշխարհս ՚ի
 հոգեղէն իմն գոյացութենէ սփռելոյ
 ընդ ամենայն մասունս նորա . և այդ
 գոյացութիւն անանջրպետ է յԱս-
 տուծոյ . և այդ հոգի համանդամայն
 ընդ աշխարհի ՚ի մի կենդանի բովան-
 դակի, որոյ գլխաւոր անդամք են եր-

կին և արև : Չետեղեալ է աշխարհս
 'ի միջավայրի անսահման դատարկու-
 թեան : Աշխարհս լի է բովանդակ , զի
 նիւթն լուծական որ առ ամենայն
 ձևս պատկանի՝ ընու զմիջոցս թափուր
 թողեալս 'ի մեծամեծ մարմնոց որք ոչ
 կարեն յամենայն կուսէ մածանել յի-
 րեարս՝ վասն անհարթութեան մակ-
 երևութից իւրեանց : Ապականացու-
 է աշխարհս , քանզի , ասեն , ապակա-
 նացու է բոլորն՝ թէ իւրաքանչիւր 'ի
 մասանց նորա ապականի . արդ իւրա-
 քանչիւր մասն աշխարհի լուծանի յա-
 պականութիւն , ապա և աշխարհս հա-
 մօրէն : Հաստատուն աստեղք շարժին
 ընդ շարժութեան երկնի : Արեգակն
 մարմին է հրեղէն՝ մեծաքանակ յոյժ
 քան զերկիրս , զի կոնոնաձև արկանէ
 զստուեր նորա : Արեգակն և այլ աս-
 տեղք սնանին 'ի գոլորշեաց շնչելոց
 յերկրէ և 'ի ծովէ : Հասու եղեն
 ստոյիկեանք ճշմարիտ պատճառի խա-
 լարմանց արևու և լուսնի , և որոտ-
 մանց և փայլատականց : Անբնակ կար-
 ծէին զցրտային դօտին 'ի սակս սաս-
 տիկ ստունամանեաց . նոյնպէս և զայ-
 րեցածն վասն անհանդուրժելի սո-
 թոյն :

Աստոն Ստոյիկեան խնդրէր անհեա
 առնել զտրամաբանութիւն . զորոյ

զնրբին ձեռնարկս օրինակէր յոստայն սարդի, որ հանձարոյ գործ թուի և կարգաւորեալ, այլ ամենևին անօգուտ է: Ընդ հակառակն խրիւսիպոս մեծապէս դովու թեամբ ներբողէր զտրամաբանութիւն. մինչև յառակս լինել, ասել՝ եթէ դից պիտոյ լիցի տրամաբանութիւն, զխրիւսիպոսին միայն վարեցեն ՚ի պէտս:

Չգեցան առւրք կենաց Չենոնի մինչև ցիննսուն և ութ ամ՝ առանց խօթութեան. ցաւ և սուգ ՚ի մահունորա վարակեաց զամենեսին: Իբրև լուաւ զայն Անտիգոնոս արքայ վշտացաւ դառնապէս, յողօց եհան և ասէ. Ինք արդարք՝ որպիսի սքանչելի տեսարան կորուսի ես: Եւ իբրև հարցանէին ցնա զպատճառ այնչափ պատուաօիրելոյ զիմաստասէրն զայն, ասէր. քանզի բովանդակ զոր ինչ պարզեցի նմա՝ ոչ կարացին բռնադատել զնա ՚ի գործ ինչ վատութեան: Յղեաց հրեշտակս յԱթէնս՝ զի թաղեցեն զՉենոն ՚ի Կերամիկոն աւանին:

Ոչ նուազ և ատենացիք աշխարեցին զվախճան Չենոնի: Գահերիցունք իշխանաց ներբողեցին զնա ՚ի հրապարակի յետ մահու նորա. և զի այս հաստատուն օրինօք կատարեցի, վճիռ հատին օրինակ զայս. «Քանզի Չենոն

որդի Մնաստմի կիտիացի զամս բա-
 զուսն եկաց 'ի քաղաքիս՝ ուսուցանել
 զիմաստասիրութիւն, և յամենայնիս
 վկայեցաւ այբ առաքինի, զի ցանդ
 խրախուսեաց 'ի հանդէս առաքինու-
 թեան զերիտասարդս զորս ունէր ընդ
 ձեռամբ, և զի վարքնորա միաբան էին
 ընդ վարդապետութեան իւրում, հա-
 ճոյ թուեցաւ ժողովրդեան՝ պաշտօն
 գովութեան հարկանել նմա 'ի հրա-
 պարակի, և պարզել նմա պսակ ոսկի՝
 որում արժանաւոր իսկ էր՝ վասն ըղ-
 դօնութեան իւրոյ և ժուժկալութեան.
 և կանգնել նմա շիրիմ հասարակաց
 ծախիւք 'ի Աերամիկոն աւանի: Հրա-
 մայէ ժողովուրդն՝ ընտրել օստիկանս
 հինգ յԱթէնս՝ ինամ ունել յօրի-
 նուածոյ պսակին և շիրմին: Չայդ
 պատուէր հրամանի արձանագրեսցէ
 աշխարհամար դպիրն պետութեան 'ի
 սիւնս երկու, յորոց մին դիցի 'ի ձե-
 մարանին, և երկրորդն 'ի Աիկէոնի:
 Յանձն լիցին անյապաղ կարևոր դրամք
 առ 'ի սոյն գործ՝ առ որ յանձին ու-
 նիցի զհոգ գործոյ հասարակաց մատա-
 կարարութեան. որպէս զի ամենայն
 մարդ խելամտեսցէ յանձին իւրում,
 թէ ակեանացիք դիտեն մեծարել զար-
 ժանիան պատուոյ և 'ի կեանս իւր-
 եանց, և յետ մահունս ։:

Տուաւ այս վճիռ հրամանի 'ի ժա-
մանակին երբ իշխան էր յԱթէնս
Արրենիդաս, քանի ինչ աւուրբք յետ
մահուն Չենոնի, զորոյ զհանգամանս
մահուն այսպէս աւանդեն: Մինչդեռ
ելեալ երթայր 'ի դպրոցէն, զարկաւ
ուրեք, և բեկաւ մատն նորա: Համա-
րեցաւ զայս՝ նախապատում ազդեցու-
թիւն 'ի դից առ դուրս հասելոյ մա-
հուն. եհար զերկիր ձեռամբն և ասէ.
Դո՛ւ կոչես զիս, աւասիկ պատրաստ
եմ: Եւ անդէն անյապաղ փոխանակ
բուժելոյ զմատնն՝ անձամբ զանձն
խեղդեաց: Քառասուն և ութ ամբ
էին յորմէ հետէ անխափան ուսուցա-
նէր զիմաստասիրութիւն, և վաթսուն
և ութ ամօք յառաջ՝ յերեսնամեայ հա-
սակի աշակերտեցաւ յուսումն իմաս-
տասիրութեան՝ ընդ ձեռամբ կիւնի-
կեանն Արատեսի:



Յ ՈՒՅ ԱԿ

ՎԱՐՈՒՑ ԻՄ ԱՄՏԱՄԻՐԱՑ

Էջ

Թ աղէս .	5
Սողոմն .	18
Պիտոսաւոն .	52
Րհիսս .	63
Պերեանդր .	72
Վիդոն .	83
Կղերոբուլոս .	91
Լայիմեանդէս .	97
Լնասարսիս .	105
Պիւլասփորասս .	112
Ներաւղիտոս .	126
Լնասասփորասս .	133
Ղեմոնիտոս .	144
Լմեմոնիտ .	153
Սոկրատ .	162
Պլատոն .	197
Լնասիսիւնեան .	212
Լնիսիպոս .	222
Լնիսոս .	238

Քսենոկրատես .	261
Գեոգրիկոս .	269
Կրատես .	301
Պետրոս .	310
Բեռն .	318
Եպիստոլարոս .	325
Օգոստին .	354



154

